

Index

24-3-E-72

I

1. Luodi Andre. - De habitibus intellectus libri sex  
Venez. 1577.
2. Tritonii M. Antonii Mythologia. - Lono. 1560. -

an act, passed, entitled, "An Act  
to amend the several Acts  
relating to the said Bank of North America."

<sup>II</sup>  
ANDREAE DVODI  
FRANCISCI FILII  
PATRITII VENETI  
DE  
HABITIBVS INTELLECTVS  
LIBRI SEX.

Ad Amplissimum ac Religiosissimum  
Virum Ioannem Grimanum

PATRIARCHAM AQVILEIAE.



VENETIIS, M D LXXVII.

Apud Dominicum Nicolinum.

ANDREW 23 5301

FRANCIS FILII

PATRITII VENETI

MASTITIVS INTELLECTVS

LIBRI 2. M.

Ad Augustum in rebus  
Vnde rebus in rebus

PATRITIAM VENETI



FRANCIS M. D. XXXVI

FRANCIS M. D. XXXVI





ILLVSTRISSIMO

AC REVERENDISSIMO

VIRO IOANNI GRIMANO

AQVILEIAE PATRIARCHAE

AMPLISSIMO,

Andreas Duodus Francisci F.

S. P. D.



ERITATEM adeo homi-  
nis propriam humanęq;  
conditioni adeo accom-  
modatam existimarunt  
Academici omnes, vt si-  
ne ea hominem, nec iure  
hominem, nec mentis compotem iudican-  
dum censuerint; ex quo euenire putandum

est, vt quodam nature instinctu, internaque  
animi commotione, tunc nos maxima iniu-  
ria affici, notaq; turpis ignominiaë foedari  
censeamus, dum quòd mentiamur, quòd ab  
sit à vero verbum, quòd longè distemus à ve-  
ro, nobis obijci audimus. Et, quoniam men-  
tiri datum est homini, cum verbo, tum ope-  
ra; propterea quòd opera verbo præfertur, eo  
mentiri opera deterius censeretur debet, quàm  
mentiri verbo. Ex duplici hoc mendacio-  
rum genere, quàm magna, quàmq; pernicio-  
sa detrimenta sequantur, facile cognoscere  
licet, si mente reuoluimus ex his quasi semi-  
nibus in Christiana Republica falsos Prophe-  
tas, mentitos Christicolas, dissimulatosq; Pa-  
stores ortum ducere; in Republica vero ciui-  
li viros illòs prodire, qui extrinsecus senato-  
rum habitu sunt induti; intus vero sunt infam-  
es Tyranni, perniciosiq; ciues. Propterea  
nitendum pro facultate est, vt verbo, & ope-  
ra veri simus, vt externa respondeant inter-  
nis, vt ab omni mendaciorum forma longè  
distemus, quod felicissimè consequemur; si  
animum congruentibus virtutum habiti-  
bus

bus decorabimur ; quorum recta ratione  
 quasi regula exactissima in omni actione, ef-  
 fectio, ac iudicio, verum strenuè servare,  
 mendaciumq; omne procul repellere ; ac  
 profligare valebimus ; Hac regia via, rectaq;  
 ratione, tu vir Amplissime, & Religiosissi-  
 me, te omni veritatis splendore fulgere indi-  
 casti ; ingenitæ nanque animi habitibus ho-  
 nestatus, plurâ præstas opera, quàm pollicea-  
 ris verbo, verior te, quàm nomine tibi com-  
 missi gregis es Pastor, magis intus quàm ex-  
 tra candidus, & innocens . Propterea omni  
 dignitatis, amplitudinisq; gradu te adeo di-  
 gnum patefacis, ut tu potius illis perfectio-  
 ni, quàm illi sint tibi splendori, & ornamen-  
 to . Hos itaq; ego de humanæ mentis habi-  
 tibus libros, tanquam animi mei primos fœ-  
 tus, sub felici disciplina Francisci Piccolomi-  
 nei Philosophi præclarissimi conceptos,  
 cum edere decrevissem, iure eos tibi dicand-  
 dos, consecrandosq; censui, non solum quia  
 teneor tibi, ut Religionis Antistiti, ut conci-  
 ui, affiniq; officiosissimo, ut Patrono colen-  
 dissimo, studiorum meorum rationem red-  
 dere ;

dere; verum etiam quia ipso iure eos tibi  
vindicare videris; cum illustrioribus animi  
habitibus decoratus, & Vrbi, & Orbi adeo  
splendide fulgeas, vt ipsi sua sponte ad te  
tanquam imperfecti ad perfectionem, mor-  
tui ad vitam, mobiles ad constantiam, & de-  
mum tanquam tenebricosi ad lucem prope-  
rent; ac confugiant; ita nanq; se diu viuere  
incolumesq; seruari posse optime sperant.

Vale Patavio .VI. Id. Maij. 1577




## CLAVDII ANCANTHERI.



*Nte diem hac, prima vix sub la-  
 nugine male  
 Hac iuuenum, decus eximium,  
 generosa propago,  
 Pandere mens potuit sacrosq; in-  
 uisere montes?  
 Montes, quos nulli, quidquam,  
 nisi plurima virtus,  
 Cana q; consurgens seris prudentia in annis  
 Spondet, iterq; aperit, & magno munere diuum,  
 Dat superare iuga, & facili dehinc tramite sistit.  
 Ingenium caeleste tibi ut non firmior aetas,  
 Eminent, & radios veluti per nubila Titan  
 Fundit, & in medio certat se proderè carlos.  
 Non secus exeritur solida vi, lapsa polo mens,  
 Impatiens residere situ, serugineq; omni  
 Pura & caelicolas, cognataq; lumina querit.*

Tu,

Tu, quid enim studio recolens, & pectore, tandem  
Cecopriaq; Dea, Phœboq; es digna locutus?  
Scilicet ætherei pennis sublatus amoris,  
Inter odorata & lauro nemora alta, perenni  
Qua veriflore nitet, liquidisq; recentia riuis  
Prata virent, placidas inter sedesq; beatas  
Stellantis sophiæ, assiduus per amœna vireta,  
Et circumuolitans casiamq; crocumq; rubentem,  
Inde satur, flauum potuisti emittere nectar,  
Æternaq; animos dulcedine, certe futuri,  
Pascere, ut extendas clara tua nomina fama,  
Promeritis nulli cessurus honoribus olim.  
Quare erit illa dies, generis spes altera tanti  
Maxima, cum fortunatissimus vnus obibis  
Europæ lata imperia, eloquioq; superbos  
Et reges, populosq; tuo, admirande tenebis  
Et responsa feres, sperataq; gaudia letis  
Patribus, amplexu patriæ excipiendus ouantis.  
Maeste annis genus Heroum, pars vna senatus:  
Spe maiora tibi, felix denunciat ather.



Quo niteat cultu diuinæ mentis imago,  
Hoc scriptis aperis maxime Duode tuis  
At generis sors alta tui est; Mars arma parenti,  
Corq; tibi, & fratri docta Minerva dedit.





## PAVLI AICARDI.



ORIFLVAE ille dies olim qui sidera nocti  
 Eripiet fulgentiā, libros  
 Idem de medio poterit tibi tollere, Duode  
 Conscriptos docte, & sapienter :

Complexus quibus es naturæ arcana fugacis,

Et vita præcepta beata

Plurima persimilem quæis nostra instructa Deorum

Mens suevit traducere vitam.

O te felicem, qui nondum egressus ephebos,

Et malas implumis adhuc, iam

Peruenisti quò vix longo tempore multi

Et sudore senes potuere.

## INCERTI AVCTORIS.

Ἡ θείων ἄνθος, Σοφίην πινυτόφρονα ἀσκοῦν,

Παντοδαπάστ' ἀρετάς, ἀμμιγα τῶν χαρίτων.

Ἐκπάγλοις μύθοις, αὐτῷ κλέωσ' ἀφθιτον ἔσαι,

Ἀγλαόν οὖ, ἔρπει σῆμα πέριξ πολυκάμους.

Ἡ ρά σε θρεψάμενον, ἱερὸν τέκος, ὦπασε Παλλὰς

Τῇ γυνά, ἰδμῆς ἔμπλιον ἀμβροσίης.



INDEX OMNIVM  
CAPITVM,  
QVAE IN HOC OPERE  
CONTINENTVR.

*Capita Primi Libri.*



*Intentio nec non ratio inten-  
tionis. Cap.1. Pag.1.*

*Genera duo habituum ani-  
mi declarantur. Cap.2.  
pag.4*

*Diuisio habituum intelle-  
ctus. cap.3 pag.6*

*Quomodo Habitus intellectus possint dici semper  
recti vel veri. cap.4 pag.7*

*De instrumentarijs Habitibus ad quos  
tioribus rediguntur. cap.5 pag.13*

*Quid sint Habitus intellectus cap.6 pag.17*

*Proponuntur dubia non nulla cap.7*



cap. 7	pag. 15
<u>Quomodo inter se distinguantur habitus intellectus.</u>	cap. 8
	pag. 17
<u>De Habituum distinctione opinio propria.</u>	cap. 9.
	pag. 19
<u>Solutio rationū alterius opinionis.</u>	cap. 10. pag. 13
<u>Quomodo &amp; unde Habitus dicatur unus opinio</u>	
<u>nes varie, &amp; instantie aduersus eas.</u>	cap. 11.
	pag. 5
<u>Opinio Propria.</u>	cap. 12.
	pag. 9
<u>In qua animi parte insint ac seruentur habitus</u>	
<u>intellectus opiniones aliorum.</u>	cap. 13. pag. 31
<u>In quo sint habitus intellectus ex sententia Aristotelis.</u>	cap. 14
	pag. 74

### Capita Secundi Libri.

<u>Comparantur inter se habitus intellectus.</u>	cap. 1.
	pag. 38
<u>Quid sit intelligentia &amp; in quo versetur.</u>	cap. 2.
	pag. 41
<u>Quomodo in nobis insit intelligentie habitus opinio Platonis.</u>	cap. 3
	pag. 43
<u>Reijcitur opinio Platonis.</u>	cap. 4
	pag. 45

Soluuntur rationes aduersæ & explicatur quo-  
modo possimus dicere primorum principio-  
rum cognitionem nobis per naturam conue-  
nire. cap.5 pag.47

Quæ sint principia prima complexa. cap.6. pag.51

Quomodo Dignitates à nobis cognoscantur. cap.7.  
pag.54

An axiomata ingrediantur demonstrationem.  
cap.8 pag.57

Opiniones nonnullæ referuntur, & in dubium  
vertuntur. cap.9 pag.60

Resolutio difficultatis. cap.10. pag.63

Soluuntur rationes aduersæ. cap.11 pag.66

### Capita tertij libri.

De sapientia & primo de nominis significationi-  
bus. cap.1 pag.70

De sapientia diuina. cap.2. pag.73

De sapientia intelligentiarum. cap.3 pag.77

Dubia nonnulla & solutiones. cap.4 pag.79

De humana sapientia vniuersè considerata  
cap.5 pag.83

In quo versetur humana sapientia. cap.6. pag.85  
Dubia

111

Dubia nonnulla ac eorum solutiones. cap. 7.  
pag. 87

Quae causarum genera à metaphysico conside-  
rentur. cap. 8 pag. 92

Dubia nonnulla, & solutiones. cap. 9. pag. 93

Vtrum metaphysica sibi ceteras scientias subal-  
ternet ac de subalternatione opinio prima.

cap. 10 pag. 96

De subalternatione opinio secunda. cap. 11. pag. 98

De subalternatione opinio propria. cap. 12. pag. 101

### Capita quarti libri.

Enumeratio scientiarum. cap. 1. pag. 105

An Mathematica sit pars Philosophiae. cap. 2.  
pag. 108

Quas causas consideret mathematicus. cap. 3  
pag. 109

Quae sit materia mathematicorum opinio Al-  
berti. cap. 4. pag. 112

Euersio huius opinionis. cap. 5 pag. 114

Opinio propria. cap. 6 pag. 117

An mathematica medio sint magis physica, vel  
magis mathematica. cap. 7 pag. 120

De

<i>De naturali scientia in quo versetur.</i>	ca. 8.	p. 124
<i>Diuisio naturalis Philosophiæ.</i>	cap. 9	pag. 127
<i>De communibus attinentibus ad naturalem philosophiam.</i>	cap. 10	pag. 130
<i>Ordo seruatus ab Aristotele in declaratione principiorum causarum &amp; elementorum.</i>	cap. 11.	pag. 134
<i>Ordo seruatus in explicatione communium effectuum.</i>	cap. 12	pag. 137

### *Capita quinti libri.*

<i>Quid sit prudentia.</i>	cap. 1	pag. 141
<i>De diuisione prudentiæ.</i>	cap. 2	pag. 144
<i>Comparatio partium prudentiæ inter se.</i>	cap. 3	pag. 147
<i>An prudentia sit vniuersa virtus ad mores pertinetens.</i>	cap. 4	pag. 151
<i>Quæ pertineant ad prudentiam.</i>	cap. 5.	pag. 154
<i>Ex quibus principijs oriatur prudentia.</i>	cap. 6.	pag. 156
<i>Dubia nonnulla ad prudentiam pertinentia.</i>	cap. 7.	pag. 159
<i>Num prudentia, vel sapientia potius principa-</i>		tum

K

tum obtineat. cap.8 pag.163  
Fructus, & utilitates prudentia. cap.9. pag.166

*Capita sexti libri.*

*De significatione nominis artis eiusdemque definitione. cap.1 pag.169*

*De actione, & effectione. cap.2 pag.172*

*Nonnulla colliguntur ad actionem, & effectionem pertinentia. cap.3 pag.175*

*De nonnullis artium diversionibus. cap.4. p.178*

*Vtrum ars utatur consilio. cap.5 pag.181*

*An ars sit praestantior quam natura. cap.6. pag.103*

*Resolutio difficultatis. cap.7 pag.185*

*Vtrum Ars valeat efficere substantiam. cap.8. pag.188*

*Quot, & quae sint artes ingenuae, & quae viles, & sordidae. cap.9 pag.191*

F I N I S.

Potiora errata sic corrigito.

Pagina 3. linea 3. rectæque, lege rectèq; 9 linea 24. subiiciuntur, lege subij-  
ciantur, 14. linea 15. patuit, lege patebit, 38. linea 2. inducitur, lege in-  
ducitur, 40 linea 6. Aristoteles, lege Aristoteles. 41 linea 29. à Sapiencia;  
lege ab Intelligentia, 43. linea 30. primorumque, lege primarumque 54.  
linea 34. Philosophorum, lege Philosophus, 55. linea 27. dignitatem re-  
fulgent, lege dignitas refulget, 64. linea 12. potuerunt, lege poterunt,  
112. linea 2. inde, lege vnde, 124. linea 13. Demeritus, lege Democri-  
tus, 125. linea 23. nobis.n.otius, lege nobis notius, 126. linea 12. notio-  
nis, lege notioris, 148. linea 32. explicatnr, lege explicatur, 149. linea  
18. Philosopho, lege Philosophos, 152. linea 27. aliquo, lege aliquo,  
155. linea 21. constitutionem, lege constitutionem, 157. linea 33. mo-  
ribus, lege moribus, 180. linea 15. opns, lege opus, 184. linea 5. autem,  
lege Artem, 190. linea 5. magis, lege Magus, 190. linea 11. naturæ, lege  
Natura, 191. linea 19. reddit reddit, lege reddit, 192. linea 15. vt, lege  
vel, 192. linea 20. iuncta, lege cuncta, 194. linea prima. ardere, lege or-  
dine, 194. linea 19. superna, lege superno.



ANDREAE DVODI  
FRANCISCI FILII  
PATRITII VENETI

DE  
HABITIBVS INTELLECTVS  
LIBER PRIMVS.



*Intentio necnon ratio intentionis. Cap. I.*



OMO, vt in hoc mortalium or-  
be maximè omnium liber, ita ma-  
ximè seruus cenſeri meretur; Li-  
ber, quia ſolus munere libertatis  
arbitrii donatus eſt, ſeruus verò  
non vna, ſed multiplici conditio-  
ne, ipſe enim variis ſubiicitur le-  
gum ordinibus, tùm ciuium, tùm  
naturæ, tùm Dei, quibus inferuire, ac obtemperare te-  
netur. Inſuper cum homo in hanc lucem nudus veniat,



omniumque sit impotentissimus, cogitur variis artibus nauare operam, ut incolumis valeat breue hoc suæ vitæ curriculum sibi a natura præfixum transigere; Demum cum animo sit præditus ad opposita facili, & sæpè ad deteriora procliu, tenetur varios habitus accuratè quæ-  
re, & niti eos pro facultate acquirere, vt eorum recta ratione in conuenientem finem ducatur, ac dirigatur. Sic homo maximè omnium eget cura, studio, & disciplina, vt ex nudo maximè indutus, ex impotentissimo potentissimus, ex informi formosissimus euadat. Ac ob id præsertim his eget, quoniam hæc est humanæ naturæ conditio, vt magis ei obsit, vnius vitiosæ actionis inusta sceditas, quàm innumerarum probarum ei proffit splendor, ac ornamentum, quàm sæpè contigisse inueniemus; si memoria repetemus præteritorum historias, homines diuturna Prudentia ornatissimos variarumque virtutum fulgore splendidissimos, vnius tantum sceleris caligine ita fuisse obrutos, vt mox obscurissimi reliquum suæ vitæ tempus contriuerint, & in infamiæ Theatro constituti, uiuam potius mortem traduxerint, quàm uitam absoluerint; Hinc duxit ortum ea cura, & diligentia, quam adhibuerunt semper omnes rectè institutæ Respublicæ pro iuuentute conuenienter instituenda. Hinc quoque ea sollicitudo manauit, quæ Prudentissimorum parentum animos diu, noctuque cruciat, eorumque corda perurit, ut filii, quasi Plantæ ex eorum semine ortæ congruenti cultu in optimam frugem perducantur; Hæc faciunt maiores nostri, ac rectè institutæ Respubli. præsertim sua probitate, suæque pietate commotæ, conspirante ad id instinctu quodam a Deo per naturam eis inserto; At ex aduerso minores natu multiplici lege tenentur suæ rectæ institutionis parentibus, Reipublicæ, & Deo rationem reddere, ut manifestent se a Parentibus non degenerasse, se sibi non defuisse, se non iniuria, ut legitima membra in suam famili-



miliam, suamque Rempub. inferendos, recipiendosque esse; Hoc cum conueniat iuuenibus omnibus, præsertim conuenit illis, qui in vrbe libera, rectaque instituta Republ. orti sunt; qui cum uniuersæ suæ vitæ debeant rationem reddere, maximè habituum animi id facere tenentur, cum illi sint regulæ humanarum actionum, sint lumina humanæ cecitatis, sint formæ mortalis deformitatis, sine quibus nil recti agere, nil boni nisi fortè fortuna nobis conuenire potest, & quorum munere per conuenientia media in optimum finem perducimur; Hæc mecum animo voluens, cum animaduertērem me, ne dum communibus verum propriis quoque quibusdam rationibus summoperè teneri, meorum studiorum Patriæ, & parentibus rationem reddere, ad animi habitus tanquam ad duces, & Dæmones humanæ vitæ conuersus, de eis libros formaui, eosdemque edere decreui, vt per hanc quasi externam, & sensibilem formam, internæ, sensumque fugientis animi mei formæ aliquam imaginem mundo, & parentibus patefacerem.

Homo itaque maximè liber, maximèque seruus censerimeretur.

Homo maximè omnium eget studio, cura, & disciplina.

Homo ad apposita apprimè facilis est.

Maiores sua probitate, & quodam naturæ instinctu naturum, ac minorum curam habent.

Tenentur filii Parentibus, & Reipub. rationem reddere studiorum, & habituum animi sui.

*Genera duo habituum animi declarantur.**Cap. I I.*

**N**ATURA in formando homine de nullo alio magis sollicita fuisse videtur, quàm vt illum ad studia redderet, aptissimum. Propterea vires, & facultates cunctas ei dedit assequendi scientias, suamq; postremam perfectionem, in nobis deindè positum est, vt facultatibus benè, vel perperam vtamur, vt animum nostrum conuenienter, vel peruersè formemus; Hinc homo in suis manibus dicitur derelictus, suæ fortunæ dicitur faber, suæq; fortis auctor: A natura exactè habemus, vt simus, ab arte, vt corpore benè valeamus, à proprio studio, cura, & diligentia, vt animum, & mentem congruenter perficiamus. Habitus animi, vt ad esse minus conducunt, ita ad benè esse apprimè sunt necessarii, Viri autem rectè affecti summopere expetere debent, vt benè sint, cum summopere de suo fine teneantur esse solliciti; Et quoniam benè esse ad animum, non ad corpus præsertim pertinet, idèò animum formare tenentur illi, qui benè esse cupiunt; Animæ pars cui studium, cura, & disciplina conducit, vel ex se debet esse rationis particeps, vel saltem per quandam participationem, & iurè quidem, quoniam disciplina, & studium à sola ratione proficiuntur, solamq; rationem, vt ducem, & regulam cognoscunt; Ex his pendet conuenire disciplinam, & studium cum parti animæ sentienti natæ audire rationem, eiq; obtemperare, tum intellectui, qui ex se rationis est compos; Hinc oriuntur duo Genera habituum, quorum vnum pertinet ad sentiendi facultatem, eiusq; appetitum; aliud verò ad facultatem intelligendi; Primi generis sunt virtutes in more positæ,

Alterius verò sunt virtutes ad mentem pertinentes: Virtutes primi generis sanitati corporis conuenienti proportionē respondent: Vitia verò eis opposita egritudini: Virtutes secundi generis pulchritudini, & decori corporis sunt similes, vt eorum oppositi habitus deformitates, & turpitudines intellectus dici merentur. Ambo hæc habituum genera illustria, & præclara sunt, in quibus vera hominis nobilitas est collocata, facta tamen inter ea comparatione, iurè meritò principes censerī debent illæ virtutes, quæ ad intellectum pertinent, hæc nanq; vt potioris, & dominæ partis sunt habitus, ita vires suas per vniuersas animæ facultates effundunt, cæteris dominantur, cæterarum sunt duces, & demum facultate, & eminentia eas continent. Ideò de habitibus intellectus differendum mihi proposui tanquam de lumine nostræ vitæ, De suprema forma vniuersæ nostræ perfectionis, De optimo, ac potentissimo Dæmone, à quo proximè monemur, & ducimur.

Homo itaq; à natura habet vires, & facultates, à se vt benè vel male eis vtatur.

Homo est suæ sortis Faber.

Habitus animi conducunt, nō vt simus, sed vt benè simus. Disciplina propriè sumpta sine ratione consistere non valet.

Cum duæ sint Animæ partes rationis compotes, duo etiā sunt prima genera habituum.

Habitus Intellectus vniuersæ considerati, & ratione præstantissimorum, præferuntur habitibus sentientis facultatis.

*Diuisio Habituum Intellectus. Cap. III.*

**H**ABITVS, qui humanum Intellectum formosum, ac splendidum reddunt, in duo Genera distribuuntur, vel enim sunt tales, vt de eorum ratione, nec rectitudo, nec veritas sit, qualis est opinio, & latè sumpta fides. Vel ita se habent, vt de eorum ratione sit veritas, & rectitudo, adeò vt sine his consistere nequeant: Insuper habitus semper veri, & recti duplices sunt; vel enim sunt instrumentarii, qualis præsertim est Grammatica, & Logica, qui pro acquirendis potioribus habitibus nobis adimiculantur; Vel sunt habitus principes, qui ad Principem aliquem finem ex se oprandum proximè ducunt, qualis est Scientia, Sapientia, Prudentia, Ars, & Intelligentia; Ego cæteris silentio prætermisiss, de his potioribus verba faciam, cum de his curam præcipuam habere, ac rationem reddere teneamur. Hi habitus iurè quinque censerì merentur, cuius numeri ratio est, quoniam intellectus per habitus suos conuenienter in finem dirigi debet, ideò tot sunt habitus veri, & recti, quot sunt ea, per quæ in finem rectè dirigimur. Finis habituum duplex est, uel cognitio, uel operatio; quæ operatio adhuc est duplex; Actio scilicet, & effectio, adeò ut fines sint Actio, effectio, & cognitio; pro actione consurgit Prudentia, quæ est recta ratio agibilium; pro effectione consurgit Ars, quæ dicitur recta ratio effectibilium, pro exacta ueritate, & cognitione, quoniam ea latissima est, non unus, sed tres habitus parati sunt: & iurè quidem, nam contemplatio, & ueritas tribus modis se habere potest, uel enim uersatur in primis principiis, quorum cognitio quoniam maximè est propria mentis, ideò eius nomine honestatur, & di-

& dicitur *uſs.* ſiue Intelligentia, uel uerſatur in his, quæ proximè pendent ex primis principiis, ac communia ſunt, cumq; primis principiis iuncta, & dicitur ſapientia: Vel demùm uerſatur in rebus propriis contracta aliqua ratione ſcibilibus proximè pendentibus ex principiis pariter propriis, & nuncupatur ſcientia: His plures habitus, nec dantur, nec dari debent, & ſi alii nonnulli numerantur, ad hos, ut ad Principes eos redigi putandum eſt.

Habitus itaque uel ex ſui conditione ſunt ueri, & recti, uel ne.

Habitus ex ſe ueri, & recti, uel ſunt Principes, uel instrumentarii.

Habitus Principes ſunt quinque, qui tamen in tres rediguntur, uel enim dirigunt ad actionem, uel ad effectum, uel ad ueritatem.

*Quomodo Habitus Intellectus poſſint dici ſemper recti, uel ueri. Cap. IIII.*



**V**R mirabitur aliquis qua ratione uerum ſit, quòd dictum eſt, Habitus nempè quinque enumeratos æterna rectitudine, æternaq; ueritate eſſe præditos, cum in omnibus variæ obliquitates, innumeri errores, plurimæ deceptiones conſpiciantur. Conſpicui ſunt errores artificum, maniſeſtiſſimè patet uiros quantumuis prudentes nonnunquam falli; Scientiæ adedò reſertæ ſunt deceptionibus, ut potius ignorantia, quam ſcientiæ nomine à plurimis Philoſophis fore nuncupandas exiſtimatum ſit; Propterea rectè D. Auguſtinus dixit humanam ſcientiam eſſe pulchram quandam opinionem, rectè quoque nos addere ualemus, ſolam Dei, Intelligentiarumq; cognitionem ab errore eſſe immunem; Et præſertim dubitatio

bitatio locum habet de Arte, & Prudentia, quæ uersantur in re mutabili, incerta, omnis necessitatis experte, adeò ut exacta rectitudo, eis semper conuenire minimè apta esse uideatur; Eustratius in Sextum de Moribus, inquit, Scientiæ, Sapientiæ, & intelligentiæ conuenire æternam ueritatem, cum ex parte enunciationum, tum ex parte rerum, uersantur enim in re necessaria, quæ secus se habere non potest; At Prudentia, & Ars, quamuis ex se sint habitus ueri, tamen aliquando falsum subsequitur ob instantiam, & fluxum rerum, in quibus uersantur. Hæc solutio dubia uidetur, quoniam ueritas posita est in consensione enunciationis cum ipsa re, si hæc mutua responsio non adest, ueritas non seruatur, non itaque ratione rei uidetur posse censerī fallax, ratione enunciationum uera; Præterea adhuc non uidetur soluta dubitatio, quoniam Artifices frequenter non ob materiam, sed ex se falluntur, & Scientiæ multis deceptionibus uidentur refertæ; Dicamus itaque hos habitus ex sui ratione æterna ueritate, ac rectitudine esse præditos, quatenus dum ueritatis, uel rectitudinis sunt expertes, non amplius seruant naturam, & conditionem propriam: non enim est scientia, quæ fallax est, sed ignorantia, neque est Prudentia, uel Ars, quæ rectitudine caret, sed imprudentia, & inertia, quæ conditio opinioni, fidei, & existimationi minimè conuenit, datur enim opinio, & existimatio uera, & falsa, per se itaque ueri, & recti sunt illi habitus; Ex quò euenit quòd Vir prudens, & Artifex, ut dicebat Plato, nunquam errent; quoniam non ut Prudentes, neque ut Artifices, sed ut imprudentes, & inertes falluntur, adeò ut solum ex euentu errare dicantur, nos autem ad id, quod est per se respicere debemus; Et dum dicebatur scientias, & artes refertas esse innumeris erroribus; Respondeo per id indicari, uel non rectè esse formatas, uel non exactè abhominare esse apprehensas, ac demum innumeris difficultatibus



bus esse præditas . Ad postremum quando addebatur , quòd materiæ Prudentiæ, & Artis carent necessitate. Respondeo de re quoque fluxibili, & inconstanti dari regulas rectitudine præditas, per quas monemur de his, quæ fieri possunt, eligere quod melius est; ac ut inquit Aristoteles, rectitudine utitur sutor dum ex datis pellibus eos conficit calceos, quibus commodiores ex eis confici nequeunt; quòd si etiam Viro Prudenti, Perito nautæ, & Medico non omnia eueniant ad uotum, id parum refert; satis enim rectitudinem seruasse dicuntur, si ex illis, quæ ad eos pertinebant nihil prætermiserunt; Non enim rectitudo Prudentiæ, & Artis in finis adeptione consideratur, quæ sæpè ex euentu nobis conuenire potest, sed in conuenienti mediorum dispositione pro finis adeptione; Et quamuis asserat Hippocrates in Libro Præfagiorum, oportere medicum esse fortunatum, attamen non ob id rectitudo Artis medicæ in manibus Fortunæ est collocata, sed seruari potest in omni eius mutatione, & inconstantia, sola finis adeptio subiicitur Fortunæ non ratione rectitudinis Artis, sed ratione multorum externorum, quæ in facultate Medici collocata non sunt.

Quæritur itaque quomodo habitus Intellectus dicantur semper recti, & veri, cum variis obliquitatibus, & erroribus subiiciuntur.

Soluitur, propterea dici semper rectos, & veros, quia rectitudo, & veritas est de ratione eorum, sine quibus propriam naturam non seruant, sed in oppositum mutantur. Additur quòd quamuis non semper in Arte, & Prudentia optatus finis eueniat, non ob id dicuntur carere rectitudine.

Rectitudo Artis, & Prudentiæ non subiicitur Fortunæ, sed euentus, siue finis adeptio.

Nullus Artifex, nullusque Vir Prudens errat.

*De Instrumentarijs Habitibus ad quem ex po-  
tioribus redigantur. Cap. V.*



**V**R mirabitur aliquis cur Aristoteles exactissimè numerans, & explicans habitus intellectus, habitum instrumentarium, sub quo Logica, Grammatica, aliæque instrumentariæ disciplinæ continentur, minimè enumeravit, neq; manifestavit, an redigantur ad aliquem enumeratorum habituum, & iure mirabitur cum in Primo Topic. idem Philosophus enumerans genera Problematum minimè prætermiserit ea, quæ pertinent ad disciplinas instrumentarias, sed dixit Problematum quædam conducere ad veritatem, alia ad operationem, nonnulla his adminiculi, per adminiculantia denotans ea, quæ ad instrumentarias disciplinas pertinent, Propterea dixere nonnulli eas disciplinas, & præsertim Logicam redigi ad Scientiam, ac insuper esse partem Philosophiæ, sed hi manifestissimè falluntur; Primo quoniâ a proprio fine unum quodque denominari, & definiri conveniens est, finis proximus Logicæ ex sententia Aristotelis in primo Topico- rum loco nuper relato, non est scire rem illam, in qua versatur, sed adminiculi Scientiis, & Artibus, propterea si ei convenirent cæteræ omnes conditiones Scientiæ, cum hæc potissima desit, Scientia dici non potest. Præterea secundæ intentiones, in quibus versatur logicus, non sunt res, quæ propriè cadant sub Scientiam, illæ enim, quæ vere sunt Scientiæ, & sunt Philosophiæ speculatricis partes in rebus versantur, & in partium mundi contemplatione, non in consideratione notionum, & intentionum, a nobis in gratiam alterius elaboratarum; Accedit quod si aliquo modo de eis est scientia, modus ille non est Logicæ  
con-



considerationis, sed potius Metaphysicæ, dum considerantur sub ratione entis, & in comparatione ad ens per se, & propriè sumptum; vel Physicæ dum considerantur ratione principiorum, & modi, quo conficiuntur, ita enim ad libros de anima pertinent, in Logica solum considerantur, ut instrumenta pro explicandis rebus, quare solum instrumentaria est. Et hoc ex eo manifestè patet, quia Logicus, ut Logicus ignorat quid sit ens rationis, nec ualet illud definire, sed solum in eo uersatur, illud considerando, ut instrumentum ad aliud manifestandum. Hinc manifestè falluntur, qui eam censent Philosophiæ partem, ut Stoici, & nonnulli ex Peripateticis, nam in his, quæ à nobis fiunt, nunquam euenit, ut instrumentū sit eius pars, quod instrumento efficitur. Accedit, quòd Logicæ minimè conuenit finis Philosophiæ, nā in usu Philosophiæ, per se collocata est humana foelicitas, in usu Logicæ foelicitas posita non est: nisi forte ex euentu ratione rerū, cum quibus Logica instrumenta nectuntur, non itaq; est pars Philosophiæ. Propterea, ut difficultati satisfaciamus, & solutionem ex rei natura eliciamus, ita dicendum censeo. Natura, ut ad scientias essemus aptissimi, duo nobis potissima instrumenta largita est, loquendi scilicet, & ratiocinandi facultatē, disciplinæ deinde, quæ in horum cultu, & recta formatione positæ sunt, ex rei natura habent, ut instrumentariæ sint; & huiusmodi est Grammatica, quæ in sola oratione uersatur, & Logica, quæ in ratiocinatione. Hæ propriè non sunt scientiæ, ut patuit, neq; etiam propriè dicuntur artes, quales illæ sunt, quæ in externa materia uersantur, maximam tamen cum Arte habent affinitatem, quatenus earum finis est nos docere aliquid efficere; Nos enim docet Logicus efficere Logica instrumenta, quibus utimur pro acquirendis, siue formandis scientiis, est enim Logica habitus, quòd rectè formamus instrumenta scientiarum, & artium; Hinc non iniuria à uiris sapientibus, Logica, Gram-

matica, Rhetorica, & similes dictæ fuere artes ingenuo homine dignæ. Aristoteles in 6. Ethicorum. dum habitus enumerauit, ad Principes respexit, non ad instrumentarios, & iure quidem, quoniam instrumentarii carent fine, ex se optabili, & proprio, sed ad Principes habitus diriguntur; Insuper quoniam, ut patuit similitudine, & conuenientia quadam ad Artem rediguntur.

Disciplinæ itaque instrumentariæ sunt illæ, quæ vel in oratione, vel in ratiocinatione, vel in vtrisque rectè formandis versantur, cum hæc instrumenti loco à natura nobis tributa sint.

Logica non scientia, nec Ars propriè est, magis tamen cum Arte, quàm cum scientia conuenit.

Hinc minimè censerì debet pars contemplatiuæ Philosophiæ.

Aristoteles enumerans habitus ad potiores respexit, quoniam instrumentarii ad eos diriguntur, & rediguntur.

### *Quid sint Habitus Intellectus. Cap. VI.*



Vnde habitus apprimè lateant, nec vllò sensu valeant usurpari, iure variis difficultatibus quasi nubibus inuoluti, sese nobis offerunt, nec ex actè eorum naturam, & conditionem valemus iudicare: Inter difficultates magni momenti ea principatum obtinet, quæ pertinet ad eorum essentiam; & per quam in dubium vertitur quidnam huiusmodi habitus esse dicantur, & iure de hoc ambigere debemus, quoniam Aristoteles nonnunquam asserit eos esse qualitatem quatenus pro prima qualitatis specie statuit habitum, & dispositionem: Aliquando dicit eos esse relationem, ut de scientia dixit in 7. Physic. & propterea asseruit ad eam non esse motum: Nonnunquam inquit, Genus scientiæ esse ad aliquid species verò esse quali-

qualitates, vt in Prædicamento qualitatis, magna itaque in dictis Aristotelis apparet implicatio, neq; constat quid nam huiusmodi habitus esse dicantur. Inquiunt nonnulli, habitus absolutè esse qualitates, aliqua tamen consideratione includere relationem; includunt autem relationem primo dum acquiruntur, non enim acquiruntur sine relatione obiecti ad facultatem, secundò postquàm acquisiti sunt, quoniam ad hos habitus, & ad nomen eorum, ac præsertim ad nomē Generis sequitur relatio, disciplina enim alicuius disciplina esse dicitur. Hæc opinio mihi non satisfacit, nec per eam soluitur difficultas; primo, quoniam omnem adeptionem qualitatis, antecedit relatio quædam agentis, & patientis, nec propterea sequitur ad eam qualitatem non esse motum; Insuper pari ratione sequeretur, quòd in parte sentiente non esset motus, & quòd omnis eius actio esset relatio, quoniam in actu sentiendi, vtraque illa relatio reperitur; & tamen Aristot. in 7. Phy. concedit alterationem attingere sensum, non intellectû, quia scientia est ad aliquid. Prætereà si habitus absolutè sunt qualitates, quæ in intellectu gigni debeant, quomodo vera erit sententia Aristotelis in contex. 20. 7. Libri, dùm inquit, vt igitur, cum dormiens excitatur, non dicitur factus sciens, quàmuis prius non valuerit vti scientia, sed solo impedimento remoto sciens apparet, ita qui à principio acquirit scientiam per solam remotionem perturbationis redditur sciens, &c. Hæc sententia profectò non esset vera, si scientia absolutè esset qualitas intellectus, quæ modo aliquo referretur ad aliud. Propterea dicendum censeo, scientiam ad duo referri posse, vel ad partem animæ sentientem, & præsertim ad Phantasiam, cui iuncta est memoria, uel ad intellectum; si refertur ad partem sentientem, est qualitas ad quam pertinet modo aliquo motus, qui est generatio in parte, & alteratio, & ideo Aristoteles in tertio Phy. contex. 8. inquit, quòd scientia, siue discipli-

sciplina, est motus, & est actus addiscentis, ut est in potentia, pariter in 8. Physic. contex. 40. inter motus numerat doctrinam, & disciplinam, de qua ait, quòd idem non potest esse mouens, & motum. De scientia in hac consideratione dixit in Antepredicamentis quod est in anima, vt in subiecto; & in 7. Physic. contex. 20. inquit in parte sentiente esse alterationem; Secundò potest referri scientia ad intellectum contradistinctum à reliquis partibus animæ ad quem refertur ab Aristotele in 7. Phy. dùm declarat ad intellectum non pertinere alterationem, & in hac cõsideratione dicendum, quòd quamuis ratione modi denominandi scientia sit qualitas, quia intellectus, & homo per illam denominatur sciens, tamen potius debet iudicari relatio, quàm qualitas, vt in eo loco etiam affirmat Auerroes; & ratio est primo, quia scientiæ habitus, vt patuit non recipitur in intellectu, sed in phantasia, & memoria. Secundò quia ad intelligere non concurrit aliqua transmutatio corporea, vel instrumenti corporei intellectus; sed solū sat est obiecti representatio, & imaginationis conueniens dispositio, ex qua conuenienti oblatione, & dispositione sequitur recta actio intellectus: Iure itaque scientia, ut ad intellectum pertinet dicitur esse quædam relatio, & nil absolutum in eo dicit præter vniuersale, quod in intellectu reperitur in esse cognito, & seruetur per Phantasmata, idè dicitur intellectus nobis per Phantasmata copulari.

Patet itaque habitus intellectus modo aliquo esse qualitates, propriè tamen ut ad intellectum pertinent dici relationes.

*Proponuntur dubia nonnulla, & dissoluntur.*

*Cap. VII.*

**I**N rebus obscuris nulla resolutio est adeo conspicua, quin ex ea difficultates varię emergant, hinc ex tradita explicatione tria potissima dubia oriri videntur; Primum est, quoniam Aristoteles in Prædicamento qualitatıs ait genera habituum, vt putà disciplinam, & scientiam dici ad aliquid, species vero, ut Grammaticam, Geometriam, & similes minimè: Vnde autem hoc eueniat, & quomodo sit verum ex tradita solutione non apparet. Præterea in contex. 18. 7. Physic. nedum scientia, verum etiam virtutes morales dicuntur ad aliquid, & ob id ad eas non esse motum, cum tamen virtutes morales ex sententia Aristotelis non pertineant ad intellectum, sed ad appetitum sensitivum. Postremò si habitus intellectus reuera insunt, ac seruantur in sola animæ parte, quæ sentiendi est principium, nulla erit differentia inter habitus morales, & rationales, omnes enim in eadem animæ parte erunt collocati, cuius oppositum asserit Aristoteles, qui nonnullos habitus tribuit intellectui, alios parti sentienti: Ad has difficultates respondens; ad primam dico, quòd Aristoteles in Prædicamento qualitatıs dubitabat quomodo habitus cum in prædicamento relationis, tùm qualitatıs essent collocati, dat duas solutiones, prima est, quòd genera sunt ad aliquid, species vero non ad aliquid, sed qualitates sunt; Quæ solutio solum est vera ratione communis modi loquendi, & impositionis nominum, communibus enim vt notioribus magis sunt imposita relationum nomina, quàm minus communibus cōtractis ad magis definitam rei naturam: insuper vera est, quatenus conceptus generis

generis habituum & disciplinarũ ex eo sumitur, quòd magis præ se fert relationem, quàm id, ex quo sumitur conceptus speciei. Absolutè tamen hæc solutio non satisfacit, nec omnem remouet difficultatẽ, si enim genera sunt ad aliquid, vt etiam species contentæ sub eis, quatenus sub eis continentur, sint ad aliquid necesse est. Propterea addit secundam solutionem, quæ est, quòd eadem res varia ratione, & qualitas, & relatio dici potest; quo vero pacto scientia, & habitus debeant censeri qualitas, & relatio ex iam dictis constat; sunt enim qualitates in anima sentiente, in intellectu autem solum sunt qualitates, quoad nostrum concipiendi, & loquendi modum, cum ratione sui solum sint relatio quædam. Insuper sunt ad aliquid, quia sunt qualitates relatæ, vel ad obiectum, uel ad habentem, vel ad intellectum, vt eis vtentem, eosque dirigentem: Ad alteram difficultatem dum dicitur, etiam virtutes morales dici relationes, & propterea ad eas non esse motum, vt constat ex contex. 17. Respondeo, virtutes morales dici quidem ad aliquid, at longè secus, quàm dicantur habitus intellectus, nam de habitibus intellectus inquit Arist. nil denuò in intellectu acquiri, vel gigni, sed ex sola relatione intellectus ad obiecta, cum remotione impedimenti, conuenientiq; sensuum dispositione consurgere, & ita vt pertinent ad intellectum solum sunt relationes, quamuis vt pertinent ad phantasiam, & memoriam magis sint qualitates, at de virtutibus moralibus secus se habet; nam illæ cum sint moderationes perturbationum, & pertineant ad appetitum sensuum, & phantasie proculdubio ita consideratæ qualitates quædam sunt, & solum dicuntur ad aliquid, vt etiam sanitas, pulchritudo, & robur in eodem contex. ad aliquid esse dicuntur, quatenus vel consurgunt ex conuenienti aliqua proportionem, vel quatenus sunt commensurationes quædam, vel constituentium inter se, vel earum ad suum subiectum. Ad postremam  
diffi-



difficultatem dico, hanc esse differentiam inter habitus intellectus, & habitus morales, qui conueniunt facultati sentienti, quoniam habitus morales sunt mediocritates, & moderationes perturbationum ad sensitiuum appetitum pertinentium, & versantur in voluptate, & dolore, in quibus minimè versantur habitus intellectus. Hinc habitus morales more, & assuetudine acquiruntur, habitus verò intellectus studio, obseruatione, & disciplina: Insuper habitus intellectus, propterea intellectus esse dicuntur, quia ut in suo obiecto propriè in vniuersalibus versantur, & eorum esse dicuntur, vniuersalia autem ad intellectum pertinent; habitus verò morales magis sunt contracti ad singularia, quamuis per vniuersalia, ut putà per Prudentiam, quæ dirigendo ab vniuersalibus orditur, dirigantur.

Constat itaq; cur habituum genera magis dicantur ad aliquid, cum tamen, & genera, & species varia consideratione, & ad aliquid, & qualitates sint.

Insuper constat cur habitus intellectus magis propriè sint ad aliquid, quàm virtutes morales.

*Quomodo inter se distinguantur Habitus Intellectus.* Cap. VIII.



ABITVS nostri Intellectus, quamuis dicantur esse quinque, tamen in duo capita rediguntur, vel enim in contemplatione, vel in operatione versantur. Operatio duplex est, actio scilicet, & effectio. Propterea ab Aristotele sub initium sexti metaphy. habitus omnis, vel actiuus, vel effectiuus, vel contemplatiuus esse dicitur, qui cum maximè inter se distinguantur, & à multis pendere videatur eorum distinctio, à quo tamen præsertim ea petenda sit non læuis est dubitatio; Aristoteles nonnunquam

videtur asserere distinctionem pendere à principio, siue ab efficiente, nam inquit in primo contex. sexti metaph. omnem scientiam, aut effectiuam, aut actiuam, aut contemplatiuam esse, effectiuæ in efficiente principium est, aut Intellectus, aut Ars, aut potentia quædam, Actiuarum verò principium est præelectio agentis: Pariter in 6. ethicorum Cap. 1. intellectum diuidit in actiuum, & contemplatiuum, indicans, ex diuisione intellectus tanquàm principii pendere diuisionem habituum eius. Nonnunquam asserit distinctionem pendere à fine, vt in 3. de Anima. 49. dum inquit, intellectus autem qui ratiocinatur, & qui propter aliquid est, differt autem à contemplatiuo fine, &c. hoc est cōtemplatio simpliciter respicit verum, & falsum, quod etiam est bonum, & malum, sed actio illud respicit sub ratione boni agibilis, & eligibilis; Nonnunquam asserit distinctionem sumendam esse à forma; nam forma est ratio cognoscendi, & distinguendi. Hinc variæ ortæ sunt opiniones de ratione potiore distinctionis habituum. Greci asserunt, vt Simplicius Philoponus, Alexander, Themistius distinctionem sumendam esse à fine, cuius sententiæ, est etiam D. Thomas; Ex aduerso qui Scoto adhærent, inquirunt, distinctionem esse petendam non à fine, sed ab obiecto, siue à subiecto, in quo versantur, & ab intellectu respiciente illud obiectum sub ratione obiecti; non sub ratione finis: Pro notitia, hi considerant hunc ordinem; primo reperitur obiectum natum cognosci per intellectū, vt puta in arte medica sanitas, vel corpus humanum sanabile, quod est obiectum intellectus medici, in naturali philosophia reperitur corpus naturale, quod est obiectum intellectus Physici, hæc obiecta ex sui absoluta natura habent, ut sint nata habere, unam, uel alteram facultatem, vt puta, quod sint nata expeti; ut bona, siue agibilia, siue effectibilia, siue contemplabilia, adeo ut nonnullis una; aliis alia conueniat facultas; At nunquam facultas conuenit



uenit uni naturæ, & repugnat alteri, nisi ob aliquod abfolutum illi naturæ internum, quare supponitur in ſcientia aliqua conditio intrinſeca, ob quam conuenit ei facultas talis, hæc conditio habitus. Eſt ab aliqua cauſa priore, cauſæ priores eius ſunt intellectus, & obiectum, ab his itaq; petenda eſt prima ratio, diſtinctionis, confirmatur, ſi ſinis redderet ſcientiam actiuam, uel effectiuam, aut id faceret ſinis iam acquiſitus, aut cognitus, aut intentus; non primum, quia ſic eſt effectus ſcientiæ, & poſterior; ſi ſecundum hoc eſt, quod uolo, nam ut cognitus habet rationem obiecti, non autem ſinis; non tertium, quia iam reiectum eſt; Ad Ariſtotelem in 3. de Anima, inquit, illum denotare ſinem, ut cognitum, & ſub ratione obiecti, non ſub ratione ſinis. Nonnulli coacti rationibus utriuſq; partis; ſe medios conſtituunt, & inquit ſcientiam eſſe habitum actiuum, uel effectiuum ex obiecto, hoc eſt ex re, in qua uerſatur: eſſe uero actu talem ex modo, & intentione operandi; & hæc de aliorum opinionibus.

Dubitatio mota eſt, à quo primo petenda ſit ratio diſtinctionis habituum intellectus.

Nonnulli id tribuunt ſini, ut Græci, & D. Thomas, alii, ut Scotus obiecto.

Quidam ſe medios conſtituunt, & uaria conſideratione aiunt eſſe petendam ab utriſque.

### *De Habituum diſtinctione opinio propria.*

#### *Cap. IX.*



T difficultatem reſoluere ualeamus, accipiendum primo eſt ſinem, ſcopum, & obiectum, quamuis habeant modo aliquo ſignificationes diſtinctas frequenter tamen conſundi, ac vnum pro altero uſurpari, dum propriè accipiuntur, Scopus ille eſt, qui ab Ariſtotele nun-

cupatur finis, cuius gratia laboramus, ut in arte medica sanitas, in Philosophia contemplatiua veritas, siue felicitas, ex contemplatione confurgens. Obiectū quamuis cum Scopo confundatur, attamen ut instituto nostro inseruit, illud esse dicitur, quod facultati cognoscenti offertur, eiq; relatiuè opponitur: inde subiectum Artis, uel scientiæ obiectum dicitur, quod nomen transfertur etiam ad alia, sed modo in hac significatione accipitur. Finis est vox latior, & multiplex assignatur eius diuisio, ac insuper ratione diuersorum in eadem arte uario modo assignatur finis, ueluti Artis medicæ Scopus est sanitas, obiectum cognitionis est corpus humanum arte sanabile; finis construētis Artem, est methodum formare, seruandi, uel recuperandi sanitatem, finis addiscentis, est eam methodum addiscere, finis artis, uel artificis operantis, est sanitatem seruare, uel recuperare, siue quod idem est, Scopū artis attingere, nunc tamen finis accipitur, ut cum Scopo coincidit, & ab obiecto distinguitur; Accipio secundo ab eo petendam esse distinctionem, à quo res pendet, uel in quo constitutum est esse rerum; per eadem enim res sunt, & distinguuntur, loquendo non de distinctione externa, & ex euentu, sed de ea, quæ est per se, & propria; Accipiendum tertio rerum quatuor esse causas ad quas respiciendum est, dum rerum distinctiones explicare cupimus, nam ab omnibus modo aliquo potest pendere distinctio. Addo postremo dum loquimur de formarum mutua distinctione, eam ne dum ab aliis causis, verum à forma quoque, siue à conditionibus eius posse accipi; Et Suëssanus in prima quæstione sexti metaphy. tenens sentiens à uero recessit; nam forma leonis, à forma lapidis, etiam per ea, quæ sunt de interna ratione utriusque formæ distingui dicitur: quæ distinctio, diuersitas quædam, ex natura, & conditione rei esse dicitur, ueluti quamuis mathematicus solam consideret formam, tamen quadratum ab hexagono, uel à circulo differre

differre manifestè affirmat. Et hoc præsertim uerum est de distinctione habituum, cum in eis ne dum formæ, uerum etiam materiæ ratio consideretur. His præassumptis dico primo distinctionem habituum esse duplicem, unam per externa, alteram per interna, per externa est ab efficiente, & sine, per interna à materia, & forma; à materia, quoniam uersatur in consideratione alicuius rei, quæ dicitur materia, in qua uersatur, & hæc dicitur interna, quoniam de ea est scientia, quæ scientia per representationem est ipsum scibile, forma autem est ipsamet natura, & conditio habitus, cui conuenit, vel maior, vel minor certitudo: ideò Aristoteles in Proœmio de Anima dicebat, præstantiam scientiæ pendere ex præstantia scibilis, & ex certitudine, hæc enim perinde se habent, ac materia, & forma; quòd à materia quoq; possit peti distinctio patet, quia dicimus Artes in re variabili, scientias in re æterna uersari; putantes per id scèrnere Artes à scientiis. Dico secundo ex materia, in qua habitus uersantur, non pendere potissimam rationem distinctionis, quod ostendo, quia ex eo non pendet præcipua distinctionis ratio, sine quo seruatur distinctio, ac seorsum à uarietate materiæ seruatur distinctio, quare non ex ea præsertim pendet, quòd autem sine ea seruatur distinctio; ostenditur; quoniam hominem, sanitatem, ægritudinem, temperamenta, & similia considerat Physicus, & Medicus: & tamen eorum consideratio distincta est; pariter animi perturbationes, arbitrii libertatem, & alia nonnulla considerant Ciuilis, & Physicus; & tamen quamuis materia, siue res considerata sit eadem, consideratio varia est; Confirmatur, quia ut se habet pars ad partem, ita totum ad totum; at partes speculatricis philosophiæ, ut Physica, & Mathematica nō distinguuntur inter se per materiam, in qua uersantur, sed per modum considerandi; ut declarat Aristoteles in 2. Phy. 18. quare pariter habitus vnus ab altero non per materiam præsertim distinguitur,

tur, sed per aliud; Ex quo sequitur errare eos, qui aiunt distinctionem per se & primo ab obiecto petendam esse; nam obiectum, ut modo accipitur est materia, in qua habitus versatur, quæ quamuis ut obiectum dicatur mouere intellectum, propriè tamen ad habitum se habet, ut materia eius, in qua versatur. Addo terriò internam habituum inter se varietatem, & distinctionem in forma esse positam, & a forma esse petendam, forma habituum, siue quod præsertim ad formam pertinet, est modus considerandi; ideo ex modo considerandi intrinsecus sumenda est eorum distinctio, ut declarauit Aristoteles in 2. Physi. contex. 18. dum Mathematicum seiunxit à Physico, quod etiam explicauit Auerroes in 1. Poster. com. 178. Addo quarto, & postremò modum considerandi respicere finem, & à fine pendere, terminari, & formari, à fine enim diriguntur, & terminantur ordinata in eum, quia vnus quisq; rem considerat, quatenus suo fini inseruit, per Aristotelem 2. Physi. 26. & finis dicitur causa causarum: Ex quo sequitur distinctionem primò ortum ducere, & præsertim ut à prima causa pendere à fine: secundo proximè reperiri in forma, & conditionibus eius, exposcere tamen materiam cōuenientem, congruentiaq; principia efficientia, & hac de causa Aristotel. in 3. de Anima, habitus fine distingui affirmauit. Confirmatur, nam quòd modus cōsiderandi seruet relationem ad finem, patet; Medicus enim gratia exempli hominem considerat, ut arte sanabilem; Ciuilis, ut natum per actionem assequi felicitatem, & sic de cæteris; Insuper artifex absolutè sumptus rem considerat, ut effectibilem; Ciuilis ut agibilem, speculator, ut contemplabilem; qui omnes considerandi modi ad finem referuntur, adeò quòd cum ex modo considerandi proximè petenda sit distinctio, & modus considerandi pendeat, non ab obiecto sub ratione obiecti contradistincti à fine, sed à fine ut propriè obtinet rationem finis, iure à fine potissimā habituum distinctionis

nis ratio petenda est. Confirmatur, quia ab eo præsertim petenda est distinctio, à quo pendet terminus, directio, & forma considerationis; at hæc à fine pendent, quòd ostenditur, nam Aristoteles in 2. Phy. explicans, vnde scientiæ, & Artes recipiant terminum suæ considerationis, inquit in contex. 26. illum recipere à fine, & vnumquodq; suo fine definiri, ac terminari conueniens est: Postremò hæc confirmantur respiciendo ad definitiones habituum; nam Ars dicitur recta ratio effectibilium, Prudentia agibilium, scientia scibilium, adeo quòd postrema differentia in definitione sumpta, quæ potissima est, & magis propria iudicari debet, à fine sumitur, quòd etiam à fine petenda sit rectitudo, directio, & præstantia, ex se constat.

Obiectum itaq; & Scopus frequenter confunduntur, propriè tamen sumpta diuersa significant.

A quo pendet esse rerum, pendet etiam distinctio.

Hinc propriè distinctio ab aliqua ex quatuor causis oritur.

Potissima habituum distinctio non pendet ex materia, siue ex obiecto, neq; ex efficiente.

Distinctio intrinsecus, & proximè pendet ex conditionibus formæ, ac attinentibus ad eam.

Absolutè præcipua distinctionis ratio à fine petenda est.

### *Solutio Rationum alterius opinionis.*

Cap.

X.



ELIQVVM modo est, vt aduersis rationibus satisfaciam; quod arduum minimè erit, cum ex recte explicata veritate pateat facilis solutio difficultatum. Dùm primò dicitur Aristotelem nonnunquam ex principio efficiente sumpsisse distinctionem; Respondeo ex eo quoq;

quoque distinctionem pendere, at non primò, indicat autem Philosophus potiore rationem distinctionis, dum absolutè ait eos sine distingui. Dum additur, quòd Aristotel. in 6. Metaphysic. distinctionem petit ab obiecto; Respondeo, distinctionem pendere ab obiecto ratione modi considerandi illud, qui modus respicit finem, & à fine pendet tanquam à prima causa, vt cumulatè manifestavi. Ad primam rationem dum dicitur, si scientia ex fine haberet, ut esset contemplatiua, vel actiua; aut id haberet ex fine, ut actu intenditur, vel vt natus est intendi: Respondeo, ex fine, ut actu intenditur, habet ut actu sit talis, ex fine ut nato intendi, habet ut habitu talis sit; & dum additur nunquam facultas conuenit uni naturæ, & repugnat alteri, nisi ob aliquod absolutum illi naturæ internum, quod prius est; Respondeo promptitudo, & facultas supponit quidè obiectum, vt fundamentum eius, tamen in eo priori non seruatur distinctio habituum, quoniam illud prius est tale, ut nonnunquam possit ad uarios fines dirigi, & ad distinctos habitus pertinere, quemadmodum manifestavi, ideò potest esse obiectum distinctorum habituum, illa itaque relatio supponit quidè obiectum, & conditionem eius, ut causam, sine qua non, at non ut causam potissimam distinctionis. Ideò inquit Aristoteles in 2. Metaphy. contex. 3. Vocari verò Philosophiam veritatis scientiam recte se habet; nam contemplatiuæ finis est veritas, Practicæ opus; etenim si quo modo se habent, considerant nō tamen secundum se, sed ad aliquid, & nunc speculantur Practici. &c. Ex his patet solutio ad alteram rationem, dum dicebatur, si finis reddit scientiam contemplatiuam, vel practicam, aut id facit, vt acquisitus, vel vt cognitus: vel vt intentus: Respondeo, id facit vt intentus, quia sic dicitur causa, vt finis, & ad instantiam contra hoc iam est responsum. Et dum ad Aristotelem inquirunt eum denotare finem, vt cognitum, non vt intentum, quando asserit,



serit, habitus distingui per finem, proculdubio falluntur; nam Aristoteles propriè vtitur nomine finis, finis autem propriè sumptus propterea dicitur finis, quia est in intentione agentis, finis enim describitur in 2. Phy. quòd sit, id cuius gratia agens agit, & hoc explicauit Aristoteles in contex. 34. tertii de Anima, dùm dixit, & quòd sine actione est verum, & falsum, & in eodem genere est cum bono, & malo, sed differunt ipso simpliciter, & aliquo, &c. Pariter aliis in locis dùm Aristoteles inquit, habitus dirigi, terminari, definiri, nobilitatem accipere à fine, semper finem accipit sub ratione boni intenti, & verè finis, non autem solum pro obiecto.

Solutæ itaq; sunt aduersæ rationes, responsum est ad authoritates, & est ostensum Aristotelem nomine finis propriè sumptum finem denotasse.

*Quomodo, & vnde Habitus dicatur vnus opinionones varie, & instantia aduersus eas.*

*Cap. XI.*



**N**UMERATI sunt quinq; habitus nostri intellectus, at iure aliquis mirabitur, quia ratione Ars habitus vnus dici possit, cum innumeræ propè sint Artès, quare ratione scientia, & reliqui habitus vnitæ præditi sint, cū in singulis innumeræ varietates, innumeræq; ostensiones apprimè sciuntæ inueniantur. Aiunt nonnulli habitum dici vnum per aggregationem. Est enim Ars habitus vnus ex multorum aggregatione consurgens: Confirmatur hæc opinio primo, quia scientia, & habitus omnis insequitur conditionem, & naturam rei, de qua est habitus, at huiusmodi res ex se distinctæ sunt, vt puta entia, de  
 D quibus



quibus est sapientia, sunt varia, & solum per aggregationem possunt dici vnum, quare similiter habitus de illis solum per aggregationem vnus erit; Confirmatur insuper, quia omnis demonstratio est Syllogismus generans scientiam, quare, vt se habet de demonstrationibus, ita de scientia, sed demonstrationes in scientia sunt plures, & solum per aggregationem neſtuntur, quare habitus scientiæ solum erit vnus per aggregationem, & eadem ratio est de cæteris habitibus. Alii inquiunt habitum esse vnum non per aggregationem, sed per formam, adeò vt habitus vnus, dicatur forma vna simplex prædita gradibus, per quos consequenter acquiri possit, non secus ac calor, & color, per varios gradus in recipiente suscipiantur; sic itaq; dum aliquis incipit acquirere per nonnullas demonstrationes gratia exempli naturalem scientiam, dicitur incipere acquirere formam illius habitus, quæ per subsequentes demonstrationes intendatur, ac perficiatur; non autem quòd per subsequentes demonstrationes noui habitus producantur. Confirmatur hæc opinio, quoniam habitus est vnum subalternum genus qualitatis, quod sub se habet species varias, vt patet ex prædicamento qualitatis, genus, & species accipiuntur à forma, non ab aggregatione, quare in habitu vnitatis reperiri debet, siue generis, siue speciei, quæ ex forma oriatur, & consurgat; Præterea si ad aggregationem respuiceremus, sequeretur qd & habitus apprimè distincti possent dici vnus, quia, in vno recipiente valent aggregari, & habitus vnitatis præditi possent dici non vnus, sed multi, quia non in eodem essent aggregati, sed in variis distincti. Nonnulli se medios constituentes inquiunt scientiam ex demonstratione consurgentem posse dupliciter considerari, & per se, & per accidens, si per se consideratur est cognitio, si per accidens est habitus; quo præassumpto aiunt, si scientia consideratur sub ratione habitus per quem inclinamur ad facilem speculationem eiusdem, vel similis rei, sic in-

Platone est vnus numero, & in tota humana specie est vnus specie specialissima; ratio est, quia habitus refertur ad id, cuius est habitus, & sic vnus numero, vnus numero est habitus: vnus specie, vnus est specie; Et confirmatur, quia habitus est species specialissima qualitatis. Si verò scientia consideratur per se, vt est cognitio, sic potest dici vna numero, specie, genere, & aggregatione, vna numero, vt est vnus numero conclusionis per vnam demonstrationem, vna specie, vt est vnus specie, vna genere, ut est vnus genere. absolute uerò vna aggregatione, ut ex omnibus constans, ueluti uniuersa Metaphysica: Hæ opinioniones dubiæ mihi videntur; nam prima, quòd habitus sit vnus aggregatione dubia est, quoniam si est vnus aggregatione, non est vnus per se, si non per se vnus, ergo per accidens erit vnus, per se autem multiplex: Et quia denominatio debet fieri ab eo, quod est per se, sequitur, quòd absolute habitus multiplex erit, non vnus. Secunda opinio, quòd habitus sit vna forma recipiens magis, & minus, dubia etiam est, quoniam habitus ex multis constat, neque per hanc opinionem explicatur quomodo ex eis multis vna simplex forma consurgat, quæ intendatur, & remittatur; Forma enim intenditur per similitudinem additionem, ea, quæ adduntur non videntur similia, sed apprimè dissimilia ex variis principiis, distinctis demonstrationibus consurgentia, idè adhuc remanet sententia dubia, neque constat quomodo sit vna forma. Tertia opinio, quæ fuit Sueffani deterior aliis esse videtur; Primò dum inquit scientiam posse considerari, & sub ratione habitus, & sub ratione cognitionis; sub ratione habitus omnem scientiam esse eiusdem speciei specialissimè, quia habitus est species specialissima qualitatis; hoc apprimè falsum est; nam species qualitatis ab Aristotele numerata, vt potiores interpretes conueniunt, sunt non postremæ, sed mediæ sub se varias species continentes, & præsertim habi-

tus, & dispositio, & propterea ab Aristotele modo species, modo genera nuncupantur. Accedit, quòd cognitio ad habitum pertinens est differentia habitus, ideo ut talis non potest censerì communior habitu, nam habitus in genere qualitatis positus diuiditur, uel enim est habitus corporis, uel animi, si animi uel est habitus appetitus ad sensum pertinentis, uel rationis, siue intellectus; si intellectus, uel est actiuus, uel effectiuus, uel contemplatiuus, & unusquisque horum mox per alias differentias diuiditur; quare ea sententia alienissima est a uero; Prætereà dicere, quòd scientia absolutè sit una aggregatione, verum non est, quoniam in omni habitu unio aliqua formæ reperitur, cum habitus sit unum genus, & genus sumatur à forma, dum adest unio pendens à forma, ea per se, & propria unio censerì debet, à qua, & non ab alia est sumenda denominatio. Prætereà dicere, quòd dum acquiritur scientia, ea per se sit scientia, & cognitio, per accidens uero habitus dubium est, quoniam habitus per se in primo modo prædicatur de scientia, quare dum acquiritur scientia non per accidens acquiritur habitus, sed proximè scientia, remotè, & per consecutionem dicitur acquiri habitus, ut dum gignitur Socrates, dicitur gigni homo, & animal.

Tres itaq; potiores sunt de unitate habituum opiniones; quidam enim asserunt habitum debere censerì unum per aggregationem.

Alii inquirunt habitum esse vnum, quia est una forma simplex, nata per gradus perfici.

Nonnulli se medios constituunt, & habitum uaria consideratione, asserunt esse unum numero, specie, genere, & aggregatione.

Hæ omnes opiniones dubiæ uidentur, nec omni ex parte uidentur esse approbandæ.

*Opinio propria. Cap. XII.*

**C**UM Viri celebres de re aliqua dissentiunt difficile est conspicuam veritatem inuenire, propterea cum de vnitatem habituum variae sint illustrium virorum sententiae, non est nobis facile veram patefacere, & procul ab omni dubitatione eam proferre. Vt tamen dicam quod sentio; Præaccipio rem omnem, quæ propriè vna sit ex forma habere ut sit vna: nam dicebat Aristoteles in 2. de Anima. contex. 7. cum ens, & vnum multipliciter dicantur, & propriè actus est: Addo secundo habitui, & partibus eius propriè vnitatem conuenire; nam propriè ea natura censeri debet vna, quæ vniuoca est, habitum esse vniuocum ex eo constat, quoniam in eo, & genus, & species inueniuntur, est itaque habitus verè vnus, & consequenter à forma intrinsecus, & proximè habet, ut vnus sit; Addo tertio quotiescunq; forma rei talis est, ut operationis initium esse debeat, quoniam id, cuius est opus est gratia operis, ut inquit Aristoteles 2. Cœli. 17. propterea semper vnitatem recipit à sua forma, cum relatione aliqua ad actionem, tanquam ad finem: & præsertim id euenit, dum ea relatio est modo aliquo de ratione formæ, & quoniam habitus sunt gratia operis, ut docet Aristoteles in 1. Ethicorum, & ea relatio est de ratione formæ eorum; Ideò iure colligendum est, habitui conuenire vnitatem per formam cum relatione tamen ad finem, & dependentia ab eo. Perpendendum modo est, quænam sit huiusmodi forma, de qua dico eam posse cum maiori, & cum minori abstractione considerari, & consequenter magis, & minus tenuem indicare posse vnitatem: Genus enim est vnitatis, magis tenuis, quam species: propterea dum habitus vniuocè accipitur, indicat hanc tenuissimam vnitatem; ut cum difficultate ab eo in

eo in quo est remoueatur, descendendo uero ad habitus nostri intellectus, & prætereundo cæteros, cæterorumq; differentias, dico hos habitus conuenire primo, quia ad intellectum pertinent; Insuper, quia cum difficultate remouentur, cum rectitudine, & facilitate per eos speculamur, uel operamur. In singulis deinde consideratur propria forma, quæ posita est in modo considerandi cum relatione, uel modo quodam sese habendi ad suum finem; Ex quo sequitur, quod sapientia, sciëntia, & Intellectus minus inter se distinguuntur, & magis cōueniunt, quàm scientia, & Ars, uel scientia, & Prudentia: cum eorum modi considerandi, & fines magis conueniant; sic itaq; Prudentia est habitus unus, quia unus est considerandi modus in unum finem ordinatus, pariter de cæteris se habet. Ex his sequitur habitum posse dici unum numero, unum specie, unum genere, ut una fuerit forma, siue modus considerandi eius: Confirmantur hæc, quoniam ex eo pendet unitas, ex quo sumitur distinctio, at distinctio, ut patuit pendet à forma, & fine; Præterea ex eo pendet unitas, ex quo sumitur rei definitio, at habitus per formam, & finem ab Aristotele definiuntur: Dicitur enim Prudentia recta ratio agibilium; Ars recta ratio effectibilium, & ita de cæteris: Et si quis instet, quoniam forma in simplici, & in uariabili essentia posita est, & ad materiam refertur, ideo de rebus uariis per distincta principia, & ostensiones una forma consergere non potest: Respondeo res ad scientiam pertinentes non esse adeo distinctas, quin possint in communi aliquo fine, ac in communi modo considerandi conuenire, ut satis constat: Et ex his patent solutiones difficultatum. Sic itaq; habitus non debet dici unus per aggregationem. Habitus debet censerī unus per formam cum relatione ad finem, & dependentia ab eo, in qua significatione secunda opinio cæteris est præferenda.

*In qua animi parte insint, ac seruentur habitus  
intellectus opiniones aliorum.*

*Cap. XIII.*



**P**ERTINENTIA ad Intellectum, ut sunt præclara, & sui natura illustria, ita nobis obscura, & ualdè difficilia sese offerunt; nam supposita ex opinione Aristotelis huius animæ partis æternitate, perplexa oritur dubitatio, ubi nam insint, ac seruentur habitus eius: Alexander, qui ut unam in homine animæ substantiam recte nouit, ita perperam censuit eam ex materia educi, & ex temperamento pendere, facile ab hac difficultate explicari ualuit, nam dixit intellectum in habitu esse depositas conseruatas, & quiescentes considerationes, quæ sint ueluti acies suprema animæ, per quam ea præditi, ualent ad libitum speculari, & nitatur tanquàm fundamento substantia animæ: Fallitur proculdubio Alexander primò cum statuatur essentiam animæ ex temperamento conseruari: præterea cum dicat intellectum in habitu esse conseruatas, & quiescentes considerationes, nam proculdubio aliud est habitus, aliud est intellectus in habitu: sed deceptus est Alexander, quia censuit intellectum potestate denotare solam potentiam, & puram illam præparationem: Insuper dubia est sententia Alexandri cum dicat conseruari considerationes illas ad intellectum pertinentes, non enim illæ seruari possunt ex sententia Aristotelis, nisi ex euentu; cum solum ex euentu detur memoria uniuersalium, quatenus scilicet in Phantasmatibus re lucent, quorum Phantasmatum per se memoria est, ut in libro de memoria, & reminiscencia asseritur: Simplicius rectè



rectè iudicans, animam immortalem, existimauit in eius essentia insertas esse intelligibilia rationes, & formas ideis respondentes: quæ rationes in anima in se manente seruari illesæ, in progrediente verò quasi deletæ laterent; in acquirendo autem habitu censuit præcurrere excitationes à sensibilibus factas, perfici uerò intellectū progredientem à formis illis, quæ sunt in anima, siue animario intellectu manente; adeo quòd habitus ut in fundamento sit in intellectu progressio, & pendeat à formis animæ in se manentis: & propterea habitus ille à Simplicio in tertio de Anima, commento 8. non dicitur substantia, sed circa substantiam, hoc est circa formas, quæ sunt insertæ in substantia manentis animæ: Qui intellectus in habitu ad libitum sine præcurrente imaginatione valeat speculari. Proculdubio simplicius in multis ab Aristotele recedit, primò ratione fundamenti habitus, nam censet habitus seruari in intellectu progressio, quòd dicere non valemus cum Aristotele, qui intellectum nil seruari asseruit, sed soli Phantasie memoriam censuit conuenire. Præterea recedit ab Aristotele, cum tribuat intellectui formas ideis respondentes, quas manifestissimè Aristoteles reiecit: Insuper fallitur cum censeat intellectum in habitu sine præcurrente imaginatione speculari posse frequenter in 3. de Anima, & in libro de memoria, & reminiscencia repetit Aristoteles, intellectum sine Phantasia, nil intelligere, & Phantasmata perinde se habere ad intellectum, ac sensibilia ad sensum; Præterea uidetur Simplicius aduersari suis fundamentis, nam ex vna parte asserit in commento 20. tertii de Anima, memoriam esse Phantasmatum, & ad Phantasiam pertinere: Ex altera uero, inquit seruari habitum in intellectu progressio, per quem valeat ad libitum sine præcurrente Phantasia operari: Insuper ex vna parte inquit habitum esse perfectionem ex formis idealibus, quæ substantiæ sunt prodeuntem, immo esse



esse formam intellectus progressi pendentem à formis animæ manentis, quæ substantiæ sunt, ex altera inquit habitum non esse substantiam, sed circa substantiam; nam si essentia habitus est forma, quæ substantia est, necessario sequitur, ut ipse quoque sit substantia. Propterea est tertia opinio D. Thomæ, & sectatorum, qui ex sententia Aristotelis in singulis hominibus singulas ponunt animas à Deo creatas, ac insuper censent, dari species intelligibiles re distinctas ab intelligibilibus, quæ sint ratio intelligēdi ea, ac habitum intellectus inquirunt esse qualitatem de prima specie qualitatis ex speciebus intelligibilibus impressis, ac seruatis in intellectu consurgentem: Hæc opinio, pia, verissima, & Theologorum determinationibus accommodatissima est: at Aristoteles superno destitutus lumine, secus existimauit: ac ut multa præteream, proculdubio Aristoteles in Libro de memoria, & reminiscencia non censuit vniuersalium esse memoriam, nisi ex euentu, quatenus scilicet in Phantasmatibus lucent, quorum per se memoria est: Præterea intellectus ex opinione Aristotelis in 7. Phy. 20. nihil recipit, ideo scientia dicitur relatio quædam, ac ut inquit Auerroes commento 20. Scientia potius est relatio, quam qualitas.

Sic itaque ex opinione Alexandri substantia humanæ animæ in singulis est vna, & mortalis, in cuius essentia, ut in fundamento seruantur habitus intellectus.

Intellectus in habitu sunt species illæ conseruatæ & coaceruatæ, quæ sunt veluti suprema acies animæ.

Ex opinione Simplicii fundamentum habitus est intellectus progressus, reuersus tamen ad eum in se manentem.

Habitus est perfectio à formis intelligibilibus insertis in essentia animarum in intellectu in se manentis profluens.

Ex opinione D. Thomæ species intelligibiles statuuntur distinctæ ab intelligibili in esse cognito.

Habitus ut in subiecto sunt in intellectu, ac in eo seruantur.

Hæc omnia minimè conuenire cum opinione Aristotelis variis rationibus ostensum est.

*In quo sint habitus Intellectus ex sententia  
Aristotelis Opinio propria .  
Cap. XIII.*



**Q**UONIAM cæterorum opiniones satis dubiæ apparuerunt, & parum congruentes cum principiis, & fundamentis Aristotelis: Propterea dicendum censeo habitus, tanquam in fundamento eos seruante esse collocatos in virtute imaginandi, & memoria; adeo ut tunc homo dicatur habitu præditus, dum longo studio, cura, & diligentia, ita digesserit, firmauerit, ac ordinauerit rerum Phantasmata, ut ex eis promptè, & ad libitum valeat vniuersalia colligere, & rerum naturas speculari, siue alio quouis fungi munere, quod ad habitum pertineat; Intellectus autem in habitu, est intellectus potestate, qui quauis nil, ut subiectum recipiat, & seruet, tamen duplici ratione dicitur singula factus, primo quia nunquam firmatur in memoria habitus non præcedentibus contemplationibus per quas intellectus fit singula, secundo, quia præsentē habitu ad libitum, intellectus potestate fit actū singula; quòd hæc sit opinio Aristotelis patet primo ex octauo context. 3. de Anima; ubi inquit, quòd intellectus in habitu adhuc dicitur esse potestate, non autem diceretur potestate si in se intelligibilia conseruaret, & si addit Aristoteles, non eodem modo esse potestate, ut antequàm intelligeret, id facit, quia antequàm intelligeret non ita erat facilis, & paratus ad intelligendum, ut est iam parato habitu: Præterea si intellectus in se haberet, & seruaret habitum, utiq; posset

posset sine auxilio Phantasie speculari, quod tamen negat Aristoteles, cum sæpe repetat esse necesse, vt qui speculatur conuertatur ad Phantasmata; Insuper Aristoteles manifestissime hoc patefacit in 7. Phy. contex. 20. dum affirmat scientiam esse solam requietem, & quatenus pertinet ad intellectum esse solam relationem, per quam intelligibile ad intellectum refertur, ac demum eius primam acquisitionem ei dispositioni esse similem per quam Geometra ebrius, remota ebrietate dicitur fieri Geometra, quod exemplum eatenus est simile, & accommodatum, quatenus pertinet ad intellectum, in quo nil noui recipitur, sed solum ei offertur obiectum, quod congruenter disposita imaginatione, valet iudicare cum ante id efficere non ualisset: Hoc ipsum etiam confirmatur per Auerroem in calce 20. commenti tertii de Anima, dicentem, & debes scire, quod vsus, & exercitium sunt causæ eius, quod apparet de potentia intellectus agentis, qui est in nobis ad abstrahendum, & intellectus materialis ad recipiendum, sunt dico causæ propter habitum existentem per vsum, & exercitiū in intellectu patibili; & mortali, quem nuncupauit Aristoteles patibilem, denotando uim cogitandi, per hæc uerba manifestissime indicat Auerroes habitum non in intellectu, sed in parte sentiente recipi: At obiiciet aliquis cum scientia, sapientia, & reliqui habitus intellectus sint vniuersalium, quomodo seruari, & recipi possunt in Phantasia, quæ solum est singularium; Præterea si sunt in Phantasia, cur non potius appellantur habitus Phantasie quàm intellectus, & cur non potius per Phantasiam quàm per intellectum definiuntur, cum habitus per subiectum definiiri debeant? Insuper sequeretur si habitus essent in Phantasia, & memoria, quod non eiusdem esset actus secundus, cuius est primus, habitus. n. est actus primus, speculatio secundus, speculatio pertinet ad intellectum, quare si habitus erit in memoria non eiusdem erit actus secundus, cu-

ius est primus; Immò sequeretur, quòd habitus non erit principium operandi, sed potius erit obiectum; Nec Ars, & Prudentia erunt recta ratio agendi, vel efficiendi, cum recta ratio ad intellectum pertineat. Respondeo ad primum cum Aristotele in libro de memoria, & reminiscencia, conseruationem esse non vniuersalium, sed Phantasmatum, & cum sit Phantasmatum etiam deinceps esse uniuersalium, adeò quòd scientia ratione fundamenti, quod conseruatur, & ex quo colligitur speculatio, est singularium, ratione vero sui actus, & formæ est uniuersalium. Ad secundam difficultatem, dico hos nuncupari habitus intellectus, quoniam eorum munere intellectus nobis per operationem copulatur, insuper usus eorum ad intellectum pertinet, & pro eius usu parati sunt; Postremo, quia non sunt perturbationum moderationes, nec more, & assuetudine, sed præsertim doctrina, disciplina, longo studio, ac diligenti mentis cura, formantur, & acquiruntur, & ob id etiam per intellectum definiri possunt; Insuper definiuntur per intellectum ob communem sententiam opinantium in intellectu seruari, exactius autem definirentur si id fieret per utrumque manifestando, quomodo ad Phantasiam, & quomodo ad intellectum pertineant. Ad tertium dum dicitur, non eiusdem erit actus primus, & secundus. Respondeo actus primus est duplex, vnus præcipuus, alter instrumentarius, actus primus præcipuus est intellectus, qui etiam verè est principium secundi actus. Habitus est actus primus instrumentarius pariter & eius, vt instrumenti est actus secundus: Et ad confirmationem, quia sic habitus non erit principium operandi, &c. Respondeo habitum non debere absolute iudicari primum operationis principium, huiusmodi enim principium est intellectus, sed habitus est ratio quædam bene, facile, & promptè operandi, quam facilitatem acquirimus per conuenientem

nientem phantasmatum dispositionem, & frequentem  
usum eorum; rectitudo autem seruatur in intellectu,  
ut in principio, & causa, in phantasmatibus uero, ut in  
fundamento in quo modo aliquo rectitudinis forma re-  
fulget.

Sic itaq; constat habitus illos, qui intellectus esse dicun-  
tur in memoria phantasie iuncta seruari: Ad intelle-  
ctum uero pertinere usum ad libitum eorum, quæ  
seruata sunt.

## FINIS PRIMI LIBRI.





ANDREAE DVODI  
FRANCISCI FILII  
PATRITII VENETI  
DE  
HABITIBVS INTELLECTVS  
LIBER SECVNDVS.



*De Mente, siue Intelligentia.  
Comparantur inter se habitus Intellectus.  
Cap. I.*



**H**ABITVS omnes quibus anima nostra ex se nuda induitur, & ex se informis ornatur, ac perficitur, illustres, ac splendidissimi sunt; attamen vt stellarum, quibus ornatum est Coelum, nonnullæ illustriores sunt aliis, & à nonnullis aliæ splendorem, & virtutem recipiunt; ita inter habitus intellectus nonnulli solis instar



instar sunt illustriores, & reliquis suæ virtutis semina, & initia impartiuntur; Inter habitus duplex potest considerari ordo, vnus dignitatis, alter necessitatis, si ad ordinem dignitatis respicimus, inueniemus intelligentiam, quam *σοφίαν*. Aristoteles appellat, omnibus esse præferendam, sapientiam secundum sibi optare locum, scientiam tertium, quartum Prudentiam, postremum Artē; si verò necessitatis ordinem consideramus, econtra sese habere inueniemus; Habitus enim dignitate postremus necessitate est primus, dignitate vero primus, est necessitate postremus: Rem ita sese habere facile inueniemus, dum Naturam, & conditionem habituum accuratè considerabimus; Nam quoniam intelligentia versatur in cognitione primorum principiorum, quibus alia principia non præsumt, ideo nemini subiicitur, alio priore habitu non eget, sed ipsa veluti sol habituum ex se est conspicua, & aliis habitibus suæ lucis radios impartitur; Hanc veritatem celebri illa regula in 1. Post. declarauit Aristoteles, propter quod vnum quodque tale est, & illud magis: Cum itaque splendor; veritas, & certitudo primo conueniat intelligentiæ, & mune eius conueniat aliis, iure intelligentia aliis est præferenda, & propterea non iniuria prima principia ob præstantiam, dignitatum nomine honestantur, ex his constare arbitror non rectè illos sentire, qui sapientiam habitum eminentissimum affirmarunt; Et quoniam statuto primo cætera mensurantur, ac in ordinem rediguntur per accessum ad illud; cum proxima intelligentiæ sit sapientia, & adeo proxima, ut intra suos limites eam includere uideatur, & sit intelligentia tanquam caput sapientiæ, iure merito sapientia secundum dignitatis gradum sibi vendicabit; ideo Aristoteles in Prohæmio Metaphy. sapientiam mirum in modum commendauit; & eam solam liberam, ac scientiarum reginam nuncupauit; & in 1. Post. eandem dixit dominam omnium; sapientiæ succedere scientiam nemini



nemini dubium esse debet: Scientia enim proximè a sapientia recipit principia, & partem eius considerat, quòd in sapientia consideratur; Insuper scientia cum sapientia conuenit in communi fine, qui est cognitio ueritatis; miro itaque necessitudinis nexu cum ea iungitur; Propterea Aristoteles in 6. Metaphy. asseruit, remota metaphysica, quæ sapientia est, Naturalem philosophiam Principem remanere: Scientiam sequitur Prudentia, & ratio est, quoniam ut inquit Philosophus. in 6. Ethico. Prudentia cum ciuili disciplina re eadem est, sola ratione distinguitur. Disciplina autem Ciuilis a scientia recipit principia sua: & præsertim a naturali philosophia, ideo sequitur post naturalem philosophiam, Plato etiam in Menone, & alibi Prudentiam pendere a scientia manifestauit. Quòd autem præferatur Arti manifestè patet, nam finis ciuilis est honestum, finis Artis utile, honestum dignitate præfertur utili, Insuper ciuilis ob suam præstantiam digna est nomine Philosophiæ, Ars uero minimè: Demum ex usu ciuilis Prudentiæ consurgit hominis fœlicitas, non autem ex usu Artium; Quare constat Artem esse habitum dignitate postremum; Euenit sæpè tamen, ut ea, quæ sunt postrema dignitate, necessitate sint prima, quod in his habitibus manifestè seruatur, Ars habituum omnium apprimè est necessaria, & ratio est, quia Ars præsertim conducit ad esse, non ita ut per eam primo & absolute simus, sed ut utamur a natura receptam seruemus, reliqui habitus magis conducunt ad bene esse, at esse supponitur ab ipso bene esse, & apprimè dicitur necessarium, nam sine eo cætera nequeunt consistere. Propterea Aristoteles in Procemio Metaphy. asseruit primo inuentas fuisse Artes, mox uero datam fuisse operam Philosophiæ; Et si quis dubitet, quia Artes dicuntur filix Philosophiæ, quare ante eam ortæ non sunt: Dicendum est Artes ante philosophiam fuisse rudes, & imperfectas, a philosophia autem absolutione,

& per-

& perfectionem recepisse; adeo. vt Artes perfectæ, & potiores sint filiæ eius. Secundum necessitatis locum sibi vendicat Prudentia, ac ciuilis scientia, & ratio est, quoniâ hæc quoq; respicit salutem, & conseruationem humani generis; Hinc ciuilis scientia magis est hominis propria, conditioniq; eius magis accommodata, quàm contemplatio: Hinc etiam prius inuentæ, formataq; fuerunt ciuiles societates, quàm partes philosophiæ contemplatiuæ, quamuis mox per contemplationem Prudentia postremam suam perfectionem receperit. Ethæc, quæ hactenus dixi de Artium, siue scientiarum inuentione, si cum Aristotele loqui volumus, potius de restauratione, quàm de prima earum inuentione, vel saltém de inuentione in aliqua mundi parte, quàm absolutè intelligi debent; Nam Aristoteles falsò putans mundum esse æternum, etiam scientias, & Artes in hominum genere censuit esse æternas, innouari tamen in partibus, & infinitis restaurari.

Constat itaq; Intelligentiam dignitate primam esse, Artem verò postremam.

E contra verò Artem esse necessitate primam, sapientiam, & Intelligentiam postremam.

Quid sit Intelligentia, & in quo versetur.

Cap. II.

VONIAM in explicandis habitibus dignitatis ordinem seruandum duxi. Propterea à sapientia, exordiens, assero quemadmodum.

no, siue mens est oculus internus animæ, & eminentissima facultas eius ex sui

condicione, & natura ad prima respiciens, & in eis solum requiescens. Ita primorum principiorum cognitio eius maximè propria, eiusq; conditioni proportionè respon-



dens ob conuenientiam cum ea, nomine quoque eius honestatur, & est veluti oculus, apex, & lumen cæterorum habituum, sine quo cæteri habitus tenebricosi, & inchoati sunt, Cum autem huiusmodi habitus omnium eminentissimus in solis primis versetur, prima autem sint duplicia, vel complexa, vel incomplexa; complexa, vt primæ enunciationes, quæ dignitates dicuntur; incomplexa vero, vt prima, & simplicissima rerum initia, in his vtrisque versari intelligentiam putandum est; propterea dicitur uersari in terminis. Prima enim termini sunt, in quos omnis humanæ scientiæ resolutio terminatur, & in eis datur status eleuationis intellectus: Idè Aristoteles in primo Post. prima principia stare dixit, & de hoc intelligentiæ habitu censeo ego debere exponi Aristotelem in eodem primo Poster. dicentem, & non solum scientiam, sed & principium scientiæ esse quoddam dicimus, quo terminos cognoscimus: Loquitur tunc Aristoteles de Intelligentia siue cognitione primorum principiorum aduersus antiquos destruentes scientiam, & ideo inquit, ne dum dari scientiam, quam destruxerunt antiqui, & ne dum principia sciri, verum insuper dari principium scientiæ, & cognitionem illam primorum principiorum esse principium scientiæ; Est enim habitus ille, qui intelligentia dicitur, quo habitu cognoscimus terminos, hoc est primas enunciationes, quæ sunt termini omnium enunciationum; ac etiam prima, & simplicissima principia rerum; At cum intelligentiæ habitus in vtrisque terminis versetur, vt Themistius in 2. Poste. recte existimat, profectò magis conspicuè, & manifestè versatur in primis terminis complexis; intimius vero, & prius in incomplexis.

Vt itaq; suprema animæ facultas, siue Intelligentia nuncupatur, ita quoq; suprema nostra cognitio eodem nomine iure merito honestatur.

Versatur Intelligentia in cognitione primorum, quæ sunt duplicia,

duplicia, vel complexa, vel incomplexa.  
Per hæc explicatur locus in 1. Post. cap. 3.

*Quomodo in nobis insit Intelligentia habitus  
Opinio Platonis. Cap. III.*



CONVENIRE humano intellectui dignitatum, primorumq; terminorū cognitionem, vt est conspicuum, ita ex aduerso latet modus, quo in nobis insit huiusmodi cognitio, & à nobis acquiratur; Censuit Plato terminos in humana anima Natura insitos esse, & solum egere hominem excitatione aliqua a sensibilibus facta, vt in eorum memoriam, & cognitionem redigatur, & quoniam eius opinio satis apparentibus nititur fundamentis, propterea latius versabor in eius explicatione, vt mox ex eius reiectione firmior, & certior veritas elucescat: Platonici gradus rerum, eorumque connexiones explicantes inquirunt, Deo succedere Mentem, Menti Animam, Animæ Naturam, Naturæ materiam; Deum ponunt suprâ Ideas, Menti Ideas tribuunt, Animæ rationes, Naturæ semina, Materæ umbras, & imitationes Idearū: Per rationes Animæ nostræ conuenientes inquirunt in nobis fieri Scientiam, & primorum terminorum cognitionē; Censent enim ipsi terminos esse rationes illas animæ insertas, & Ideas: & ideò Plato in 6. De Repub. connexionem Animæ cum illis Intelligentiam nuncupauit; & eas esse intelligibilia censuit: Sic itaque ex eorum opinione per naturam nobis conuenit terminorum, primorumque notionum cognitio; & sola egemus excitatione aliqua à sensibilibus facta. Nituntur hanc eorum sententiam confirmare primo, quia in primis notionibus omnes secundum naturam dispositi conueniunt; omnes eis per natu-

ram assentiuntur! nec percipimus quando in nobis producantur, adeò ut semper conuenire videantur; Præterea, id ipsum confirmatur à Platone in Phedone ex eo quia nisi in anima nostra insertæ essent rerum rationes nunquam apprehenderemus essentiam rerum, nam sensus sola accidentia nobis offerunt, ideò vt apprehendamus essentiam, necesse est eam in anima nostra esse insertam. Confirmatur ex naturali appetitione Scientiæ: non enim per naturam intrinsecus ad Scientiam commoueremur, nisi intrinsecus; ac in animæ essentia insertæ essent rationes, & termini rerum: Præterea id ipsum patere potest ex naturali quadam nostri intellectus determinatione ad partem veram potius, quàm ad falsam, quòd minimè ei conueniret, nisi in eo inserta esset veri ratio. Præterea eadem sententia confirmatur considerando conditionem humani intellectus; proculdubio intellectus noster immortalis, & diuinitatis particeps est, huiusmodi essentia nil noui in se tanquàm in subiecto recipere posse videtur: propterea si denuò intelligit putandum est id ei conuenire per rationes sibi coæternas, ac in eius essentia insertas: Demum id ostendi potest ratione sumpta ex rerum integritate, & perfectione; in omnibus enim seruari licet, nil à Deo, vel à natura produci, quod sit sua perfectione destitutū, cum autem anima rationalis à Deo pendeat, ac præstantissima sit, sua perfectione per naturam destituta esse non debet, sua perfectio ex intelligibilibus pendet, necesse itaq; est, vt sit suis intelligibilibus insignita, & decorata.

Quare ex Platonis sententia rationibus comprobata, cognitio fit per rationes, & terminos in animæ essentia insertos à sensilibus excitatos.

Et intelligentia, siue axiomatum veritas est nobis per naturam insita, & sola egemus excitatione per externa sensilia.

*Reijcitur opinio Platonis. Cap. IIII.*

**Q**UAMQVAM non defuerunt viri do-  
 cti: qui relata opinionem nedum ve-  
 ram existimarunt, verum etiam ab Ari-  
 stotele approbatam; attamen firmiter  
 asserendum censeo, eam nec veram,  
 nec Aristoteli vlllo pacto consentaneā  
 esse; quod à vero dissentiat ex eo pa-  
 tet, quoniam nos ducimur in cognitionem pertinentium  
 ad animam per externa obiecta, & per eius actiones; exter-  
 na obiecta; & actiones indicant animam omnino esse po-  
 testate, nil includere actu, cum ab externis obiectis mo-  
 ueatur, patiatur modo aliquo, & perficiatur: Præterea hu-  
 iusmodi formæ insertæ per naturam in essentia animæ, vel  
 sunt essentia rerum scibilem, uel nè, si non sunt earum es-  
 sentia, minimè ex earum apprehensione dicemur appre-  
 hendere essentiam rerum: si sunt rerum essentia, vt in-  
 terquunt Platonici; apprime hoc videtur absurdum, non  
 enim rei mortalis essentia est aliquid æternum, cum mor-  
 tale, & æternum seceinantur genere, vt in calce decimi Me-  
 taphy. docuit Philosophus. Præterea in natura nil frustra,  
 nil superuacaneum poni debet, cum autem sine huiusmo-  
 di formis seruentur omnia ad humanam scientiam, siue In-  
 telligentiam pertinentia, vt seruari videntur per funda-  
 menta Aristotelis, iure huiusmodi in animā insertæ ratio-  
 nes, superuacaneæ censerī debent, iureq; sunt reiiciendæ.  
 Non enim ferè vniuersum hominum genus in ignorantie  
 pelago mersum esset: nec tam pauca nobis essent conspi-  
 cua, & explorata; nec tantoperè laboraremus, pro scien-  
 tiarum adeptione, si intelligibilia, si rerum veritas, si re-  
 rum rationes insertæ essent in nostra anima; Longè etiam  
 minus



minus putandum est hanc fuisse sententiam Aristotelis, primò, quia nullam Platonis opinionem tam exactè reiecit, quàm illam de Ideis; at intelligibilia in animæ essentia inserta Ideas supponunt, ab Ideis pendent, eisq; respondent, maximè itaq; aduersantur fundamentis eius. Præterea Aristoteles explicans naturam, & conditionem nostri intellectus, manifestat eum omnino esse potestate, necessario esse denudatum ab intelligibilibus, esse locū speciesum solum potestate non actu, se habere perinde ac tabellam, in qua nihil scriptum sit: Nec satisfacite uasio Plotini, Simplicii, Plutarchi Lydi, & aliorum, qui inquirunt, ea, quæ ab Aristotele tribuuntur intellectui possibili, illi conuenire, quoniam declinauit, & progressus est ab Anima in se manente; nam in Anima in se manente seruantur rationes illæ, & formæ intelligibiles, in intellectu autem progressu, & recedente à se ipso, non seruantur, nisi cum progressionem tectæ, & obumbratæ, adeo ut ei conuenire non videantur. Hæc inquam euasio nulla est, primò, quia nihil eo nudari potest, quod in sua essentia est insertum, nihil à sua essentia dicitur recedere, rationes in anima à Platonicis excogitatæ, sunt eadem cum essentia animæ, quare quouis modo anima se habeat, nunquam poterit dici nudata eis. Præterea quod ex sui natura est natum aliquid recipere, ex sui natura debet eo esse nudatum, intellectus ex sui natura, & conditione est natus omnia fieri, quare ex sui natura debet omnibus esse denudatus. Confirmatur, quia si intelligibilia in anima primò laterent, ut in Geometra ebrio, mox apparerent, anima non absolutè diceretur ea fieri, sed solum ab impedimento liberari, ut Geometram primò ebrium mox factum sobriū non dicimus Geometriam didicisse, At de nostro intellectu absolutè inquit Aristoteles omnia fieri; Præterea Aristoteles in Primo Posteriori. inquit ut detur demonstratio, & scientia, non est necesse ut dentur Ideæ, vel huiusmodi ratio-



rationes supponentes Ideas, sed sat est vt sit unum in multis; & apprimè Aristoteles fuisset diminutus si putasset in anima reperiri huiusmodi intelligibilia, & nunquam ea manifestasset, nunquam ostendisset per ea nobis cognitionem conuenire, sed oppositū potius semper asseruisset; Demum hoc manifestissime patet, ex calce 2. Poster. vbi verba faciens Philosophus de hoc intelligentiæ habitu, ac de eius acquisitione, inquit nequaquam nobis per naturam esse insertam cognitionem primorum principiorum, sed acquiri; nec latere prius in nobis, mox manifestari, sed denuo gigni. Colligamus itaq; Platonis sententiam, nec veram esse, nec principiis Aristotelis consentaneam. Et decipi eos, qui hac de re Aristotelem cum Platone nituntur conciliare.

*Soluuntur rationes aduersæ; Et explicatur quomodo possimus dicere primorum principiorum cognitionem nobis per naturam conuenire.*

*Cap. V.*



VE MADMODVM difficile non est opinionem illam Academicorum reiicere, ita non est difficile eorum fundamentis satisfacere; quod vt clarius pateat, & facilius à nobis fiat, considerandum est Naturam rebus omnibus facultatem, & initia tribuere, per quæ valeant cumulate se perficere, & proprium finem assequi, non autem semper omni perfectione eas donare; nam perfectio, & absolutio rerum, duplex est, una interna, & hæc proximè, & semper à natura profiscitur, nisi impediatur; altera externa, quæ ex principiis oritur, per naturam rebus insertis; Hæc duo perfectionum genera

genera in hominis anima cumulatiſſime inueniuntur; ea enim ita ſui natura conſtituta eſt, vt prædita ſit facultate aſſequendi perfectionem ſuam: Eſt anima intrinſecus, & quatenus ad eius eſſentiam pertinet, omni ex parte abſoluta; externa tamen perfectio qualis eſt intelligentia, & habitus omnis, per facultates proprias ſibi per naturam conuenientes, adhibita cura, & diligentia acquiri debet; & eorum, quæ ab anima noſtra ſunt cognoscenda nonnulla in tot rebus, & tam apertè ei offeruntur, ac anima tam aptè parata eſt, ad ea cognoscenda, vt quàmprimùm ei oblata fuerint, de illis valeat certum iudicium tradere. Hoc primo ſeruare licet in ſenſu, qui ſine præcurrente aliâ cognitione ſenſilia propria ſine errore iudicat: & inter cæteros oculus lucem ſibi familiarem ita cognoscit, vt ea mediante cætera omnia intueatur, & iudicet. Id ipſum euenire menti putandum eſt, dantur enim nonnulla, quæ ad mentis aciem perinde ſe habent, ac lumen ad corporeos oculos; Huiusmodi ſunt primæ enunciationes, & axiomata, quæ adeò manifeſtè, & in tot rebus menti offeruntur, & adeò ſui natura mens ad ea iudicanda eſt parata, vt quàmprimùm in ea ſui aciem conuertit, procul ab omni hæſitatione eis aſſentiatur, & propterea de illis conſentiunt omnes ſecundum naturam diſpoſiti, nec valemus dicere quando ea didicerimus; quia quàmprimùm ſeſe nobis obtulerunt, eorum veritatem iudicauimus, ſeruando tamen modum explicatum ab Ariſtotele in calce 2. Poſter. & dum quæritur an cognitio illorum nobis per naturam conueniat, vtendum eſt diſtinctione, nam aliquid nobis per naturam conuenire duplici modo contingere poteſt; primò, quod verè res illa ſemper conueniat, vt igni calor; vel vt nobis conueniat ad rem illam facultas tali modo, vt abſq; alterius habitus auxilio ad actum illū parari ſimus, vt igni conuenit ferri ſuſum, & homini vidèrè; Primorum principiorum cognitio conuenit nobis per naturam non in

non in prima, sed in secunda significatione, ex qua explicatione patet solutio difficultatum, constat enim cur omnes in axiomatum veritate conueniamus, cur non valeamus iudicare quado in nobis parata sit eorum cognitio; & quomodo dici possit per naturam nobis conuenire. Ad Platonem in Phedone asserentem, nisi in nobis insertæ essent rationes rerum, minimè valeremus apprehendere earum essentiam, id iure inficiari debemus, quoniam ex accidentium, & ex actionum notitia perducimur in cognitionem substantiæ, ut principii eorum, veluti per opera cognoscimus Deum, quamuis Dei, neq; etiam ex Platonis sententia detur Idea: Insuper in Platonem reflectitur argumentum, quia si nobis cognitio conueniret per rationes in anima nostra insertas non valeremus cognoscere essentiam rerum, cum illæ rationes essentia rerum extra animam existentium esse non possint, non enim æternum est essentia rei mortalis. Ad confirmationem sumptam ex naturali appetitione scientiæ. Respondeo primò, omnia per naturam expetere suam perfectionem, & esse procliuia, & facilia ad munerum functiones ex propria facultate prodeuntes. Reflecto deinde argumentum, asserens si in nobis insertæ essent rerum notiones, & formæ, non eas per naturam expeteremus; appetitus enim priuationem exposcit; Ad aliam confirmationem, quia intellectus per naturam potius parti veræ, quàm falsæ adhæret; Respondeo iure hoc fieri, pars enim vera respondet naturæ rerum, & est accommodata rectè dispositioni intellectus, iure itaq; ei per naturam magis assentitur; Insuper retorqueo argumentum, quia si nobis inserta esset rerum veritas, non tam diu in ignorantia merfi essemus, nec tam pauca tanto labore, tantaq; dubitatione cognosceremus & præsertim ex sententiâ Academicorum, qui nil certi de rebus posse dici existimarunt. Ad rationem sumptam ex conditione nostri Intellectus, qui est æternus, & immortalis, & ideo nil noui

valet recipere; Respondeo intellectus ex sententia Aristotelis nil noui recipit, vt subiectum accidētium, sed de nouo multa iudicat, vt obiecta, & hoc ei conuenit obnoxium cum re mortali, & idē non intellectus dicitur intelligere, sed homo per intellectum. Reflectio deinde argumentum in Platonem, si intellectus cum sit aternus insertas haberet in sui essentia formas rerum; quoniam nihil à sua essentia recedere valet semper eas sibi haberet familiares, continenterq; eas intelligeret; cum hoc non faciat, iure colligendum est, eas non esse insertas in essentia illius; Ad rationem postremam sumptam ex rerum perfectione. Respondeo perfectionem internam attinentem ad essentiam rerum à natura tribui, externam verò proficiscentem ex principiis à natura tributis, non semper rebus per naturam conuenire; nec insertam esse in essentia rerum; Reflecto deinde argumentum hunc in modum; quæ sunt inserta in essentia rei semper insequuntur naturam eius, & semper ei conueniunt, intelligibilia, & rerum notiones erga animam non sic se habent, sed variis permutationibus, & innouationibus sunt obnoxie, non itaq; sunt per naturam insertæ in eius essentia.

Colligamus itaq; Axiomatum cognitionem nobis modo aliquo per naturam conuenire, modo alio minime.

Addamus fundamenta, quibus Platonici nituntur, ostendere in anima nostra insertas esse rationes rerum, potius opinionem Platonis euertere, quam confirmare.

*Quæ sint principia prima complexa.*

Cap.

VI.



**Q**UAMVIS demonstrationum, scientiarumq; proxima principia, varia, & multa sint; tamen si ad ea conuertimur, quæ absolute sunt prima, & solis instar ad reliqua sese habent, paucissima esse inueniemus, quod ut appareat, ita progrediendum censeo; Principia complexa vel sunt de ipso est secundo adiacente, & simplicissima penitus sunt, vel includunt maiorem compositionem: si primo modo se habent, ea possunt esse prima dupliciter, vel absolute, & ex natura rei, vel ex parte nostræ cognitionis: Absolute, & ex natura rei prima, adhuc possunt esse duplicia, vel quoad dignitatem, & naturam rerum, sic prima hæc erit, Deus est, vel quoad abstractionem factam per nostrum intellectum, & prima erit ens est: Si vero considerantur huiusmodi principia, ut sunt prima ex parte nostræ cognitionis; sic prima hæc erit calidum est, vel hæc frigidum est, hæc enim ea sunt, quæ primo nobis occurrunt, faciliusq; cognoscuntur quamprimum in lucem venimus, quod indicauit Aristoteles in 3. de Anima. contex. 10. motus est, & multa entia sunt, non ita sunt prima, quia sunt de sensilibus communibus, quorum cognitio supponit cognitionem priorum. Loquendo verò de Enunciationibus primis, quæ non sunt de ipso est secundo adiacente, sed magis sunt complicatae, earum, quæ prima sit non manifestè constat; Proculdubio Enunciatio prima, præsertim post elaboratam abstractionem ex terminis constare debet communissimis denotantibus res absolute primas, & conspicuas; huiusmodi autem est ens, & propterea ut in 4. Metaphy. contex. 7. inquit Aristoteles,

ad metaphysicum pertinent principia prima, ut ad eum quoque pertinet entis consideratio; De eo, quod est duplex formari potest Enunciationum Genus, vnum cum nugatione, vt dicendo ens est ens, quæ Enunciatio apprimè est conspicua, vt enim inquit Boetius nulla est uerior Enunciatio, illa, in quâ idem dicitur de se ipso, est profectò verissima, & eius veritas est maximè conspicua, sed est cum nugatione, & inanis, & propterea negligenda; Alterum Genus est sine nugatione, in quo genere duo occurrunt Enunciationes, quæ de principatu inter se pugnant, vna est affirmatiua, altera negatiua; Affirmatiua est, de quolibet dicitur esse, vel non esse. Negatiua est, de nullo simul dicitur esse, & non esse; Censent nonnulli affirmationem esse priorem, quia affirmatio est simplicior, nec supponit negationem: negatio vero est composita magis, & supponit affirmationem, oportet enim id ipsum negationem negare, quod affirmauerit affirmatio, vt dicitur in Libro de Interpretatione, ideo Aristoteles in eodem libro, inquit: Est autem vna prima Enunciatio affirmatio, deinde negatio, indicans affirmationem priorem esse negatione. Ex aduerso alii inquiunt Enunciationem illam cum negatione esse priorem. quoniam Aristoteles in 4. Metaphysic. contex. 9. referens Enunciationem primam, & firmissimam eam refert, quæ est cum negatione, & inquit omnes demonstrationes in eâ, vt in postremam, & firmissimam cuncta redigere, & eam esse sui natura principium cæterarum omnium dignitatum; Confirmatur hæc opinio, quia dum res latent, facilius est cognoscere quid non sint, quàm quid sint; ideo Deus, & materia per negationem explicantur: Respondens ad hanc difficultatem, dico eas duas Enunciationes, quarum vna est affirmatiua, altera negatiua, dupliciter posse considerari, primò sub ratione enunciationis, in qua consideratione affirmatio prior est, ut patuit, non enim Doctissimo Fracastorio



torio, & aliis nonnullis assentior, qui negationem præferunt affirmationi: Secundo assero, posse considerari sub ratione conspicuæ veritatis, in qua consideratione cum Aristotele priorem censeo Enunciationem illam negatiuam, & ratio est, quoniam falsitas Enunciationis oppositæ, est magis conspicua, huius scilicet: De eodem simul vere dicitur esse, & non esse, nam oppositio inter esse, & non esse, est apprimè nota, & maximè patet ea opposita simul eidem conuenire non posse. Non autem ita se habet, de affirmatiua dignitate, quæ erat, de quolibet dicitur esse, vel non esse, & de mendacio oppositæ eius; Videlicet, non de quolibet dicitur esse, vel non esse; nam quis suspicari posset materiam, & alia nonnulla, nec absolutè esse, nec absolutè non esse. Iure itaque Aristoteles negationem dixit primam, & firmissimam: quod etiam ex eo confirmatur, quoniam dignitas illa, de quolibet dicitur esse, vel non esse, præsertim inseruit demonstrationi ducenti ad absurdum, vt in primo Poster. a Philosopho asseritur: altera uero maximè inseruit demonstrationibus rectis, & earum absolutio esse dicitur. Demonstratio autem recta est prior demonstratione ducente ad absurdum: Neque nos ab hac sententia remouet, eorum ratio, qui inquit non posse negationem esse dignitatem primam, quoniam vt priuatio per habitum, ita negatio per positionem, & affirmationem aliquam cognoscitur, & propterea semper affirmatio prior est. Nam ad hoc dico, quamuis negatio per præcedentis positionis cognitionem elucescat, tamen dum cognoscimus de nullo simul uere dici posse esse, & non esse, huius dignitatis cognitio non pendet ex cognitione affirmationis alterius dignitatis, a qua minimè pendet, sed ex cognitione terminorum, & partium suarum, quæ rem aliquam significant.

Colligamus itaq; principia complexa multiplici consideratione posse dici prima, propterea modo unum, et

do alterum iure merito primum iudicari posse.

Inter principia complexa de ipso est secundo adiacente, hoc est primum ex natura rei, Deus est.

Quo vero ad abstractionem intellectus hoc est primum, ens est.

Si uero respicimus ad ordinem nostræ cognitionis, & originem eius, primum principium erit, calidum est, siue frigidum est.

Loquendo uero de dignitatibus magis complexis, & perpendendo quarum ueritas prior, & certior sit, assero cum Aristotele hanc esse dignitatem primam: De nullo simul dicitur esse, & non esse.

*Quomodo dignitates à nobis cognoscantur. Cap. VII.*



**V**AE, & methodi nostræ cognitionis duæ sunt, ut in primo de moribus ex sententia Platonis, & propria affirmavit Aristoteles una est ab initio ad finem altera è contra à fine, siue à postremis ad initia. Dum progredimur in cognitionem primorum principiorum, non ualemus ad ea tendere uia sumpta à principiis, quoniam primorum principia non sunt, qui enim omnium dicit esse principia destruit principia, ut rectè Theophrastus, & Eudemus affirmarunt, ueluti etiam, qui omnium asserunt esse demonstrationem destruunt demonstrationem; Quare in cognitionem primorum principiorum cogimur progredi per posteriora, adeò ut ad ea solum ascendere, minimè autem descendere ualeamus: Cognoscuntur prima principia instrumento sensuum per inductionem, quatenus ex singularibus colliguntur, ut in calce 2. Poster. docet Philosophorum: quare eorum quoque cognitio est cum

eum discursu, & ex præexistente cognitione. Sed est dubitatio primo, quia dignitates dicuntur ex se notæ, & conspicuæ, quod autem ex se tale est, non redditur tale per aliud. Præterea ea cognitio, quæ est principium cognitionis alterius est certior, eminentior, & præstantior illa, cuius est principium, quoniam ut inquit Aristoteles in primo Poster. loquens de principiis scientiæ; propter quod vnumquodque tale est, id magis est; at nil certius, firmitus, & præstantius cognitione dignitatum: Postremo dubitatur an primorum principiorum sint modo aliquo principia; & si eorum dantur principia, quomodo dici possunt principia prima, & indemonstrabilia: Pro solutione accipiendum est; quod cognoscere per aliud contingit dupliciter, vel tanquam per instrumentum, vel tanquam per causam præcipuam, & propriam cognitionis alterius: hoc secundo modo se habent principia demonstrationis relata ad affectionem, quæ per ea demonstratur; altero verò se habent sensuum cognitiones ad intelligentiâ dignitatum, nam per sensus habemus indiuiduam quandam cognitionem terminorum dignitatis: aded vt instrumento eorum dignitas conuenienter offeratur intellectu, ex qua conuenienti ablatione sequitur vt Intellectus iudicet id esse de ratione eorum, vt puta esse de ratione entis, & non entis, vt eidem simul conuenire non possint, hoc non propriè cognoscitur à sensu, sed ab intellectu instrumento sensuum; nam ex conuenienti oblatione eorum in quibus dignitatem refulget colligit intellectus cognitionem dignitatum potiore, & firmiore cognitione sensuum, propterea dixit Aristoteles in calce 2. Poster. necesse itaq; est nos habere quandam potentiam, non talem tamen habere, vt sit his honorabilior certitudine; &c. noluit itaq; Aristoteles cognitionem sensuum ita esse certitudine honorabiliorem cognitione dignitatum, vt harum cognitio est certior cognitione conclusionis demonstrationis.

tionis. Insuper considerandum, quòd quamuis in primo occurſu nobis notiora ſint ſingularia, & indiuidua, quæ ſenſibus uſurpantur, tamen dum recte oblata ſunt intellectui principia prima, & cognitum eſt quòd veritas eſt de ratione earum, longè exactius, & certius eis aſſentimur, & dicimur ea cognoscere, quàm indiuidua ſolo ſenſu percepta, Propterea dixit Ariſtoteles in 6. Topicorum. Cap. 3. Amplius eiſdem alia, interdum alia magis nota, nam à principio quidem ſenſibilia, inſtructoribus autem factis, è contra &c. Ex his colligo ſolutiones difficultatum; Ad primam dum dicitur principia ex ſe nota eſſe; Reſpondeo illud ex ſe in cognitione principiorum excludit cognitionem per priora, & certiora principia, non autem excludit opem, & auxilium ſenſuum modo iam explicato, adeo q̃ ſunt ex ſe nota cum recte fuerint oblata intellectui recte diſpoſito nato ex ſui natura illis aſſentiri; Ad ſecundum dubium dum dicitur; propter quod vnumquodq; , & illud magis: &c. Reſpondeo regulam eſſe veram de præcipua cauſa, non de instrumento; proferitur. n. ab Ariſtotele ea regula de illis, quæ ſunt ab vno, quorum primum eſt verè cauſa ſubſequentium. Ad poſtremam dubitationem dum quæritur, an primorum principiorum ſint principia; Reſpondeo ea habere quidem principia; nam acies intellectus dicitur eſſe primum principium cognitionis eorum, propterea Themiltius in primum de Anima dixit ſcientiam de anima eſſe certiffimam, quia cæteræ ſcientiæ ab ea conſtantiam, & certitudinem reponunt, quæ ſententia eatenus eſt vera, quatenus ex cognitione humanæ mentis valemus iudicare, quomodo aſſentiamur primis principiis. Insuper dignitates habent cauſam in genere materiæ, & ſunt termini ex quibus conſtant, & in alia conſideratione materia earum eſt facultas, animæ, cui inharrent. Demum habent cauſam ſumptam pro origine cognitionis earum, & eſt cognitio indiuiduorum per ſenſus, ea tamen eſt cauſa

est causa instrumentaria; cum itaq; modo aliquo principiorum, sint principia, ac vt habent principia non sint prima, tamen quo ad id quod sunt vera, conspicua, ex se nota, non per priora demonstrabilia, non nata quoad veritatem eorum in priora principia resolui, iure meritò prima, ac su per demonstrationē collocata esse dicuntur; ea enim quæ modo aliquo dignitatum dicta sunt esse principia, non sunt principia demonstrationis earum, cum non sint cause affectionis, vel quod prædicatum subiecto conueniat; quod si Aristoteles in 1. Poster. Cap. 8. inquit metaphysicum demonstrare communia principia, vt hoc de quolibet est vera affirmatio, vel negatio, asserendum est ea nō propriè demonstrari, sed ostendi ad hominem perperam dispositum, deducendo eum in contradictiones, & conspicua absurda, vt facit Arist. in 4. metaphy.

Colligamus itaq; Axiomata instrumento sensuum per inductionem ex sensibilibus colligi.

Addamus cognitionem sensuum non esse certiozem, nec honorabiliorem cognitione Axiomatum, immò nec eius propriè causam.

Demum constat Axiomatum esse quidē principia, & causas, non ita tamen vt per eas demonstrari possit quòd vera sint.

*An Axiomata ingrediantur demonstrationem. Cap. VIII.*



**L** VRE in dubium reuocant viri docti an Axiomata, siue effata demonstrationē ingrediantur, vel ne; nam ex vna parte eam ingredi necessario videntur, ex altera id fieri minime posse apparet; quòd demonstrationem ingrediantur patet, autoritate Aristotelis, qui in

1. *Poster.* dixit demonstrationem constare ex primis indemonstrabilibus; mox explicans ea, quæ principium demonstrationis dicta fuerunt, dignitatem, & positionem enumerat. Quod etiam confirmauit cum dixit, in demonstratione tria inueniri, dignitates, subiectum, & affectionem; Insuper cum dixit principia inferiorum scientiarum, habere commune aliquod, & scientiam de communibus esse dominam omnium; indicans metaphysicam, quæ in primis versatur, & per absolute prima ostendit: Hinc nuncupatur sapientia, quæ est scientia capite prædita, quatenus in prima principia resoluit, & proxime per ea ostendit; Insuper dixit demonstrationem debere constare ex primis, quia si demonstrationis principia non essent prima, non sciremus, nisi haberemus demonstrationem eorum; Ex quo sequitur prima principia necessario ingredi demonstrationem; quod confirmatur, quoniam in scientiis nos prima quærimus, nitimur resolvere in ea, & nunquam requiescimus, nisi ad ea deuenerimus, id autem vltimum in quod scientiarum fit resolutio proculdubio debet demonstrationem ingredi; vnumquodq; enim in ea solum resoluitur, ex quibus constat. Demum id ipsum patere potest ex eo, quia solum veritas, & cognitio primorum principiorum dicitur Intelligentia, & melior dispositio, quam scientia, posita vero sub eis per scientiam cognoscuntur, & habitus scientiæ per demonstrationem acquiritur; quare omnia sub primis principiis posita per demonstrationem cognoscuntur, & consequenter effata, & prima principia demonstrationem ingrediuntur. Ex aduerso non videntur ingredi demonstrationem, quoniam inquit Aristoteles in Proemio de Anima contex. 11. & confirmauit in 13. libro metaphy. omnis demonstrationis principium esse quid est, siue definitionem; Axiomata non sunt definitiones, vt ex se patet, & ab Aristotele asseritur in 1. *Poster.* diuidente principium demonstrationis in dignitatem, &



tem, & positionem; mox positionem in suppositionem, & definitionem; est itaq; definitio pars membri contradistincti à dignitate. Confirmatur quoniam dignitates mathematicæ minime ingrediuntur mathematicas demonstrationes, inquit enim Aristoteles in 2. Phy. 68. mathematicas scientias resolvere demum sua quæsitæ in quid est, hoc est in definitiones, quod non contingeret si eorum demonstrationem ingrederentur dignitates; postremo enim in dignitates fieret resolutio; si dignitates mathematicæ non ingrediuntur demonstrationes mathematicas, pari ratione, neq; dignitates aliarum scientiarum, eam ingrediuntur. Præterea si dignitates ingrederentur demonstrationem, deberent esse per se, vel in primo, vel in secundo modo dicendi per se, quæ enim sunt per accidens demonstrationem non ingrediuntur, at neutro modo dignitates videntur esse per se, ut per eas digredienti redditur notum, nam si dignitatem illam consideramus, quam primam statuimus, & est, de nullo simul est vera affirmatio, & negatio, proculdubio per se esse non videtur, ut neq; illa, de quolibet vera est affirmatio, vel negatio, cum nec prædicatum subiecti, nec subiectum videatur esse causa prædicati. Confirmatur, quoniam per ea principia res sciuntur, per quæ sunt; omnis enim quæstio, est quæstio causæ, omnis causa talis est, ut ab ea in suo genere res pendeat, vel quo ad esse vel quo ad fieri dignitates non sunt primæ causæ, quibus res sint vel fiant non itaq; debent ingredi demonstrationem; nam scire est per causam, & demonstratio est ex causis: Præterea si dignitates demonstrationem constituerent, utiq; constituerent demonstrationem præstantissimam, in perfectâ demonstratione omnes termini debent esse reciproci, quare si ea dignitas de quolibet est vera affirmatio vel negatio demonstrationem ingreditur, quia eius termini ad omne, quod est extenduntur, demonstrationem ex ea solus formabit metaph. eamq; forma-

bit de omni eo, quod est, quam demonstrationem minime conspiciamus Aristotelem in metaphysica formasse. Confirmatur, quoniam Aristoteles in 1. Poster. inquit hac dignitate, de quolibet dicitur esse, vel non esse, eam uti demonstrationem, quæ ducit ad absurdum, quare videtur asserere eam non ingredi demonstrationem rectam: at demonstratio ducens ad absurdum ut recte Auerroes ait, non exacta est demonstratio, sed redigitur ad demonstrationem quia. Insuper inquit in eodem loco Aristoteles alteram dignitatem, quæ est de nullo simul dici esse, & non esse, non ingredi demonstrationem, nisi velimus ostendere conclusionem sic, quod de subiecto sit vera affirmatio affectionis, non autem negatio, ut si vellemus ostendere animam esse æternam, non autem non æternam; At cum hoc dicat Aristoteles manifeste indicat eam dignitatem non ingredi demonstrationem, ut principium, vel medium eius, sed solum ingredi ex parte affectionis, & maioris termini, qui maior terminus, siue affectio non est principium demonstrationis, sed est id, quod demonstratur. Constat itaque dum ambigimus an dignitates ingrediantur demonstrationem rem esse apprimè dubiam, & extare rationes magni ponderis pro omni parte.

*Opiniones nonnullæ referuntur, & in dubium vertuntur. Cap. IX.*



**X** rerum quæ considerantur difficultate, ortum ducunt opiniones uariæ, propterea de proposita quæstione inquirunt nonnulli dignitates ingredi demonstrationem uirtute; non autem, ut partes, & principium aliquod demonstrationis; quæ sententia dubia est, quoniam si uirtute solum demonstrationem ingrediuntur, eatenus uir-

tute dicentur ingredi, quatenus opē, & auxilio earū propositionibus, demonstrationis firmiter assentimur, at si propositiones per dignitates sunt certæ, & firmæ, etiam per dignitates poterunt demonstrari, alioquin per eas constantiam non reciperent; Præterea Aristoteles in primo Posterior. asserit in demonstratione, non uirtute solum, sed actu tria inueniri, dignitates, subiectum, & affectionem. Insuper rationes supra adductæ ostendunt dignitates ingredi demonstrationem non sola uirtute, sed tanquam eius principia, propterea inquirunt alii, quod nisi demonstrationem ingrediantur duæ illæ dignitates primæ, ingredientur saltem aliæ: Insuper inquirunt ex dignitatibus confici demonstrationes non primæ, sed secundæ mensuræ, & minus perfectas: perfectiores uero confici ex propriè sumptis definitionibus; Addunt postremò Aristotelem definitionis nomine, dum dixit omnis demonstrationis principium esse definitionem, denotasse definitionem latè sumpta, quæ extenditur etiam ad dignitates; nam dignitates inquirunt posse dici definitiones, & terminos, quatenus sunt primæ ex se conspicuæ, in quas fit resolutio, & ad quas terminatur nostra intelligentia; Hæc sententia, ut pertinet ad primum dictum, in quo ponitur resolutio difficultatis non differt ab alia supra relata, & reiecta; nam qui inquirunt dignitates solum uirtute ingredi demonstrationem, de primis dignitatibus loquuntur, non de aliis: Ut uero pertinet ad alia duo dicta, ea profectò apprimè dubia sunt, ac ut censeo minus uera. Dictum illud quod demonstratio ex dignitate sit minus perfecta, dubium est, quoniam Aristoteles in primo Poster. inquit oppositum, ait enim in cap. 7. quare ex his constat, quod non est demonstrare vnumquodque simpliciter, aliter quàm ex propriis vniuscuiusq; principiis, sed horum principia habent cōmune, & post pauca, erunt enim illa omnium principia, & scientia eorum domina

omnium, & nanq; scit magis ex superioribus causis sciēs, ex prioribus enim scit cum non ex causatis sciat causis, quare si magis scit, & maximè, & scientia illa erit, & magis, & maximè: hæc Aristoteles, qui loquens de dignitatibus communibus, quæ pertinent ad Metaphysicam, vt dicitur in quarto Metaph. asserit cognitionem per illas maximè esse scientiam; & confirmatur, quoniam cognoscere per dignitates primas nuncupatur altiori nomine, quàm scientia, dicitur enim sapientia, quæ est scientia capite, & postrema perfectione prædita: Confirmatur id ipsum per regulam Aristotelis in primo Posteriori. propter quod unumquodque, & illud magis, at ex primis principiis, cætera omnia fidem, & certitudinem suscipiunt, idèd se habent lucis instar, quæ ex se conspicitur, & virtute eius conspiciuntur alia. Postremum quoque eorum dictum verum non est, quod scilicet Aristoteles definitionis voce latè vsus sit, & denotauerit omnes terminos, & principia prima, in quæ resoluitur demonstratio, nam Aristoteles in primo de Anima, dum profert eam sententiam de propriè sumpta definitione loquitur, & eam non appellat tunc terminum, sed quid est, inquit enim omnis demonstrationis principium est, quid est, & in 2. Physi. 68. inquit mathematicum vltimò resolvere in quid est, ut in definitionem recti commensurabilis, & similibus, patet itaque Aristotelem denotasse propriè sumptas definitiones.

Breuius autem colligens ea, quæ dixi, Assero primo dubiam esse eorum sententiam, qui inquiunt dignitates solum uirtute ingredi demonstrationem.

Dico secundo demonstrationem ex dignitatibus non esse deteriorem demonstratione ex definitionibus.

Addo tertio Aristotelem denotasse propriæ sumptam definitionem, dum dixit omnis demonstrationis principium esse definitionem.

*Resolutio difficultatis. Cap. X.*

T demum de re satis obscura dicam quod sentio; Accipiendum primo est, dignitatem esse duplicem, vel communem omnium scientiarum, vel propriam alicuius particularis scientiæ: Diuisio est Aristotelis in primo Poster. cap. 8. Dignitas communis omnium dicitur propria metaphysicæ, quæ in omnibus versatur, & omnibus præest, huiusmodi sunt illæ duæ dignitates, de quibus in præcedentibus frequenter facta est mentio, quæ ad omne quod est extenduntur, de quibus præsertim uera est sententia Aristotelis in primo Poster. quod necesse est omnem addiscentem eas possidere, ac sibi familiares habere; Hoc præsumpto dico primo dignitatem omnem vel communem, vel propriam posse actu ingredi demonstrationem. Dico secundo ratio eas demonstrationem actu ingredi, uirtute uero semper: Addo tertio demonstrationem ex dignitate non esse secundæ mensuræ, & minus perfectam aliis: Probo hæc omnia, ut pertinet ad primum, manifestissimè asseritur ab Aristotele in primo Poster. cap. 2. ubi principium demonstrationis sumptum in definitione demonstrationis declarās, enumerat dignitatem, ut potiorē partem eius, cum enim Aristoteles dixisset demonstrationem constare ex primis immediatis, declarans quæ sint ea prima immediata ex quibus constat demonstratio, primo enumerat dignitates, at proculdubio Aristoteles ibi declarabat id principium demonstrationis, quod sumptum erat in eius definitione, id autem principium sumitur in definitione demonstrationis, quod actu eam ingreditur non potentia solum; Insuper id ipsum manifestè affirmat Aristoteles

teles in 3. Metaphysic. contex. 4. inquiring, dico sententias communes ostensivas, ex quibus omnes demonstrant, ut quod de eodem necesse est affirmare, aut negare, & non posse de eodem uerâ esse affirmationem, & negationem. Præterea ut dignitates proprię sese habent ad particulares, & proprias scientias ita communes ad communem: at conspicuum est dignitates Physicas veluti ex nihilo nihil fieri, dignitates mathematicas, ut si ab æqualibus æqualia demas remanentia sunt æqualia, & alias similes frequenter ingredi Physicas, & mathematicas demonstrationes, quare pari ratione dignitates communes in scientia communi actu potuerunt ingredi demonstrationem. Confirmatur, quia nisi actu possent demonstrationem constituerē, eamq; ingredi, cur dicerentur principia demonstrationis? cur diceretur omnem demonstrationem in primam dignitatem resolui, ut asseritur ab Aristotele in 4. metaph. contex. 9? Insuper cur nuncuparentur termini nostrę contemplationis, ut termini ab Aristotele appellantur in 1. Poster. & in 6. Ethico? Præterea si non actu ingredi possent demonstrationem; unde id eneniret, vel ex defectu earū, vel aliorum, non earum, quia sunt principia primā ex se nota, nata alia manifestare: non aliorum, quoniam alia his subiiciuntur, & nata sunt illustrari per huiusmodi dignitates. Colligamus itaq; omnem dignitatem posse actu ingredi demonstrationem, sic dicere possemus in prima Philosophia, de omni, quod est, vere dicitur esse, vel non esse, causa, & causatum, siue dependens, & independens, est id, quod est, de his itaq; vere dicitur esse, & non esse; Et quāuis dum subiectum est ab vno affectiones ut plurimum demonstrantur de primo ut inquit Auerroes, nil tamen prohibet, quin etiam nonnunquam de vniuerso ostendantur. Dicebatur secundo dignitates raro actu ingredi demonstrationem, sed solum ingredi virtute, & ratio est, quoniā demonstrans in eo laborare debet quod latet, & nisi for-

metur



metur demonstratio non constat; at de eo, quod pendet ex huiusmodi dignitatibus non ita se habet; statim enim quodd ostendimus aliquid esse, manifeste patet id non posse non esse, quia ex se conspicuum est, de nullo simul dici posse esse, & non esse, pariter è contra, statim prolata ea dignitate de sibi æquali subiecto cōspicua est veritas pendens ex ea; hac itaque de causa demonstrationem non ingreditur, non quia ingredi non possit, & ex se non sit principium demonstrationis, sed quia inutiliter id fieret, propterea sat est, vt addiscens possideat huiusmodi dignitates, & si quando occurrat, quodd aliquis vel ob naturæ suæ peruersionem, vel ob defectionem experientiæ, vel ob prauam assuetudinem, vel ob Logicæ ignorantiam aliquid dicat, quodd huiusmodi dignitatibus aduersetur, debemus eas, vt ex se notas ei obiicere pro repellenda ignorantia eius. Tertio, & postremo dicebatur demonstrationem ex dignitatibus non esse postponendam demonstrationi ex definitione, immo præferendam ei esse: hoc in præcedentibus manifestauimus, quodd etiam confirmo per Aristotelem in 4. Metaph. contex. 8. asserentem. Congruit autem maximè cognoscentem in unoquoque genere posse dicere firmissima rei principia, quare & de eo quodd est, quatenus est, principia omnium sunt firmissima, nuncupat Aristoteles dignitates principia firmissima, per quæ maximè cognoscimus; Insuper in 3. Metaph. contex. 4. inquit dignitates maximè omnium principia esse, ac ex eis demonstrationem fieri, si autem maximè sunt principia maximè cognoscuntur, & eorum virtutè cognoscuntur alia, proculdubio non constituunt demonstrationem secundæ mensuræ, sed primæ, quia propter quodd vnumquoddq; & illud magis: Declaratæ itaque sunt tres Conclusiones.

Prima est dignitates actus demonstrationem ingredi possunt.

Altera est, raro ex dignitate pro parte demonstrationis  
I sumpta

sumpta constituitur demonstratio. *Postrema est, ea demonstratio, quæ ex dignitate constituitur non debet censeri deterior demonstratione ex definitione constituta contradistincta a dignitate.*

*Soluantur rationes aduersæ. Cap. XI.*



**D**UBITATIONES pro parte aduersa in præcedentibus adductæ magni sunt ponderis, propterea ut facilius eas dissoluere ualeamus, præaccipiendū est dignitates in duplici esse differentia, nonnullæ inueniuntur quæ reuera dignitates sunt, & hæc quamuis non sint definitiones, tamen includunt modo aliquo uim definitionis, quatenus de ratione vnius est, vt conueniat alteri, ueluti de ratione rotius est, vt sit maius parte, cū constet ex multis partibus, & contineat partem illam, & aliquid ultra, pariter dum dicimus, de quolibet est vera affirmatio, & negatio, & de nullo simul est uera utraque, hæc dignitates uim, & euidenciam habent, a definitione, nam de ratione oppositionis per affirmationem, & negationem est, vt eius nullum sit medium secundum se, vt inquit Aristoteles in 1. Poster. cum autem sit oppositio ex se carens medio, de nullo simul ambo sunt uera, & de quolibet alterū eorum verum est, includunt itaque huiusmodi præcipuæ dignitates vim definitionis, proferuntur tamen non per modum definitionis, quia sic magis conspicuæ, & apertæ sunt, hinc euenit, quod Aristo. in 4. Metap. contex. 28. Loquens de huiusmodi dignitatibus, dicebat aduersus negantes huiusmodi dignitates per definitiones esse disputandum, accipiendo quid significet esse verum, & falsum, &c. per hæc indicauit Aristoteles huiusmodi dignitates vim definitionum includere, & propterea non iniuria,

D.Tho-

D. Thomas in 1. Poster. ad has dignitates respiciens dixit eas esse per se, in primo modo: Insuper inueniuntur nonnullæ dignitates, quæ potius regulæ sunt, siue enunciationes sensu conspicuæ ex sensilibus collectæ, ab omnibus concessæ, quàm propriè dignitates, & principia prima demonstrationum, veluti dum dicimus, si ab æqualibus æqualia demas remanentia sunt æqualia, quæ sunt æqualia uni tertio, sunt æqualia inter se, & aliæ similes, hæ sunt conspicuæ enunciationes, at non propriè causæ, & propterea non propriè principia: Propterea Platò in 6. necnon in 7. de Republ. negauit mathematicum considerare propriè sumptâ principia: & Aristoteles etiam in 2. de moribus ad Eudemum cap. 7. inquit ea mathematicorum solum esse principia similitudine quadam non reuera. De his vera est sententia Auerrois in Epithomate Logico, in cap. de demonstratione; dum inquit rationem ex dignitatibus non propriè esse demonstrationem, sed potius rationem dialecticam, in eadem significatione eiusdem Auerrois sententia uera est, dum inquit plurima ex dictis in metaphysica esse dialectica: Et ex his colligo modo solutiones difficultatum: Ad primam dum dicitur, omnis demonstrationis principium est quid est. Respondeo primo id debere præsertim intelligi de demonstrationibus propriis, per quas propriæ affectiones demonstrantur, non de communibus. Addo secundo id etiam de communibus esse uerum, dum veræ sunt demonstrationes, & ex propriè sumptis dignitatibus constituuntur, quia illæ includunt uim definitionis, ut patuit; Ad alteram instantiam, dum dicebatur, quod dignitates mathematicæ non ingrediuntur demonstrationem: Respondeo dignitates raro demonstrationem ingrediuntur, sed ut inquit Aristoteles in quarto Metaphysic. contex. 8. nos ad scientias accedere debemus parati dignitatibus. Addo secundo quando Aristoteles inquit mathematicum resolvere suas demonstra-

tiones in definitiones, id esse uerū duplici consideratione, primo loquendo de ostensionibus propriis, per quas propria ostenduntur affectiones, non de communibus: Secundum asserendo, quod illæ, quæ propriè sunt dignitates, & principia demonstrationis etiam includunt vim definitionis. Ex his patet solutio tertiæ difficultatis, constat enim dignitatem propriè sumptam redigi ad primum modum dicendi per se. Et dum additur, quod in dignitatibus non exprimitur causa, per quam res est, & propterea non sunt propriè principia demonstrationis. Respondeo causam exprimi, & tradi, quatenus includunt vim definitionis; At contra hoc instatur, quia si dico de quolibet est uera affirmatio, vel negatio, proculdubio non prædicatum est causa subiecti, non enim affirmatio, & negatio, uel ueritas earum sunt causa rei, sed è contra, ut dicitur in libro de Interpretatione. Ad hoc respondeo, ueritatem eius dignitatis in eo esse positam, ut vel affirmatio, vel negatio sint uera de quolibet, & hoc est de ratione eius oppositionis, ut patuit: Dum Ulterius dicebatur Aristotelem in metaphy. ex illis dignitatibus non constituere demonstrationes: Ad hoc patet solutio per declarationem secundæ conclusionis in præcedente capite; Ad postremam rationem sumptam ex auctoritate Arist. qui in 1. Post. inquit eā dignitatē, de quolibet est uera affirmatio, uel negatio; solū ingredi demonstrationem ducentem ad absurdum alteram uerò solum ingredi ex parte maioris extremitatis, dum volumus aliquid ita ostendere: Respondeo Aristotelem tūc loqui de ostensionibus formatis in scientiis particularibus non in communi, possunt enim communes dignitates cum contractione ad proprium subiectum, inseruire scientiis propriis, ut idem Philosophus docuit: Præterea indicauit per id Aristoteles huiusmodi dignitates raro actu ingredi, sed satis esse, ut in nobis insint, dum accedimus ad scientias addiscēdas, dum enim eas possidemus,


conspicua sunt etiam, quæ ex eis proximè colliguntur.

Quare ex his constat primo non omnes, quæ dignitates appellantur reuera dignitates, & principia esse.

Constat secundo propriè sumptas dignitates vim definitionis modo aliquo includere, quatenus vnum eorum, ex quibus constant est de ratione alterius.

Patet demum aduersarum rationum solutio.

## FINIS SECVNDI LIBRI.





ANDREAE DVODI  
FRANCISCI FILII  
PATRITII VENETI

DE  
HABITIBVS INTELLECTVS  
LIBER TERTIVS.



*De Sapientia, & primo de Nominis signi-  
ficationibus. Cap. I.*



B Intelligentia tanquam à Sole  
ex se splendidissime fulgente, sa-  
pientia proximè ab ea illustrata  
foelicissime pendet, & propter-  
ea iure considerationi intelligen-  
tiæ consideratio sapientiæ succe-  
dit; Sapientia solo nomine suam  
præstantiam, & eminentiam pate-  
facit; Sapientia enim grece *σοφία*  
*φία* à verbo. *σεβόμαι*. quòd est veneror & honoro deducitur,



vt indicetur sapientem honore dignum esse. Propterea Plato in Phedro asseruit sapientis nomen magnum esse, & non homini, sed soli Deo conuenire, cum solus Deus absolute sit dignus veneratione. Verum quia hoc nomen late sumptum ad varia extenditur, & in aliqua significatione etiam conuenit homini, ideò ab eius acceptionibus ordiendum est. Sapientia duplex est, vna diuina, altera humana: de prima dixit Plato eam soli Deo conuenire, quam sententiam desumpsit à Pythagora, qui renuuit sapientem nuncupari, non enim se sapientem esse affirmabat, sed Philosophum, hoc est amicum sapientiæ, eiusque sectatorem, ita nomina sensim permutata, & emendata sunt; Nam primi homines, qui veritatem indagarunt, Theologi fuere nuncupati, mox mutata voce fuere dicti sapientes, demum Philosophi. Simonides quoque idem cum Pythagora sensit, propterea Aristoteles in 1. metaph. cap. 2. inquit, quapropter ex sententia Simonidis Deus solus sapientiæ dignitate est honestatus. Verum quia homo in terris est umbra, & imago quædam Dei, ideò ei quoque adumbratè saltem sapientia tribuitur, adeò vt sapientia sit duplex diuina, & humana. Insuper sapientia humana adhuc est duplex, vel est sapientia vniuersa, vel sapientia in parte sumpta: Sapientia vniuersa est ea, per quam cuncta vniuersè scimus, ad suprema eleuamur, cum primis principiis iungimur, & propterea scientiarum vltimum colophonium, scientiarum domina, sola libera, sola sui ipsius non alterius gratia inuenta esse dicitur; insuper ea sola est, per quam in terris ex sententia Philosophi postrema foelicitate donamur; Hæc est illa sapientia, quæ ab aliis habitibus intellectus contradistinguitur, quæ ab Aristotele metaphisica prima Philosophia, & absolute Philosophia nuncupata est; à Platone verò sæpè ob liberum, perspicacem, & sublimem indagandi modum nomine Dialecticæ designatur, in qua significatione Dialectica scientiarum apex ab eo

nuncupata est; Ex aduerso sapientia iu parte sumpta, etiā duplex est, vel enim respicit operationem, vel cognitionem veritatis; si ad operationem refertur, referri potest, vel ad actionem, vel ad effectiōnem: Dum ad actionem refertur, qui Prudentia fulgent sapientes nuncupantur, & sapere nil aliud est, nisi prudentem esse, in qua significatione Principes prudentes, necnon Senatores optimi nuncupantur sapientes. Hanc Plato in 10. Epistola, sapientiam morum appellat, & in Appendice legum inquirens, qui nam sit iudicandus sapiens, colligit dubitandum non esse, quin bonus vir sapiens sit dicendus: sapientem enim illum iudicat, qui ad diuinorum imitationem de humanis recte sentit, conuenienterq; ea moderatur. Et quoniam Prudentia latè sumpta ad calliditatem, & astutiam extenditur, idè ad eam quoq; extenditur Sapientiæ nomen, & Vlisses, quia callidus describitur, & astutus, etiam dicitur sapiens, in qua significatione D. Hieronymus in Veteri testamento dixit, erat ibi serpens sapientior omni bestia: si verò sapientia refertur ad effectiōnem, de eminentia Artium dicitur, & qui in Arte aliqua cæteris præstant, sapientes in ea Arte dicuntur, sic Dedalus, Policletus, Phidias, & similes, sæpè sapientes artifices nuncupantur. Demum sapientia in parte sumpta relata ad veritatem, & contemplationem, est fulgor, excessus, & eminentia quædam in aliqua scientia particulari: sic Ptolomeus dicitur sapiens Mathematicus, Thales Milesius sapiens Physicus; Verùm cùm tam latè extendatur sapientiæ nomen, ille præsertim inter homines debet censeri sapiens, in quo contemplatio ita cum actione iuncta est, vt diuinorum exemplo recte moderetur humana, & hic est habitus regius per quem intus formantur, & extrinsecus fulgent legitimi Principes. Colligamus itaq; dari sapientiam diuinam, & humanam.

Insuper sapientiam humanam, vel esse sapientiam vniuersam, vel in parte.

Præterea sapientiam in parte, vel referri ad operationem, vel ad veritatem;

Si ad operationem vel ad actionem, per quam viri Prudentes dicuntur sapientes, vel ad effectiorem, per quam Artifices nuncupantur sapientes.

Si vero refertur ad veritatem excessus in particulari aliqua scientia sapientia est.

Ille tamen absolutè est sapiens, qui ad Dei imitationem in actione, & contemplatione resulget.

### *De Sapientia Diuina. Cap. II.*



**X** variis sapientiæ acceptionibus, duæ solæ sunt, quæ ad præsentem considerationem pertinent; Sapientia scilicet diuina, & sapientia humana vniuerse sumpta, a scientia contradistincta; Quamuis enim institutum meum sit de sola humana sapientia loqui, quæ est habitus nostri intellectus, attamen quoniam hæc est imago diuinæ, etiam aliquid de diuina dicendum est, & ab ea, vt a Principe, & exemplari forma ordiri debemus. Sapientia diuina non studio, & labore acquisita est, vt humana, non accidens est, nec habitus animi, sed est ipsamet Dei natura, essentia, ac substantia, adco vt intelligens, intellectio, & intelligibile re idem sint, sola ratione distinguantur; Dei namque essentia, vt omnia continens est ipsum intelligibile, ut se eminentissima certitudine intuens est intelligens, vt hic intuitus non est per aliquod externum, nec per actum secundum manantem, & recedentem a primo, sed per propriam intuentis essentiam, est intellectio. Dum dicimus quod Deus, ut omnia continens est ipsum intelligibile; considerandum est, quod Deum omnia continere, potest præsertim duobus modis intelligi: Omnes

enim sapientes in hoc cónueniunt; quòd Deus contineat omnia; Differunt tamen quia nonnulli inquirunt, Deum omnia continere in sola eminentiâ, veluti in Cœlo dicimus in eminentia contineri quatuor elementa, & reliqua metalla in auro, huius sententiæ est Aristoteles, qui ob id asserit in sola eminentia Deum cuncta cognoscere. Alii inquirunt Deum omnia continere, non in sola eminentia, sed per conuenientes rerum Ideas, cuius sententiæ sunt Theologi, necnon Platonici, & quoniam vt Deus cætera continet ita cognoscit, idè isti rectius valêt, seruare perinentia ad cognitionem Dei; ad Mundi dependentiam ab eo, ad curam, & prouidentiam vniuersi, quàm Peripatetici; Ideæ enim sunt sapientia Dei, sunt ipsamet Dei essentia, vt nata à rebus imitari, & participari, sunt Dei Natura, vt rerum est causa, vt distinctè cuncta repræsentans diuinæ menti, sunt demum Mundus intelligibilis initium, & exemplar mundi sensibilis. Has ideas Aristoteles variis in locis, diuersisq; rationibus euertere nixus est, neq; assentiendum est simplicio, Ioanni Pico, & aliis, qui asserunt littem inter Aristotelem, & Platonem solum esse in verbis, in sententiâ autem conuenire; Nam Aristoteles accuratissimè, vt de re maximi momenti de Ideis differuit, latissimè manifestare conatus est, Ideas nullam præbere utilitatem, ad nil eorum conferre, ad quæ conducere asseruit Plato; omnia demum Idearum fundamenta esse inania, & inconstantia nixus est patefacere: Neq; putandum quod in vna significatione Ideæ ponantur à Platone, in altera reiiciantur ab Aristotele, vt puta quod à Platone ponantur in Dei mente, ab Aristotele reiiciantur, vt formæ rerum naturalium seiunctæ, & per se subsistentes; Nam Aristoteles neq; etiâ in diuina mente censuit inueniri Ideas, & rationes ab eo formatæ vim habent, siue Ideæ sint in diuina mente, siue sint separatæ, censuit Aristoteles Deum se solum cognoscere, non autem cætera, nisi in eminentia; quæ

quæ sententia Aristotelis quamvis absolutè falsa sit, & verissima sit ea Theologorum, tamen si in sola humana ratione persistimus, ea quoq; defendi potest; sic itaq; ex sententia Peripateticorum, sapientia Dei eminentissimè includit omnem veritatem, & dicitur Deus solum in eminentia cuncta cognoscere, non autè distinctè, & in propria forma; Et si quis quærat, hæc cognitio in eminentia qualis nam est, nunquid censeri debeat cognitio rerum in vniuersali, vel potius in parte, & in propria forma? Ad hoc est dicendum, quod cum sit cognitio eminentior humanæ cognitione, etiam excellit conditiones humanæ cognitionis, propterea sine contradictione, & neutra, & vtraq; dici potest: Primo est neutra, quoniam diuina cognitio non est vniuersalis, tum quia cognoscere in vniuersali, est cognoscere in potentia, & imperfectè, tum Insuper, quia cognoscere in vniuersali, vel est per communem aliquam notionem collectam ex singularibus, vel per communem Ideam, neutrum horum conceditur ab Aristotele, non primum, quia sic cognitio esset accidens, non secundum, quoniam Ideas non concedit: Neq; etiam est cognitio rei in parte, & in propria forma, quoniam eminentia excludit conditiones particulares, excludit propriam rerum formam, rectè itaq; Auerroes in 12. metaphysicæ, commento 51. inquit scientiam Dei, nec vniuersalem, nec particularem esse; quod etiam latius explicauit in 3. Disputatione contra Algazelem. in solutione 18. Dubii. Ex aduerso vtraq; esse dicitur, & vniuersalis, & particularis, quoniam vtriusq; perfectionem in gradu eminentiore seiundo ab omni oppositione, ac imperfectione includit; est vniuersalis vt excludit indiuiduas, & oppositas inferiorum differentias, & oppositiones, est particularis, vt excludit omnem potentiam, distinctionem, ac diminutionem; At quæres cum ea cognitio neutra sit, cui saltem est similior num cognitioni in parte, vel vniuersali? Inquit Auerroes in 6,

Disputatione, in solutione tertii dubii, quia scire particularia apud nos est sciētia in actu, patet, quod scientia Dei propinquior est scientiæ particulari, quàm vniuersali, licet nulla harum sit: Sententiam Auerrois minimè cen-  
 seo veram, sed potius eorum opinioni subscribendum cen-  
 seo, qui cognitionem in eminentia, magis similem esse pu-  
 tarunt cognitioni vniuersali; quod ex his patere potest;  
 Primo quia cognitio in eminentia similior est cognitioni  
 præstantiori, quam imperfectiori: at demonstrat Aristote-  
 les in 1. Poster. quod demonstratio vniuersalis est præ-  
 stantior particulari, & scire vniuersale, est præstantius  
 quàm scire partem eius. Confirmatur, quia vniuersale  
 respondet facultati eminentiori, intellectui nempe;  
 singulare verò sensibus: Propterea Vniuersale essen-  
 tiam, & quod quid est rerum indicat, scientia Dei, est id,  
 quod est, cum sit eadem cum Dei essentia: est itaque scien-  
 tia Dei absolutè similior cognitioni vniuersali, cum con-  
 ditio vniuersalis sit præstantior, & eminentior, est tamen  
 ita similior vniuersali, ut non excludat perfectionem sin-  
 gularis, immo vt in Deo Natura vniuersalis à singula-  
 ri non distinguitur, ita neque in eius scientia, cum eius  
 scientia, sit ipsamet essentia Dei. Considerandum  
 tamen, quod aliud est cognoscere vniuersale, aliud co-  
 gnoscere in vniuersali, primum indicat perfectionem,  
 est enim cognitio essentiæ rei: Alterum uerò indicat im-  
 perfectionem; quia contineri in vniuersali, est contineri  
 potestate, cognitio Dei est similior cognitioni vniuersa-  
 lis, sed non rei in suo vniuersali, quod imperfectius est, &  
 ea cognitio vniuersalis comparata cum cognitione rei in  
 vniuersali potest aliqua ratione dici particularis, cum sit  
 absoluta, ac perfecta, & si Auerroes id voluit denotare, re-  
 ète sentit; Colligo itaque cum solus Deus Deum cogno-  
 scat cætera uerò eò cognoscant obscurius, quò longius di-  
 stant ab eo; hominem inter rationales creaturas longis-  
 simè à



simè à Deo distantem, obscure solum cognoscere posse, ut Deum, ita conditionem cognitionis Dei, cum cognitio Dei sit ipsemet Deus.

Patet itaque Diuinam sapientiam Deo conuenire.

Insuper constat ex sententia Aristotelis sapientiam illam esse cognitionem in eminentia.

Demùm patet qualis sit cognitio in eminentia, & quomodo absolutè similior sit cognitioni vniuersali, quàm particulari.

### *De sapientia Intelligentiarum.*

#### *Cap. III.*



Q UEMADMODVM diuina conditio per quandam participationem in uarios gradus effunditur, ita sapientia, quæ eius est propria distribuitur in uarios gradus, & quemadmodum diuinæ naturæ conditio, vel obscurior, vel clarior in distinctis rerum gradibus seruatur, ita quoq; seruari conditionem sapientiæ putandum est: Deo proximè ministrant Angeli, qui Intelligentiarum nomine à Peripateticis denotantur, de quorum cognitione, & sapientia non idem sentiunt Theologi, & Peripatetici: Ego Theologorum decreta toto amplectens animo, solum quid sentiant Peripatetici explicandum mihi proposui. Conueniunt profectò inter se Peripatetici Intelligentias ea, quæ cognoscunt per essentiam cognoscere: dissentiunt verò, quatenus nonnulli censent, inferiores intelligentias intelligere superiores per essentiam superioris, alij uerò per essentiam propriam, & quilibet pro parte sua uarias affert rationes; sed ut de re, non ex præcipuo instituto considerata, breuib; & resolutè agam, asserendum censeo Intelligentias cum superiores, tum inferiores in-

res intelligere, inferiores quidem per essentiam propriā, & in eminentia, superiores uerò utroq; modo, & per essentiam propriam, & per essentiam superioris. Quod intelligentiæ mediæ intelligant inferiores per essentiam propriam, patet, quia in forma eminentiore, in eminentia, & nobiliori quodam modo continentur inferiores, ut manifestauit Auerroes in disputatione tertia in solutione 18. dubij: propterea cum Intelligentia mediæ intelligat se per essentiam, etiam dicitur intelligere inferiores: non autem intelligit inferiores per essentiam earum, uel per earum receptionem, quia sic uilesceret. Quod Intelligentiæ mediæ intelligant superiores per essentiam propriam ostenditur, quia Intelligentiæ inferiores vsq; ad proprium suæ perfectionis gradum dicuntur conuenire cum superioribus, ideò quoad hoc intelligendo se dicuntur intelligere superiores. Confirmatur, quia Intelligentia inferior dicitur modo aliquo pendere à superioribus, & ideo dicitur quædam participatio superioris, & præsertim Dei; Propterea intelligendo se, dicitur intelligere superiorem, ut est participatio eius, & intelligentia inferior eò præstantius dicitur cognoscere, superiores, quò etiam præstantior fuerit: Verum hæc cognitio superioris ab inferiori non est satis, quia per hanc cognitionem non uerè nectuntur cum superioribus, & beantur ab eis, alioquin sequeretur quod intelligentia inferior esset beatitudo suimet: Præterea per hunc intelligendi modum non consideraretur compositio in intelligentiis, ut enim Deus se solum intelligens ratione huius intellectiōis simplex dicitur, ita cæteræ intelligentiæ si tantum se intelligerent, & cætera per essentiam suam, simplices penitus ratione huius censendæ essent, nec aliquid dicerentur intelligere extra se, cum tamen solus Deus, absolutè, & omni ex parte sic simplex, & solus omnium Peripateticorum consensione dicatur se solum intelligere, inferiores autem intelligentiæ dicuntur compo-

compositæ ex intelligibili, & intelligente, & una pendet ab altera, ut intelligens ab eo, quod intelligitur, ut inquit Auerroes in 12. metaphy. commento 44. sunt itaq; compositæ ex intellectu, & intelligibili; & propterea rationi consentaneum est, asserere inferiores intelligentias intelligere superiorem per essentiam superioris, quæ intellectio per essentiam est quidam spiritalis contactus, est maxima omnium connexionum, incorporea enim intimius nectuntur quàm corpora, & sine vlla partium distantia copulantur; est præstantissima formatio, non est propriè intuitus, neq; abstractio; sed eminentior utriusq; est diuina eleuatio inferioris in superiorem, est demum summum bonum, foelicitas, & uita optima semper conueniens Intelligentiis, ut in 12. metaphy. 39. affirmat Aristoteles. Patet itaq; inferiorem Intelligentiam, cum se, tum superiorem intelligere, & per essentiam suam, & per essentiam superioris.

*Dubia nonnulla, & solutiones.*

*Cap. IIII.*



**Q**UO res suapte natura, & conditione sunt splendidiore, eò humanæ mētis acies in ea conuersa maiore, ac obscuriore caligine offunditur. Propterea mirum non est, si conuersa in intelligibilem diuinarum mentium Solem variis difficultatibus circumfunditur. Primum hoc dignum consideratione occurrit utrum diuinarum mentium cognitio similior sit illi habitui, qui sapientia dicitur, uel potius Intelligentiæ: Præterea si inferior Intelligentia intelligit superiorem per essentiam superioris, varia uidentur sequi absurda, nā sequitur primo quod in substantiis abiunctis non idem erit intelligens, intellectio, & intelligibile; Insuper cognitio

gnitio Intelligentiæ non erit sua essentia; tertio tunc in Intelligentiis aliquid nouum considerabimus, omne enim compositum est nouum, ut dicitur 12. metaph. contex. 36. Præterea tunc eadem Intelligentia se, & superiorem multipliciter intelliget; nam se intelliget per essentiam propriam, & superioris: pariter utroq; modo intelliget superiorem: Insuper erit multiplex, quia erit ipsamet, & superior cum intelligendo euadat ipsum intelligibile; Deum non apparet quomodo uariæ intelligentiæ intelligant eandem, quia uel intelligunt eodem modo, uel modo uario, & distincto; non eodem modo, quia uaria subordinata non æquè accedunt ad supremum, non uario quia simpliciter simplex uel omnino attingitur, uel nullo pacto attingitur, non enim in simplici inueniuntur gradus. Ad primam difficultatem dum quaeritur an ea cognitio similior sit sapientiæ, uel Intelligentiæ; respondeo eā propriè neutrum esse, non enim est habitus, sed essentia, aliqua tamen ratione similis est Intelligentiæ, quatenus est cognitio præstantissima, cognitio non pendens ex alia præstantiori cognitione, & demum cognitio rei, quæ est principium, in qua cognitione mendacium non habet locum: Attamen nuncupatur ab Academicis, & Peripateticis nomine sapientiæ, quia tunc sapientiæ nomen ab eò Intelligentiæ non distinguunt, sed nomine sapientiæ denotant eminentiam quandam cum sapientiæ, tum intelligentiæ: Insuper utuntur nomine sapientiæ, quatenus sapientis est omnia scire, substantiæ autem abstractæ per suam cognitionem in eminentia omnia scire dicuntur. Præterea id faciunt ob euitandam æquiuocationem; nam si diceremus Intelligentiæ cōuenire Intelligentiam, appareret conspicua æquiuocatio, neq; propterea putandum est eam cognitionem etiam intelligentiæ nomine honestari non posse: Dum ulterius addebatur ex tradita explicatione sequi uaria absurda, hoc inficiari debemus; nam dum dicitur, quòd

tur; quòd ita in abstractis non idem erit intelligens, intellectu, & intellectum: Respondeo hoc de solo Deo absolute verum esse, solus Deus se solum cognoscit: de cæteris est verum quatenus intelligens fit intelligibile; nam si de nostro intellectu verum est, quòd intelligens fiat modo aliquo intelligibile, vt dicitur in 3. de Anima, contex. 8. & 37. longè magis id erit verum de cognitione abstractorum, quorum cognitio est per essentiam: hinc omnes intelligentiæ extra primam cum intelligent aliud a se, dicuntur compositæ ex intellectu, & intelligibili: Dum additur quod cognitio intelligentiæ non erit sua essentia; Respondeo cognitio intelligentiæ est essentia intelligibilis, quatenus est per essentiam superioris intelligibilis: est essentia intelligentis quatenus, ut dixi, intelligens dū intelligit dicitur fieri intelligibile: Ad aliud, quia sic in eis esset aliquid nouum; Respondeo si per nouum denotatur dependens, quod denotasse Auerroem existimo in 12. Metaphysic. 39. vbi contra diuinam trinitatem disputans ab eo perperam intellectam, eam profert sententiã, sic nulla est dubitatio, nam omnes intelligentiæ citra primam dependent, quòd verò Auerroes eo in loco dependentiam denotauerit, indicauit per subsequentiã verba, inquit, nisi dicant aliqua componi per se, & si aliqua essent, quæ per se componerentur, tunc exirent de potentia in actum per se, & mouerentur sine motore per se, &c. Sic itaque Auerroes ibi per nouum denotauit dependens nõ primum; quòd Deo aduersatur, de quo tunc loquebatur: Si vero per nouum intelligimus genitum, & mortale, hoc inficiari debemus; nam minimè in hac significatione omne compositum est nouum, sed solum id, quod uere compositum est, ex materia, & forma mortalium, hoc manifestissime affirmauit Auerroes in 3. Disputatione, in solutione 19. dubii. inquit dum dicitur omne causatū est possibile, minimè id est verum uniuerse. sed de causato com-

posito, & hoc non est æternum, quia compositum unum includit materiam, quæ est initium potentia, & interitus: nam denotat compositum unum, hoc est vnum per formam dantem esse, hoc non est sine materia, ob quam est possibile; Limitat itaque Auerroes sententiam illam, omne causatum, siue compositum est possibile de eo composito, quod ex materia constat, ex qua cum forma vnum consurgit, quare ea sententia minimè nobis aduersatur, cum loquamur de compositione ex intellectu, & intelligibili, quæ compositio longè distincta est ab ea. ex tradita etiam solutione constare censeo minus rectè ab expositoribus, & sectatoribus Auerrois confundi sententiam prolatam in 12. Metaphy. commento 39. cum ea tertiæ disputationis contra Algazem; nam si loca illa accuratè perpenduntur apparebit Auerroem de re diuersa loqui, & in uaria significatione sententiam utranq; veram esse. Dū vltius additur ex ea determinatione sequi hoc absurdum, quod eadē intelligentia se, & superiorem duobus modis intelligit: dico id minimè esse absurdum, quia non eodem, sed distincto modo id contingit: Ex qua duplicis cognitionis conspiratione exactior consurgit cognitio, arctiorq; connexio: Dum dicitur, quod erit multiplex: Respondeo, quod uerè erit multiplex, quia solus Deus absolutè est simplex, sed est multiplex vario modo, est ipsamet absolutè, sit superior per potentiam, & nexum cum superiori, ut etiam de nostro intellectu dicimus, quod ex se est, natura, & substantia quædam æterna, cum tamen mox per potentiam fiat omnia intelligibilia. Ad postremam difficultatem, quæ erat an inferiores eodem, uel uario modo, & distincto gradu reciperent, & intelligerent superiores: Respondeo id fieri gradu vario, & distincto; nam in simplici, quamuis absolutè non insint gradus, tamen in eo reperiuntur, ut participari natum est, & ex conditione recipientis, & participantis, ueluti idem lumen in uariis uario



riò modo recipitur: Sic rectè de Deo dictum est. In domo patris mei mansiones multæ sunt; Insuper solus Deus dicitur Deum cognoscere, quia in eo solo cognoscens æquatur rei cognite, cum tamen modo aliquo, & per uarios gradus dicatur etiam cognosci ab aliis multis: At colligamus in pauca, quæ latè patefecimus.

Constat primo apprimè dubium esse inferiores intelligentias per sui, & superioris essentiam superiorem intelligere.

Patet secūdo quo pacto ea dubia censeam esse soluenda. Demum constat cognitionem intelligentiarum magis cōuenire cū habitu intelligentiæ, quàm sapientiæ, quamuis reuera neuter eorum sit, & frequentius sapientia nuncupetur, quàm intelligentia.

*De Humana Sapientia vniuersè considerata.*

*Cap.*

*V.*



**E**RSAT; hactenus sumus in Sapientia diuina, quæ Coelo dominatur, & terris, & iure merito sol intelligibilis nuncupatur, cuius radii cuncta pariunt, omnia seruant, & foelicissimè perficiunt. Humana Sapientia est ueluti umbra illius, & umbra quidè satis tenuis per quam homo aliqua ex parte redditur similis Deo: Quæ duæ sapientiæ inuicem comparatæ, ita se habent, vt illa sit essentia uiua, hæc verò accidens: illa sit supra ignorantia nubis eleuata, hæc obscura quadam humanæ cecitatis caligine sit inuoluta; Illa seorsum a difficultate splendidissimè diuinis mentibus conueniat, hæc sine labore, & sudore minimè acquiratur; Illa conueniat omnibus, hæc valdè paucis: Illa sit causa rerum, hæc ex rebus iam productis colligatur: Illa demum sit pura, eminentissima,

uberimâq; *foelicitas*, hæc tenuis quædam umbra cū humana miseria permixta. Ex his constat eius difficultatis solutio, qua quæritur, vtrum sapientia sit humana possessio, vel nē: nam sapientia diuina minimē est humana possessio, sapientia vero humana ita est humana possessio, vt ab hominibus conuenienter per naturam dispositis, recteque educatis, ac institutis acquiri, & aliquandiu valeat possideri. Humana enim sapientia contradistincta ab aliis habitibus intellectus Metaphysica est, quæ. & prima Philosophia, & Philosophia vniuersa, & humana Theologia, & scientia absolutissima dici potest, quæ non vulgaris, sed eminentioris hominis possessio est. Humana sapientia dum confertur cum scientia, dicitur absolutio scientiæ, scientiarum caput, vel potius scientia capite prædita, cui scientiæ definitio ab Aristotele in 1. Post. tradita apprimē conuenit, uerē enim Metaphysicus rei causam cognoscit, verē ostensionem formare valet, ex primis, ueris, immediatis, prioribus, notioribus, causisque conclusionis, adeo vt iure ea sola absolutē scientia nuncupari mereatur. Verum dubitatio oritur, si sapientiæ conuenit definitio scientiæ; & reuera non est habitus re distinctus a scientia, quomodo ab Aristotele pro distincto habitu numeratur? Cuius difficultatis hanc censeo esse solutionem; Scientia latitudine prædita est, & eius culmen, & apex longē præstat partibus aliis: Præterea vt magnificentia ad liberalitatem se habet; magnanimitas ad mediocrem honorum appetitionem; uirtus heroica ad morales, ita sapientia se habet ad cæteras scientias, & quemadmodum Magnificentia, Magnanimitas, Heroicaq; eminentia enumerantur pro distinctis uirtutibus, ita non est absurdum, vt sapientia pro habitu distincto a scientia numeretur, non secus, ac Sol nonnunquam pro distincto a stellis numeratur, quamuis reuera sit stella. Præterea id quoque iure factum est, quia de ratione sapientis est, omnia

nia scire, nemini subiici, quod minimè est de ratione scientiis; non itaque errauit Aristoteles dum sapientiam seiunxit a scientia, præsertim cum nouerit, & docuerit sapientiam, intelligentiam, & scientiam arcto quodam necessitudinis nexu iungi, & copulari.

Constat itaq; primo quomodo humana sapientia ad diuinam se habeat.

Patet secundo humanam sapientiam rectè dici posse humanam possessionem.

Patet demum Intelligentiam, Sapientiam, Scientiam, maxime conuenire, maximeq; necti; & præsertim sapientiam cum scientia, nec propterea perperam Aristotelem sapientiam à scientia secreuisse.

*In quo versetur Humana Sapientia.*

*Cap.*

*VI.*



**A**RIAS de subiecto metaphysicæ sunt Peripateticorum sententiæ, nec manifeste constat quid hac de re Aristoteles senserit; nonnunquam enim asserit metaphysicum vna cum Dialectico, & Sophista nullo claudi termino, sed versari in omni eo, quod est, vt in 4. metaphy. nonnunquam ait versari in substantiis abiunctis, vt in Prohemio de Anima 11. metaphy. 2. Phy. & alibi: nonnunquam demum asserit versari in substantia, & tot esse Philosophiæ partes, quot substantiæ, vt in 4. metaphy. Ex quo vario loquendi modo variæ prodierunt interpretum eius opiniones; & id quoq; præsertim contigit, quia minime constat quid nomine entis denotauerit, cum ea vox in varia significatione variis in locis proferatur; & quoniâ hæc quæstio cum latissimè sit exactissimè pro omni parte ab aliis est discussa; propterea ego prætermisiss aliorum opinionum-

nionibus, sententiam meam quàm breuissimè referam. Accipiendum primo Entis vocem, vt ad institutum nostrum pertinet tribus modis vsurpari; accipitur primò in maxima eius latitudine pro omni eo, quod est, quouis modo ei esse conueniat; accipitur secundo magis propriè pro ente composito; nam ens est vox concreta, & propriè ea significat, quæ composita sunt, ideo frequenter ab Aristotele profertur pro denotando composito, vt in 1. Phy. context. 51. 52. 69. in 2. Phy. context. 1. & alibi: Tercio accipitur ens pro primo ente composito, quod substantia est: si ens accipitur in prima significatione, principia, & simplicia, entia sunt, si accipitur in secunda significatione principia non sunt entia, sed initia eius, quod est; si demum in tertia accipitur sola substantia composita est ens; accidēs verò minime, ideo substantia dicitur ens simpliciter, accidentia verò non dicuntur entia, nisi quia entis; & entia in parte non absolutè. Insuper accipiendum est subiecti nomine tria posse denotari, vel enim denotatur id omne quodcunq; sit, quod in ea facultate consideratur, quod ratione aliqua obiectum dici potest, veluti Aristoteles in 2. de ortu, & interitu. context. 7. obiectum visus nuncupauit subiectum, quod etiam fecit in 2. de Anima. context. 136. & 144. vel denotatur id, quod contradistinguitur à principis, & affectionibus, vel demum denotatur id quod potissimùm est ex consideratis in scientia: si vtimur nomine subiecti in prima significatione, vtiq; omne, quod est, dicitur subiectum metaphysicæ: ad hoc respexit Aristoteles, dum in 4. metaphy. context. 5. & in Prohemio metaphy. dixit metaphysicum, Dialecticum, & Sophistam versari in omni eo, quod est: Insuper dum asseruit sapientis munus esse cognoscere omnia, ac etiam dum affirmauit Philosophi esse de omnibus posse speculari: si nomen subiecti accipiat in secunda significatione, tunc ens compositum contradistinctum à principis, & affectionibus debet iudicari

iudicari subiectum; in hac significatione dicitur in principio 4. metaphy. Metaphysici munus esse considerare ens, ut ens, & eius causas primas, & affectiones. Demum si nomine subiecti intelligimus id, quod primum est, quoniam huiusmodi est substantia, iure subiectum metaphysici statui posset substantia, & inter ea, quæ quouis modo in illa considerantur, & quouis modo sunt entia statui potest substantia abiuncta, quotiescunq; enim scientia versatur in eo, quod est ab vno, præsertim, & propriè in eo, quod primum est versari dicitur; hoc affirmavit Aristoteles in 4. metaphy. contex. 2. inquit, constat itaq; quia entia vnius est scientiæ speculari quatenus entia, propriè vero primi est scientia, ex quo pendent alia, & per quod huiusmodi nuncupantur, si itaq; hoc est substantia substantiarum oportet principia, & causas habere Philosophum. Ex his constant variæ cum subiecti, tum entis significationes.

Insuper patet quomodo, & omne quod est, & solum compositum, & demum sola substantia, & præsertim substantia abiuncta dici possit subiectum metaphysicæ.

*Dubia nonnulla, ac eorum solutiones.*

*Cap. VII.*



QUONIAM res de qua loquimur apprimè est perplexa, & ardua, propterea mirum non est si aduersus traditam elucidationem variæ quasi ex profundo tenebricosæ caliginis pelago emergunt dubitationes; nam primo redditur dubia, quoniam frequenter Aristoteles asserit primam Philosophiam versari in consideratione substantiarum separatarum, per earum considerationem distinguendo ab aliis scientiis, ab eis sortiri esse præstantiam,

& dignitatem, vt patet ex 11. metaphy. ex Prohemio de Anima, & locis aliis, & adeo asseritur in eis versari, vt affirmetur, quòd nisi illæ darentur Physica esset prima Philosophia, vt patet ex 6. metaphy. quæ omnia indicant substantiam separatam esse materiam propriam diuinæ considerationis, eiq; æqualem. Præterea non videtur posse seruari, vt ens habeat affectiones, & principia, quia illæ affectiones, & principia, vel sunt entia, vel ne, si sunt entia, ergo non sunt principia, & affectiones entis vt ens, alioquin essent principia, & affectiones suimet, reduplicatio enim vertitur in vniuersalem; si non sunt entia non possunt esse principia entis, & affectiones, quod enim non est, non potest esse principium, & affectio entis quemadmodum non substantia non potest esse per se principium substantiæ, vt dicitur in 1. Phy. contex. 52. Præterea falsum videtur, quòd enti conueniant principia, & causæ, vt ens est, quia sic omne ens haberet principia, & causas, quod est absurdum, ita enim daretur in causis progressus in infinitum: Consequentia patet, quoniam reduplicatio vertitur in vniuersalem, si itaq; ens, vt ens habet principia, omne ens principia habebit. Præterea ego dixi, id, quod præsertim in metaphysica consideratur esse substantiam, Auerroes vero in calce 1. Phy. & alibi asserit esse Intelligentias, & ab Aristotele in 8. Phys. contex. 3. nuncupatur metaphysica methodus de primo principio, sic itaq; ea apprime redduntur dubia, quæ in præcedentibus dicta sunt. Ad primam difficultatem dico, versari quidem metaphysicum in consideratione diuinarum mentium, ac in eis versari, & tanquàm in parte potiori sui subiecti, & tanquàm in principiis eius: nam si ens, & subiectum accipiuntur in prima significatione, sic diuinæ mentes sunt pars præstantissima eius, & in hac significatione vera est sententia Auerrois, quod diuinæ mentes sunt pars potissima subiecti metaphysicæ; si vero ens, & subiectum accipiuntur in secunda



da significatione, diuinæ mentes sunt principia entis, & subiecti metaphysicæ: si demum subiectum accipitur in tertia significatione, patet diuinas mentes varia ratione posse dici, & principia, & subiectum, principia substantiæ compositæ, subiectum vero quia est pars potissima substantiæ latæ sumptæ; sic itaq; iure dicitur metaphysicum in separatis mentibus versari, & ab eis recipere dignitatem, nam solus metaphysicus valet considerare essentiam separatarum formarum; Ad Aristotelem in 6. metaphy. asserentem, nisi darentur substantiæ separatæ naturalis esset prima Philosophia, cui sententiæ similem protulit in 1. de Partibus Animalium, inquit, si Physicus consideraret intellectum, præter naturalem non daretur alia Philosophia; Communis solutio Latinorum serè omnium est, quòd metaphysicus versatur in abstractis, siue per essentiam, siue per indifferentiam, nisi autem darentur abstracta per essentiam, non darentur abstracta per indifferentiam, & consequenter non daretur metaphysica, quæ sententia mihi semper dubia apprimè fuit, quoniam metaphysicus, vt in sequentibus apparebit, considerat nedum separata, verum etiam coniuncta cum materia, & materiam considerat, vt elementum eorum, & quatenus ingreditur definitionem, & propterea etiam circumscriptis substantiis separatis, remaneret aliqua cōsideratio metaphysica: Propterea secus soluens dico metaphysicum habere aliquid commune cum Physico, & aliquid proprium, commune est ens, materiatum, & compositum, quod distincta consideratione consideratur ab vtrisque; proprium vero est ens abiunctum, & separatum, quod nedum est proprium, verum etiam est potissimum, & quoniam denominatio recipitur à proprio, & præstantissimo, ac insuper vires mensurantur per maximum, vt dicitur in 1. Coeli: ideo iure Aristoteles sæpè inquit metaphysicum versari in abstractis, esse methodum de primo principio, & nisi

darentur abstracta, non daretur metaphysica, nam periret profectò quoad id, quod proprium; ac præstantissimum est, & nil superesset; quod magni momenti esset, & quod non posset sine magno discrimine, & confusione, vna cum naturali consideratione iungi, & ex eis constitui scientia vna: quemadmodum id ab Antiquis Physicis fuisse factū compertum est, vt ab Empedocle, Democrito, & aliis.

Ad secundam difficultatem, quia non videtur ens posse habere principia, & affectiones: Respondeo ens in secunda, & tertia significatione, manifestè potest habere principia, & affectiones: Et dum quæritur, vel erunt entia, vel nè: Respondeo ea non esse entia in ea significatione, in qua est ens, id cuius sunt principia, sed sunt entia in prima, & lata significatione, sic materia, & forma, modo dicuntur esse entia, modo non: Hoc denotauit Aristoteles in 1. Phy. 69. inquitens materiam esse vnum principium, non ita unum, neque ita ens, vt hoc aliquid, hoc est compositum, indicauit Aristoteles ens, & vnum secus dici de composito, secus de principijs eius: Si verò ens accipiat in prima significatione, pariter, & subiectum, tunc dico de ratione subiecti, ita sumpti non esse, vt habeat propriè sumpta principia ab eo distincta, accipitur enim tunc subiectum pro obiecto, & pro omni in ea scientia considerato. Ad tertiam difficultatem dum quærebarur quomodo enti, vt ens possint conuenire principia, & affectiones, patet ex iam dictis aliqua ex parte responsio, nam si accipiat propriè reduplicatio, & ea cadat super compositum, patet huiusmodi enti conuenire principia, & affectiones; at si cadat super vniuersam entis latitudinem, minimè enti, vt ens conueniunt principia, & affectiones, quoniam statim de illis principijs, & affectionibus quæcunq; sint, quæram an sint entia, vel ne, & ita vel dabitur progressio in infinitum, vel non ens penitus, erit principium, siue affectio entis. Propterea dicendum censeo ens esse ab vno,

& ei conuenire proprie principia, & affectiones, non pro vniuersa latitudine absolute, sed pro parte, nec habere eadem, vel eodem modo principia pro omni parte, sed varia pro distinctis partibus, ueluti pro parte aeterna, & mortali conuenientia solum in aliquo communi ab uno, & si volumus gradibus omnibus rerum conuenire principia, dicendum est eis principia conuenire saltem minus proprie, & late sumpta; sic Deus habet principia saltem explicantia illum; & quoad nostrum modum cognoscendi; quæ principia mox in priora principia resolui nō possunt; Intelligentiæ citra Deum habent, & hæc, & alia principia; substantiæ demum corporeæ proprie sumptis principiis præditæ sunt; Hæc omnia possunt considerari ut entia, ideo inquit Aristoteles in 4. Metaphy. contex. 2. quapropter & entis, quatenus ens quascunque species speculari vnius est scientiæ genere, species autem specierum: Sic itaque dum dicimus ens habere principia, ut ens, reduplicatur tunc non vniuersa entis latitudo, sed ea solū, quæ est subiectum metaphysicæ contradistinctum a principiis. Hoc etiam prætereundum non est, longe secus se habere de reduplicatione alicuius generis uniuoci, & eius, quod est ab uno, nam uniuocum est, natura una in omnibus eadem, & propterea id quod cum reduplicatione subiecto tribuitur conuenit omnibus eodem modo. Id vero quod est ab uno, non est natura una in omnibus eadem, sed uaria, & propterea id, quod cum reduplicatione ei tribuitur non conuenit contentis sub eo, eodem modo: Ad postremam difficultatem sumptā ex auctoritate Auerrois patet solutio ex dictis.

Ex his itaque patent uariarum difficultatum solutiones. Patet quomodo metaphysica constituitur, & non constituitur per substantias abiunctas.

Insuper constat enti, ut ens pariter uniuerse latitudini entis conuenire, & non conuenire principia.

Demum explicatum est uniuocis, & his, quæ sunt ab uno uario modo conuenire reduplicationem.

*Quæ causarum genera à Metaphysico considerentur. Cap. VIII.*



**Q**UEMADMODVM de subiecto metaphysicæ, ita de principiis, & causis eius uariæ sunt Peripateticorum sententiæ: Censuit Auerroes, & cum eo Zimara, & plurimi ex Latinis, naturalem considerare omne genus causæ tãquam principium sui subiecti, solum tamen in genere materiæ, & efficientis posse resoluerè, usque ad primum: de prima materia patet ex 1. Phys. de primo efficiente patet ex 8. Metaphysicum uero solum cõsiderare formam, & finem, & in his resoluerè usq; ad primum; materiam uero, & efficientem, ut principia sui subiecti non considerare, quoniam abstrahit a motu, a transmutatione, & a materia; Hæc autem duo causarum genera cum motu, & transmutatione sunt principia rerum, & rebus conueniunt materiatis; Hanc sententiam minime ueram censeo, primo manifeste Aristoteles in 2. Phy. 71. & 73. inquit, quæ mouent non mota, ad Physicum non pertinere, sed ad diuinum, loquitur tunc Aristoteles de causa efficiente, quæ describitur per esse principium motus, & inquit pertinere ad diuinum: Præterea de materia hoc patet ex 12. Metaphy. ubi quærit utrum omnium prædicamentorum eadem sint principia, & manifestat actû, & potentiam esse communia principia omnium, potentia autem ad materiam redigitur, cum itaque diuinus consideret actum, & potentiam, & consequenter materiam, ut principia entium in decem prædicamenta distributorum:

conspicuum est, quod cōsiderat materiam, ut principium saltem speciei subiecti: Præterea hoc patet, quia materiam in prima notione solus diuinus exacte considerare, & explicare ualet: Insuper hæc omnia manifeste confirmantur per ea, quæ protulit Aristoteles in Prohemio metaphy. cap. 3. ubi manifestauit cognoscendas esse a diuino primas causas, quia per eas scimus: & in 8. Metaphy. dixit rem esse explicandam per omne genus causæ. Quod postremo confirmatur, quoniam id, quod proprie est ens, nempe substantia composita prædita est omni genere causæ, & accidentia dicuntur entia, quia entis, hoc est, quia accidunt substantiæ, substantia autem dicitur accidentiū causa, ut subiectum, & materia.

Colligamus itaq; metaphysicum nedum considerare omne genus causæ, ut sunt differentię, uel modi entis latè sumpti, uerum etiam id facere, quatenus sunt principia sui subiecti, uel speciei eius.

Patet itaq; Physicum in nullo genere causæ verè eleuari vsq; ad primum.

Patet insuper diuinum considerare omne genus causæ, vñ principium sui subiecti.

Constat demum solum metaphysicum in omni genere causæ supremam verè considerare.

### *Dubia nonnulla, & solutiones.*

#### *Cap. IX.*



**V**ARIA sunt, quæ nostræ sententiæ primo intuitu aduersari videntur; nam dubium primo apparet, quomodo Diuinus eas causas considerare valeat, quæ cum motu, & transmutatione causæ sunt veluti materiam, & efficientem, cum diuinus, & à materia, & à transmutatione

mutatione abstrahat: Præterea si materia, & efficiens sunt principia entis, vt ens, erunt itaq; principia omnis entis, quod tamen falsum est: Insuper manifeste constat Aristotelem in 1. Phy. definire primam materiam; in 8. Phy. agere de primo motore, & frequenter asserere se primum motorem in eo libro declarasse, vt constat ex 1. & 2. de ortu, & Interitu, & ex libro de motu Animalium. & ex aliis locis. Demum patet Auerroem frequenter oppositum affirmare. His, & similibus difficultatibus facile est respondere, si neglectis Latinis expositoribus, soli Aristoteli, & rationi credere voluerimus. Nam diuinus præsertim substantiam, & quid est considerat, vt affirmat Aristoteles in 4. 7. & in 12. metaphy. ipsi autem substantiæ, & quid est omnia genera causarum conueniunt, ideo Aristoteles in 8. metaphy. declarat principia interna explicare quid est, externa verò esse causas ipsius quid est: Ad primam difficultatem dum dicitur metaphysicam esse scientiam de abstractis, & abstrahere à materia, & transmutatione; Respondeo eam esse scientiam de abstractis, quatenus valet eleuari ad eorum considerationem, & quatenus abstracta sunt præcipuum quod in ea consideratur, & per quod præsertim à Physico distinguitur; non autem ita est de abstractis, quin valeat etiam considerare essentias rerum materiatarum, & earum causas, vt entia sunt; & hac quoq; ratione Physica dicitur de mobilibus, diuina verò scientia de immobilibus; substantia itaq; materiata consideratur à diuino, vt species entis, à Physico verò vt corpus physicum est: Ad secundam difficultatem dum dicitur si materia, & efficiens sunt principia entis, vt ens, erunt itaq; principia omnis entis; Respondeo, enti, vt ens in secunda, & tertia significatione conuenire quidem principia, & causas, at non eodem modo, non enim est reduplicatio rei vniuocæ, sed rei ab vno, ideo ratione diuersitatis specierum entis, & graduum eius, varia, & diuersa sunt principia



principia, & quorundam plura, quorundam pauciora esse possunt, vt substantiæ Coeli pauciora sunt principia, substantiæ verò mortalium plura, quare hæc est vera entis, vt ens sunt principia, non tamen entis ut ens sunt omnia principia. Insuper si absq; distinctione significationum entis uolumus dicere enti, ut ens conuenire principia, & affectiones, dicendum est, quòd ea dictio, vt intelligi debet non pro reduplicatione, sed pro explicatione modi, quo ei in suo gradu principia conueniunt, & de eo considerantur. Ad Aristotelem, qui in *Physicis* agit de prima materia, & primo motore; Respondeo *Physicum* resolvere quidem usq; ad primam materiam, asserò tamen metaphysicum magis eo eleuari, quia ille solus ualet materiã in prima notione, & per ea, quæ absolutè ei conueniunt considerare, at materia in prima notione, & consideratione absoluta est prior se ipsa considerata in secunda notione, & cum relatione. De primo motore hanc dico esse regulam ab Aristotele seruata, quòd id solum dicitur ad aliquam scientiam pertinere, in qua consideratur essentia eius, essentia primi motoris ad diuinum pertinet, ueluti essentia humani intellectus, ideo quamuis à *Physico* de iis uaria dicantur, & eis uaria tribuantur, tamen, quia solus diuinus attingit essentiam, non autem *Physicus*, ideo absolutè dicuntur ad diuinum pertinere, ut patet ex 1. de Partibus Animalium. & ex 2. *Phy.* 71. necnon 73. contextibus: Ad Auerroem oppositum sæpe asserentem: Respondeo me cum eo hac de re non conuenire cum censeam illum dissentire ab Aristotele; & si aliqua in parte eius sententiam rueri uolumus, dicendum est illam eatenus esse ueram, quatenus facta comparatione inter metaphysicum, & *Physicum*: Consideratio formæ, & finis magis est propria diuini; consideratio materiæ, & efficientis magis est propria *Physici*: modus per quem materia, & efficiens causæ sunt, proximior est considerationi *Physicæ*,  
reli-

reliquarum uero diuinæ: Demum ea sententia uera est, in consideratione rei, quæ potissima est inter ea, quæ à diuino considerantur, nempe in consideratione Intelligentiarum, quibus nec materia, nec propriè efficiens conuenit ex sententia Aristotelis.

Constat itaq; aduersas rationes facile solui.

*Vtrum metaphysica sibi ceteras scientias subalternet, ac de subalternatione Opinio prima. Cap. X.*



**M**ETAPHYSICAM esse scientiam liberam, dominam omnium, supremam inter disciplinas humano ingenio inuentas, ac formatas, conueniunt profectò omnes, nū uerò ita ceteras scientias sibi subiiciat, ut ei subalternæ iudicari debeant maxima est lis, & opiniones sunt uariæ, quæ difficultas, ut conuenienter dissoluatur considerandæ sunt primo conditiones subalternationis, ex earum enim notitia poterimus deinde cognoscere, quæ disciplinæ debeant iudicari subalternæ quæ uerò minimè: Inquiunt nonnulli hanc vnā esse conditionem subalternationis, vt considerata in scientia superiori gratia sciendi, in inferiori dirigantur ad opus, ex quo inferunt nullam subalternatam esse scientiam, & addunt hanc solam conditionem in 1. Poster. ab Aristotele fuisse assignatam. Huius opinionis est Episcopus Casertanus in sua Logica, necnon in libro de Honore, ex cuius opinione, nec Physica, nec mathematica possunt iudicari subalternæ metaphysicæ: Proculdubio eius opinio uera non est; Primò si accuratè Aristotelis uerba in 1. Poster. perpenduntur nunquam ab Aristotele de huiusmodi conditione

tionem sit mentio. Præterea falsum est, quod omnis disciplina subalternata sit Ars, nulla sit scientia: nam Aristoteles in primo Posteriori. cap. 10. asserit dari musicam, mathematicam, hoc est contemplatiuam, & scientialem, pariter & Astrologiam mathematicam, quæ tamen proculdubio Arithmetica, vel Geometriæ subalternantur. Insuper Aristoteles in primo Posteriori. cap. 11. Perspectiuam inter scientias enumerat, eamque asserit cognoscere propter quid, inquit enim figurarum autem maximè faciens scire prima est; mathematicæ enim scientiarum per hanc demonstrationes conficiunt: ut Arithmetica, Geometria, Perspectiua, &c. & tamen nulli dubium, quod Perspectiua subalternatur Geometriæ, ut idem Philosophus asseruit cap. 10. Insuper addit in eodem 10. cap. quod Perspectiua dicitur propter quid, Physica vero, quia ipsius Iridis, quod minime esset verum, nisi Perspectiua esset scientia, non enim scientia subalternatur Arti. Colligamus itaque non esse de conditione subalternatæ disciplinæ, ut considerata in superiori gratia scientiæ, in inferiori dirigantur ad opus. At nituntur id suadere, quoniam inquit inanis esset subalternata, si ea quoque propter scire, eadem principia consideraret, nec etiam a sua superiori esset distincta, quoniam rem eandem ob eundem finem specularetur; sed ut falluntur in conclusione, ita in ostensione eius, non enim sequitur, quod esset inanis, quoniam quod sine contractione in superiori consideratur, mox in inferiori contrahitur, & applicatur alicui determinatæ materiæ, ut lineæ consideratæ vniuersæ in Geometria, mox in Perspectiua contrahuntur ad radios oculorum, siue ad lineas iunctas cum eis: & quamuis finis communis sit, idem, ut puta contemplatio, tamen finis proprius uariis est: At inquit Perspectiuam, Astrologiam, Cosmographiam, & alias similes esse Artes, quoniam dirigunt ad operationem: ut Astrologus ad futurorum prænotationem: Perspectiua

Atius ad operationem in attinentibus ad uisum, & sic de singulis. Cum hoc dicant profecto ex vno in plura labuntur absurda: nam Astrologiæ finis non est futura prædicere, sed cognoscere pertinentia ad Cælum per principia, & demonstrationes mathematicas, pariter de Perspectiuo dicendum est, quod si ex eis sequatur operatio aliqua, proculdubio ea censi debet extra terminos scientiæ, & fructus aliquis Astrologiæ, ac Perspectiuæ, non autem proprius finis, non secus ac naturalis, magia dicitur fructus scientiæ naturalis.

Constat itaque hanc minime esse conditionem subalternatæ, ut considerata in superiori in gratiam scientiæ, in inferiori dirigantur ad operationem.

Ex quo sequitur non esse necesse, ut omnis subalternata sit Ars.

### *De Subalternatione Opinio secunda.*

#### *Cap. XI.*



**A**LI ex aduerso reperiuntur Viri docti, qui inquiunt de ratione subalternationis esse, ut superior, & inferior eundem seruent considerandi modum, adeo ut sola scientia subalternetur scientiæ, & Ars Arti, non autem Ars scientiæ subalternari possit, neque scientia Arti: Hinc ortum ducit ea enunciatio; scientia, quæ subalternatur speculatiuæ est speculatiua: Inquiunt qui sunt huius opinionis scientiam subalternatam nil addere modo considerandi superioris mutando illum, sed solum addere rei consideratæ, ut Geometra considerat lineam, ut quanta est, Perspectiuus considerat lineam visui iunctam, pariter ut quanta est: hinc scientia subalternata non auget scientiarum

tum numerum, sed redigitur ad genus eius cui subalternatur. Ex quo sequitur nec Physicam, nec Mathematicam subalternari metaphysicæ, quia uariatur modus considerandi. Confirmatur hæc opinio, primo, quia ut genera subalternata sunt eiusdem generis prædicamenti, ita scientiæ, & disciplinæ subalternæ eiusdem generis, considerationis, & ordinis esse debent, quod non contingeret, si in varios fines dirigerentur. Præterea id ipsum patet exemplo earum mathematicarum, quæ verè, & propriè subalternæ sunt: Insuper scientia vere subalternata debet vere locari sub sua superiore subalternante, rectè autem subordinantur illæ, quæ in vnum finem tendunt, quæ vero ad varios diriguntur, possunt in parte, at non absolutè subalternari. Hæc quoque opinio dubia est, nam si Aristotelem sequi volumus proculdubio inueniemus non tam arctè eum subalternationem explicasse; Aristoteles enim in 1. Posterior. de scientiis subalternatim positis uerba fecit, & non alibi; at ibi minimè huiusmodi cōditiones ponit, nec ex eius dictis colliguntur, immo oppositum potius, inquit enim musicam poni sub Arithmetica, Artem conficiendi machinās sub Stereometria: At musica est Ars cum dirigat ad operationem, pariter disciplina conficiendi machinās Ars est. Præterea in cap. 7. manifestans non dari transitum ex vna scientia in aliam, inquit, quare aut absolutè necesse est, idem esse genus, aut modo aliquo, si debet demonstrationis descendere; & post pauca addit, neque unius scientiæ est ostendere id, quod est alterius, nisi quæcunq; sic se habent ad inuicem, ut alterum sit sub altero, &c. Aristoteles itaque pro subalternatione hoc solum ponit, ut vna sit sub altera, adeo ut subiectum inferioris sit in parte idem cum subiecto superioris. Hi vero alias conditiones fingunt, & imaginantur, quòd si de subalternatione loqui volunt, de qua non sit loquutus Aristoteles, ipsi propriam subalternationem, & eius conditiones sibi fingunt.

Hinc medicam Artem vere subalternari putandum est naturali philosophiæ, ut conciliator recte existimauit, medica enim ars verè sub naturali philosophia posita est, vt asserit Aristoteles in libro de sensu, & sensili; neque est difficile satisfacere rationibus aduersis, dum.n. inquirunt, subalterna debere esse eiusdem generis: Respondeo aliã esse rationem generum eiusdem prædicamenti, aliam uerò subalternatarum scientiarum, conueniunt enim quatenus in vtrisque; vnum sub altero ponitur; & ab iisdem principiis communibus pendent; Differunt verò, quia prædicamenta sunt vna series vniuoca rerum; subordinatæ verò disciplinæ vniuocationem non exposcunt, nam versari possunt in genere ab vno; & quemadmodum operatio dirigitur à cognitione, ita ex subordinatis disciplinis superior ad contemplationem, inferior ad operationem respicere potest. Hinc veram non censeo sententiam Zimaræ Theoremate 77. dum inquit in vera subalternatione superiorem esse, vt genus, inferiores verò ut species illius generis, & propterea subalternatas non augere numerum disciplinarum. Nam eiusdem est genus & species considerare vt dicitur in 4. metaph. ideo propriè se habent ut species ad genus illæ, quæ sunt partes eiusdem scientiæ, ueluti dum consideramus, quod in naturali philosophia agitur primo in libris Physicorum, de corpore physico in genere, mox de speciebus eius; & in logica, primo de Syllogismo vniuersè, mox verò de demonstratione, & aliis, & tamen nec libri de Cœlo subalternantur libro Physicorum; nec libri Posteriorum libro Priorum; immò addo, quod loquendo de verè subalternatis inferior non est species superioris, non enim Perspectiua est species Geometriæ, nec Musica Arithmeticæ, nam si species essent, quia genus de specie prædicatur, Perspectiua esset Geometria, & musica esset Arithmetica quod falsum est: Et dum addunt subalternatam non



tam non augere numerum, hoc non dicitur ab Aristotele, neq; semper verum est, dico tamen, quod subalternata vt subalternata non augeat numerum, vt verò dirigit ad finem distinctum, & includit varium considerandi modum, valet numerum augere: Confirmationem sumptam ex disciplinis, quæ subalternantur puris mathematicis iam constat ex dictis eis aduersari, & nostræ sententiæ fauere: Ad postremum dum dicebatur verè subordinari disciplinas illas, quæ in vnum finem tendunt. Respondeo disciplinas in vnum finem tendentes magis necti, magisq; conuenire, at non vnâ alteri magis subiici, nec magis inferiori à superiore pendere, quòd solum requiritur ad propriè sumptam subalternationem.

Colligamus itaq; ad veram subalternationem non requiri, vt subordinatæ disciplinæ in vnum finem tendant.

Et propterea non veram esse illam sententiam, subalternatas non augere numerum.

Neq; alteram quod scientia subalternata speculatiuæ sit speculatiua.

Neq; demum quòd subalternata sit tanquam species superioris.

### *De subalternatione Opinio propria.*

#### *Cap. XII.*



**V**T disciplinæ veræ sint subalternæ requiritur, vt vna verè sub altera collocetur, vt autem hoc fiat, quia disciplinæ in sui subiecti cōsideratione versantur, & ex eo ordinem, & conditionem suscipiunt, ideo requiritur, vt subiectum inferioris, sub illo superioris contineatur, adeo vt à superiori recipiatur cum aliqua contradictione: hæc conditio ponitur ab Aristotele in 1. Poster. cap. 7.

his verbis. quare, aut absolutè necesse est, idem esse genus, aut aliquo modo si debet demonstratio descendere, &c. nā Genus, siue subiectum modo aliquo est idem in scientiis subalternatis, & dum dicimus subiectum modo aliquo debere esse idem, hoc minime debet contrahi ad modum considerandi, sed sat est, vt sit modo aliquo idem ratione rei considerata; Et quoniam ex subiecto sumuntur principia, & principia totius saltem remotè sunt principia partium, inde euenit, quòd si inferior recipit subiectum à superiori, etiam recipiet principia, hinc oritur secunda conditio, quòd principia complexa inferioris sint conclusiones superioris; hoc dixit Aristoteles in 1. Poster. cap. 7. his verbis: Si verò non sit idem genus absolutè, sed vt Musica per Arithmetica huiusmodi demonstrantur quidem similiter, sed differunt, nam ipsum quia, alterius scientiæ est, subiectum enim genus alterum est, sed propter quid est superioris: id ipsum clarius confirmatur ab Aristotele cap. 10. Hæ duæ conditiones ex Aristotele colliguntur non aliæ: Ex quibus infero, & Artem posse verè subalternari scientiæ, & scientiam scientiæ, & artem arti, scientiam verò arti nequaquam. Quod verè ars subalternetur scientiæ, patet de variis artibus, quæ à Physico principia prima, & subiectum recipiunt: Insuper patet de illis artibus, quæ Geometriæ, Stereometriæ, & Arithmetiæ subalternantur, quamuis enim dirigant ea, quæ considerant in varium finem, nihilominus tamen suæ superiori subiiciuntur, & præsertim, quia de ratione operantis est, vt à contemplatione dirigatur, & ideo per hoc seruatur, non euertitur subalternatio: Quòd etiam scientia subalternetur scientiæ patet exemplo Astrologiæ, scientiæ de Iride, & aliarum, quæ quamuis intra suos limites constitutæ non sint scientiæ, quia non resolvunt in prima immediatæ, tamen quia finis earum est veritas, propterea, vt complicatæ cum sua superiori, & virtute eius scientiæ sunt;

sunt; nam Syllogismus cum prosyllogismo scientiam parere potest; & meretur nuncupari demonstratio. Ars quoque subalternari potest Arti; nam artes vni principi arti inservientes, & ad finem eius ordinatæ, dicuntur ei subalternari, quatenus in aliquo uersantur pertinente ad Principem illam artem, & à fine eius tanquam à communi principio diriguntur, ut se habet de artibus ad militarem disciplinam conducentibus. Ex hæcenus explicatis colligere modo ualemus solutionem propositæ difficultatis. Occurrebat dubitatio, utrum metaphysicæ ceteræ omnes scientiæ, & artes subalternentur, dicendum censeo eas subalternari, uel proximè, uel remotè, quòd autem Naturalis philosophia, & mathematica proximè subalternentur patet, quia subiectum inferioris est pars subiecti metaphysicæ, ut dicitur ab Aristotele sub initium quarti metaphy. Præterea metaphysicæ probat principia eorum, ut dicitur in eodem 4. metaphy. & clarius in 1. Poster. cap. 7. ubi hæc uerba leguntur: Sic autem manifestum est, quoniam non est uniuscuiusque propria principia monstrare, erunt enim illa omnium principia, & scientia eorum domina omnium &c. per quæ uerba denotauit metaphysicam; & in eodem capite inquit Aristoteles principia particularium scientiarum habere commune, id autem commune ad metaphysicam pertinet: sic itaque ceteræ omnes artes, & scientiæ subalternantur metaphysicæ, immò Aristoteles in eo capite id tribuit metaphysicæ, & ceteris collocatis sub ea, quod etiam tribuit ceteris subalternatim positis, nempe ut liceat descendere in formanda demonstratione. At inquirunt multi ex Latinis naturalem, & mathematicam minime subalternari metaphysicæ, quoniam hæc scientiæ ualent resolvere usque ad principia per se nota, per quæ alteri scientiæ non subiiciuntur: Falluntur profectò cum hoc dicunt, quoniam hæc scientiæ propriè sumpta principia minime resoluunt usque ad per se nota, sed solum id faciunt

eiunt in nonnullis, quæ sunt principia nostræ cognitionis non rei, ueluti accipit naturalis motum esse, multa entia esse, at loquendo de principiis, quæ etiam causæ sint, uerè subiiciuntur metaphysicæ, & ea recipiunt à metaphysico, ut inquit Aristoteles. Et dum dicitur subalternatas non facere numerum; dicendum est eas non facere numerum, quæ seruant eundem considerandi modum, & ad eundem finem respiciunt, sed dum hæc uariantur, utiq; numerum augere dicuntur.

Constat itaq; duas esse conditiones subalternationis.

Insuper patet, & scientiam scientiæ, & artem scientiæ & artem Arti subalternari posse.

Demum constat metaphysicam sibi cæteras scientias, & artes, uel proximè, uel remotè subalternare.

## FINIS LIBRI TERTII.





ANDREAE DVODI  
FRANCISCI FILII  
PATRITII VENETI

DE  
HABITIBVS INTELLECTVS  
LIBER QVARTVS.



De Scientia.

*Enumeratio Scientiarum. Cap. I.*



SCIENTIAE nomen tribus vsur-  
pari modis satis est conspicuum;  
nonnunquam enim latè accipitur  
pro omni disciplina, quæ metho-  
do, & ordine traditur, in qua si-  
gnificatione, etiam artes, & Ciui-  
lis Prudentia nuncupantur scien-  
tiæ: ideo Aristoteles in Proœmio  
Ethicorum Ciuilem disciplinam  
nuncupauit scientiam, & Galenus in arte parua, medicam

O artem

artem scientiam appellauit; Nonnunquam accipitur id nomen magis propriè pro habitu contemplatiuo per demonstrationem acquisito contradistincto ab actiuo, & effectiuo in qua significatione etiam sapientia est scientia, & in eadem significatione ab Aristotele definita fuit scientia in 1. Poster. Demum accipitur scientia pro habitu nedum contradistincto ab effectiuo, & actiuo, verum etiam a sapientia, & intelligentia, in qua significatione Aristoteles in 6. Ethicorum, scientiam inter habitus intellectus numerauit; In qua postrema significatione consilium meum est, de Scientia in hoc libro verba facere; Vt autem ab eius definitione ordiar, dico scientiam esse habitum intellectus, ac partem speculatricis Philosophiæ, demonstratione acquisitam, quæ in partibus eius quod est, veritatem inquiri, dico in partibus quoniam ea, quæ uniuersè id quod est considerat, sapientia dicta est: Partes eius quod est ad scientiam pertinentes duæ sunt, corpus scilicet physicum, vt prædicitur interno initio motus, & quantum, ut quantum est: Ex his consurgunt duo scientiarum genera Naturalis nempe philosophia, & mathematica: ratio est, quoniam scientiæ omnes debent versari in eo quod est, quod enim non est definitione, demonstratione, causisque caret: propterea ad scientiam non pertinet: Id quod est, vel consideratur uniuersè, uel in parte, si uniuersè sapientiam constituit; si in parte, uel ea pars est substantia separata, uel ne: si est substantia separata ea pariter ad sapientiam pertinet, si autem non est substantia separata, sed aliud quod corporeum, & materiatur, uel est substantia, vel accidens: si est substantia, alia esse non potest nisi Physica, omnis enim substantia corporea, & materiata Physica est, & inde consurgit Physica, si uero est accidens, id accidens, vel consideratur, ut affectio corporis physici, ac terminus eius, & sic ad Physicum pertinet, vel consideratur cum abstractione à corpore physico, quod autem est huiusmodi



iufmodi nil aliud, præter quantitatem eſſe poteſt, quoniã ea ſola eſt prima accidentium, & non expoſcit certum ſub iectum, vt reliqua accidentia, ideo poteſt abſtrahi, & conſiderari ſine ſuo ſubiecto, & inde conſurgit mathematica; His plures inueniri non poſſunt; Naturalis philoſophia cum uerſetur in corpore naturali, quod eſt genus unum ſcibile in multis conueniens, ideo eſt ſcientia una conſiderans communia, & propria ſpecierum eius. De mathematica non ſic ſe habet, ea enim uerſatur in quantitate, quæ in continuam, & diſcretam diſtribuitur, quarum communia pauciſſima ſunt, propria uero plurima; Ideo mathematica communis negligitur, & conſpicua non eſt, quamuis ea quoque dari poſſit, quæ conſideret communia omni quantitati; partes autem apprime ſunt conſpicuæ, earumque diſtinctio manifeſta eſt, cum plurima ea ſint, quæ vel continuæ, vel diſcretæ quantitatis ſunt propria, & ea inter ſe apprime differant. Hinc oritur diſtinctio mathematicarum in Geometriam, & Arithmetica, Geometricæ ſunt, uel puræ, uel mediæ: pura eſt Geometria, cui apprime iuncta eſt Stereometria; mediæ uero ſunt Aſtrologia, Coſmographia, Perſpectiua, Quæſtiones mechanicæ; Arithmeticæ pariter uel ſunt puræ, & eſt Arithmetica, uel mediæ, & eſt muſica.

Conſtat itaque ſcientiam contradiftinctam ab arte, & ſapientia eſſe duplicem, Phyſicam, & mathematicam.

Inſuper patet cur maior in mathematica, quam in Phyſica reperiatnr multitudo, & diſtinctio, quamuis in utriſq;, & communia, & propria inueniantur.

*An Mathematica sit pars Philosophia.*

## Cap. II.



ATVR ALEM Philosophiam esse philosophiæ contemplatiuæ partē fatentur perfectō omnes, de mathematica uero non cōueniunt, nonnulli asserunt, alii negant esse partem philosophiæ. Alexander in Proœmio Priorum eam propterea non esse partem philosophiæ affirmat, quoniam philosophia contemplatiua a græcis Theorica, hoc est rerum diuinarum speculatrix, dicta est; mathematica uero nequaquā diuina, sed sola accidentia speculatur, nō itaque digna est nomine philosophiæ. Confirmatur eadē sentētia ratione ex fine sumpta, nā finis philosophiæ est fœlicitas, ad quā solū remotē parat, non autē proximē perducit Mathematica. Præterea Mathematica substantiam nō considerat, solū versatur in quantitate, & eam imperfectissimē cognoscit, ut ex sequentibus apparebit, nō itaque censerī debet pars philosophiæ. Ideo Aristoteles in 4. metaph. dixit tot esse philosophiæ partes, quot substantiæ; ex aduerso videtur esse pars philosophiæ; nā Aristoteles 12. metaph. contex. 44. mathematicam appellat nomine philosophiæ, & in 6. metaph. contex. 2. eandem appellat Theoricam, quamuis diuina non speculetur. Præterea omnis scientia est pars philosophiæ, ad philosophum enim pertinet bonum, & verum inquirere, cū autem mathematica sit scientia, necessario pars philosophiæ censerī debet; Dicamus itaque philosophiam esse latitudine præditam, & includere partes vel magis, vel minus a fine distantes, & ideo quasdam magis, quasdam minus esse dignas nomine philosophiæ, nomen enim a fine sumptum est; Proxima fini, immo ea, quæ sola finem  
attin-

attingit, & ad illum nos eleuat est metaphysica, eam sequitur Philosophia Naturalis, remotissima est mathematica, idè minimè omnium eo nomine digna est; Insuper mathematica dupliciter potest considerari, primo in se, & ratione eorum, quæ eius sunt propria, secundo, vt iuncta cum aliis scientiis, & ad alias conferens, & eleuans in prima consideratione minus propriè potest dici pars philosophiæ, in altera vero propriè magis, quamuis enim mathematica non speculetur, diuina tamen nos parat, & eleuat ad eorum contemplationem. Ex his constat, quomodo mathematica sit, & non sit Philosophiæ pars, & quomodo rationes pro omni parte solui debeant. Nam mathematica comparata cum aliis partibus Philosophiæ est certitudine quoad nos prima, abstractione media, dignitate, & certitudine quoad naturam postrema, & idè postremo loco digna est nomine Philosophiæ.

*Quas causas consideret mathematicus.*

*Cap. III.*



**Q**UONIAM mathematica est contemplatio quædam, & scientia, ac ei conueniunt principia, causæ, & elementa, vt dicitur in 6. metaphy. iure considerandum occurrit quod genus causæ à mathematico consideretur: Ex vna parte apparet mathematicum includere omne genus causæ, vt opinatur Simplicius in expositione primi tex. primi Phy. & in 2. Phy. nam de forma conueniunt omnes, res enim mathematicæ sunt formæ, quas cū definiat mathematicus, & earum definitionibus vtatur, iure dicitur demonstrare per formam, definitio nanq; formæ forma est; cum definitio sit eadem cum definito. Idè Aristoteles in 2. Phy. 68. dixit mathematicum demonstra-

re per formam, & resolvere quæ sita in definitiones, quæ formæ sunt; Et quoniam forma, & finis in idem venire dicuntur, ut dicitur in 2. Phy. propterea etiam finem videtur includere, quod asseruit Aristoteles in 11. metaphysi. inquiens errare eos, qui aiunt mathematicas carere fine, præsertim cum innumeras præbeant utilitates. Insuper, quia finis videtur supponere causam efficientem, ut inquit Auerroes, in cap. de substantia orbis. ideo etiam efficientem includere videntur; Et confirmatur, quoniam inquit Auerroes in 2. Poster. 38. medium demonstrationis esse extra quiditatem eius, quod demonstratur, causa autem quæ est extra quiditatem externa est, & dicitur vel finis, vel efficiens. Quod etiam mathematicus consideret materiam patet ex Aristotele, qui in 7. necnon in 8. metaphy. eis tribuit materiam intelligibilem; ut etiam in 3. de Anima. contex. 10. & in 2. Poster. exemplo mathematico declaravit materiam ingredi demonstrationem; Ex aduerso inquit Alexander ex relatione Simplicii in Proëmio Phy. commento 1. & cum eo Auerroes mathematicum ex causis solam considerare formam, & Aristoteles in 2. Phy. 68. id ipsum affirmat, inquiens mathematicum vltimò resolvere in formam, & quid est: Pro resolutione præsentis difficultatis, dico, mathematicam posse considerari dupliciter, primò ut est scientia, & habitus nostri intellectus per demonstrationem acquisitus, in aliquem finem ordinatus, in qua consideratione ei proculdubio convenire possunt modo aliquo omnia genera causarum; Secundo potest considerari, ut scientia demonstrans de suo subiecto affectiones per mediam causam, in qua consideratione dico mathematicum propriè considerare solam formam & per solam formam demonstrare; Hoc patet, quia mathematicus abstrahit à principiis motus, & à propriè sumpta materia; ideo nec causam efficientem considerat, quæ per motum definitur, nec propriè sumptum finem, qui causam efficientem

cientem supponit, vt dicitur ab Aristotele, in 3. metaphy. & ab Auerroë in cap. de substantia orbis; pariter nec materiam propriè considerat, cum ab eâ abstrahat, & cum versetur in solis formis, & earum inquirat affectiones, iure pro medio maximè vtitur definitionibus formarum, à quibus affectiones fluunt, quæ cum sint definitiones formarum, & definitio sit eadem cum definito, rectè dicuntur formæ, & mathematicis dicitur per formam demonstrare: Ad rationes pro alia parte, dum ostenditur mathematicis conuenire finem: Respondeo eis conuenire finem, vt scientiæ sunt, & apprimè vtilis, at non finem, quæ considerent, & per quem demonstrant; & dum dicitur formam in idem venire cum fine; Respondeo id non esse verum de mathematicis formis, quoniam mathematicus abstrahit à motu, forma enim in idem venit cum fine, quatenus est finis generationis, & motus, & hanc censeo causam, quod formæ mathematicæ non veniant in idem cum fine, vt colligitur ex Aristotele 3. metaphy. contex. 3. non autem eam, quam referente simplicio in 2. Phy. 73. assererat Alexander, qui assererat formam in idem venire cum fine, dum ea consideratur sub ratione boni, vt quod melius sit homini rectam habere figuram, quàm pronam, & de mathematicis non dicimus, non enim asserimus melius esse circulo habere lineas ductas à centro æquales, quàm non æquales: At hæc ratio læuis est, quoniam forma obtinet rationem finis, non respectu sui, sed respectu alterius, & præsertim agentis, & ideo non debemus considerare an melius sit circulo habere lineas à centro ductas æquales, necne, quoniam hoc est esse circuli, & sine hoc non esset circulus, sed figura circuli obtinet rationem finis, dum consideratur in alio, vt finis operantis, & producentis illum; habent itaq; mathematicæ finem extra eas positum, ad quem conferunt, sed non demonstrant per eum, neq; illum considerant cum abstrahant à motu; ex quo se-

quo sequitur, quòd neq; etiam considerant causam effici-  
cientem, cum efficiens sit principium indè motus: Et dum  
additur, quia demonstratio est per ea, quæ sunt extra qui-  
ditatem; Respondeo quamuis medium non sit quid, sed  
dicat propter quid affectionis, quæ demonstratur, attamen  
dicit quid subiecti & explicat formam aliquam, à  
qua fluit ea affectio, quæ non subit rationem finis, vel effi-  
cientis, nisi includat motum; nam dicimus quod generās,  
& dans formam dat consequentia formam. Ad instan-  
tiam de materia, respondeo mathematicum includere ma-  
teriam, non propriè sumptam, sed intelligibilem, & per  
eam non propriè demonstrare, nisi quatenus est pars defi-  
nitionis, & modo aliquo ad formam redigitur, & quam-  
uis Aristoteles in 2. Poster. indicet materiam mathemati-  
corum esse medium demonstrationis, dicendum est, quòd  
id facit gratia exempli, non autem, quia verè mathemati-  
cus per eam demonstret, nisi modo iam explicato.  
Colligamus itaq; mathematicum propriè per solam for-  
mam demonstrare.

*Quæ sit materia mathematicorum Opinio Al-  
berti. Cap. IIII.*



MATHEMATICIS cōuenire materiam  
sæpè ab Aristotele affirmatur, vt patet ex  
3. de Anima. 11. ex 7. metaphy. 35. 39. ex 8.  
pariter metaphy. context. 16. consuevit Phi-  
losophus materiam diuidere in sensibile,  
& intelligibilem, ac eam mathematicorum intelligibile  
esse dixit; Verùm quæ nam sit huiusmodi intelligibilis  
materia non manifestè constat; censuit magnus Albertus  
in 5. metaphy. tractatu 3. cap. 2. & in 1. Phy. cap. 3. & cum  
eo D. Thomas, Ioannes Gandauensis, Egidius, & multi ex  
Latinis,



Latinis, materiam intelligibilem esse substantiam priorem qualitatibus sensibilibus, considerat enim hunc ordinem, primò materiam primam, secundo formam substantiæ, tertio quantitatem, quarto qualitates sensibiles; Aggregatum ex prima materia, & forma substantiæ asserunt esse materiam intelligibilem, quæ sub sensum non cadit, sed solo intellectu percipitur, siue illa substantiæ forma sit forma corporis de prædicamento substantiæ, ut censuit magnus Albertus, siue sit alia forma; per quam corpus constituatur, ut censet D. Thomas parum refert, hoc itaque aggregatum iudicant esse materiam intelligibilem, materiam verò sensibilem inquitunt esse corpoream substantiam qualitatibus affectam, censent itaque Mathematicum considerare quantum sciunctum à materia sensibili, quæ in quarto gradu posita est, non autem ab intelligibili: hinc magnus Albertus ponit triplex corpus, vnum Metaphysicum, & est compositum ex prima materia, & formâ corporis, quæ substantia est, alterum Mathematicum, quòd superaddit quantitatem, tertium Physicum, quòd qualitates includit. Fundamentum principale, quo utitur D. Thomas in 2. Phy. est quoniam Aristoteles in 5. Metaphy. inquit prius posse abstrahi à suo posteriore, at non è contrà: cum itaque materia sensilis sit posterior quantitate, materia verò intelligibilis sit prior, iure Mathematicus valet abstrahere à materia sensibili posteriore, non autem ab intelligibili priore; Confirmatur eadem sententia, primò, quia si Mathematicus abstraheret à substantia, versaretur in eo, quod non est, quoniam accidentis esse est alteri hoc est substantiæ inherere. Insuper sua abstractio esset mendacium, quia consideraret quantitatem sine substantia, sine qua non habet esse, & ideo rem consideraret secus ac esset: Præterea si secus esset, euerteretur sententia Aristotelis in 7. metaphy. context. 4. dicentis substantiam esse priorem accidentibus co-

gnitione, & natura, ita enim accidens, sine substantia cognosceretur. Præterea euerteretur sententia Aristotelis in 4. metaph. contex. 4. dicentis, tot esse philosophiæ partes, quot sunt substantiæ. Insuper euerteretur eiusdem philosophi sententia 2. metaph. contex. 4. ut res se habet ad esse, ita ad veritatem; quod autem hæc sequantur manifeste constat. His itaque, & similibus rationibus moti nonnulli affirmarunt mathematicum minimè a substantia abstrahere, sed definire per eam, & addunt mathematicum in suis definitionibus includere substantiam aliquotium modorum: uel scilicet propria consideratione, & virtute, eam in definitionibus exprimendo, uel saltem confuse eam significando; uel demum accipiendo definitiones suas a metaphysico, qui per substantiam definit.

Prima itaque opinio est materiam intelligibilem, & mathematicam esse substantiam ex sola prima materia, & forma substantiæ constata, quæ sit in potentia ad quantitatem.

*Euersio huius opinionis. Cap. V.*



**M**ATERIAM mathematicorum esse substantiam profectò aduersatur Aristoteli, rationi, necnon mathematicis contemplationibus; aduersatur primo Aristoteli, qui in 12. metaph. 44. inquit ex mathematicis solam Astrologiam contemplari substantiam: neque satisfacit solutio dicentium, cæteras considerare substantiâ solum confuse, Astrologiam vero distincte, vel asserentiam, cæteras contemplari solam substantiam intelligibilem, Astrologiam vero sensibilem; hæc inquam euasio nulla est; primò, quia Astrologus solum confuse substantiam considerat, non distincte ut docuit Simplicius ex sententia Gemini,

Gemini, & Alexandri in 2. Phy. 17. & Auerroes in 1. metaphy. commento 19. Secundo, quia Aristoteles absolute inquit cæteras mathematicas non considerare substantiã. Insuper Aristoteles non de modo considerationis, vel confuso, vel distincto loquitur, sed absolute de cõsideratione substantiæ. Præterea Aristoteles in 11. metaphy. cap. 3. inquit mathematicum cæteris circumscriptis solum sibi de relinquere quantum, & continuum. Præterea considero tertium contextum secundi de Anima, ubi inquit Aristoteles corpus physicum esse principium cæterorum corporum, & consequenter esse principium corporis mathematici, quod minime verum est, si corpus mathematicum esset substantia, & includeret materiam, & formam corporis, hoc enim est prius corpore physico, & consequenter corpus mathematicum esset principium corporis physici, non è contra. Præterea id ipsum patet ex mathematicis contemplationibus, & ex omnibus pertinentibus ad eas; nam primo si ad principia respicimus inuenimus punctũ, & unitatem principia statui, quæ nullam includunt substantiam, & ideo inquit Geometra, ex fluxu puncti produci lineam, ex fluxu lineæ superficiem, ex fluxu superficiæ corpus, in qua magnitudinum constitutione, nulla de materia, quæ de substantia est fit mentio: Insuper cognoscimus mathematicum ex causis solam considerare formam, & in eam postremo resoluerè demonstrationes, ut dicitur in 2. Phy. 68. Præterea considerando omnes definitiones, quibus utuntur mathematici in nulla apparet ullo pacto materia, quæ substantia sit, sic linea dicitur longitudo, sine latitudine, superficies dicitur longitudo, & latitudine prædita carens profunditate, in quibus nulla de substantia fit mentio. Præterea hoc patet considerando proprietates mathematicorum, dũ vtimur modo considerandi mathematico, dicimus corpus posse augeri in infinitũ, corpus in infinitum reddi posse rarius, uel densius, quæ

minime essent uera, nisi mathematicus abstraheret a materia, quæ substantia est, materia enim quæ est substantia habet certos terminos extensionis, raritatis, & densitatis. Præterea mathematicus dicitur abstrahere à motu, dicitur scientia ex abstractione, & certissima, quæ ei non conuenirent, nisi abstraheret à materia prima, & à substantia; quod ostendo; nam primo dicitur abstrahere à motu, non autem physicus, ut dicitur in 2. Physic. 19. at Physicus propterea dicitur includere motum, non quia definiat substantias physicas per motum, sed quia eas definit per principia interna motus; at si mathematicus non abstraheret a prima materia, & à substantia, ipse quoq; non diceretur abstrahere a motu, quia non abstraheret à materia, quæ principium est generationis, & transmutationis. Insuper non diceretur scientia ex abstractione, quoniam omnis scientia utitur abstractione, & omnis scientia ualet abstrahere prius à posteriori, & definire sine posteriori: & tamen sola mathematica nuncupatur ab Aristotele scientia ex abstractione, propterea putandum est, id ex eo euenire, quia sola abstrahit à suo priori, & a substantia, sibi subiecta, quod manifestissime affirmauit Aristoteles in 2. Phy. 18. inquit, de his igitur agit mathematicus, sed non ea considerat, ut remini sunt physici corporis, neq; accidentia speculatur quatenus talibus existentibus accidunt, &c. asserit itaq; Philosophus mathematicū abstrahere accidentia ab eo, cui accidunt, id autem, cui accidunt prius est nō posterius, nam ut dicitur in in 1. Phy. contex. 5 2. subiectum prius est predicato: Demum scientia mathematica non esset certissima; nam certitudo mathematica oritur ex re considerata, & modo considerandi simul, præsertim tamen ex modo considerandi; oritur ex re considerata, quia considerat quantum quod est sensibile commune ex se satis conspicuum; sed hoc nō est satis, quoniam huiusmodi quantitates etiam confide-  
rantur

antur à Physico, cuius considerationes non dicuntur certæ; idè præsertim ea certitudo pendet ex modo considerandi, quatenus scilicet quantitatis non considerat obscuræ, & Latentia principia; quæ substantiæ sunt; insuper quatenus abstrahit à materia prima, quæ inconstantia, & obscuritatis est origo, propterea per abstractionem à materia scientiæ includunt acriuiam, vt dicitur in 1. Poster. Ex quo constar, quòd si mathematicæ includerent materiam primam essent obscuræ, obnoxia inconstantia, & permutationi.

Patet itaq; veram non esse eorum sententiam, qui inquit mathematicum non abstrahere à substantia.

*Opinio Propria. Cap. VI.*



**Q**UONIAM patuit mathematicorum materiã, quæ intelligibilis nuncupatur non esse substantiam, ideo cum Simplicio, Philopono, Themistio, Alexandro, Eustratio, immo cum Platone, & Aristotele colligo mathematicum in solis accidentibus versari, & abstrahere à substantia: remanet tamè considerandum, quid nam sit ea materia, quæ intelligibilis dicitur: ea profecto non est substantia vt patuit, neq; est quantitas. sciuncta à qualitatibus, vt inquit Zimara Theoremate. 7. nam quantitas est res considerata à mathematico, cui materia intelligibilis conuenit, non autem est ipsa materia. Inquit Simplicius in Proœmio Phy. in expositione primi. contex. materiam mathematicorum esse numeros, interualla, & sonos; at nimium confusè eam explicauit, propterea dicamus materiam mathematicorum esse continuum, vt dicitur in 3. de Anima. 11. & partes, vt dicitur in 2. Poster. & in 7. metaphy. 39. continuum nuncupatur materia, primò, quia est illud, quod terminis clauditur,

tur, & terminatur; secundo, quia à continuo oritur infinitum, & diuifio, quæ duo sunt conditiones materiæ, & ex materia perdere dicuntur: Partes quoq; frequenter ab Aristotele, & in 6. metaphy. & in 7. & in 2. Phy. & in 2. Postep. dicuntur materiæ, primo in ordine ad totum, quod est, vt forma adueniens, vel confurgens ex partibus, secundo quia in partibus consideratur diuifio quædam, multitudo, & potentia, quæ à materia proficiscuntur, & ratione materiæ rebus conueniunt. Hæ duæ intelligibiles materiæ, ita se habent, vt prima includat secundam, non è contra: cui enim conuenit continuum, conueniunt & partes, non è conuerso: Geometriæ conuenit vtraq; materia; Arithmeticæ vna solum nempe partes, ideo Arithmetica dicitur absolutè prior, magis abiuncta, & certior quàm Geometria: Et quoniam ex materia oritur infinitum, ideo vtriq; quantitati, & continuæ, & discretæ, infinitum conuenit; dicitur continuum natum augeri, natumq; diuidi in infinitum, discretum verò dicitur natum in infinitum augeri, non autem in infinitum diuidi; Insuper quoniam continuum magis est materiatur, quam discretum, & infinitum insequitur materiam; iure dictum est ab Aristotele in 3. Phy. contex. 1. infinitum primo apparere in continuo, quia enim continuum est diuifibile in infinitum, ideo numerus partium potest in infinitum augeri: Ex quo lucidè soluitur quædam dubitatio, quæ nonnullos turbauit, & varia dixerunt: quibus potius implicarunt quam explicarunt ambiguitatem: Difficultas est, quia si Arithmetica est prior, quàm Geometria, & priori prius conuenit affectio, quomodo infinitum dicitur primo conuenire continuo, mox numero? Ad quam dicimus, quod Arithmetica absolutè est prior, at sub ratione inclusionis materiæ non prior, sed posterior est: Geometria enim magis materiatur, ideo infinitum, quod insequitur materiam primo conuenit Geometriæ, infinitum enim insequitur eam conditionem,



ditionem, per quam scientia est posterior, ideo prius posteriori conuenit. Neq; est difficile aduersis rationibus satisfacere. Ad primam dum dicitur posterius non posse abstrahi à suo priori; Inquit Sueffanus in 2. Phy. mathematicum non abstrahere, vel quia definitiones accipit à metaphysico, vel quia confusè saltem materiam includit: Eius sententia vera non est, iam patuit in præcedentibus nullo modo in mathematica consideratione, & definitionibus includi materiam, accedit, quod si materia includeretur in principiis, etiam includeretur in aliis pendentibus ab eis, quod tamen minime verum est. Dicamus itaq; mathematicas in suo genere, & modo considerandi esse quidem perfectas, absolutè tamen esse apprimè diminutas, & imperfectas, vt manifestauimus: posterius in cognitione absolutè perfecta non potest abstrahi à suo priori, sed in cognitione perfecta in genere, absolutè verò imperfecta potest abstrahi. Sententia Aristotelis vera est de scientia distincta, & absolutè perfecta, dum enim absolutè loquimur, ad id, quod absolutè perfectum est respicimus. Dum additur, quia versaretur in eo, quod non est, & eius abstractio esset mendacium. Respondeo mathematicum non versari in eo, quod non est, sed in ente, non tamen considerato sub ratione entis, sed sub ratione quanti, & ideo per accidens versatur in ente, quia non id considerat, vt ens, sed consideratione posteriore supponente rationem per quam est ens. Insuper quamuis de ratione accidentis, vt accidens est, sit alteri inherere, tamen non est de ratione eius, dum consideratur, vt quantum, nam prætermittit prius, & solum considerat posterius: non enim mathematicus considerat quantum sub ratione accidentis, neq; eius abstractio est mendacium, quia solum est, cum præcisione considerando quantitatem, non considerata substantia: non autem cum cōpositione, & diuisione asserendo quantitatem subsistere sine substantia, hoc enim mendacium esset.

esset. Ad Aristotelem in 7. metaphy. dicentem substantiam esse priorem accidentibus cognitione; & natura; Respondeo id esse verum de cognitione absolute perfecta, & distincta: at cognitio principiorum mathematicæ est perfecta in genere, absolute autem est confusa, & imperfecta: Ad auctoritatem ex 4. metaphy. contex. 4. dico tot esse partes Philosophiæ propriè sumptæ, quot sunt substantiæ, at mathematica non est propriè dicta philosophia, vt patuit: Ad Aristotelem in 2. metaphy. contex. 4. dico ut res se habet ad esse, ita ad veritatem in cognitione absolute perfecta. Insuper sat est pro veritate, vt ea, quæ rebus tribuuntur eis conueniant, & hoc seruatur etiam in mathematicis:

Patet itaq; materiam intelligibilem mathematicorū non esse substantiam, sed continuum, & partes. Ostensum est etiam Geometriæ vtrinq; materiam conuenire, Arithmeticæ vnicam. Demum solutæ sunt aduersæ rationes, & est ostensum, cur infinitum prius conueniat continuo.

*An mathematica mediæ sint magis Physicæ, vel magis mathematicæ. Cap. VII.*

**I**NTER varias difficultates, quæ pertinent ad eas disciplinas, quæ mediare dicuntur inter Physicas, & mathematicas, hæc instituto nostro præsertim inferuire videtur, an magis sint mathematicæ, vel potius magis Physicæ: Nonnulli existimarunt eas proximius accedere ad Physicam considerationem, quod præsertim ex Aristotele colligi existimant, qui in 2. Phy. contex. 20. de eis loquens, inquit, demonstrant autem hoc, & quæ ex mathematicis magis Physicæ sunt, vt Astrologia, &c. Insuper  
in

in eodem contex. inquit Perspectiuum considerare lineā,  
 vt Physica est, cum dicat, vt Physica est, quia reduplicatio  
 respicit formam, ideo indicat modum considerandi esse  
 physicum, & quia a forma fit denominatio, iurè itaq; ab-  
 solutè magis physica censi debet: Confirmatur, quia de-  
 nominatio recipitur a fine, vt inquit Aristoteles in 2. Phy.  
 14. & in 5. Phy. 48. sed scientiæ mediæ ordiuntur a consi-  
 deratione mathematica, desinunt in considerationem na-  
 turalem, nec tando separata a mathematico cum corpore  
 physico, vt inquit Aristoteles in 2. Phy. 20. quare absolutè  
 nominari debent potius physica, quàm mathematica.  
 Ideo D. Thomas in 2. Phy. in explicatione contex. 20. cen-  
 set eas magis esse physicas. Hæc opinio nec Aristoteli, nec  
 rationi est consona; nam Aristoteles ubi de eis facit men-  
 tionem, semper asserit illas esse ex genere mathematica-  
 rum, vt patet in 2. Phy. 20. & 2. metaph. 44. 2. metaph. si-  
 cap. 2. 1. Posterio. & alibi, quod minime faceret si magis  
 essent physica, denominatio enim fit ex eo, quod extupe-  
 rat, ac dominatur: Quod ratione ostenditur, nam huius-  
 modi scientiæ subalternari dicuntur mathematicis puris,  
 non physica; subalternatæ autem sunt ex genere finarum  
 superiorum. Præterea scientiæ confurgunt ex demonstra-  
 tione, demonstrationes vñ habent a medio, & a princi-  
 piis, media, & principia, quibus vtuntur hæ disciplinæ me-  
 diæ, sunt mathematica non physica, quare demonstratio  
 erit mathematica, & propterea etiam scientia; Confir-  
 matur postremò, quia quamuis hæ scientiæ mediæ dicantur  
 nec tere sciuncta a mathematico cum rebus physicis;  
 attamen solum nec tunt, non autem propterea considerant  
 interna principia, & naturam rerum physicarum: ut cum  
 Gemino dixit Alexander, & approbavit simplicius in 2.  
 Physi. 17. quamuis enim Astronomus figuram rotundam  
 iungat Cœlo, & consideret motum Cœli, tamen interro-  
 gatus, quæ sit substantia Cœli, a quo moueatur Cœlum;

profectò vt Astronomus non cognoscit, & respondere nõ valet, & D. Thomas quamuis in 2. Phy. 20. afferat has disciplinas magis esse physicas, attamen in expositione Boetii inquit eas magis esse mathematicas: Iauellus vollens remouere contradictionem dixit has disciplinas medias ratione materiæ, & finis magis esse naturales, ratione principiorum, & medii magis esse physicas: at hoc satisfacere nõ videtur; Primo, quia adhuc non erit soluta dubitatio, adhuc quæram nunquid absolutè debeant cenferi magis physica, quam mathematica: præterea verum non est quod ratione materiæ, & finis magis sint physica, nam materiã recipiunt à mathematico, cui subiiciuntur, & eam considerant, vt quanta, quæ est mathematica consideratio, & propterea ea materia potius est mathematica; Pariter verus finis mathematicus est, non physicus, nam si finis sumitur; vt in idem venit cum forma, & modo considerandi, vtique forma, & considerandi modus mathematicus est: Præterea finis demonstrationum, & termini sunt principia, & media earum, in quæ fit resolutio demonstrationum, & in quæ resolutio terminatur, vt inquit Aristoteles in 2. Phy. 68. at huiusmodi mathematica sunt, quare proprium finẽ considerando, à quo recipitur denominatio, potius est mathematicus, quàm physicus, nõ itaq; vera est ratio D. Thomæ in 2. Phy. dum inquit: Huiusmodi autem scientiæ licet sint mediæ inter scientiam naturalem, & mathematicam, tamen dicuntur hic à Philosopho magis naturales, quàm mathematica, quia vnumquodq; denominatur, & speciem habet à termino, vnde quia harum scientiarum consideratio terminatur ad materiam naturalem, licet per principia mathematica procedat, magis sunt naturales, quàm mathematica, hæc inquam ratio nullius momenti est, quia quamuis dicatur desinere ad rem naturalem, quia nec sunt rem abiunctam cum corpore physico, tamen hæc non est finis demonstrationis, & scientiæ, vt scientia est, à quo

quo debet accipi denominatio, nam si id esset absolute deberent dici magis physicae, cuius oppositum ipsemet affirmat in expositione Boetii, quare dicamus D. Thomā hæc protulisse, quia minus rectè assumpsit verba Aristotelis in 2. Phy. Colligamus itaq; eas absolute magis esse mathematicas, & esse ex genere mathematicarum; & dum Aristotelēs inquit eas esse magis physicas, dico Aristotelem se declarare, nuncupat eas magis physicas non absolute, sed inter mathematicas, nam absolute eas nuncupat, & asserit esse mathematicas, facta tamen comparatione inter mathematicas puras, & medias, ait eas magis accedere ad Physicam, supple quàm accedāt puræ mathematicæ; nam puræ mathematicæ magis distant à consideratione physica, & est, ac si diceret inter Cœli orbes lunam esse magis elementarem, ex eo tamen non sequitur, ut magis sit elementaris, quàm Cœlestis: & dum additur quia Aristoteles inquit Perspectivum considerare lineam, ut Physica est: Respondeo eam non esse veram reduplicationem, sed solum denotare, quod considerat lineam, ut Physica est, hoc est neſtendo illam cum materia, & accedendo modo aliquo ad considerationem physicam, non autem quia eā considerat modo considerandi physico, nam id falsum profecto esset: Ad postremam confirmationem, quia desinunt in considerationem naturalem: Responsio patet ex dictis, quamvis enim neſtant rem mathematicam cum physica, & in hoc desinant, tamen non eam considerant, ut pendet ab internis principiis eius, & à natura, neq; ille est finis scientiæ, & demonstrationis, à quo sumitur denominatio; nam huiusmodi est medium demonstrationis, quod cum sit mathematicum, illæ scientiæ debent iudicari absolute mathematicæ.

Constat itaq; errare eos, qui mathematicas medias magis censent esse physicas.

Constat insuper eas absolute esse mathematicas, facta ta-

men comparatione cum purè mathematecis eas magis  
esse similes physicæ,quàm puræ mathematicæ.  
Demum patet rationes, & fundamenta primæ opinionis  
læuia esse,immo ex eis colligi oppositum potius.

*De naturali scientia in quo versetur.*

*Cap. VIII.*



**N**ATURALIS philosophia tam latè pa-  
tet, ac ad eò se extendit ad omnia, vt puta-  
uerint primi philosophi, veluti Empedo-  
cles, Demeritus, & alii hanc esse philoso-  
phiā primā, & omniū supremā, nil enim in  
vniuerso reperitur, ad quod modo aliquo non se extendat  
eius consideratio, quorum sententia vera, equidem esset,  
nisi supra physica corpora aliquid diuinius reperiretur, vt  
eorum fuit sententia: verum quia diuinæ mentes mundo  
præsunt, ideo vt corporeus mundus Deo, ita naturalis phi-  
losophia metaphysicæ subiicitur: Inter ea, quæ de natu-  
rali philosophia nobis considerata occurrunt, hoc princi-  
patum obtinet, quod nam dicatur esse genus illud scibile,  
siue materia, & subiectum in quo versatur, qua de re cum  
multa dicantur, & sententiæ sint variæ, hanc potiore cen-  
seo, vt corpus physicum ea ratione, qua physicum subie-  
ctum eius, & materia esse dicatur, dum dico corpus phy-  
sicum, vt physicum nil aliud denoto nisi corpus natura con-  
stans præditum interno principio motus vel mutationis:  
& quia huiusmodi est vniuersus mundus corporeus iure  
subiectum naturalis philosophiæ dici debet mundus cor-  
poreus, vt præditus interno principio motus. Hac de re  
quamuis Latini sint discordes, tamen græci miro consensu  
conuenerunt, & iure quidem, nam id censei debet subie-  
ctum, cuius principia, affectiones, & partes quæruntur, &  
ad quod



ad quod omnia referuntur, quæ in scientia considerantur: huiusmodi autem proculdubio est corpus physicum, nam Aristoteles in libris Physicorum, corporis physici declarat principia, corpus enim physicum, vel mortale, vel æternum est; principia corporis physici mortalis in primis libris declarantur, principia corporis physici æterni per quandam analogicam conuenientiam explicantur in eodem primo libro propriè tamen & distinctè in octauo Phy. manifestantur; ea namq; sunt motor, & mobile: Insuper in 3. Phy. proponuntur explicandæ communes affectiones corporis physici, & in sequentibus libris declarantur; Demum in libris subsequen- tibus singulæ species corporis physici manifestantur, & nil consideratur cuius declaratio non referatur ad explicationem corporis physici, iurè itaq; corpus physicum est subiectum, quod manifestissimè indicauit Aristoteles in principio primi, & tertii. de cœlo. D. Thomas in 1. Physicorum dixit ens mobile esse subiectum, sectatores eius non conueniunt, quid per ens mobile denota- uerit, at prætermis- sis eorum dis- cussionibus, assero per ens mobile proculdubio denotasse corpus physicum, nam mobile physicum circumscribit, ideo etiam Aristoteles in 6. metaphy. & in 12. ait naturalem in re mobili versari, mobile veluti nobis. notius circumscribit physicum, vt motus, circumscribit naturam, rectius tamen loquimur dicendo physicum, quàm mobile, quoniam physicum est principium, quod circumscribitur, & est prius, ratione cuius corpora mouentur, & à physico considerantur, quod autem per ens denotauerit illud, quod corpus est, ipsemet manifestauit in 1. contex. primi Phy. inquiens. De his quæ pend- ent à materia, ne dum quoad esse, sed etiam quoad ratio- nem est naturalis philosophia, & quia omne, quod habet materiam mobile est, ideo omne mobile est subiectum; & post pauca: De his igitur, quæ habent in se principium motus est scientia naturalis &c. Ex his constat D. Thomã nomine

nomine entis denotasse corpus, quod enim materiam includit, & præditum est principio motus, proculdubio corpus est: quod si asseruit subiectum esse ens, & non corpus cum nomine entis denotauerit corpus, ipsemet rationem in eodem loco assignat, inquiens: non dico autem corpus mobile, quia omne mobile esse corpus probatur in isto libro, nulla autem scientia probat suum subiectum, ideo statim in principio de Cælo incipit notificare corpus &c. censet itaq; subiectum esse illud ens, quod est mobile, ens mobile est corpus, at id esse corpus non constat, sed ostenditur in 6. Phy. & propterea debemus subiectum proferre sub ratione notionis, huiusmodi est ens mobile: constat enim omne mobile esse ens, at minime constat esse corpus; Propterea nonnunquam etiam idem D. Thomas dicit subiectum esse corpus mobile, ut facit in libro de Cælo, necnō in 4. Phy. in expositione tex. 64. & in 1. Poster. nouit enim corpus mobile, & ens mobile idem esse, sola ratione distinguui: solum asseruit in Prooemio Phy. absolute loquendo debere dici ens mobile esse subiectum, non quia non idem sit cum corpore nobili, sed quia non patet esse idem, & notum est omne mobile esse ens, non autem esse corpus & ab Aristotele in 6. Phy. ostenditur hoc non illud: ex his constat primò Diuum Thomam ratione rei non dissentire à Magno Alberto, & Egidio, qui dixerunt corpus esse subiectum: constat secundo eum in solis verbis dissentire à Græcis expositoribus: Patet 3. cum sibi ipsi constare, nec sibi aduersari, ut inquit Pomponatius, & censent alii multi: Addo quarto quamuis sententia D. Thomæ de subiecto naturalis philosophiæ uera sit, tamen rectius loqueretur si diceret corpus physicum esse subiectum, quam asserendo ens mobile; neq; alicuius momenti est ratio eius, dū ostendit nos debere accipere ens, & non corpus, quia dum asserimus corpus physicum esse subiectum proculdubio ex se cōstat dari corpora physica prædita interno principio motus, ut

tus, vt dicebat Aristoteles in 2. Phy. contex. 6. & hoc satis est pro præexistenti cognitione subiecti: Præterea ea ratio D. Thomæ supponit, quod si darentur mobilia, quæ essent entia, & non corpora, quod ea ad physicū pertinerent, quæ sententia, vt censeo uera non est; nam Angeli, vt mobiles noti Theologis, & anima se mouens ex sententia Platonis proculdubio ad Physicum non pertinent, quamuis concederetur ab Aristotele, quod ex se mouerentur; quia ut inquit in secūdo Phy. & in calce primi: Physicus tenetur eas formas considerare, quæ sunt mortales, quæ sunt termini generationis, & quæ nequeunt separari à materia nisi sola ratione.

Ex his itaq; constat subiectum naturalis phylosophiæ esse corpus physicum.

Constat secundo corpus physicum esse Mundum corporeum præditum interno initio motus.

Patet Demum D. Thomam in verbis potius, quam in sententia dissentire ab Alberto, Egidio, & Græcis expositoribus.

## *Diuisio Naturalis Philosophiæ.*

### *Cap. IX.*



**Q**UONIAM scientia actu est eadem cum re scibili, vt in 3. de Anima. 37. testatur Aristoteles, scientia enim est res scibilis in esse cognito, & spiritali, siue, quod idem est per imitationem, & repræsentationem. Ac insuper, quia pertinentia ad naturalem philosophum variis modis diuidi possunt: Propterea etiam naturalis philosophia multiplici ratione in partes varias secari nata est: primo diuiditur, quoniam uel est de communibus omni corpori naturali, vel de his, quæ propria sunt singula-  
rum

rum partium : de communibus agitur in libris 8. Phy. in aliis ad magis propria descenditur: hanc diuisionem tetigit Aristoteles in 1. Phy. 57. inquit est enim secundum naturam cōmunia primo dicentes, mox circa unūquodq; propria speculari: Insuper libri ad naturalem philosophiā pertinentes, vel sunt de natura infra animam collocata; vel sunt de natura per uniuersum animæ mortalium gradum extensa; De natura infra animam collocata agitur vsq; ad libros de Animalibus, & absoluitur eius consideratio in libris Meteorum: De natura autem, ut eadem est cū anima agitur in reliquis libris: Hanc distinctionem innuit Aristoteles in Proëmio 1. Meteorum, ubi repetens declarata in præcedentibus, addit Reliquum est, aliquid huius methodi, quod Meteorologiam appellant, indicat Aristoteles eius methodi, & primæ partis solam superesse Meteorologiam, & ita manifestat libros Meteorum esse finem primæ partis Naturalis philosophiæ, cui succedunt pro altera parte libri de Animalibus, & plantis: Diuiditur, & tertio Naturalis philosophia in partem de principiis, quales sunt primi duo physicorum, & libri de Anima; in Libros de corporibus physicis per naturam infra animam collocatam, ut libri de Cœlo, & Meteorologici: in libros de habentibus corpus, quales sunt libri de Animalibus, demum in libros de affectionibus, ut sex postremi libri Phy. Libri de ortu, & interitu, & demum libri illi, qui vulgo parua naturalia nuncupantur. Hanc diuisionem indicauit Aristoteles in 1. contex. primi de Cœlo, ubi naturalem philosophiam dixit versari in consideratione corporum, habentium corpus, principiorum, & affectionum: Postremo diuiditur Naturalis philosophia in sex potiores partes: In prima agitur de communibus principiis, & affectionibus: In secunda agitur de Mundo, & præsertim de parte eius æterna: In tertia, de his, quæ sunt communia rebus mortalibus solum, & præsertim de simplicium corporum

corporum ortu, & interitu: In quarta affectionibus tendentium ad mixtionem, vsque ad perfectè mixta: In quinta de Animalibus, anima, & affectionibus Animalium: In postrema de Plantis: ex his diuisionibus primò colligo considerationem animæ verè esse physicam, non autem mediare inter considerationem physicam, & diuinam, vt minus rectè censuit simplicius, qui considerans, quòd anima rationalis serè ab omnibus media iudicatur inter physica, & diuina, & præsertim a platonicijs, ac insuper putans animam non esse naturam, sed supra naturam, etiam censuit eius considerationem esse supra considerationem naturalem, & mediare inter Naturalem Philosophiam, & diuinam: at errauit profectò, omnis epim forma substantiæ a materia pendens uerè natura est, & ad naturalem pertinet; anima uerò rationalis varia consideratione partim ad Physicum, partim ad diuinum pertinet; Insuper colligo, libros de fossilibus, & metallis redigi ad partem meteorologicam, & inter quartum Meteorum, & libros de Animalibus alium gradum corporum naturalium non mediare: hoc manifestauit Aristoteles in talce quarti Meteorum, ubi iunxit libros Meteorum, cum libris de Animalibus, quod etiam indicauit in Proœmio primi Meteorum.

Colligo itaque Naturali Philosophiæ quatuor diuisiones non optimè conuenire.

Insuper Animalium, Animæq; considerationem verè esse physicam.

Demum libros de Mineralibus nouum gradum ab enumeratis distinctum non constituere.

*De Communibus attinentibus ad Naturalem  
Philosophiam. Cap. X.*



**Q**UONIAM institutum meum est de habitibus Animæ solum vniuersè disserere, propterea loquens de Naturali Philosophia in communibus nonnullis versabor, propria vero singulis eius partibus prætermittam, ne ab instituto meo nimium recedam. De Communibus ad vniuersam Naturalem philosophiam differitur in illis libris qui de naturali auscultatione inscribuntur, & propterea illi libri iure primo legendi occurrunt, non ob tres illas causas ab Auerroe relatas, verum præsertim ob alias duas, quæ ex Aristotèle colliguntur, prima est, quoniam sine notitia principiorum, & communium minus communia, & pendentia à principiis cognosci non possunt, ut patet ex 1. contex. necnon ex 3. cap. sexti topicorum. Altera est, quia ordo librorum præsertim debet respondere ordini naturæ, ut colligitur ex 1. Phys. 57. & ex initio libri de sensu, & sensili. Libri Physicorum varia ratione sunt cum de principiis, tum de uniuerso corpore physico, propriè tamen, ut de subiecto sunt de corpore physico vniuersè considerato, quod physicum corpus non definitur in primo de Coelo: ut perperam censuit Auerroes, & eius sectatores, sed in secundo Phy. & iure profectò, nam definitio subiecti communis attinet ad libros de principiis, & ex notitia principiorum colligitur notitia definitionis subiecti: ideo Aristoteles in secundo Phy. contex. 4. declarans quid sit habens naturam, declarauit quid sit corpus naturale, idem enim est habens naturam, & corpus naturale, quod patet, quia Aristoteles in primo de Coelo, contex. 5. circumscribens corpus naturale,



colligit definitionem ex secundo Physico. Iure meritò  
 consideratio communium attinentium ad naturalem phi-  
 losophiam in duas partes distribuuntur, in consideratio-  
 nem principiorum, & considerationem communium affe-  
 ctionum, quarum potissima motus est; nam ex horum duo-  
 rum cognitione consurgit exacta notitia corporis physici  
 vniuersè considerati: Hinc euenit, quod libri Phy. diui-  
 duntur in libros de principiis, & libros de motu: Qua de  
 re cum omnes Græci conueniant, magna tamen est lis, qui  
 nam debeant censeri libri de principiis, qui vero de Mo-  
 tu. Simplicius una cum Andronico, Eudemo, & Dama-  
 scio, censet primos quinque esse de principiis, tres postre-  
 mos de Motu: Philoponus, & Porphyrius quatuor primos  
 censent de principiis, reliquos de Motu: Non desunt,  
 qui duos primos, & octauum iudicent de principiis, quin  
 que medios de Motu: quos omnes a sententia Aristote-  
 lis recedere existimo; nam proculdubio duo soli primi  
 sunt de principiis, sex postremi de Motu, quod ex eo pa-  
 tet, quia Aristoteles in libris Physic. præsertim duobus  
 Procemiis utitur, vno in primo Phy. in quo proponit de-  
 claranda principia, causas, & elementa: Altero in tertio  
 Phy. in quo proponit considerandas communes affectio-  
 nes, non vteretur in tertio Phy. nouo Procemio, nisi iam  
 absoluisset proposita in primo, at in Procemio primi Phy.  
 proposuit consideranda principia; sequitur itaque, vt in  
 secundo Phy. sit absoluta prima pars pertinetis ad expli-  
 cationem principiorum: Præterea ibi præsertim agitur  
 de motu, vbi motus proponitur considerandus, definitur,  
 & cætera ad illum pertinentia manifestantur, hoc fit in  
 tertio libro, & sequentibus alioquin sequeretur conside-  
 rationem motus diminutam, & imperfectam esse, non e-  
 nim exactè explicantur omnia attinentia ad motum in tri-  
 bus postremis libris: At respondet Simplicius in tertio,  
 & quinto libro disputari de Motu vniuersè, ut quid com-  
 mune

bet censer de motu : Non desunt alij, qui ob huiusmodi dubitationes putarunt libros Phy. in tres partes esse diuidendos, inquit enim primum, & secundum esse de principiis tertium, & quartum de communibus affectionibus insequentibus naturam, reliquos de conditionibus communibus ipsius motus, de qua triplici inscriptione nulla apud Græcos mentio fit, sed de duplici tantum : Insuper Aristoteles in Proœmio Meteorum solum in duas partes diuidit considerationem horum librorum, inquit enim se disputasse de primis causis naturæ, & de omni motu naturali : Propterea dicamus solos duos primos libros esse de principiis, reliquos sex de motu : Et pro exactiore cognitione considerandum quod principia possunt accipi duobus modis, vel vt contradistincta à motu, & ita est vera sententia iam probata, vel pro omnibus cõmunibus, quæ vniuersè conueniunt corporibus physicis, in qua consideratione omnes octo libri possunt dici de principiis, in hac significatione, & consideratione loquitur Philosophus dum omnes hos libros appellat sermones primos, veluti in 2. de ortu, & interitu. 61. inquit, continuo existente tempore, necesse est motum esse continuum, si tempus nequit esse sine motu, vt in his, quæ in principio determinatū est : & in 4. Coeli. 25. Octauum Phy. nuncupat sermones primos, & in 8. Phy. 40. librum sextum appellat cõsiderationem de natura vniuersè : In qua etiam consideratione putandum est, quod Aristoteles in 1. Coeli. 54. tertium librum Phy. nuncupauerit de principiis : Et quamuis Aristoteles in 8. Phy. 58. sextum librum nuncupauerit primos sermones de Motu; adeo vt cum Simplicio videatur esse dicendum sextum esse librum primum de Motu: attamen dicendum est, Aristotelem per sermones primos de Motu denotasse sermones omnes præcedentes disponentes ad illam vltimam considerationem motus, non autem primū principium considerationis eius.

Colligamus itaq; errare eos, qui quatuor, vel quinq; pri-  
mos libros Phy. iudicât de principiis, reliquos de motu.  
Et longè magis eos decipi qui vel octauum dicunt de prin-  
cipiis, vel libros diuidunt in partem de principiis, par-  
tem de communibus affectionibus, & partē de Motu.  
Rectam, & veram esse hanc sententiam, quod si principia  
latè sumantur, omnes octo libri sint de principiis. hucus  
Si sumantur principia, vt contradistincta à motu, primi  
duo sint de principiis, reliqui sex de motu. Itaque libri

*Ordo seruatus ab Aristotele in declaratione  
Principiorum, Causarum, & Ele-  
mentorum. Cap. XI.*



**I**N principiorum explicatione præsertim  
accurati esse debemus; ex eorum enim no-  
titia pendet cognitio omnium: Propte-  
rea Aristoteles miro ordine, & diligentia  
de principiis, causis, & Elementis, verba se-  
cit; nam vt exactam rerum naturalium, habeamus notitiã,  
quatenus ex principiis, & causis pendent, quatuor cogno-  
scere debamus, primo à quibus principiis in earum, gene-  
ratione pendeant, secundo ex quibus Elementis iam geni-  
tæ intrinsicè constituentur, tertio per quas causas siue in-  
ternas, siue externas cognoscantur. Demum qualis sit mo-  
dus, quò per naturam producantur: in horum cognitione  
posita est exquisita cognitio principiorum, & quoniam ge-  
neratio antecedit rem constitutam, res constituta cogni-  
tionem eius per causas, & causas modum operandi: Hinc  
sequitur, quod primo agendum est de principiis, ex qui-  
bus res in fieri pendent; secundo de Elementis, ex quibus  
intrinsicè constituentur: tertio de causis, per quas cogniti-  
o scun-

scuntur: postremò de modo, quò natura suas actiones, suaq; opera producit: Hæc omnia accuratissimè seruauit Aristoteles, propterea vniuersa sua principiorum explicatio, diuisa est in quatuor partes, primam absoluit in 1. libro, in quo de principiis internis generationis rerum differtur, ideo in calce colligit se de principiis egisse, & aliud sumendum esse exordium: secunda traditur in prima parte, secundi libri, vbi agitur de natura prima enim Elementa dicuntur natura rerum; de tertia incipit verba facere in 27. contex. vbi disputat de causis: de quarta, verò à còtex. 75. vsq; in finem secundi libri, vbi declarat naturam agere propter finem, & ideo in rebus natura constantibus reperi necessitatem ex suppositione finis. Hinc interrogati ex sententia Aristotelis quot sint principia interna generationis rerum naturalium secus respondere non valeamus, nisi asserendo ea esse tria, materiam formam, & priuationem: Interrogati quot sint prima interna Elementa, quæ sunt natura rerum dicimus esse duo, materiam, & formam: Interrogati de causis dicimus esse quatuor, vt docet Aristoteles. Demum interrogati de modo agendi naturæ dicimus eam non temerè, sed propter finem operari. Insuper ex his patet, quòd quamuis Aristoteles in prima, secunda, & tertia partibus disseruerit de materia, & forma, tamen non inaniter repetit eorum explanationem, quoniam id facit consideratione distincta, & varia ratione. Insuper aliud quoq; seruare licet, quod in singulis horum quatuor capitum de vna causa præsertim verba facit, agens de internis principiis generationis, præsertim declarauit materiam cum priuatione ei iuncta, quia per materiam res fiunt; agens de Elementis præsertim explicauit formam, quæ primo est natura rerum: Agens de causis præsertim disseruit de efficiente, tum per se, tum per accedens, qualis est fortuna, & casus, quoniam apud antiquos causæ nomine denotabatur, præsertim efficiens, vt

asserit Plato in Philebo; & stoici mox eiusdem fuere sententia: agens demum de modo operandi Naturæ præsertim patefacit attinentia ad finem; Ex his quoque constat decipi eos, qui considerationes primi libri, vel Physicam non esse censent, vel solum ex euentu præponi considerationi secundi libri, vt reiiciantur falsæ antiquorum sententiæ, hi non percipientes artificium Aristotelis vniversum eius ordinem peruertunt; nam Aristoteles in 1. contex. absolute asserit, & ostendit primo differendum esse de principiis, & id esse faciendum ex instituto, & per se non ex euentu, de quibus mox in calce Libri tanquam in Epilogo se egisse colligit. Patet quoque minus rectè sentire illos, qui secundum metaphy. præponendum censent secundo Phy. tanquam Proœmium eius, vel censent esse communem introductionem ad Naturalem Philosophiam; Nam consideratio eorum, quæ habemus in primo libro iure merito antecedit, & primum locum sibi uendicat; Primo autem libro mirabili quadam connexionē iūgitur secundus; hinc Aristoteles in duobus illis libris quatuor principia fecit, secundum fuit in 2. libro; tertium in 27. contex. secundi libri; quartum in contex. 75. vt appareat explicationē hanc cum rationi tum verbis Aristotelis summo-  
pere esse consentaneam.

Colligo ex dictis primo.

Interna principia generationis rerum tria sunt, materia, forma, & priuatio.

Secundo prima Elementa intrinsecus rem constituentia, duo materia, & forma.

Tertio causæ sunt quatuor, materia, forma, finis, efficiens. Quarto Natura operatur propter finem, & in rebus natura constantibus reperitur necessitas ex suppositione finis.

Hæc admirabili connexionē, & ordine explicauit Aristoteles, ad quod vt in meliorem redigi non valeant.



*Ordo seruatus in explicatione communium affectionum. Cap. XII.*

**N**on minus accuratum in seruando ordine, se prestatit Aristoteles dum de communibus affectionibus disseruit, quam in declarandis principiis se indicauerit: Cum enim communes affectiones uarię sint, nepe motus, continuum, infinitum, locus, inane, & tempus; Motus debet censi affectio prima, & iure quidem; nam huiusmodi affectiones considerantur non absolute, sed ut conueniunt corpori physico, quatenus physicum est: corpori physico, ut physicum est primo conuenit motus, quia proprie, & primo à natura motus pendet, eaq; per motum definitur, ceterę autem affectiones eatenus sunt considerandę, quatenus cum motu habent affinitatem, & ad motus constitutionem conducunt: hinc euenit, quod nedum primo est agendum de motu: verum insuper ceterorum considerationes, sunt implicandę cum consideratione motus, & cum ea motus consideratione sunt tractandę, cum qua magis conueniunt: sequitur insuper quod quamuis Aristoteles varias corporis naturalis affectiones consideret: Vniuersa ramen earum consideratio debet inscribi de motu, quia omnes eatenus considerantur, quatenus nexu habent cum corpore mobili; ut mobile est: Hęc omnia accuratissime seruauit Philosophus, nam motus uniuersę sumptus, ut exacte explicetur debet considerari primo asoluendo quęstiones simplices mox compositas: Ut pertinet ad simplices conspicuum est motum esse, & à physico ut principium supponitur. Propterea in 3. Phy. in principio considerationis motus, primo Arist. ostendit, quid sit tradens definitionem eius, mox ceteras affectiones de-



clarat cōplicas cum natura, & constitutione motus, orditur autem ab infinito, reiiciendo infinitum a cō, comprobando infinitum potestate: & hoc iure primo faciendum fuit, quoniam si corpus physicum a cō infinitum esset, non moueretur, infinitum autem potentia intrinsecus constituit motum, & est communius cōtinuū, conuenit enim infinitum, ne dum continuo, uerum etiam discreto, numerus nanq; in infinitum est natus augeri, propterea ut seruaretur motus reiiciendum fuit infinitum a cō, & fuit approbandum infinitum, potestate: Ad hoc quoq; cōfert, quia infinitum ab antiquis pro principio omnium statuebatur, propterea primo reiiciendum fuit: Considerationi infiniti succedit loci, & inanis explicatio, ut comprobetur locus, reiicitur inane, nam locus satis proxime concurrat ad constitutionem motus, cum motus omnis, uel sit ad locum, uel circa locum uel illis conueniat, quæ sunt in loco, mox sequitur cōsideratio Temporis sine quo non fit motus, & modo aliquo idem est cum primo motu; Tempus autem locum supponit, cum locus etiam motū antecedit; in his itaq; omnibus congruens seruatur ordo, cum post definitionem motus, & explicationem quid sit, ea explicentur, quæ ad eius constitutionem conducunt qui ordo etiam clarior elucescit, considerando, quod infinitum pertinet ad esse ipsius motus, locus ad constitutionem, tempus ad motus mensuram dum constituitur; Quibus absolutis, in quinto libro Philosophus iterum ad motum reuertitur, iam enim erant explicata omnia pertinentia ad motus constitutionem; & quia post rei definitionē & pertinentia ad eam sequitur diuisio, iure in quinto discernitur motus à mutatione, ac insuper motus in suas species potiores distribuitur, ostenditurq; in quot prædicamentis reperiatur, diuisio autem ad quæstionem simplicem pertinet, & ad rem simplicem explicandam conducit: hinc euenit, quod Aristō. in contex. 21. eius libri, colligens

ligens epilogo, quæ declarauerat, inquit: Quid igitur motus, & quid quies, & quòt sint mutationes, & quæ ex mutationibus sint motus patet ex dictis. &c. adeo. quòd nectit declarata in tertio cum declaratis in quinto indicans intermedia esse declarata, vt complicata: cum hac consideratione motus; absolutis attinentibus ad quæstionem simplicem; accingitur Philosophus ad compositarum explicationem, & declaraturus qualis sit motus; & propter quid, declarat uarios terminos ad id conferentes; veluti quid sit simul, separatim tangere, inter; consequenter, contiguum, continuum; & quoniam considerandò qualis sit motus, primò occurrit vnitas, & multitudo eius, de unitate, & oppositione motuum verba facit, & declarat qui vere sit vnus motus, qui non: quis motus cui, uel quæti, vel motui opponitur, ac ita quintum librum absoluit; mox in sexto quia ad vnitatem motus requiritur, vt sit còtinuus, cuius solum nomen explicauerat in quinto, absoluit declarationem continui, manifestans continuum non constare ex indiuiduis: Insuper, quoniam continuatio motus pèdet ex mobili, ideo cum consideratione continui accommodatè nectitur ea consideratio, quòd omne quòd mouetur sit continuum, & corpus: Præterea cum motui conueniat infinitum in diuisione, & potestate, quatenus continuus est, ostenditur ei non posse conuenire infinitum absolute ratione terminorum, quia initia, & fines, eius sunt nulla enim mutatio, vel motus est infinitus cum tēdat ex opposito in oppositum, opposita, namq; terminata sunt, ita simul declarat qualis sit motus, & propter quid talis sit: Postremo remanebat explicanda potissima affectio motus, nempe æternitas, quam proposuerat in calce sexti cuius explicatio exposcebat præcedentium omnium declarationem, ad quam, ut paratiores accederemus, nos disposuit in septimo: perfecit autem illam in octauo, manifestando cum æternitatem, tum modum, & causam æter-

nitatis, resoluendo eam usq; ad æternos, & primos motores: ex his constat admirabilem fuisse Aristotelem in seruando ordine. Le. 38. 2155 20 10779 autom 2nd eudinot  
 Nam iure merito, primo de principiis, mox de affectionibus differuit: 21. 11 210 11, 210 107 210 210 107  
 Agēs de affectionibus iure orditur a motu, cæterarumq; considerationem conuenienti ratione inseruit cum considerationibus motus. 11 210 107 210 210 107  
 Disputans de motu primo absoluit attinentia ad questiones simplices, mox ad compositas. 11 210 107 210 210 107  
 Demum de motu verba faciens, primo illum definit secundo diuidit, tertio qualis sit ostendit. 11 210 107 210 210 107  
 Postremo potissima affectionis motus causam patefacit, resoluendo æternum motum in æternos motores vt congruente fine cum explicationem, tum librum absolueret, ac perficeret. 11 210 107 210 210 107

## FINIS LIBRI QVARTI.



ANDREAE




ANDREAE DVODI  
FRANCISCI FILII  
PATRITII VENETI

D'E  
HABITIBVS INTELLECTVS  
LIBER QVINTVS.



De Prudentia.

*Quid sit Prudentia. Cap. I.*



**D**ILIGENDO honore dignus,  
summo perque humane conditio  
ni conueniens est Prudentiae ha-  
bitus; propterea pro eius cogni-  
tione, & adeptione summo per  
quidem omnibus, praesertim ta-  
me illis laborandum est, quibus  
felici sorti contrigit, ut in urbe  
libera sint orti, & ad magistratuum  
dignitates eis parata sit via: & iure profecto, nam  
ut in

vt in sexto de moribus . capit. octauo . docet Philosophus, Prudentia, & ciuilis scientia idem sunt habitus, nemini autem dubium est, Ciuilem scientiam esse habitum regium, quo intrinsecus constituuntur, recteq; formantur, ne dum viri probi, optimiq; familiæ patres, verum insuper Ciues regii, & Principes, qui etiam sine Regno rectius merentur dici Principes, quam sine Prudentia cum Regno: De Prudentia itaq; verba faciens, ab eius definitione exordiens dico cum Aristotele in 6. Ethic. Prudentiam esse habitum cum ratione vera coniunctum, ad agendum idoneum, in bonis humanis occupatum; quam definitionem cæterorum definitionibus esse præferendam existimo: non enim me latet Prudentiam à Plotino definiri, quod sit Intelligentia inferiora declinans animumq; disponens ad superiora. A' stoicis, quod sit scientia bonorum, malorum, & mediorum: A' Speussippo Platonico, quod sit ius, quæ per se ipsam ad humanam beatitudinem ducit. Vel quod sit, scientia bonorum, vel malorum dispositionem scèlicem præstans, quâ quid agendum sit, & quid declinandum iudicamus: Verum huiusmodi definitiones variis obiectionibus eueri possunt, firmior proculdubio ea est, quam ex sententia Aristotelis retuli, per quâ iure Prudentia dicitur ratio recta, quoniam omnis in humana actione obliquitas, omnisq; à rectitudine declinatio pariter est declinatio à Prudentia, & lapsus in imprudentiam; Insuper dicitur recta agendi ratio, quoniâ non Prudentia est primum principium actionis, hoc enim intellectui practico conuenit, sed prudentia dicitur esse regula, mensura, rectaq; ratio, per quam intellectus practicus ita prudenter agit, vt artifex per habitum artis recte artificiosa opera construit: Dicitur Prudentia ratio recta, non quidem omnium, sed agibilium: Prudentia enim tanquam in materia propria, non in rebus natura constantibus, non in artificiosis, sed in solis humanis actionibus versatur, hu-

manæ

manæ autem actiones illæ dicuntur, quæ in hominis potestate sunt collocatæ, & ex nostra consultatione, ac præelectione proficiſcuntur; hinc ea, quæ ad Prudentiam pertinent neceſſitate carent; & non vno, ſed multis modis fieri poſſunt. Quod ſi nonnunquam Prudentia, vel ad Artis, vel ad Naturæ, vel ad Dei opera ſe conuertit, id facit non quia ea ex primo inſtituto conſideret, ſed vt in attinentibus ad illa, actiones noſtras rectè diſponat. Verſatur itaq; Prudentia in humanis actionibus, & non quidem in parte, ſed in vniuerſo earum genere. Nulla enim eſt humanæ vitæ conditio, nulla ætas, nulla fors, nullus deniq; gradus; in quo Prudentia locum non habeat, & cum verſetur in omnibus, in eis tamen præſertim fulget, quæ magis ſunt ardua; maioris ſunt momenti; & ad gradum vitæ eminentiorem pertinent: Hinc colligimus Prudentiam eſſe quidem vtilem Ciui absolute magis tamen eſſe frugiferam ei, in magiſtratu conſtituto, in Principe vero neceſſariam. Inſuper aſſero Prudentiam in Ciue eſſe conſpicuam, in magiſtratu fulgere, lucere demum in Principe; in Principe enim, vt errata, ita virtutes maiores ſunt, quàm in cæteris, cum Principes ſint exempla aliorum, & ſe habeant Principiorum inſtar, ex quorum exigua permutatione maxima ſequitur in cæteris permutatio, veluti languente capite, membra cuncta languere neceſſe eſt.

Conſtat itaq; Prudentiam accurate eſſe conſiderandam. Patet inſuper quomodo dicatur nō principium actionum, ſed recta ratio agibilium.

Demum eſt conſpicuum Prudentiam in cunctis humanis actionibus verſari, præſertim tamen in eminentioribus, & magis arduis refulgere.



*De Diuisione Prudentiæ.**Cap.**II.*

**P**RUDENTIÆ duplex dicitur esse genus, vnum naturale, alterum humanum, Prudentia naturali dicuntur præditæ, Apes Formicæ, Hirundines, variaq; animalium genera; quæ per naturæ instinctum quasi futura præuideant, fauos conuenienter constituunt, grana colligunt, & condunt: Regiones pro temporum mutatione permutant, quæ Prudentia in eis firmior, & constantior, quàm in homine esse videtur, cū magis in munerum functione conueniant, & admirabilius, ac firmius operentur: Verum quamuis hæc, Prudentiæ nomine honestetur, non tamen Prudentia censeri debet, sed vmbra eius, nec ei conuenit definitio Prudentiæ, cum iumentis, & feris, neq; etiam aq̃io cōueniat, ut in 2. Phy. asserit Aristoteles neq; eis conuenit consilium, sine quo prudentia esse non potest, sed id, quod faciunt, solum efficiunt per instinctum Naturæ; tanquam per causam potiore, & dirigētē, vt in 2. Phy. 80. affirmat Philosophus, ac insuper auxilio Phantasie, quæ in feris obtinet locum mentis, vt in calce 2. de Anima, manifestatur: Instinctus tamen Naturæ in ea effectione obtinet principatum, vt recte etiam nouit Scotus, cognitio uero ei tanquam instrumentum famulatur, qui Naturæ instinctus nil aliud est, nisi propensio insequens animam illius animalis, vt est forma materiæ, & natura eius, quamuis enim eadem anima sit natura, & cognoscens, vario tamen modo dicitur operari, vt est natura, & vt est cognoscens, sic itaq; in feris solum reperitur imago Prudentiæ: in pueris quoq; proprie sumpta Prudentia locum non habet; sed solum in eis conspicitur Prudentia pro conuenienti dispositione

tione

tione ad eam; ac insuper pro spe, quia indicant se facile euasuros esse prudentes: quæ puerorum Prudentia etiam Naturalis iudicari debet, quia eam non longo rerum usu acquirunt, sed a Natura recipiunt, & ab ortu secum ducunt: Altera ex parte aliud reperitur Prudentiæ genus, & est habitus intellectus studio, & accurato rerum usu acquisitus, & hæc est ea Prudentia, de qua verba facturi sumus, cui data definitio conuenit, quæ non in quibusdam, sed absolutè in omnibus humanis bonis versatur ad humanam actionem pertinentibus, ac insuper versatur non in solis communibus, verum etiam in singulis, ita tamen, ut per communia nos dirigat, ad singula. Colligitur enim Prudentia ex rerum euentibus firmatur usu, & exercitatione, & ad singulas actiones nos rectè format, ac instituit: Hæc Prudentia re. est idem habitus cum ciuili scientia, sola ratione distinctus, ut in sexto Ethicorum, capit. octauo docuit Aristoteles; nam habitus vnus sunt, quatenus vna est forma ex eisdem principiis orta, quæ vtriusque muneribus fungitur, distinguuntur, uero ratione, quia Prudentia dicitur, ut est virtus, ac perfectio eius viri, cui conuenit, & respicit, ac coniectat comoda propria, sibi quæ uni prospicit: Ciuilis verò scientia dicitur, quatenus refertur ad curam, ordinem, & formam Ciuitatis, & ea, quæ Reipublicæ sunt utilia considerat: Prudentia itaque ut idem est habitus cum ciuili scientia ita diuiditur, uel enim est vnus erga se, & communi nomine absolutè Prudentia dicitur, & scientia de moribus, per quam rectè homo ea disponit, quæ ad sui conuenientem institutionem pertinent: Vel respicit alios, quæ adhuc duplex est, una domestica, quæ rectè pertinentia ad familiam format, & dirigit; Altera ciuilis ad vniuersam urbem, eiusque vtilitatem respiciens: quæ adhuc diuiditur, vel enim est Regia, Princeps, & domina, & nuncupatur Prudentia ferendarum legum,

vel proximè in singulis actionibus versatur, & hæc communi uoce nuncupatur Ciuilis, quamuis enim absolute, & uere ea mereatur dici ciuilis, quæ ratio ferendarum legum est, tamen euenit ex multitudinis ignorantia, ut illi soli iudicentur ciuiles, qui in singulis actionibus, & præsertim in iudiciis uersantur, non secus ac illi uulgo censentur Artifices, qui manibus res tractant; cum tamen artis habitus in præcipiente, & dirigente præsertim sit collocatus. Insuper hæc in singulis actionibus occupata Prudentia adhuc est duplex, uel enim in consultatione, & deliberatione uersatur, & dicitur consultrix, siue deliberatiua, cui omne ciuiliū actionum genus subiicitur; Vel est iudiciaria cuius munus est de singulis actionibus iudicare, quomodo sint, vel non sint consentaneæ legibus, ac insuper pœnas, & præmia decernere. Colligamus itaq; Prudentiam esse duplicem, vnā Naturalem, alteram humanam: insuper Naturalem esse duplicem, vnā ferarum, alteram puerorum. Prudentiam uero humanam adhuc esse duplicem, vnā suimet, alteram ad alios conuersam. Prudentiam ad alios conuersam, vel domesticam, vel Ciuilem esse. Prudentiam Ciuilem vel esse rationem ferendarum legū, vel in singulis actionibus uersari. Demum patet hanc esse duplicem, vel consultricem, vel iudiciariam.

*Comparatio partium Prudentiæ inter se.*

*Cap. III.*



**Q**UONIAM Prudentia virtus est, vndique refulgens; propterea ut singulæ eius partes splendidæ sint necesse est: verum quia eius partes sunt variæ, & ad uaria vario modo pertinent, distinctaque obeunt munera, ideo earum nonnullæ magis, aliæ minus fulgent: Variæ profectò inter eas possunt fieri comparationes; nã primo si confertur Prudentia Naturalis cum ea, quæ est habitus intellectus, proculdubio Naturalis Prudentia cedit. Prudentia enim, quæ est habitus pertinet ad intellectum illa ad Phantasiam; ea versatur in humanis actionibus, hæc in attinentibus ad nutritionem, & similia: illa dirigit ad animi foelicitatem, hæc ad incolumitatem corporis; illa conuenit soli homini adulto, ac perfecto, hæc communis est pueris, iumentis, & feris. Præterea si secundo fiat comparatio inter Naturalem Prudentiam puerorum, & eam ferarum, adhuc ea puerorum præferenda est, quoniam nobiliori conuenit, ad potiora dirigit, & in præstantiorem frugem, nata est perducere: Tercio cum humana Prudentia, quæ habitus est intellectus, vel nosmet ipsos, vel alios respiciat, proculdubio magis fulget, in relatione ad alios, quàm ad se ipsum, & ratio est, quoniam ut inquit Aristoteles in Proœmio Ethico. bonum, quo est communius, & pluribus confert, eo est præstantius, & eligibilius. Insuper, quia congruens dispositio erga alios supponit conuenientem suimet dispositionem, quod autem origine est posterius, aliudque includit, est illo eligibilius, ideo Aristoteles in quinto Ethicorum. Iustitiam præ-

sertim commendat, cæterisque uirtutibus præfert, quia ad alios refertur, aliosque respicit. Quarto si Prudentia domestica cum ciuili comparètur, Ciuilis principatû obtinet, primo quia totum curat, & respicit, non solam partem, ut domestica; secundo, quia domestica a ciuili tanquam a fine, a Principe, & a toto dirigitur, instituendæ nanque sunt familiæ, ut conformentur cum legibus uniuersæ Urbis, non autem è contra: Quinto si comparetur Prudentia ferendarum legum, cum ea, quæ in singulis actionibus versatur, ea, quæ ferendarum legum ratio est; Princeps, & domina censeretur, nã ita cæteris præstat, ut Principes Ciuibus, & Regia dignitas Magistratibus: Hinc iure a Platone in libro de Regnò, & ab Aristotèle in sexto Ethicorum Architectonica Princeps, & Regia nuncupata est; ad hanc, ut ad Ducem respiciunt, ei que ut dominæ famulantur Prudentia consultrix, & iudiciaria, quæ iudiciaria Prudentia in loco postremo collocata est; nec absolute Ciuilis nuncupari meretur, ut inquit Plato in libro de Regno, sed potius pedissequa est, & custos eius, quod etiam in 6. de moribus cap. 8. confitetur Aristoteles: Ex dictis duo accurata consideratione digna colligi debent: primum est, quod cum Prudentia ferendarum legum absolute inter partes Prudentiæ principatum obtineat: non propterea facta comparatione inter libros Moralis Philosophiæ libri de Repub. cæteris sunt dignitate præferendi, ut est latinorum communis sententia: Libri. n. Ethicorum, proculdubio principatû obtinent, & ratio est, quia quamuis in libris de Republic. instituantur magistratus, condanturque leges, tamen recta ratio constituendorum magistratuum, ferendarumque legum, quæ Princeps est, non ex eis libris colligitur, sed ex libris de moribus, & ratio est, quoniam in libris de moribus explicatur felicitas, quæ est postremus finis Magistratuum, & legum. Insuper declaratur uirtutes, quæ sunt initia, & finis proximus earundem,

de, vt enim inquit Aristoteles in 5. de moribus, leges principium recipiunt à virtute, & ad virtutem tendunt, & quicunq; seruant recte institutas leges, seruant præcepta omnium virtutum: Ex huiusmodi finibus, & principiis desumitur recta ratio ferendarum legum, adeo vt mox libri de legibus sint veluti fructus, recte rationis instituendi eas, quæ recta ratio in libris de moribus exactissime formatur pariter in eisdem libris de moribus declarantur alia multa ad rem eandem pertinentia.

Colligamus itaq; libros de moribus principatum obtinere, & in eis magna ex parte declarari pertinentia ad Civilem Philosophiam: hinc Aristoteles in Proœmio eorum librorum, eos absolute appellat scientiam civilem, & ait scælicitatem in eis declaratam pertinere ad disciplinam, quæ Princeps cæterarum sit ad operationem dirigentium; Alterum, quod ex dictis colligitur est, quod Legistæ, qui Iuris Prudentes nuncupantur, & se vere morales Philosopho esse censent, summopere decipiuntur, ipsi enim cum versentur in infima, censent se in parte potiori civilis scientiæ versari, & cum sint iuncti cum famula putant, & gloriantur se cum domina esse coniunctos; nam ipsi minime versantur in parte Prudentiæ, quæ est ratio legum ferendarum, sed in consultatione, & iudicio, quæ est pedissequa eius, & custos legum: Ipsi in civili scientia minime philosophantur, non enim leges in sua principia resoluunt, nec ab eorum principiorum exacta notitia auspicantur, vt patet ex eorum Institutæ lectione, solum confuse accipiunt, quid sit Iustitia, ac se ad leges addiscendas statim conferunt, non autem distincte virtutes omnes, earum principia, finemq; considerant, ac rectam rationem ferendarum legum, dum intra suos terminos versantur, adeo vt Philosophi contemplatiui longe rectius mereantur dici Iuris prudentes, quàm ipsi; quod, vt clarius pateat considerandum est, quatuor in vniuerso reperiri legum subordinatos ordines: Gradus legum



legum primus fulget in Diuina Prouidentia : Secundus in Fato. Tertius in Natura ; Postremus, qui humanus, & Ciuilis est, in homine : Primum gradum, & initium secundi speculantur Theologi, & Metaphysici: secundum cum tertio Physici; Postremum Ciuiles Philosophi, qui postremus est umbra quædam, & imitatio cæterorum, & qui cæteros non cognoscunt, postremum exacte cognoscere non valent. Legistæ in hoc postremo versantur, & in parte non prima, sed pedissequa eius, vt patuit, & cum infimi sint, audent tamen cum superioribus de dignitate contendere, nec ob aliud, nisi ob vulgi deceptionem qui vt inquit Aristoteles in 6. Ethic. ciuiles appellant non eos, qui vere ciuiles sint, sed qui tanquam ministri proxime res quasi manibus tractant.

Colligo itaq; primo Prudentiam Ciuilem dignitate præstare Naturali.

Colligo secundo Prudentiam Naturalem puerorum, esse potiore Naturali brutorum.

Addo tercio Prudentiam humanam potiore esse, vt respicit alios, quàm vt respicit se ipsum :

Infero quarto Prudentiam Ciuilem præferri domesticæ.

Colligo quinto Prudentiam ferendarum legum inter partes Prudentiæ principatum obtinere.

Patet insuper Prudentiam ferendarum legum ex libris de moribus colligi: & eos libros esse potiore partem Ciuilis scientiæ.

Demum constat Legistas in postrema Iuris prudentiæ parte versari, nec iure debere dici morales Philosophos.

*An Prudentia sit vniuersa virtus ad mores  
pertinens. Cap. IIII.*



**V**ONIAM Prudentia ad omnem humanā actionem se extendit, in omni fulget, dirigit, conuenientemq; formam tribuit: iure vniuersa morum virtus esse videtur, adeo vt, qui Prudens sit alia vlla virtute egere nō videatur, hæc dicitur scientia bonorum, malorumq; omnium ad hominem pertinentium; hac duce omnes animæ perturbationes recte componuntur, singulæq; actiones in beatitudinem diriguntur, eius ope, etiam ea, quæ mala sunt vertuntur in bonum, & demum nullum numen abest, si adsit Prudentia, per hanc præsentia ordinantur, futura prævidentur, præterita in memoriam reuocantur, hac ciuilia; & domestica gubernantur, de qua recte Anthistenes protulit murum tutissimum eam esse, qui neq; decidere, neq; prodi possit: Iure itaq; Apollaphanes stoicus, referente Laertio, dixit Prudentiam esse vniuersam virtutem, & Socrates in eam, veluti in culmen, & apicem omnem virtutem redegit. Dixit Plato in Menone, vt ergo summam dicam omnes animæ impetus, omnesq; declinationes Duce Prudentia ad beatitudinem tendunt; Imprudentia uerò ad contrarium: Prudentia itaq; uirtus est, aut vniuersa, aut pars aliqua uirtutis, & in Alcibiade primo ait, in quo unusquisq; est Prudens, in eodem est bonus, imprudens autem malus: Hæc est circumspecta, uigilans, simplex, matura, perspicax solers, & quid plura, in opere secundum Prudentiam optima hominis uita, summumq; bonum, eius uidetur esse collocatum: non itaq; iniuria uidetur esse dicendum Prudentiam esse uniuersam moralem uirtutem; Ex aduerso id minime uidetur esse uerum, quo-

quoniam uirtus moralis ad sentiendi appetitum pertinet, Prudentia ad intellectum; Virtus moralis est moderatio alicuius generis perturbationis, ut uoluptatis Temperantia, Iræ Mansuetudo, & ita de reliquis; Prudentia autem non perturbationis est moderatio, non enim ad intellectum perturbationes pertinent, sed medium decernit, & statuit, quod est conueniens in perturbationibus: Demum moralis uirtus in fine posita est, per quem boni dicimur: Prudentia uero uersatur in ordinatis ad finem, per Prudentiam enim recte media disponimus pro finis adeptione: Hinc ne dum Aristoteles, uerum etiam Plato, præter Prudentiam enumerat uirtutes alias; Hanc difficultatem dissoluit Aristoteles in 6. de moribus ad Nichomachum inquit, Quapropter aiunt uirtutes omnes Prudentias esse; & Socrates partim recte quærebat, partim peccabat; peccat quidem, quia uirtutes omnes Prudentias esse putabat; bene dicebat, quia non esse sine Prudentia eas aiebat: Hæc est resolutio Aristotelis, in qua duo consideranda sunt; primo id, in quo damnat Socratem, & consequenter Platonem, secundo id, de quo illum commendat: De primo inquit errasse Socratem, quia putabat uirtutes omnes esse Prudentias, at aduertendum est, quod non secus Plato existimauit Prudentiam esse uirtutes omnes, ac existimauerit Aristoteles, quod patet, quia præter Prudentiam, etiam cæteras uirtutes dinumerauit, ut Iustitiam, Fortitudinem, Temperantiam, & alias: Dixit tamen Prudentiam esse modo aliquo uniuersam uirtutem, quatenus omnium est Princeps, omnium est dux, omnibus, medium, & formam præscribit, per omnes extenditur, adeo ut facultate quadam, & eminentia omnes intra suos terminos uideatur includere, cunctasq; facultate, & uirtute dicatur continere non secus ac Dux belli peritissimus sibi uniuersam uictoriæ gloriam uendicat, cum uniuerso exercitui conuenientem formam tribuerit: Ut uero pertinet ad aliam partem, in qua

Socra-

Socratem commendat, quia virtutes sine Prudentia minime posse consistere affirmabat, iure de hac sententia, commendatione dignus est Socrates, cum in ea omnes Viri sapientiores conuenerint, eademq; experientia, & ratione comprobetur: Percipimus enim Prudentiam virtutem esse, quæ in Puppi sedens gubernaculum tenet hominum, ac omnium nostrarum actionum, consiliorum, operum Dux est, per hanc homo, familia Vrbs; Regnum, ac demum omne mundi Imperium optime valet, seruatur, perficiturq; per imprudentiam uero peruertitur, ac labefactatur. Prudentia idem esse habitus dicitur, cum civili scientia, per quam conduntur leges nos formantes, ac dirigentes, ad vniuersum virtutum genus: iure itaq; sine Prudentia nulla virtus consistere potest, quod ratione ostenditur, nam virtus in mediocritate est posita, mediocritatis Iudex est Prudentia, virtus est habitus cōuenienter nos in finem disponens, Prudentia viam parat pro assequēdo fine, vt itaq; formatum suum formatorem, terminus viam, finis deniq; media supponit, ita virtutes morales Prudentiam exposcunt, & sine ea consistere nequeunt.

Constat itaq; Prudentiam esse, & non esse virtutes omnes.

Nam Prudentia est vniuersa moralis virtus, quia Princeps omnium, & Dux est, & omnes facultate continet. Non est vniuersa virtus, quatenus alia est Prudentiæ, & singularum virtutum, forma propria ratio, conditio, & officium.

*Quæ pertineant ad Prudentiam.**Cap. V.*

VONIAM Prudentia virtutum omnium Princeps, & Regina est; ad dignitatem autem regiam varia pertinent, & procius constitutione, & forma plurima requiruntur, iure merito etiam ad Prudentiam varia redigi multaq; pertinere putandum est: Præsertim tamen Prudentis est bene consulere posse de his, quæ sibi, quæ familiæ, quæ Vrbi optima sunt, de his quæ ad bene, recteq; viuendum vniuerse conducunt, adeo ut sua consilii rectitudine, & sibi, & aliis summopere proffit, ideo consilium à solo Prudente petendum, expetendumq; est, & sine consilii rectitudine Prudentia nulla consistere valeat, non est profecto eadem consilii rectitudo cum Prudentia, sed ita se habent inter se, vt vnum sine alio seruari nequeat, præsertim tamen consilii rectitudo, vnum ex requisitis ad Prudentiam iudicari debet: Insuper ad eiusdem Prudentiæ constitutionem conducit perspicacitas ea, siue acumen ingenii, quod à Græcis *σύνεσις* appellatur, cui tarditas, & hebetudo opponitur, & nemo est iure Prudens, nisi idem sit perspicax, & solers. Hæc perspicacitas, siue Intelligentia non est eadem cum Prudentia, constituit tamen Prudentiam: Perspicacitas enim ad iudicium pertinet, eiusq; munus est recte iudicare; Prudentia vero vim habet præcipiendi, & ad actionem dirigit: Præterea ad Prudentiam recte formandam necessaria est rectitudo sententiæ, quæ à Græcis *γνώμη* dicitur, & ex consultatione recta, ac ex perspicacitate ingenii confurgit, hæc nil aliud est, nisi iudicium rectum, adeo vt bona consultatio dirigat, perspicacitas inueniat, sententia recte decernat: Ex his ortum ducunt circumspectio,

ſpectio, Prouidentia, cautio, Vigilantia, æquitas, quæ in Vi  
ro prudente refulgent, eumq; reddunt ſplendidiffimum.  
Insuper ut in conſtituenda ſapientia requiritur *σοφία*, ſiue  
Intelligentia quæ eſt cognitio communium, ac primorum  
principiorum eius, ita in conſtituenda Prudentia requiri-  
tur *φρόνησις*. ſiue Intelligentia, exactaq; cognitio, alterius extre-  
mi, nempe ſingularium, ex quorum notitia, ſingularumq;  
circumſtantiarum inſpectione, tâquam ex principio ortum  
ducit vniuerſa viri Prudentis in actione rectitudo, quam-  
uis enim Prudentia per ſe, & proprie ſolum vniuerſalium  
eſſe dicatur; attamen, quia ea vniuerſalia huius ſunt con-  
ditionis, vt nos in ſingulorum actionibus dirigant, & pro  
actione ſit neceſſarium ea neſcere cum ſingularibus, ex  
quorum ſingularium conditione, & natura deſumitur con-  
ditio directionis eorum, ideo cognitio horum extremorum  
(ſingularium ſcilicet) ita dicitur *φρόνησις*, ſiue Intelligentia,  
in attinentibus ad Prudentiam, ut ex aduerſo in attinenti-  
bus ad ſapientiam cognitio primarum enunciationum *σοφία*,  
ſiue Intelligentia nuncupatur; Ex quibus omnibus con-  
ſtat, quàm ſplendida ſit Prudentiæ forma, & quàm diffi-  
cile ſit virum eſſe Prudentem, cum ad eius conſtitutionem  
uaria, & præclara neceſſario concurrant.

Patet itaq; Prudentiam non eſſe rectam conſultationem,  
perſpicacitatem, ſententiam rectam, Intelligentiam, at  
non poſſe eſſe ſine his.

Insuper conſtat, quomodo Prudentia, & ſolum vniuerſa-  
lium, ac inſuper etiam ſingularium eſſe dicatur.

Demum patet ratio, cur in attinentibus ad Prudentiam  
cognitio eorum ſingularium, in quibus verſantur actio-  
nes debeat nuncupari Intelligentia, & ita ab Ariſtotele  
in 6. Eth. nuncupetur.



*Ex quibus principijs oriatur Prudentia.*

*Cap. VI.*



**N**IL præclarum in homine reperitur, nil illu-  
stre in eo refulget, quod sine labore, & con-  
spiratione multarum causarum producatu-  
cum itaq; Prudentia virtutum sit præstan-  
tissima, hominisq; maxime propria, putan-  
dum iure merito est multarum causarum concursu, & fau-  
re in nobis gigni, quod experientia, & inductione conspi-  
cium redditur; si enim eos accurate cõsideramus, qui Pru-  
dentia decore sunt ornati, ac insuper si perpendimus Pru-  
dentia conditiones, inueniemus Natura, studio & longo  
rerum vsu in nobis fieri: per Naturam semina, principia, &  
facilitatem habemus, per quæ apti sumus ad assequendam  
Prudentiam, quæ semina tantæ sunt virtutis, ut per ea so-  
lum, frequenter pueri nuncupentur, ac iudicentur Pruden-  
tes, & nedum pueri; verum etiam animalia rationis exper-  
tia ueluti Formicæ, & Apes: Hæc tamèn solam habent pruden-  
tia imaginem, nec formam eius assequi nata sunt, quâ  
assequi valent pueri; Et cum animantium temperamenta  
sint varia, putandum est temperamentum illud prudentia  
esse accommodatissimum, quod ad atram bilem vergit, cõ-  
uenientemq; portionem splendoris sanguinis habet ad mix-  
tam, adeo vt à feruore caloris non turbetur, per splendore  
sanguinis fulgeat, a bile atra habeat constantiam, & con-  
gruentem soliditatem, huiusmodi autem tempera in cœtum  
ad prudentiam esse aptissimum inferis, & iumentis expe-  
rientia docet; & dum inter se comparatur, varia hominum  
temperamenta manifeste elucescit, immo si ad hominem  
conuertimur, inueniemus non prius illum reddi prudentē  
quam iuuenilis in eo calor temperetur, & ad senilem atrā  
bilem

bilem inclinet : Insuper putandum est . Prudentiam studio , & disciplina acquiri ; plurima enim prudentiæ præcepta ab aliis addiscere , & scripta cum vtilitate perlegere valemus , & nedum hac ratione sub doctrina continetur Prudentia, verum insuper alia præsertim, quatenus Prudentia firma, & constans omnibusq; suis numeris absoluta à sapientia pendet, ac ex ea in homine consurgit; adeo vt nemo absolute omniq; ex parte sit Prudens, nisi ipse etiam fuerit sapiens. Sapientia autem proculdubio doctrina, & disciplina acquiritur, hanc veritatem cumulatissime nobis in Menone patefecit Plato, vbi quamuis primo intuitu dubius valde esse videatur, attamen accurate eum considerantibus manifestat optimam Prudentiam cum scientia esse iunctam, & eatenus doceri posse, quatenus à contemplatione pendet. Insuper patefacit Prudentiam cum contemplatione iunctam esse, similem statuis Dedali ligatis, hoc est firmis, & permanentibus. Prudentiam vero sine scientia, & cōtemplatione, esse similem statuis Dedali solutis fugacibus, instabiliq; opinioni simillimis. Eandem quoq; veritatem cum Alexandro patefecit Auerroes, dum manifestauit in Proœmio Phy. ex philosophia contemplatiua etiam ciuilem fœlicitatem, ciuilesq; virtutes pendere; demum in sua Republica id ipsum protulit Aristoteles dum affirmavit cognitionem veritatis, ne dum ad contemplationem, verum etiam ad actionem dirigere: Iure ex sapientia ortum ducit Prudentia cum nos ex diuinorum contemplatione moneamur recte disponere humana, humanorum enim congruens dispositio est imitatio dispositionis diuinorum. Demum pro absolute Prudentiæ egemus longo rerum vsu, & experientia; Nemo enim Prudens etiadere potest, nisi etiam in humanis actionibus, in variisq; fortunæ euentibus sit versatus. Ideo recte Aristoteles in 6. de motibus. cap. 9. dixit Iuuenes, & Geometras, & mathematicos, & talibus disciplinis cruditos

eruditos fieri posse, Prudentes vero fieri non posse; causa hæc est, quod etiam in rebus singularibus Prudentia vertitur, quarum cognitio usu comparatur; Adolescens autem usum rerum non habet, id ipsum in cap.8. declarat, exemplo medici inquiring; si quis sciat carnes leues esse ad concoquendum faciles, & salubres, leues autē, quæ sint, ignoret, bonam valetudinem non efficiet, sed is potius efficiet, qui auium carnes scit esse leues, & salubres; non itaq; sat est hominem per Naturam esse aptum, accomodatumq; ad Prudentiam per sapientiā cognoscere communia quædam, & vniuersalia; verum insuper requiritur, vt longo usu in singularibus versati simus: Ideo Plato in Theeteto. dixit Philosophum in rebus agendis se deridendum, patrefacere eisq; minime esse accommodatum, quod exemplo Thaletis declarauit, qui dum Cælum inspiceret intensus syderibus in foueam cecidit: Propterea Thracensis quædam eius ancilla facete cum carpsit, quod quæ in Cælo sunt præuidere contenderet, proxima uero, & ante pedes posita non uideret. Iure itaq; ueneranda senectus, & dum iuuenes in actionibus parum uersati; nimia quadam de semetipsis præsumptione, & arrogantia senioribus præualent, eisq; non obtemperant, plurima profecto incommoda, & detrimenta cum in domibus, tum in Republica sequuntur, tunc enim sensus rationi, Temeritas Prudentiæ, Fortuna experientiæ, ut Dux præponitur. Colligamus itaq; Prudentiam à Natura recipere semina, & principia, à doctrina cultum, & accretionem, ab experientia, & longo rerum usu postremam absolutionem. Prudentiæ conseruatricem Temperantia est, quod Græci ipso nomine manifestarunt, dum Temperantiam *σώφρωνσύνη*. quasi *σώζουσαν τὴν φρόνησιν*. appellarunt, quod cum Aristoteles in 6. de moribus. Cap.5. tum Plato ante Aristotelem declararunt, nec equidem iniuria, nam sensuum uoluptas uehementissima est, propterea ut eius uehementia, maxime rationem turbare

bare, nosq; rapere nata est, ita eius moderatio summo pe-  
re nobis est salutaris, nostramq; Prudentiam incolumen  
ab omni perturbatione conseruare nata est.

Colligamus itaq; Prudentiam, natura, studio, & assuetudi-  
ne acquiri: Eandemq; Temperantia præsertim con-  
seruari.

*Dubia nonnulla ad Prudentiam pertinentia .*  
*Cap. VII.*



**V**ARIÆ in attinentibus ad Prudentiam se  
se nobis offerunt difficultates: quarum una  
est, an ualeat secerni à uirtutibus morali-  
bus, adeo ut in nobis Prudentia sine illis in  
ueniri possit; nam eam posse secerni, ex eo  
quis credere posset, quoniam morales uirtutes sunt mode-  
rationes perturbationum, & pertinent ad appetitum sensi-  
tium: Prudentia uero seorsum, à perturbatione posita  
est, & in intellectu locum habet, propterea cōtingere pos-  
se uidetur, ut aliquis optima consultatione, sententia, per-  
spicacitateq; sit præditus, ac insuper aliis ex quibus Pru-  
dentia confurgit, in quo tamen moderatio perturbationū  
minime reperiatur, hinc nonnullos consueuimus nuncupa-  
re Prudentes quidem, sed uitiosos: Huic difficultati re-  
cte, & Plato, & Aristoteles satis faciunt, conueniunt enim  
in hoc, nemini posse Prudentiam conuenire, cui etiam uir-  
tutes morales non conueniant, & iure quidem, nam uirtu-  
tis moralis officium, est recte nos erga finem, erga iustum,  
& honestum, eiusq; appetitionem disponere: Prudentiæ  
uero munus est, modum in rebus agendis inuenire, me-  
dium seruandum statuere, in principiis, & conferentibus  
ad finis adeptionem nos conuenienter dirigere, quæ mu-  
nera sine morali uirtute, obire nō potest; nam uitium per-  
uertit

Prudentia tanquam in principio, & causa ea vniuersa rectitudo reperiatur, quæ conuenit virtuti morali, ideo Prudentia dicitur recta ratio agibilium, humanæ vitæ magistra, Auriga nostrarum appetitionum: Ex aduerso moralis virtus præfertur Prudentiæ, quia actu, & forma includit bonum, quod in fine est collocatum, est enim moralis virtus habitus in mediocritate collocatus, à quo habitu proximius pendent probæ actiones, humanæq; scelicitas, quàm à Prudentia; Verum quia continere virtute, & facultate, & esse principium prius, est absolutè præstantius, quàm continere forma, & actu, ideo Prudentia absolutè præstantior censeri debet morali virtute: Hinc recte virtutum Regina, earumq; formatrix, & moderatrix celebratur: Iure etiam legum est conditrix, quæ ad vniuersam virtutem nos dirigunt; Dum autem pro parte virtutis dicebatur, quod ea in fine versatur: Respondeo virtutem nos recte disponente erga finem, ea tamen recta dispositio à Prudentia, vt à causa pendet; Prudentis enim munus est recte consulere, & iudicare de his, quæ bona sunt, & medium seruadum constituere: Et dum addebatur, quod Prudentia sine morali virtute est perniciosissima: Respondeo id euenit, quia tunc non est Prudentia; de ratione enim Prudentiæ rectitudo est, quæ rectitudo perniciosa esse non potest: At dubitabit insuper aliquis, si eueniat, quod homo mortalia omnia negligat, & paruipendat Diuina sola veneretur, & colat, num ille ob hanc actionem debeat censeri Prudens? nam minime Prudens esse videtur, cum fortunæ bona despiciat, quæ humanarum actionum, humanæq; scelicitatis sunt instrumenta; Pariter est dubitatio, num ille, qui negligit sua omnia commoda, suasq; facultates, & totum se dicat curæ Reipublicæ, debeat Prudentiæ, vel potius imprudentiæ nomine designari: Ad primam difficultatem, si cum Plotino loquimur, ille solus censendus est Prudens, qui neglectis humanis ad diuina se conuertit, ideo

Plotinus Enneade prima, libro 6. cap. 6. definiens Prudentiam, dicebat, quod est intelligentia inferiora declinans, animumq; erigens ad superna, qui partim recte, partim male sentiebat; recte loquebatur, quia ea præstantissima Prudentia est: perperam vero, quia ea non est vniuersa Prudentia; Propterea dicendum est cum Prudentia respiciat morales virtutes, & earum sit Dux, formatrix, & gubernatrix, vt in moralibus virtutibus consideratur, & virtus, & gradus heroicus uirtutis: ita de Prudentia sese habere censendum est; nam Prudentia duplex est, una ciuili, & humana, altera supraciuilem, & diuina potius, quam humana, ut Prudentia ciuili nos recte disponit, & dirigit in ciuilibus uirtutibus, ita hæc hæroica Prudentia nos eleuat supra homines, & medios nos constituit inter ciuiles homines, & Deos; Ex quo patet solutio primæ difficultatis: Ad alteram, quæ erat, an homo negligens propria bona ob curam communis, & publici boni, mereatur dici Prudens: Respondeo hac de re nos posse dupliciter loqui, primo ex uulgi opinione, secundo ex sententia Sapientium: si ad multitudinem respicimus, minimè dicendus est Prudens, qui sua negligit; nam Prudentis esse dicitur recte consulere de propriis bonis, ideo ea, quæ in propriis bonis uersatur, absolutè Prudentia nuncupatur, ut etiam in 6. Ethic. dixit Aristoteles, hanc sententiam sequutus est Euripides, qui dixit,

Prudentem enim quis me putet mortalium

Cui suppetebat absq; ullo negotio.

In totius turba numerato exercitus.

Sortem parem obtinere sapientissimo?

Præstantiores nanq; & eos qui pluribus,

Se rebus implicant, male odit Iupiter.

Hæc itaq; est uulgarium sententia, quæ tamen falsa est; primo, quia Prudentis est, bonum, maius eligere, bonum autem quo est communius, eo etiam est præstantius, & uniusq;



quisq; tenetur bonum publicum priuato præferre. Insu-  
per absq; notitia attinentium ad Rempublicam non uale-  
mus recte iudicare bonum proprium, & domesticum, non  
enim de parte absq; notitia totius recte iudicare uale-  
mus: Expetendum itaq; est, bonum commune non negle-  
cto proprio, & si alterum negligere cogimur, potius priua-  
tum, quàm commune bonum negligendum est.

Constat itaq; nec moralem uirtutem sine Prudentia, nec  
Prudentiam sine illa consistere posse.

Insuper conspicuum est, quod quamuis moralis uirtus ali-  
qua ratione principatum obtineat, absolutè tamen Pru-  
dentia earum Regina censenda est.

Præterea constat, eam esse Prudentiam heroicam, qua ne-  
glectis humanis sola diuina magnificimus.

Demum constat etiam, quod reuera magis est Prudens,  
qui publica bona, quàm qui priuata recte gubernat,  
quamuis ex uulgi sententia secus se habeat.

*Num Prudentia, uel sapientia potius principa-  
tum obtineat. Cap. VIII.*



NTIQUA, & à uiris sapientibus satis agi-  
tata est quæstio, num sapientia præstet Pru-  
dentia, uel è contra Prudentia potius sapien-  
tia sit præferenda nonnulli partes vnius;  
alii alterius defendunt, & innumera pro om-  
ni parte argumenta formantur: Quod Prudentia principa-  
tum obtineat, ex eo colligi posse videtur, quia Prudentia  
sapientia imperat, & in Vrbe, quibus scientiis, quomodo,  
& usq; ad quem terminum danda sit opera soli Viri Pru-  
dentes decernunt: Insuper Prudentia respicit bonum, sa-  
pientia verum, bono autem nil melius esse potest, quare  
neq; Prudentia aliquid præstantius potest excogitari;

Quod postremo confirmatur, quia Prudentia respicit, ne dum bonum proprium verum præfertim commune, & publicum, contemplatio vero solum bonum proprium, propriamq; perfectionem perquirat, iure itaq; videtur Prudentia in hominibus principatum obtinere, eaq; sola Reges formare, condere leges, & humanum genus regere, ac moderari: Ex aduerso pro parte sapientiæ potiora media circumferuntur; nam Prudentia versatur in humanis, sapientia sola diuina perquirat, Prudentia versatur in re mortali, sapientia in re æterna, Prudentia nos detinet intra homines, sapientia eleuat ad Deos: Sapientia tribuit principia Prudentiæ, eiusq; est formatrix, & domina: Prudentia lumen, & certitudinem à sapientia recipit: Prudentia est affectio hominum, sapientia Deorum; Prudentia parit foelicitatem ciuilem, sapientia diuinam: Prudentia subiicitur euentibus fortunæ, bonisq; eius; sapientia uehitur supra fortunam, & libera est: Prudentia ex humana indigentia oritur, sapientia ex mentis nostræ diuinitate, ideo ex Iouis capite orta fertur. Varia profecto sunt, & ea quidem maximi ponderis, quæ pro omni parte afferuntur, & hinc oritur disputatio de dignitate, & præstantia Viri Ciuilis, & contemplatiui; Verum vt recte dixit Ficinus in primum de Republ. Platonis, quanto oculus præstat manibus caput pedibus, ratio sensibus, anima corpori, tanto vita contemplatiua actiui præfertur, & consequenter sapientia Prudentiæ: Vt tamen resolutio difficultatis clarior pateat, & Veritas splendidior elucescat, dubiaq; facilius dissoluatur, considerandum est, in mortalibus ut esse præfertur origine ipsi bene esse, dignitate vero postponitur, ita contentia ad esse dicuntur magis necessaria, minus tamen nobilia: Prudentia magis conducit ad esse, hoc est ad sui, aliorumq; conseruationem; sapientia solum respicit ad bene esse: propterea Prudentia magis est necessaria, sapientia est præstâtior. Insuper quia homo est ciuile animal natum uiuere

minore in hominum cœtu, ideo prudentia est hominis mā-  
 gis propria: Sapientia vero est ei magis communis cum  
 Diis, eiq; conuenit, vt supra humanam conditionem ele-  
 uatur: Præterea prudentia versatur in humanis, quæ nobis  
 magis sunt familiaria, magisq; nota, & explorata, sapien-  
 tia versatur in diuinis, & sublimibus, de quibus solam ob-  
 scuram, & valde tenuem cognitionem assequi valemus:  
 propterea vt prudentia cedit sapientiæ ratione præstanti,  
 & dignitatis rei, in qua versatur, ita è contra sapientia ce-  
 dit prudentiæ ratione certitudinis rerum ex parte nostri,  
 & cumulatoris earum cognitionis: Vterq; habitus mirum  
 in modum fulget, sapientia tamen perinde ac sol se habet,  
 aliunde lumen non recipiens; Prudentia est similior Lunæ  
 quæ nobis est proximior, & ea solum ex parte fulget, quia  
 in solem conuersa est, absq; enim sapientiæ lumine tene-  
 bricosa, & obscura penitus est. Ex his ad dubia patet solu-  
 tio; dum enim dicebatur prudentiam imperare sapientiæ  
 hoc minime verum est, nam, vt docet Aristoteles in 6. de  
 moribus: prudentia non imperat sapientiæ, sed pro sapien-  
 tia, quia curat pertinentia ad acquirendam, & conseruan-  
 dam sapientiam, vt medicus non imperat sanitati, sed pro  
 sanitate, & serui non imperant domino, sed pro domino;  
 imperare autem pro aliquo, est ei inferuire, in cuius gra-  
 tiam imperatur, & si quando eueniat, quod uiri ciuiles im-  
 perent sapientibus, id est ex euentu ratione conditionis  
 hominum, non autem id euenit per se, ratione sapientiæ,  
 adeo ut prudentia ex euentu imperet sapientiæ, cum è con-  
 tra sapientia per se prudentiæ imperet, eamq; dirigat, & il-  
 lustret: Dum additur, quod sapientia respicit uerum, pru-  
 dentia bonum, uel saltem boni adaptionem, dico etiam  
 uerum esse bonum, immo uerum est bonum contempla-  
 tioni conueniens, quod illi bono præfertur, quod in actio-  
 ne positum est. Insuper id omne bonum, quod pertinet  
 ad prudentiam, modo quodam eminentiore, continetur in:  
 sapientia,

sapientia; tanquam in Duce, & in causa: Sapientia enim dirigit, & illustrat prudentiam, ideo prudentia censeretur debet non quidem finis, sed fructus aliquis sapientiæ. Ex quo etiam constat solutio ad rationem postremam; nam dicebatur, Prudentia respicit cōmune bonum, format Reges, & mundū regit; Respondeo hæc omnia conuenire sapientiæ, ut causæ, & modo eminentiori: Ideo Deus sua sapientia creauit mundum, eademq; illum conseruat; & humana prudentia sine sapientia fugax est, & inconstans, ut dicebat Plato in Menone. Et tunc solum ex sententia Platonis Vrbes erunt foelices, dum philosophi regnabunt; & ratio potissima est, quia in eis una cum sapientia iuncta est prudentia: Præterea quamuis etiam prudentia respiciat commune bonum, contemplatio proprium, tamen id proprium non est eiusdem generis cum illo communi, sed eminentioris gradus, & cōditionis eleuat enim nos super hominis conditionem propterea ea ratio inanis censeretur debet.

Constat itaq; Prudentiam, necessitate, & proprietate, quadam præstare sapientiæ; absolutè tamen ei cedere, & famulari.

Constat insuper uniuersæ prudentiæ bonum in sapientia, ut in eminenti causa contineri.

### *Fructus, & Vtilitates Prudentiæ.*

#### *Cap. IX.*



VONIAM Prudentia Lunæ dicta est similis, quæ ex Cæli luminibus nobis maximè est proxima; ideo ut ex luna rerū mortaliū generatio- nes pendent, innumeriq; fructus apud nos perficiuntur, ita ex Prudentia tanquā ex vitæ nostræ Luna pluri fructus, præstantissimeq; vtilitates consurgunt: Cū. n. prudentia

Prudētia in suimet, in familiæ, in Reipublicæ administratione Regina sedeat, sua fecūditate, quā à sapiētia duxit, ut tam instituit, leges condit, Magistratus disponit, vniuersas humanas actiones moderatur, & dirigit, Per hanc, si quid mali eueniat, si quid præter ordinem contingat, statim corrigitur, statim dirigitur in bonum, si quid eueniat boni, id ipsum congruente vsu ex bono melius, ex paruo redditur maius, adeo ut Viro Prudenti nil mali contingere posse videatur, & ei soli humana bona uere conueniant, cum eorum illi soli conueniat rectus vsus; Propterea recte Plato in Menone dixit, omnes animæ impetus, atq; omnes declinationes, ducente Prudentia ad beatitudinem tendunt; Im prudentia verò ad contrarium: Præterea cum homo in manibus fortunæ sit collocatus, ac frequenter, multisq; modis ab ea turbetur, crucietur, illudatur, nullum nobis remedium magis salutare Dii præbuerunt ipsa Prudentia; per Prudentiam enim nedum furentem contra nos fortunam lenimus, aduersam repellimus, inuadentem superamus; verum insuper eam nobis subiicimus, obtemperantem reddimus, omni virtute eam denudamus; Pedibus ceruicæ eius conculcamus, adeo ut iure dictum sit.

Nullum Numen abest si sit prudentia, sed te,

Nos facimus fortuna Deam Cœloq; locamus.

Ac insuper ne dum fortunam volubilem, & inconstantem Duce prudentia superamus, verum etiam fatum, rem firmam, & constantem aliqua in parte corrigere, & moderari valemus, multa enim agunt Viri prudentes, quæ fato aduersantur, ueluti dum propensiones naturales superant, & secus agunt, ac per naturā sint procliues, hinc iure dicitur.

Fato prudentia maior.

Præterea prudentiæ auxilio internum bellum homini coequū componimus, nobismet reddimur amici, & sensum à ratione alienum una cum ratione scælici nexu ligamus. Hinc oritur interna serenitas, humana tranquillitas, & pax omni pace

ni pace salubrior, quæ ut intrinsecus in singulis hominibus, ita in familia, in Republica, in Regnis cum splendoris re utilitate resurgit: Propterea recte Anthistenes dixit, murum tutissimum eam esse, neq; enim decidere, neq; prodire, neq; superari posse; nam prudens fallere non vult, falli non potest non mutatur à rebus, sed rerum euentibus se accommodat: Demum quia nil mortalium animos magis turbat, nil magis angit, & excruciat, quàm metus mortis, propterea languenti, & iam iam morienti homini prudentia adstat, doloribus medetur, langores sanat, cruciatus lenit, hominem à formidine liberat, cum ostendat ea omnia negligenda, & parui pendenda esse, quæ morti subiiciuntur: Iure itaq; Seneca dixit: Non video quid habeat in terris Iupiter ulchrius, si conuertere animum velit, quàm ut spectet Catonem, iam partibus non semel fractis, stantem nihilominus inter ruinas publicas erectum, solius prudentiæ, & fortitudinis munere.

Constat itaq; præclaros esse Prudentiæ fructus, ea enim humanæ vitæ magistra est, leges condit, omnes hominis conditiones recte instituit, bonos euentus amplificat, aduersos lenit, & corrigit: Fortunam domat, Fato imperat, pugnantem animæ nostræ partes conciliat, metumq; deniq; mortis longe repellit.

## FINIS LIBRI QVINTI.



s homini  
plendidio  
es dixit,  
neq; pro  
ult, falli  
bus se ac  
agis tur  
mortis;  
i pruden  
iatus le  
a omnia  
biicium  
at in ter  
uam ve  
tantem  
ruden-

a enim  
ominis  
ificat,  
impe  
umq;



ANDREAE DVODI  
FRANCISCI FILII  
PATRITII VENETI

DE  
HABITIBVS INTELLECTVS  
LIBER SEXTVS.



De Arte.

*De significatione nominis Artis, eiusq; defini-  
tione. Cap. I.*



QUITUR homo animalium omnium  
maxime egenus, ac impotentissimus,  
propterea egemus arte, vt per eam va-  
riis necessitatibus occurramus, va-  
riisq; imbecillitatibus medeamur;  
Nomen Artis multa significat, vsurpa-  
tur nonnunquam id nomen in eminen-  
tia quadam, veluti dum dicimus, Deum mira arte creasse  
Mundum, ideo Plato in 10. de Legibus dixit cōtra Demo-  
critum,

critum, Empedoclem, & alios quosdam priscos philosophos, Mundum non Natura, vel Casu, sed Diuina Arte fuisse conditum. Insuper extenditur quandoq; nomen Artis ad sapientiam, & scientiam, ideo quicunq; eis dant operam, dicuntur incumbere bonis artibus: Et metaphysica Ars Artium, scientiaq; scientiarum nuncupatur: Ex aduerso cum declinatione, & depressione profertur nomen Artis, veluti dum dicitur de eo Naturæ instinctu, ac dispositione, quæ solum vmbra; imago, & simulachrum est Artis, per quam Formicæ dicuntur colligere grana, Aranei conficere telas, hirundines nidum construere, & ita de plurimis, propterea Natura quoq; artificiosissima nuncupatur: Verum hoc in loco nomine Artis, neq; eminentiam, neq; depressionem eius intelligi volumus; sed habitum humani intellectus à reliquis contradistinctum, qui inter eminentem Artem, & depressam medium sibi locum vendicat: Hæc Ars definitur ab Aristotele in 6. de moribus, quod sit recta ratio effectibilium, conuenit Ars cum Prudentia, quia ambo ad operam dirigunt, ambo sunt rectæ rationes, Prudentia tamen agibilium, Ars effectibilium, recta ratio est; dicitur Ars recta ratio, quoniam ea non est principium primum, quod operatur, & opera artificiosa construit, sed est recta ratio efficientis, & regula eius, quæ intrinsecus Artificem format, eumq; ducit, ac dirigit in construendis operibus. Hinc Ars dicitur modo quodam illud effectibile, quod per eam constituendum est, veluti Ars medica ab Aristotele in 7. metaphy. dicitur sanitas: Ars ædificandi dicitur ædificium, & sic de singulis: & ratio est primo, quia opera in efficiente dicuntur virtute aliqua contineri, continere aliquid facultate, & virtute est illud ipsum eminentiori quodam modo esse, & includere; Insuper alia potior ratio est, quia Artifex, vt opus conficiat, idq; non temerè, & fortuito, sed recta ratione perficiat, debet in se formam, imaginem, ac Ideam rei conficiendæ includere

cludere, quam Ideam nititur deinde in externa materia pro facultate exprimere, ea autem Idea cum sit forma rei conficiendæ, eodem nomine cum illa significatur; veluti intellectus apprehendens intelligibilia dicitur ea fieri ex sententia Aristotelis in 3. de Anima. contex. 8. & 37. Iure itaq; Ars dicitur non principium absolute primum efficiendi, sed recta efficientis ratio: Principium autem primum natura, vel intellectus est: Vt in Arte medica conspicuum est, nam ex parte medici intellectus est primum principium, ut dicitur in 6. metaphy. quoniam medicus per animam, siue per intellectum dicitur primo operari; ab Arte solam recipit rectitudinem operandi, quæ rectitudo principium primum operandi necessario supponit; Ex parte laborantis principium primum est Natura, quoniam pro recuperanda sanitate, repellendaq; ægritudine Ars ut instrumentum concurrat agentia cum patientibus neccens; Natura autem est, quæ primo opus efficere dicitur: Ideo recte Galenus Artem medicam esse dixit instrumentum nature: Vt tamen instituto nostro inseruit, Ars in artifice non principium absolute primum nuncupatur; Quod si etiam Artem principium primum indicare volumus, non absolute, sed cum reduplicatione loquendum est; Ars enim est principium primum operis artificiosi, non absolute, sed quatenus artificiosum est, ut enim sit artificiosum per se primo ab Arte habet, ut constat ex 2. Phy. contex. 38. Constat itaq; Artis nomen nonnunquam in eminentia accipi, & eleuari vsq; ad Deum.

Insuper patet etiam sapientiam, & scientiam dici Artes. Ex aduerso declaratum est, Artem cum depreffione iumentis; & feris conuenire.

Propriè tamen dicitur Ars pro habitu intellectus contradistincto à cæteris habitibus.

Hic habitus est modo aliquo res conficienda.

Insuper est, & non est primum principium efficiendi.

*De Actione, & Effectione.**Cap. II.*

**Q**UONIAM dictum est Prudentiā in actione, Artem in effectione versari, propterea quæ inter actionem, & effectionem sit differentia considerandum occurrit, conueniunt profecto ambæ, vt inquit Aristoteles in 6. de moribus; cap. 4. quatenus locum habent non in rebus necessariis, sed in his, quæ secus euenire possunt, & ideo cum noster intellectus diuidatur in partem supernam contemplationi dicatam, sola necessariæ respicientem, & in partem infernam dirigentem ad opẽram; quæ optimatrix, consilatrix, & ratiocinatrix nuncupatur, cum actio, cum effectio ad hanc partem pertinent, & propterea in virisq; inconstantia, incertitudo, varietas locum habent, magis tamen in actione, & in attinentibus ad Prudentiam, quàm in effectione, inde euenit, quoddam consilium actionis, & Prudentiæ maxime proprium est, conueniunt itaq; in parte actio, & effectio, differunt uero, & differentia vario modo à variis assignatur. Plato in Carmide ex sententia Hesiodi hanc ponit differentiam, quia opera, & actiones solæ illæ dicuntur, quæ vtilis, honesta & præclaræ sunt, effectiones autem, & turpes, & sordidæ esse possunt; at hæc minime propria differentia esse videtur; quoniam opposita sunt nata fieri in eodem, propterea Prudentia, & Imprudentia, virtus, & vitium, in eodem nata sunt fieri; Sed Prudentia, & virtus ad actionem pertinent, quare etiā imprudentia, & vitium ad eandem pertinebunt, quare necdum honestæ, & probæ, verum etiam improbæ, & vitiosæ dantur actiones; Aristoteles in 6. Ethic. cap. 5. actionem secruit ab effectione, quia effectionis aliud quàm effectio

finis est; actionis vero nequaquam; vel ut in aliis codici-  
 bus legitur non semper: Eandem differentiam confirma-  
 uit in 1. de Republica cap. 3. & in calce primi libri magnorum  
 moralium: propterea in 1. de moribus. ad Nicomachum.  
 cap. 1. dixit, ac videntur inter se fines discrepare, alii enim  
 sunt actiones, alii præter eas opera quædam: Hanc diffe-  
 rentiam approbavit Alexander in 6. metaphy. in exposi-  
 tione 2. contræ. & 1. metaphy. commento 2. sic itaq; Pru-  
 dentia in agibilibus versatur, quorū finis est perfecta actio;  
 Ars vero in effectibilibus, quorum finis aliud ab effectio-  
 ne est; Verum oritur dubitatio, quia si Ars est recta ratio  
 effectibilem, neq; peritia saltandi, & pulsandi lyram, neq;  
 aliæ multæ ludicæ; quæ in imitatione versantur. Artes  
 erunt, quoniam ex eis non remanet opus aliquod peractū;  
 Neq; satis labore videtur solutio. Eustratii in 6. Ethic. qui  
 inquit, Artium quasdam esse effectrices, alias agentes, a-  
 deo ut Ars pulsandi Lyram, & saltandi Artes actione esse  
 dicantur, cum opus non remaneat, at hoc manifeste aduer-  
 satur Aristoteli, qui vniuersæ Artem definiens, inquit, esse  
 rectam rationem effectibilem; Insuper addit nullam ef-  
 fectionem esse actionem, neq; è contra: Propterea dicen-  
 dum potius censeo actionem ab effectione, nō eo solo sci-  
 ærni, quia post actionem non remaneat opus peractum,  
 remaneat autem post effectionem, immo hæc videtur esse  
 differentia valde externa, & levis: At dicendum puto  
 actionem ab effectione tribus modis distingui, primo ex  
 parte finis, secundo ex parte principii, tertio ex parte mo-  
 di operandi; ex parte finis, quia in actione semper finis est  
 ipsamet actio, & id bonum, quod in ea includitur, in effe-  
 ctione autem nunquam finis, præcipuus est, ipsa effectio,  
 sed vel est opus, quod ut plurimum remanet elaboratum,  
 vel est utile aliquid ex effectione consurgens, ut Artis sal-  
 tandi finis est sanitas, & congruens corporis dispositio, ideo  
 inter Gymnasticas artes numeratur, quarum finis non ea  
 effectio,



effectio, sed sanitas est ex ea confurgens: Ita de Musica loquendo finis non est recte canere, vel pulsare Lyræ, sed utilitas inde confurgens, ut puta animorum à grauioribus studiis ingenua relaxatio, perturbationum animi compositio, vel earum excitatio, & similia, ut docuit Philosophus in 8. de Republ. cap. 7. & hoc idem etiam significare voluit in 6. Ethic. si verba recte perpenduntur, quam rem etiam nouit Eustratius, sed minus recte deinde dixit dari artes actiuas: Verum est dubitatio, quia Aristoteles in calce primi magnorum moralium, pulsationem Lyræ actionem nuncupauit: & Alexander in 6. metaph. saltus nuncupauit actiones: Dicendum quòd hæ dicuntur actiones consideratione quadã externa & populari: insuper quia valde cū actione conueniunt, quatenus ex effectione non remanet externum aliquod opus confectum: primã itaq; differentia ex fine sumitur, secunda sumitur ex principio: nam initium actionis est proheresis, siue præelectio, & pertinet ad appetitum, initium vero effectionis, non præelectio est, sed intellectus per Phantasiam; hanc distinctionem assignauit Aristoteles in 2. Phy. dum soli homini conuenire actionem ex eo ostendebat, quia soli homini conuenit præelectio, id ipsum manifestabat in primo contex. 6. metaph. ubi asserbat effectionum in efficiente principium esse, aut intellectum, aut artem, aut facultatem quandam: actionum vero in agente proheresim, idem enim agibile, & eligibile est. Tertio differunt ratione modi; & ratione conferentium ad operationem; nam actio præsertim fit cum aliquo concursu perturbationum, & eius præcipua absolutio interna est, & locum habet in ea præelectione, quæ ex consultatione confurgit, ideo dixit Aristoteles in 3. Ethic. cap. 1. actiones hominis tum ab ira, tum à cupiditate ortum ducere; effectio è contra sine perturbationum concursu fit, & extrinsecus instrumento partium corporis perficitur; propterea dixit Aristoteles, bonum Artis in opere confecto considerari, actio-



et actionis vero præsertim in præelectione; & in Artibus, qui sponte peccat, minus errat, in actionibus maxime culpandus est; qui peccat sponte.

Constat itaq; ex his primo actionem cum effectione conuenire, quia ambo ad eandem facultatem intellectus pertinent, & in materia non necessaria versantur.

Secundo patet cæteros diminute assignare differentiam inter Actionem, & effectionem, cum enim ea ex tribus petenda sit, ipsi ad unum respiciunt.

Ex quibus demum colligimus omnem Artem esse rectam rationem effectibilium, quamuis nonnullæ cum actione magis conueniant.

*Nonnulla colliguntur ad actionem, & effectionem pertinentia. Cap. III.*



X his, quæ in præcedente capite de actione, & effectione declarata sunt, uaria, & ea quidem satis utilia colligere ualemus; Colligimus primo quòd quamuis actio, & effectio sua forma distinguantur, tamen frequenter nectuntur, & in eadē operatione pertinentia ad utranq; inueniuntur: Veluti dum Faber die festo opus aliquod arte conficit, quatenus prælegit id efficere die festo, peccat, & est actio uitiosa, quod uitium in ea præelectione positum est, quæ effectionem operis antecedit, per quam prauam actionem Faber dicetur uir absolute prauus, solum ob recte confectum opus poterit dici bonus Faber; nam actio hominem bonum, uel malum absolute reddit, effectio uero solum bonum, uel malum, cum additione, ut puta bonum, uel malum Fabrum; Insuper colligere ualemus perperam à plurimis diuidi actionem in immanentem, & transeuntem; omnis enim actio immanens est, cum eius

finis

finis sit illud bonum, quod in præelectione est positum, quod eligentis est. Ideo recte Aristoteles in 9. metaphy. 16. non actionem, sed operationem diuisit, omnis itaq; actio immanens est; effectio uero, & immanens, & transiens esse potest, immanens, ut saltandi, operatio transiens, ut ædificatio. Tertio colligendum est perperam à plurimis diuidi artes, nonnullas in Theoricas, & Practicas, ut Artem medicam, Astrologiam, & similes; nam Ars, neq; Theorica, neq; Practica vere dici potest, non Theorica, quoniam Theroicæ finis est cognitio veritatis; vniuersa autem consideratio Artis ad effectiorem tendit; non Practica, quoniam Praxis est actio, quæ distincta est ab effectione, arti autem sola conuenit effectio, ideo recte Aristoteles in 11. metaphy. Artem medicam absolute effectricem nuncupauit. Verum est dubitatio, de nonnullis, quoniam non constat num actiones, vel potius effectiones dici mereantur, ut puta sensuum operationes. visio, auditio; hæ namq; videntur actiones, & tamen, ex præelectione non confurgunt; nec soli homini conueniunt; pariter docere alios, num actio, vel effectio sit, minime constat, ad uaria enim respiciendo modo actio, modo effectio esse videtur; Eadem dubitatio est de actu intelligendi hominis, & Intellectuarii, nam actio esse uidetur, cum tamen neq; ex præelectione, neq; ex animi perturbationibus ortum ducat: Ad has difficultates respondens, dico primo, dum Aristoteles actionem ab effectione seiunxit, præsertim ad humanas operationes respexit, & eas in actionem, & effectiorem diuisit, & de his veræ sunt differentie in præcedentibus explicatæ: addo insuper, quòd loquendo de cæteris ratione maioris, vel minoris conuenientiæ, cum his modo actiones, modo effectiones dici possunt, veluti actus intelligendi actio nuncupatur, quoniam finis est ea veritas, quæ ira in contemplatione est posita, vel bonum in actione, redigitur itaq; ad actionem, quamuis propriè actio non sit,

pariter

pariter loquendo de actu sentiendi, ille potius debet dici actio, quàm effectio; & ratio est, quia finis proprius eius est, ut videamus, vel audiamus, ac sensilia iudicemus, quod iudicium actio est, cum finis, & rectitudo sit posita in ea veritate, quæ illi conuenit; hinc Aristoteles in Proemio metaph. dixit sensus ex se esse diligendos, quàmuis ex eis nulla alia utilitas præter iudicium sensilium confurgeret; Verùm tamen est quod si ad finem remotum respicimus, quatenus conferunt ad salutem corporis, vel ad habitus intellectus, modo aliquo cum effectione operatio eorum valde conuenit: Demum loquendo de actu docendi alios, dico doctrinam varia ratione esse effectiorem, & actionem; esse quidem actionem dum consideramus, quod homo præligit alijs instituere, quia id est opus honestum, & qui multos erudiunt dicuntur mirum in modum fulgere, ex aduerso vero est effectio quatenus doctrina est operatio transiens, & eius finis non in ea operatione positus est: At dubitabit aliquis, quia si docere est efficere, sequetur, quod qui docent metaphysicam, vel Naturalem scientiam artifices erunt, eis enim conuenit recta ratio efficiendi, cum docere sit efficere: Respondeo munus docendi ad artem posse redigi; hinc nonnulli dicuntur habere veram docendi artem, alios minimè, quæ ars docendi, est fructus, & signum scientiæ: ita quoque se habet de arte differendi, de arte orandi; nam artes sunt, & artes ingenuæ, euenit tamen, quòd homines respicientes ad vulgares artes eas solas propriè censent artes, quæ in externa materia versantur, cum tamen aliarum multarum his potiores inueniantur.

Colligamus itaq; actionem cum effectione frequenter necesse est, in quo nexu potest homo recte agere, & perperam efficere, & è contra.

Insuper dicimus hominem per actionem dici absolute bonum, vel malum, per effectionem vero solum in parte.

Præterea addimus male actionem diuidi in inmanentem;  
& transeuntem.

Pariter non recte artem diuidi, in Theoricam, & Practicam.

Demum constat actum intelligendi, ac sentiendi redigi ad actionem, actum vero docendi alios partim ad actionem partim ad effectiorem.

*De nonnullis Artium diuisionibus.*

*Cap. IIII.*



**V** humana impotentia, humanaq; necessitas latissima est, ita late patent artes, quæ ei medentur, variæq; a variis assignantur eius diuisiones, quæ vt clarius pateât a fine artiũ ordiri debemus: Institutz sunt Artes, vt earum auxilio, homo per naturam impotens, potentior, quoad ei liceret, redderetur: Impotentia conuenit homini, vel ratione animi, vel ratione corporis, nam si conuenit cõposito, necesse est vt eiconueniat præsertim ratione alicuius componentis, hinc ortum ducunt Artes, quæ vel conferunt saluti corporis, ut ars medica, vel saluti, & perfectioni animi, ut Grammatica, Dialectica, & similes: Insuper si conducunt ad animi, vel corporis medelam, aut conducunt, vt sint, & seruentur, vel vt bene sint; si conducunt ad esse oritur Agricultura: Ars obstetricia, si ad bene esse oritur Grammatica, Ars Gymnastica, & similes: Præterea cum conferant ad bene esse, id bonum, vel est uere bonum, ut sanitas ad quam confert Ars medica, & animi perfectio ad quam confert Grammatica, & Dialectica, vel est bonum apparens, non uere bonum, huiusmodi est bonum illud, ad quod paratz sunt artes ornandi mulieres,

lieres, conficiendi fucum, & cinnos, inſuper commiſcendi venena: & ſimiles, quæ vt non ad vere bonum, ſed ſolum ad id, quod bonum apparet referuntur; ita non vere etiam cenſeri debent artes: Præterea huiuſmodi artes, vel proximè reſpiciunt ad hominis eſſe, & bene eſſe, vt arſutatoria, & medica, vel alio mediante, vt arſ paſtoralis, aucupatoria, & ſimiles; hæc ſunt capita potiora, ex quibus ſatis cumulate colligere valemus numerum, & ordinem artium: Inſuper in vniuerſa hac artium latitudine nonnullæ inueniuntur, quæ ingenuæ, liberoque homine dignæ ſunt, aliæ ſordidæ, nonnullæ inter has mediæ, quales ſunt, artes ludicræ, & pueriles, nam longe rectius ita assignandam eſſe diuiſionem cenſeo, quam tradita fuerit a Poſſidonio, qui quatuor genera artium dinumerauit, ſordidarum, ludicarum, puerilium, & liberalium, conſtat enim has in ea tria membra, conuenienter redigi: Præterea in eadem artium latitudine nonnullæ inueniuntur, quæ in imitatione conſiſtunt, ut ſtatuaria, & pictura: aliæ opus conficiunt, vt arſ conficiendi inſtrumenta bellica; alia demum vtitur qualis eſt militaris, quæ utens dignitate præfertur efficienti: hanc diuiſionem Plato in decimo de Republica assignauit, ſed vt cæteras diuiſiones prætermittam, quæ multæ ſunt, cum Ariſtoteles in ſecundo Phyſico. 25. dico artium nonnullas eſſe dominas, & Principes, quæ Architectonicæ nuncupantur, alias ei famulari, & inferuire: Artes Principes duæ ſunt, vna vtens qualis eſt Muſica, & arſ militaris, altera non vtens, ſed ſolum præcipiens, quales ſunt ædificiorum Architecti, quibus vtiuntur Principes pro recte conſtruendis oppidis, & Palatiis: Neque ex his debemus colligere, quod omnis utens ſit artifex; multi enim vtiuntur domibus, indumentis, & ſimilibus, qui tamen artificeſ non ſunt ideo nomine vtentis intelligere debemus artificeſ præcipuum, cui alia arſ famulatur, vt muſicus vtitur tibia, & militiæ Princeps



utitur militaribus instrumentis ab aliis artibus, eius famulis constructis, quicunque hoc modo se habent duplici ratione sunt artifices primo, quia præditi sunt habitu eminentioris artis, secundo, quia etiam cognoscunt formam, & pertinentia ad perfectionem instrumenti ab alia arte conficiendi, & ideo ei præcipiunt, vt congruente forma illud efficiant: Duæ itaque sunt artes, quæ Principes, & dominæ nuncupantur, vtens vna, altera non vtens, sed præcipiens; Artes famulæ etiam duæ sunt, vna uersatur in conficienda, uel disponenda materia, ut ars conficiendi calcem, & lateres, insuper ars dolandi ligna; Altera in ea materia formam inducit, ut ædificatores: Dum huiusmodi artes inter se conferuntur, & quæ earum sit præstantior consideratur, proculdubio artes dominæ præsumunt ministris, & quamuis illæ solum videantur, efficere opus, quæ suis manibus illud construunt, attamen eminentiori, & præstantiori modo præcipientes id efficere dicuntur quam famulantes, qui enim dirigit, & primo mouet, maxime mouere dicitur. Si fiat deinde comparatio inter utentem, & præcipientem, utens uidetur esse præstantior cum præcipiens dicatur præcipere in gratiam utentis; Demum si artes famulæ inter se comparantur, proculdubio ars illa, quæ formam inducit, & opus perficit præstantior est altera, quoniam materiæ constitutio, & dispositio in formam recipiendam, tanquam in finem dirigitur.

Constat itaq; artes humanæ necessitati respondere, & ex ea sumendum esse numerum, distinctionem, & ordinem earum.

Insuper diuisæ sunt artes, in sordidas, ingenuas, & medias.

Præterea diuisæ sunt in eas, quæ imitantur, quæ opus conficiunt, & quæ confecto opere utuntur.

Demum diuisæ sunt in Principes, & famulas: Principes in vtentes, & præcipientes, famulæ in disponentes siue conficien-



conficiētes materiam, & inducentes postremā formam.  
Inter has artes dominæ principatum obtinent, ex dominis  
utentes, ex famulis inducentes formam.

*Vtrum Ars utatur consilio.*

*Cap. V.*



**A**RTE uti consilio, ratione, experientia,  
auctoritateq; cognoscimus, ratione pri-  
mum, quoniam frequenter attinentia ad  
artem satis incerta, & obscura sunt; in ob-  
scuris, & dubiis egemus consultatione, &  
consilio ne erremus, quod patet experientia: utuntur me-  
dici consultatione, & ne dum medici; verum etiam Nau-  
tæ, Duces militiæ, & similes, quod demum auctoritate  
confirmatur; nam Plato in Alcibiade primo inquit Navis  
Gubernatorem uti consilio: Aristoteles in 3. Eth. cap. 3. id  
ipsum affirmat inquit: Neq; vero in scientiis exquisitis,  
suaq; vicentis consultationi locus est, verbi gratia de  
literis non consultamus, non enim quomodo scribendum  
sit ambigimus, sed de iis, quæ tametsi opera nostra fiant,  
non tamen semper eodem modo fiunt, ut de iis, quæ ad me-  
dicinam, ad artem pecuniæ quærendæ pertinent, & in arte  
gubernandarum navium potius, quàm in ratione corpo-  
rum exercendorum dubitare solemus, quanto minus illa,  
quàm hæc enucleatis, & exquisitis præceptionibus abso-  
luta est, & præterea item de reliquis, magis autem in arti-  
bus, quàm in scientiis consultationi locus est; in eis enim  
sæpius ambigere solemus, hæc Aristoteles, quibus mani-  
feste affirmat in artibus quoq; locum habere consultationē;  
Ex aduerso Aristoteles in 2. Phy. contex. 86. inquit, absur-  
dum autem est non opinari agere propter finem nisi vi-  
deant

deant mouens deliberasse, & uti consilio, & tamen ars non utitur consilio; Confirmatur, quia consilium cum prælectione videtur esse coniunctum, ex consilio enim sequitur prælectio, quæ non in artibus locum habet, sed in solis humanis actionibus, non itaq; videtur artifex uti consilio: Pro resolutione considerandum inueniri hæc tria subordinata, quæstionem, consultationem, & prælectionem, quæstio est communior consultatione, quæstio enim etiam locum habet in rebus æternis, consultatio vero solum est de rebus non necessariis, quæ ab homine fieri possunt, ut colligitur ex 3. & 6. Ethic. Prælectio adhuc minus communis est, quàm consultatio, omnis prælectio supponit consultationem, at non omnis consultatio in his versatur, quæ ad prælectionem pertinent, nisi prælectionis nomen late usurpetur: Insuper accipiendum est duplex esse genus artium quoddam enim certum, & definitum est, in quo locum non habet consultatio: Aliud est inconstans, incertum, apprimè dubium, in quo artifices accurata consultatione utuntur, & hæc distinctio ex Aristotele colligitur in 3. Ethic. cap. 3. Demum addendum censeo Artificem esse duplicem, imperitum vnum, qui magis consultatione eget, peritum alium, qui quamuis nonnunquam, minus tamen consultatione utitur, quàm imperitus; ex his patet resolutio difficultatis. Quærebatur vtrum Ars utatur consilio, dictum est, artem incertam, & artificem imperitum consilio uti: Ad Aristotelem in 2. Phy. dicentem artificem non uti consultatione. Respondeo sententiam esse veram de nonnullis, & aliquando non de omnibus, & semper, & id erat satis Aristoteli, institutum enim eius eo in loco erat ostendere non esse necessariam consultationem ad hoc, ut agens operetur propter finem, id manifestauit exemplo artis, quæ quamuis frequenter non utatur consultatione, tamen semper operatur propter finem; Ad rationem, quia consultatio terminari uidetur ad prælectionem,

ctionem, dico hoc solum esse verum de consultatione quæ uersatur in rebus agendis, non de ea, quæ uersatur in rebus efficiendis; Assero tamen in rebus agendis magis proprie habere locum consultationem, quàm in rebus efficiendis.

Patet itaq; in artibus modo aliquo locum habere consultationem.

*An Ars sit Præstantior, quàm Natura.*

*Cap.*

*VI.*



**P**LEURA & iam diu inter Viros celebres agitata est quæstio: num Ars naturæ, uel natura potius arti dignitate, & præstantia sit præferenda, & iure profecto de hoc ambigitur ambæ enim sunt causæ præclare, & illustres, ambæ suis operibus eximiam in spectatoribus pariunt admirationem, propterea modo una, modo altera præferenda uidetur: Pro artis præstantia, & dignitate, hæc potiora nobis sese offerunt, & primo quia opera nobis præstantiam opificis patefaciunt, in opera conuersi percipimus ea artis potiora esse, nam ut inquit Aristoteles in 2. Phy. 79. ars multa perficit, quæ per naturam perfici nequeunt, ab arte itaq; prouenit rei perfectio, & consequenter opus eius est præstantius opere naturæ: Insuper ut inquit Aristoteles. sub initium suarum meccanicarum quæstionum, arte superamus ea, quibus natura uincimur, sic arte grauissima pondera eleuamus, domamus feroces tauros, & alia huius generis supra humanas uires nobis subiicimus, quæ per naturam efficere non ualemus: Præterea id ipsum ex conditionibus, & modo operandi artis comprobare ualemus: Ars operatur cum cognitione, cum ratione,

ratione, cum consilio, quibus natura caret; Insuper dum operatur se habet, ut regula, ut dux, ut formatrix naturæ; ueluti per naturam ambulamus; per artem ambulationi, & saltibus regulam, & formam tribuimus, per naturam uocem emittimus, per autem id efficimus cum numeris, & harmonia: Hinc natura tradere dicitur conducentia ad esse; ars uero ad bene esse: Natura antecedere, ars tanquam perfectio subsequi dicitur; Ea autem, quæ sunt generatione postrema, & conferunt ad bene esse, dignitate, & perfectione sunt prima: ut in 8. Phy. monuit Philosophus: Demum præstantiam artis lucide conspiciamus dum principium eius, & illud cui conuenit consideramus: Principium artis est intellectus; ars soli homini conuenit, & parti eius præstantissimæ, intellectui uidelicet, anima autem & intellectus supra naturam collocantur, quare ars quoque, supra naturam est eleuata, & dum aliquid natura, & arte efficitur, longe melius efficitur arte, quam natura, ut Aristoteles in Proœmio Rhetoricorum affirmauit; ideo iure ars Dux certior, quam natura esse dicitur: Hanc sententiam visus est approbasse Plato in 10. de Legibus, ubi artem naturæ esse præferendam manifestauit; Sunt profecto rationes, quæ pro parte artis afferuntur magni ponderis, multiq; momenti, at ex aduerso illæ, quæ pro dignitate naturæ afferri possunt præualere videntur; nam si ad opera conuertimur ars sola producit accidentia, & ne dum sola accidentia, immo potius solas umbras, solasq; imagines rerum; Natura uero res producit serias, res natura constantes, substantias, uiuentia, & præstantissima corpora, si ad conditiones, & modum operandi respicimus: Natura constans, certa, & firma est, ars summopere fallax; Natura intus operatur, ac rem intus, & extra perficit; Ars solum extrinsecus operatur, & perficit; Natura ex se sufficiens est, antiquior est arte, non emulatur artem, sed è contra ars naturam imitatur; Demum si attinentia ad  
princi-

principium consideramus inueniemus naturam proximè Deo famulari; artem homini: Naturam ex se præditam esse virtute, & facultate operandi, vires suas ab arte non recipere, dempta arte sibi esse satis pro suorum operum absolutione, cum è contra ars egeat natura, innitatur ea tanquam fundamento, ab ea vires, & facultatem recipiat; Hinc Simplicius, & Porphyrius iurè meritò partes primas tribuerunt Naturæ, vt patet ex Simplicio in 2. Phy. commẽto 79. & Aristoteles. in 6. Ethic. cap. 2. dixit Naturam, & virtutem esse Duces certiores, ac firmiores arte; Plotinus quoq; Enneade 4. lib. 1. Naturam arti dignitate esse præferendam affirmauit, Insuper Aristoteles in 2. Phy. 79. ostendit Naturam operari propter finem, id ostendit per artem; cum enim ars operetur propter finem, longe magis natura propter finem operabitur. ideo Porphyrius dicebat argumentum esse à minori ad maius, quod vt vim habeat manifestè supponitur ab Aristotele artem ignobiliorem esse Naturam.

Constat itaq; Naturam potiore esse arte.

*Resolutio difficultatis. Cap. VII.*



**S**ATIS manifestè ex dictis constare censeo Naturam præstare arti, cum fundamenta ad naturæ dignitatem conferentia aduersus fundamentis præualeant: Sed quia rationes pro parte artis adductæ negligendæ non sunt; propterea vt Veritas reddatur clarior, & rationes aduersæ diluantur facilius, præaccipiendum est nomina artis, & naturæ, hoc in loco proprie accipi, vt ars declarata fuit in præcedentibus, & Natura definita fuit ab Aristotele in 2. Physic. Insuper addendum est, artem, & naturam

A proprie



proprie sumptâ dupliciter considerari posse, primo quoad ea, quæ vtriusq; sunt propria, quatenus vna contradistinctur ab altera, secundo in vniuersa sua latitudine, includendo in arte etiam ea, quæ ab arte supponuntur: His præassumptis dico, si ambo considerantur, quoad ea, quæ vtriusq; sunt propria, proculdubio Natura præferenda est arti, adeo vt absolute sit arte præstantior: Si vero consideratur ars quatenus naturam includit, & aliquid vltra superaddit secus se habet, ita enim ars Naturæ præfertur; quia sic ars, & Natura simul cum sola natura comparatur: Ex his ad dubia; Ad primum, quia ars perficit Naturam: dico ars perficit, non vt causa præcipua, sed tanquam instrumentum eius, vt rectè Simplicius affirmavit: Natura vero perficit opera artis, vt causa, Princeps, & domina, quod manifestè patet, de agricultura, & arte medica: Dû additur, quòd ars naturam superat. Respondeo non ars sola superat Naturam, sed ars naturæ superaddita, & cum ea iuncta: Ad aliud, quia ars operatur cum cognitione, cum ratione, & consilio: Respondeo, vt ars se habet ad intellectum, ita modo aliquo Natura se habet ad Deum, Ars includit cognitionem, & consultationem intellectus; Natura autem supponit eminentem cognitionem, & consultationem Dei, propterea dicitur dirigi ab intelligentia non errante, vt inquit Auerroes. 12. metaph. 18. & Themistius in 1. Phy. 81. Dum additur, quòd ars naturam dirigit, confert ad bene esse, & est generatione posterior: Respondeo artem dirigere naturam, & corrigere in valde paucis, & in rebus minime necessariis, non enim ars dirigit naturam in productione Elementorum, in generatione animalium, in formando homine, & similibus præclaris operibus eius, dum absolute rerum præstantiam consideramus, ad maximum, quod possunt respicere debemus, vt nos docet Aristoteles in 1. Cœli: at præstantissimū opus naturæ



naturæ est longè eminentius præstantissimo opere artis : Præterea non omne posterius origine est perfectione prius : Deus est prior intelligentiis, intelligentiæ Cœlo, Cœlum elementis, quæ vt origine sunt priora, ita sunt priora perfectione, in mortalibus tamē id esse verum affirmamus, quatenus consideramus id posterius non seorsum sed unā cum priori ex quo nil aliud sequitur nisi, quod Natura iuncta cum Arte sit præstantior natura sola. Accedit, quod ea perfectio quam adhibet ars, est in accidentibus posita, & id facit ars, vt ministra Naturæ, cum ex se ars nil efficere valeat : Ad postreman, quia dicebatur artem pertinere ad intellectum; & soli homini conuenire, Naturam subiici intellectui, & humanæ conditioni : Respondeo ars non est anima, vel intellectus, qui naturæ præferatur, sed est habitus eius: si compararetur intellectus cum natura, profectō intellectus principatum obtineret; at ars est dispositio intellectus, quæ ita ad intellectum se habet, vt natura ad Deum, & propterea frequenter Natura nuncupatur ars diuina; Diuinam autem Artem esse præferendam arti humanæ nemo inficiari debet: Insuper Ars dicitur Dux certior, quàm Natura, quia tunc comparatur Ars, & Natura simul cum sola natura; & ideo dicebat Aristoteles dum aliquid potest fieri arte, & natura, rectius fit arte, quàm natura solum: Ad confirmationem ex Platone desumptam, dico locum illum à multis perperam accipi, & male referri, existimantibus Platonem absolutè tribuere Principatum arti; nam Plato non loquitur tunc de humana arte, sed de arte Dei, qua Mundus constructus, & formatus fuit: Disputabat tunc Plato aduersus Empedoclem, Democritum, Leucippum, & alios existimantes Mundum esse genitum ex sola corporum naturali inclinatione per fortuitum concursum Elementorum, siue athomorum; ipse autem affirmat diuinam arte fuisse constructū?

Diuinam autem artem iure merito cæco casui; corporūq; irrationali inclinationi præferendam censuit, in eadem significatione Aristoteles in 1. metaphy. capi. 3. inquit, vt enim entia bene se partim habeant, partim fiant, nec ignē fortassis, nec terram, nec aliud huiusmodi quicquam, verisimile est causam esse, nec illos verisimile est arbitrari, nec rursus casui, & fortunæ tantam attribuire rem, probè se habet, quare qui vt in animalibus, ita in natura intellectum esse causam mundi, totiusq; ordinis dixerat, quasi sobrius comparatus ad antiquiores vana dicentes apparuit; Ex his itaq; constat solutio rationum pro parte artis. Constat insuper Platonem non secus ac Aristotelem, artem subiecisse Naturæ.

*Vtrum Ars valeat efficere substantiam.*

*Cap.*

*VIII.*



**D**ICTUM est artem in solis versari accidentibus, & minime posse substantiam producere, & iurè merito id dictum est; Substantiæ enim omnes, quæ gignuntur dicuntur, constare Natura, quæcunq; autem natura constant, per naturam quoq; dicuntur fieri: Confirmatur quoniam Ars est habitus, intellectus est vel relatio, vel qualitas, & accidens, qualitas autem, & accidens non valet generare substantiam; nam ars supponit esse rerum, & solum ei superaddit ordinem, mensuram, & dispositionem: Verum occurrunt dubia nonnulla minime negligenda, videtur sæpe ars substantiam producere, quod patet exemplo agriculturæ, qua gignuntur Plantæ, exemplo artis chemicæ, qua producuntur metalla, exemplo artis

conficien-

conficiendi calcem, & gipsum; quæ omnes artes substantiâ efficere videntur: Ideo Aristoteles in 2. Phy. 24. absolute quædam artes materiam efficere affirmavit; materia autem substantia est, valet itaq; ars substantiam efficere, cui difficultati satisfaciens dico artem conficere substantiam dupliciter posse intelligi; vel quod eam efficiat vt causa prima, vel vt instrumentum Naturæ; quod eam efficiat, tanquam causa prima, & præcipua contingere non potest ob rationes in præcedentibus relatas, solum contingere potest, vt eam efficiat tanquam instrumentum naturæ, quatenus per artem agentia naturalia cum patientibus iunguntur, quæ mox per naturam producant substantiam: Hinc ortum ducit Magia naturalis, quæ est hinc ens agentium, & recipientium per naturam, quæ præsertim naturali philosophiæ subiicitur, non quidem tanquam finis, sed tanquam fructus ex eius fertilitate prodians: Ex his patet solutio ad instantias. At pulchra se nobis offert consideratio, cum eadem, & per artem, & per naturam confici posse nonnunquam videantur, vt patet de sanitate, de metallis, & similibus; num genita per artem debeant censeri eiusdem speciei cum genitis per naturam? Averroës in Paraphrasi de Generatione animalium lib. 1. cap. 1. inquit id contingere non posse, & rationibus nititur id ostendere, propterea damnat eos, qui putant metalla se posse arte conficere, cum solum aliquid extrinsecus simile gignere valeant; nam rerum causæ sunt determinatæ; ideo ex distincta materia, & ab efficiente specie distincto, non potest aliquid idem specie produci: Averrois sententia partim vera, partim falsa est, vera primo est, quia à causis specie distinctis per se primo non possunt distinctæ rerum species produci: falsa tamen, quia id fieri potest quando ars producit opus, vt instrumentum nature veluti frequenter euenit; Et loquendo de metallorum

generatione, non censeo impossibile nonnulla eorum ab arte effici posse, non tamen omnia, ex metallis enim quædam sunt minus perfecta, eorum principia magis sunt conspicua, & posita sunt in facultate hominis, propterea valet artifex vti huiusmodi principiis, & tanquam magis valet efficere metallum aliquod; at loquendo de præstantioribus, & præsertim de argento, & auro, quoniam ob eorum præstantiam principia, & causæ illorum non sunt in facultate, & manibus hominis, propterea non valet artifex ea efficere: possunt itaq; ex substantiis nonnullæ eadem specie arte, & naturæ confici, sed quamuis arte dicantur fieri, omnes tamen fiunt natura, neq; Aueroes hoc negaret, ipse tamen loco relato solum manifestare voluit, per artem tanquam per causam primam, vel saltem per artem vten-tem, materia distincta ab ea, qua Natura vitur, non posse gigni eadem specie. Ad Aristotelem, qui inquit artem efficere materiam: Dicendum est, quod ars efficit materiam, non absolute, sed proximam, distinctam solum qualitate, & accidentibus, & si nonnunquam efficit materiam substantiam, id fa cit tanquam instrumentum Naturæ.

Constat itaq; artem per se solum efficere accidentia, vt vero instrumentum Naturæ etiam efficere substantiam. Insuper patet artem tanquam instrumentum naturæ posse efficere substantias eiusdem speciei cum his, quæ fiunt per naturam.

*Quot, & quæ sint artes ingenuæ, & quæ viles, &  
sordidæ. Cap. IX.*



**Q**UAMVIS artium quædam sint ingenuæ, aliæ sordidæ, nonnullæ mediæ, quales sunt Ludicæ, & pueriles, attamen quia mediæ minoris sunt momenti, & modo aliquo, vel ad ingenuas, vel ad sordidas rediguntur; propterea mediis prætermiſſis, de ingenuis, & sordidis agam, vt conſtet quibus nam valeat vir ingenuus, vel cum ſui ornamento, vel ſaltem ſine dedecore nauare operam; quod vt exactius fiat, clariuſq; eluceſcat, ab earum definitione exordiendum eſt. Sordidum opus, & ars doctrinaq; ſordida ex ſententia Ariſtotelis in 8. De Repub. ea cenſeri debet, quæ humanum corpus, vel animam, vel intelligentiam, inutilia ad uſus, actioneſq; virtutis reddit reddit: & propterea animum inficere, inquinare, ac illum à potiore hominis ſine, auertere dicitur. Contra artes, diſciplinæq; ingenuæ illæ ſunt, quæ virum decent ingenuum, ac illum, vt talem, vel parant, vel formant, vel illuſtrant: Vir demum ingenuus ille eſt, qui Principem in omnibus ſibi rectam rationem conſtituit, quiq; ſolum inſpiciens honeſtum, fortunæ, & Naturæ, bonis tanquàm miniſtris virtutum vtitur; Ex his ortum ducit ingenuarum diſciplinarum in tres gradus diuiſio, ac diſtributio: Earum nanq; nonnullæ animum, vel corpus ad vitam ingenuam diſponunt, aliæ formant, ac perficiunt, nonnullæ demum iam formatum decent: Corpus rectè diſponunt Artes Gymnaſticæ quarum Principes ſunt ſaltatio, & Lucta, vt in 7. De legibus. docuit Plato, ad idem conferunt etiam ludi nonnulli ingenui, inter quos iure merito à Galeno

leno ludus parua pilæ commendatur: pariter Aucupio-  
rum, venationumq; formæ nonnullæ inueniuntur, quæ  
non secus ac Gymnasticæ artes, ad corporum sanitatem  
congruentem flexionem, leuitatem, ac motum, conducût:  
quibus mox vir ingenuus vitur, cum pro sui, amicorumq;  
salute, tum præsertim pro salute Patriæ, in propulsandis  
iniuriis, seruando honesto, repellendisq; suæ Reipub. ho-  
stibus: Aliæ artes, ac disciplinæ ingenuæ inueniuntur,  
quæ animum conuenienter disponunt; & quoniam ea, quæ  
instrumenti loco nobis natura dedit pro acquirendis, re-  
cteq; formandis habitibus animi, sunt ratio, & oratio, iure  
artes instrumentariæ, quæ animum parant, vel in sola ora-  
tione, vel in sola ratione, vel in vtrisque versantur; hinc or-  
tum ducit Grammatica, Logica, Rhetorica, & Poetica,  
hæ sunt ingenuarum artium illæ quæ animum vt corpus  
rectè disponunt. Disciplinæ, quæ deinde animum Viri  
ingenui formant, ac omni ex parte perficiunt, sunt duæ  
Philosophiæ partes, vna, quæ in actione, altera, quæ in  
contemplatione versatur, hæc ducit, & dirigit, illa pro iu-  
re, & æquitate iuncta disponit; vna eminentiorem animæ  
partem, mentem scilicet, altera appetitum ei inseruien-  
tem, præsertim ornat, & illustrat: Demum disciplinæ,  
quæ virum ingenuum iam formatum, ac libertate dona-  
tum decent, variæ sunt; & hæ sunt illæ, quæ vel ex naturali  
Philosophia, vel ex mathematica, vel ex vtrisque sua prin-  
cipia proxime recipiunt: Ex Naturali Philosophia pen-  
dent artes illæ, quæ ad naturalem magiam rediguntur; &  
quarum numero sunt, Ars medica, Agricultura, Ars subli-  
mandi, quarum rectus, & conueniens vsus, Virum inge-  
nuum nō dedecet, & propterea etiam scenseo Auctroem,  
qui artem medicam, mechanicam appellauit: Ex mathe-  
maticis longe plures artes proficiuntur; & iure merito  
profectio; illæ enim, quæ magis propriè dicuntur artes:  
mensura,



mensura, numero, ac congruente partium ratione præditæ  
 sunt; quæ omnia ex mathematicis depromuntur, adeò vò  
 non injuria Plato in Philebo, artes omnes in duplicem or-  
 dinem redegerit: Nonnullas enim ex musica, & Arith-  
 metica; alias ex Geometria, & Stereometria, ortum ducere  
 affirmavit; quæ sententia eatenus vera est, quatenus ar-  
 tes considerantur, vt præditæ mensura, & numero: Ex ma-  
 thematicis ortum ducunt Architectura, Ars naualis, Ars  
 militaris, Musica, Perspectiua, Cosmographia, & similes;  
 Artium diuinatricium nonnullæ, vt inanes, & superstitio-  
 sæ reiciendæ sunt penitus, cum neq; etiam nomine ar-  
 tium dignæ sint; Aliæ vero firmioribus nixæ principiis,  
 recteq; formata virum ingenuum decent, & vel ex mathe-  
 maticis, vel ex naturali scientia ortum ducunt. Ex ma-  
 thematicis, vt Astrologia: ex Naturali scientia, vt Phy-  
 sionomia; Pingendi autem, ac statuas conficiendi artes,  
 à nonnullis ingenuæ, ab aliis viles, & sordidæ iudicantur:  
 Veram ego censeo sententiam Aristotelis, quod sint inge-  
 nuæ, ac libero homine dignæ, & ratio est, quoniam in his  
 fulgent morum imitationes ad visum pertinentes, mores  
 nostros aliqua ratione formantes, ac insuper oportunitatem  
 nobis præbent inquirendi, & contemplandi naturæ  
 præstantiam in corporum pulchritudine, & mensura ful-  
 gentem; Afferro tamen, virum ingenuum his eatenus so-  
 lum debere operam nauare, quatenus proportionem par-  
 tium corporis cognoscat, iudicium de eis ferre valeat; re-  
 ctèq; per operum intuitum, commoueatur, nam in eis ef-  
 ficiendis nimium laborare, occupatumq; esse, seruire po-  
 tius, quàm liberale censeretur debet; quæ artes pingendi, &  
 conficiendi statuas partim ex naturali scientia, partim ex  
 mathematicis, principia recipiunt; Mercatura non inge-  
 nuæ, sed vilis, & sordida censenda est: propterea rectè Pla-  
 to præcipit nulli Magistratui licere quæstum facere. Ex  
 his

his itaq; patet, quæ disciplinæ, quo ardere, & qua ratione debeant censerī ingenuæ: Ex quibus disciplinis, illæ quæ parant, & Virum iam libertate ornatum decent, artes profectò sunt; Illæ vero, quæ Virum ingenuum formant, & constituunt, non artes, sed Philosophiæ partes censerī debent: Insuper in harum artium distributione considerandum est, quòd quemadmodum sordidarum artium, quædam magis, aliæ vero minus sordidæ, ac viles sunt, ita artium ingenuarum quædam magis, aliæ minus eo cognomine honestari merentur, quæ res aded ex se est conspicua, vt illustratione non egeat; Demum ex declaratis constat artes ingenuas, & libero homine dignas longe esse plures illis, quæ vulgo ab aliis enumerantur, & longe seculum in ordinem esse redigendas, ac fiat à multis.

Sacra Theologia est habitus demissus ab alto, est regula, & splendor cæterorum habituum, & à Sancta Romana Ecclesia piè, & rectè est explicata, cui soli Credo, constanterq; adhero, & si quid dixi quod cum ea non consentiat, est error humanæ sapientiæ superna luminæ destitutæ.

F I N I S.



195 2  
M. ANTONII TRITONII  
VTINENSIS

# MYTHOLOGIA

in qua hæc continentur.

DISPVATIO de fabula, & fabulari sermone.

FABVLOSA EXEMPLA ad virtutum & vitiorum seriem redacta, ex Ouidiana Metamorphosi breuiter selecta.

EPITOME in Ouidij Metamorph. libros, in qua singulæ fabulæ ita breuiter, & ordinatè suis in locis explicantur, ut à quouis facillè intelligi possint.

AD NOBILISS. ET ILLVSTR. VIRVM  
AEMYLIVM MALVETIVM PATRITIVM BONON.



COELO DEMIS-



SVS AB ALTO.

*Don. Anton. Triton. & Anton. Triton. fratres. Bonon.*  
BONONIÆ,

Ex Officina Alexandri Benacij, & Ioannis Rubei  
sociorum. M D L X.




AEMYLIO MALVETIO

PATRITIO BONON.

VIRO MAXIME ILLUSTRI

M. Antonius Tritonius S. P. D.



V'M DIEBUS superiori-  
bus nobilissime uir tecum  
essem multis de rebus collo-  
cutus, tuam summam hu-  
manitatem, maximam uir-  
tutem, & incredibilem pru-  
dentiam, quam antea mul-

torum, & grauissimorum uiro-  
rum testimonio cognitam  
habueram, ex tuo sermone  
facile ego met perspexi. qua  
ex re incredibilem cepi uo-  
luptatem, tum quia nihil mihi  
gratius poterat unquam ac-  
cidere, quam ut praesens tecum  
colloquendo eam cognoscerem,  
tum quia me a te non solum in  
fidem tuam receptum fuisse,  
sed etiam magnopere diligi ita  
uidi, ut ea quae oculis cernuntur,  
quare me non solum tui ob singula  
rem uirtutem studiosissimum,  
sed etiam tibi propter incredibilem  
humanitatem deuinctissimum  
esse uelim scias. De tua uero  
praestanti uirtute

cum mecum cogito, cogito autem saepe pro  
 mea summa erga te observantia, non equidem  
 miror te talem extitisse, cum in summa nobilita  
 te ex illustri familia natus sis, unde quampluri  
 mi tum peritia rei militaris & armis, tum omni  
 publicæ administrationis genere insignes viri  
 prodierunt, quos ne longior sim, in præsentia re  
 ticebo. Ad summam uero nobilitatem, & glo  
 riam tuorum maiorum, & si nihil addi posse ui  
 debatur, in tanto præsertim splendore, ac tantis  
 fortunæ bonis, quæ semper fuerunt cum maxi  
 ma illorum uirtute coniuncta, tu proprio inge  
 nio, & industria tam multa decora, & ornamen  
 ta addidisti, ut maior accedere iam cumulus uix  
 possit. Tu enim uirtutis igniculos tibi ab initio  
 a natura in animo insitos excitans omnes disci  
 plinas, quæ sunt uiro nobili dignæ, maximeq; ad  
 communem tuendam societatem necessaria, &  
 aptæ denique ad gerendas res, & immortalē  
 gloriam, quæ ex præclaris actionibus, & benefi  
 cijs in homines collatis oritur, comparandam  
 percepisti, cuiusmodi sunt recta latine, & purè  
 loquendi ratio, historia, antiquitatum, & cosmo  
 graphiæ cognitio, in quibus adeo excellis, ut ne  
 mo sit, qui aprius, grauius, & ornatiùs loquendo  
 homines in suam sententiam trahere facilius  
 possit; nemo antiquorum res gestas, leges, insti  
 tuta,

tuta,  
 nem  
 biu  
 rum  
 fuer  
 ni do  
 uer  
 quæ  
 pol  
 præ  
 pop  
 gnit  
 tis d  
 tiam  
 uale  
 quan  
 Acc  
 lem  
 beni  
 dem  
 mis  
 ut co  
 ris, a  
 te qu  
 trad  
 quist  
 illu



## AD ÆMYLI MALVETIVM.

tuta, & monumenta magis in promptu habeat; nemo denique prouinciarum, populorum, urbium, marium, fluminum, montium, locorumq; omnium nomina, situs, naturam, & consuetudines inelius cognoscat, atque ita es in omni doctrinæ genere uersatus, ut quæcunque ad uerum Dei Opt. Max. cultum, & religionem, quæ ad arcana naturæ perscrutanda, quæcunque postremo ad recte mores conformandos, ad præclare uitam instituendam, & ad ciuitates & populos gubernandos pertinent, tibi optime cognita & perspecta sint. Addo etiam militaris artis disciplinam, ut equitandi, & decertandi peritiam, quibus in rebus tantum uiribus, & ingenio uales, ut non minus fortissimus miles & dux, quam nobilissimus, & optimus ciuis dici possis. Accedit ad istam fortitudinem, atque incredibilem animi tui magnitudinem summa in omnes benignitas, hospitalitas, ac liberalitas, quæ quidem omnia non priuatis tantum uiris, sed maximis etiam Regibus, & Principibus ita nota sunt, ut eos tibi perpetuo amicitiae uinculo deuinxeris, atq; ab ijs non quidem impetraris, sed sponte quamplurima ornamenta, & priuilegia tibi tradita retuleris, quæ cæteris tuæ domus antiquissimis addita Maluetiorum familiam longe Illustriorem reddunt. Ac sanè posteri tui omnes

præter cæteras maiorū suorum imagines tuam  
 etiam habebunt, quam tibi tot familiæ orna-  
 menta accepta referentes intueantur, admiren-  
 turq; nam quemadmodum uituperandi sunt il-  
 li, qui socordia, & ignauia suorum uirtuti, ac no-  
 bilitati non paruum detrahunt, sic illi maxime lau-  
 dandi, qui eam tuentur, multo autem magis qui  
 non illam tuentur solum, sed etiam augment. Ut  
 autē redeam ad id, de quo prius agebamus, in-  
 ter alias disciplinas, quibus ingenium exercere  
 soleres tuum, multum etiam te poetica delecta-  
 tum esse, & adhuc mirum in modum delectari  
 cognoui, nec ea quidem ratione ipsam sectari,  
 qua hoc tempore maxima hominum pars uul-  
 go solet, qui tantum abest, ut poetices præstan-  
 tiam & uim intelligant, ut illa ad iocularia tan-  
 tum quædam, & leuia abutantur. Diuina profe-  
 cto res est poetica, & qua nihil utilius, nihil præ-  
 stantius sit. Sola enim efficit, ut ab incunte ætate  
 ad rectam uiuendi rationem instituiamur, sola  
 ueluti quædam excellens philosophia animos  
 nostros ab omnibus sceleribus expurgatos ad al-  
 tiora erigit, sola per imitationem humanos affe-  
 ctus ad mediocritatem redigit, in qua uirtus con-  
 sistit; sola denique tanquam pulcherrimum poli-  
 tices instrumentum nihil aliud sibi habet propo-  
 situm, quam ut probum, ac legibus obtempe-  
 rantem

ranter  
 comit  
 boni  
 fecisse  
 diu, di  
 parent  
 filios i  
 gumla  
 suas in  
 poetic  
 hercle  
 tur, sec  
 hæc po  
 eius o  
 mos a  
 ipsi le  
 sitam  
 stiuic  
 a leu  
 conie  
 rum n  
 temp  
 ret, pa  
 ro diu  
 usum  
 ex ipse  
 nostru

## AD IEMYLIA MALVETIVM.

rantem uirum efficiat, dignumq; quem in hac  
 communi hominum societate maxime omnes  
 boni admirentur. Hinc ueteres poetice tanti  
 fecisse non ignoramus, ut eos, qui ipsi essent de-  
 dicti, diuino afflatu correptos, uirtutum omnium  
 parentes, Deorum immortalium interpretes, ac  
 filios interdum appellarent. Hinc etiam olim le-  
 gumus illos, qui præclaris & optimis legibus  
 suas instituere ciuitates conabantur, liberos in  
 poetica primum erudiendos curabant, non me-  
 hercle fictæ uoluptatis, quam nostrates sequun-  
 tur, sed ueræ uirtutis gratia. Multi autem diuina  
 hæc poetices arcana minimè intelligentes, cum  
 eius omnem uim in uersibus texendis, qui ani-  
 mos audientium uel numero, & sono, uel rebus  
 ipsis leuibus, de quibus agebant, oblectarent, po-  
 sitam esse crederent, eam ad idcò tantum, & fe-  
 stiuitatem sermonis retulerunt, quæ cum postea  
 a seuerioribus legerentur uiris, non immerito  
 contemni cepit, quare nostræ, ac patrum nostro-  
 rum memoria ferè ab omnibus spreta, & con-  
 tempta iacuit, adeo ut quicumque poetas lege-  
 ret, parum grauis & seuerus iudicaretur. Tu ue-  
 rò diuersa penitus ratione cum intelligeres quò  
 usum humanæ uitæ afferret poësis, tam uberes  
 ex ipsa fructus percipisti, ut cum numeris animi  
 nostri & afficiantur, & instillantur in omnem  
 partem,

partem, tu illius suauitate ductus mores ad omnem humanitatem, & grauitatem conformaris. Atque hac ego in primis causa adductus, cum nulla alia re commodius in praesentia meam erga te fidem, & beneuolentiam testatam relinquere possem, uolui librum hunc ad te mittere; quo ueteris illius fabularis historiae cognitio continetur, quae totius antiquae poeseos, & magna ex parte morales, & naturalis philosophiae firmissimum est fundamentum. Vetus enim ante Aristotelem fuit consuetudo scientiarum arcana fabularum inuolucris contegere, quae omnia si quis ignoret, fieri non potest, ut antiquos intelligat poetas, & poemata ipse conscribat, aut graues ueterum philosophorum, Platoniorum praefertim sensus perscrutari aliquando possit, quamuis ipse etiam Aristoteles fabulosam historiam in medium nonnunquam attulerit. Sed de tota hac re postea, ubi de fabula disputabitur, copiosius agemus. Iam uero cum inter antiquos omnes Ouidius in hac fabulari cognitione tradenda diligentissimus, atque excellentissimus fuerit, cumque animaduernerem illum praeter poeticam inuentionem immutare etiam popularem sermonem in fabularem, atque ita poeticum efficere, unde exempla omnia eruantur, quae sunt probationes tum poetae, tum oratoris communes,

nes, n  
plo, q  
di op  
bulos  
in cor  
scribe  
adapt  
mo, i  
iustit  
nerib  
pular  
fabu  
sint,  
breu  
ti sur  
& di  
quan  
poet  
enin  
te er  
ruen  
atque  
Hac  
iudic  
lam l  
lis &  
gniti

nes, neque enim licet poetæ historico uti exemplo, quemadmodum neque oratori poetico; dedi operam, ut ex illius xv. Metamorph. libris fabulosa breuiter colligerem exempla, atque ita in communes quosdam locos redigerem, ut in scribendis carminibus ad omnia fere possint adaptari. nam si quando de aliquo inciderit sermo, in quo sit de auaritiæ, crudelitatis, pietatis, iustitiæ, atque aliarum uirtutum, & uitiorum generibus differendum, poterit unusquisque popularis conceptus formam in poeticum per has fabulas commutare. quæ ut facilius perspicui possint, uolui omnes Metamorph. libros soluta, & breui oratione, quo ordine ab auctore compositi sunt, exprimere singulas breuiter adnotando, & diuidendo fabulas. nec est, quod sibi quisquam persuadeat posse aliter boni, ac perfecti poetæ laudem, & gloriam comparare, neque enim in scribendis uersiculis poetarum ars, ut ante etiam dixi, consistit; sed in aptè fabula constituenda, si præsertim longa poësis contexatur, atque in humanis actionibus aptè exprimendis. Hæc uolui dixisse, non quod ea tibi ignota esse iudicarem, sed ut alij, qui nostram hanc epistolam legerint, intelligant quàm grauis, quàm utilis & necessaria sit tota hæc fabularis historię cognitio. Tu profecto Illustris uir meam hanc Mythologiam

thologiam tanquam perpetuum mei erga te amoris, & obseruantię testimonium accipias uelim. nihil enim mihi antiquius, aut iucundius accidere unquam potest, quàm ut intelligas, neminem esse, qui te magis obseruet, & qui à te amari uehementius cupiat, quàm ego. alterum quàm uerum sit, mihi ipse sum testis; alterum autem si meis uirtutibus, quas sentio quàm sint exiguæ, ac penitus nullæ, obtinere minimè poterò; in spem tamen uenio, me id tua incredibili humanitate quam facillimè consecuturum.

Atque ut ingenuè fatear, cupio hac in re paulò ambitiosior uideri; cum mea omnis ratio, et consilium eò spectet, ut tuæ inferuiam uoluntati, meamq; erga te fidem, & animi propensionem testatam apud omnes relinquam. Sentio enim quanta sit uirtus tua, atque optimè intelligo, quantopere te colere, & obseruare omnes debeant. Nec est iam ullus, qui ignoret, eam esse animi tui magnitudinem, eam morum integritatem, eam sapientiam, ut te uel etiam maximi Reges, & Principes uehementer diligant & ament. Demonstrauit id sæpius, & argumentis minimè obscuris significauit SIGISMUNDVS AVGVSTVS Poloniæ Rex præclarū uirtutis, probitatis, & iustitiæ exēplar, qui nullū erga te grati, & beneuoli animi officium prætermisit, teq;

non

non  
sua re  
gnant  
in nol  
ferri p  
ment.  
uit F  
illius  
ximar  
manit  
sente  
lum h  
ctus.  
tifaci  
lequa  
ciant  
libell  
non  
rim  
hom  
Rob  
scien  
tissim  
mea  
tati,  
tem,  
ex pa




## AD ÆMYL. MALVETIVM.

non modo libentissime ad se proficiscentem in  
sua regna excepit, sed quæcunque<sup>ab</sup> optimo, ma-  
gnanimo, potentissimo, ac liberalissimo Rege  
in nobilem, fortem, atque Illustrẽ uirum con-  
ferri poterant, ea omnia in te contulerit orna-  
menta. Id etiam superioribus annis comproba-  
uit FERDINANDVS Opt. & Max. Imp.  
illiusq; filij, ac cæteri Principes uiri, qui te ob ma-  
ximam probitatem, grauitatem, prudentiam, hu-  
manitatemq; tuam tanta sunt beneuolentia præ-  
sentem complexi, ut nullum sit ornamentum, nul-  
lum honoris genus, quo non ab illis fueris affe-  
ctus. Quare te merito Bononienses ciues tui tan-  
ti faciunt, ut omnes summa te beneuolentia pro-  
sequantur, omnes deniq; tuam uirtutem suspi-  
ciant, & admirentur. Idq; etiam fuit in causa, ut  
libellum hunc in præsentia ad te miserim, tuoq;  
nomine insignitum in publicum prodire uolue-  
rim. Ad quod sanè faciendum cùm iudicium  
hominum extimescerem, FRANCISCVS  
Robortellus Vtinensis ciuis meus uir in omni  
scientiarum genere præstâtissimus, meiq; aman-  
tissimus hortari me nunquam destitit, tum ut  
mea hac Mythologia publicæ consulerem utili-  
tati, tum ut meam præclaram erga te uolunta-  
tem, quæ mihi est cum illo communis, aliqua  
ex parte declararem. Reliquum est igitur, ut te  
orem,

AD ÆMYL. MALVETIVM.

orem, atque obsecrem, ut neminem esse putes,  
qui te magis ex animo diligit, & observet, quàm  
ego, meumq; hoc munus, quod ea saltem de cau-  
sa tibi non ingratum esse debebit, quod benivo-  
lo datur animo, ita libenter accipias, ut intelli-  
gam gratam tibi fuisse meam erga te amoris, &  
observantiae testificationem. Vale.

Bononia. Idib, Aprilis. M D L X.



do  
tina  
pue  
fo  
" mo  
" non  
" cilia  
" quon  
bul  
mul  
ciu

## M. ANTONII TRITONII

## VTINENSIS

## De Fabula, &amp; Fabulari sermone

## Disputatio.



DE FABVLA, & omni  
 fabularũ genere, quæ tũm  
 oratoribus, tũm poetis in-  
 seruiunt, dicturi ab ipsis  
 notatione, sicuti par est, in-  
 cipiemus. Fabulam à fan-  
 do dictam testatur M. Varro lib. 4. de ling. la-  
 tina. quemadmodum et græci dixerunt *πῶς δὲ τὸ φῶς*  
*πῶς εἶναι*, quod loqui significat. Fabulam autem à fal-  
 so appellatam innuere uidetur Macrobius lib. pri-  
 mo de som. Scipionis, ubi inquit; Fabulæ, quarum  
 nomen indicat falsi professionem, aut tantum con-  
 ciliandæ auribus uoluptatis, aut adhortationis  
 quoq; in bonam frugem gratia repertæ sunt. Fa-  
 bularum autem uaria sunt genera apud antiquos,  
 multisq; modis dicitur hoc nomen. Marsilius Fi-  
 cinius uir acri ingenio, summaq; doctrina prædi-

11 *flus in argumento lib. x. Platonis de Rep. inquit*  
 22 *historiam dici posse fabulam, quoties ultra res*  
 22 *gestas augustiorem habet allegoriam. quamobrè*  
 22 *Olympiodorus quoq; ait Platonem historias, &*  
 22 *rationes sæpe fabulas appellasse. sic Ficinus. Hi-*  
*storiæ autem, quæ ultra res gestas augustiorem,*  
*ut ille inquit, habent allegoriam, sunt ueluti illæ*  
*iudicio meo, quæ de Theseo, de Hercule, ac de*  
*aliis præstantissimis uiris ueteres scripserunt, quo-*  
*rum cum maxima essent, ac præclara facinora, fa-*  
*bulosis etiam figmentis augere illa conati sunt. ut*  
*quæ de descensu ad inferos, de cerbari nece, de*  
*tot, tantisq; monstris superatis ubiq; legimus. Et*  
*historiæ istæ fabulares ita erant in hominum opi-*  
*nione confirmatæ, ut ab omnibus tanquam ueræ*  
*crederentur. Hinc Isocrates in prima oratione*  
*πρὸς ἐρμῶνιον sub finem, ubi de Hercule, & Tan-*  
*talo loquitur hæc habet uerba. Ἰὼς γὰρ Ἡρακλέα, καὶ*  
 22 *ταῖνταλον χρησίμους, αἷς οἱ μὴ τοὶ λίγιστοί, καὶ πάντες πισύουσι, τὸν*  
 22 *μὲν δὲ τῶν ἀρετῶν ἀθάνατον ἐποίησε, τὸν δὲ δὲ τῶν κακίαν ταῖς*  
 22 *μεγίσταις πειρίαις ἐνόησαν. Iupiter igitur Herculis et*  
 22 *Tantali pater ut fabulæ dicunt, et credunt omnes,*  
 22 *illum quidem propter uirtutem immortalem fecit,*  
 hunc

hunc uerò propter improbitatem maximis suppliciiis affecit. perpendo illa uerba, ut fabulae dicunt, & credunt omnes; ijs enim uerum esse quod dixi facile intelligi potest. Hoc genere continentur omnes illae historiae, quae in fabulas abiierunt, quales recenset Diodorus Siculus libro primo. Dicitur praeterea fabula id, quod idem apud omnes decantatur, & in omnium ore uersatur, ut sua laudare, aliena contemnere, et huiusmodi alia, quae in omnium consuetudine uersantur. rem ita se habere demonstrat Plinius lib. xiii. cap. vi. ubi de uinis pretiosis. nec ignoro, inquit, multa praetermissa plerosque existimatu-  
 ,, de uinis pretiosis. nec ignoro, inquit, multa praeter-  
 ,, termissa plerosque existimatu-  
 ,, que placet, & quocumque eatur, fabula eadem reperitur. Hinc fabulam fieri aliquem dicimus, cum à cæteris illuditur. Horatius.

Ne uulgi fabula fiam. Sic Tibullus lib. i. eleg. iiii.

Parce puer quæso, ne turbis fabula fiam,

Cum mea ridebunt uana magisteria.

Idem lib. ii. Eleg. iiii.

Fabula nunc ille est, sed cui sua cura puella;

Fabula sit mauult, quam sine amore Deus.

Tertium genus fabularum fuit à Philosophis ex-

b 2 cogitatum,

cogitatum, quales hæ sunt, quæ metamorphosin  
uariam continent, de quibus postea copiosius age-  
mus. Iam uerò ut ad id, quod tractaturi sumus,  
propius accedamus, sciendum est, fabulam à uere-  
ribus quarto modo, & propriè appellatam fuisse  
se οὐκ ἔστιν ἡ τοῦ παραμύθου à poeta ex probabili factam  
quæ in aliqua poesi continetur, & hæc integra  
est quædam actio, quam sibi proponentes poætæ  
uarijs, & aptè rei ipsi coherentibus episodijs  
exornant. quemadmodum Homerus in Iliade, &  
odyssea, Vergilius in Æneide eleganter fecit. de  
» hac fabula sic Arist. in lib. de poetica. ἐστὶ δὲ τῶς  
», μὲν πρῶτης ὁ μὲν τοῦ μίμνου. λέγω γὰρ μὴ δεῖν τοῦτο, πλὴν οὐκ ἔστιν  
», ἡ τοῦ παραμύθου. fabula actionis est imitatio; dico  
enim fabulam constitutionem rerum. In hac duo  
sunt potissimum, quæ delectant auditores, πῶς πρί-  
πια, & ἀναγνώσεως. peripetia dicitur quoties fit muta-  
tio felicitatis in infelicitatem, uel infelicitatis in fe-  
licitatem, quorum alterum tragœdiæ, alterum co-  
mœdiæ proprium est. ἀναγνώσεως autem est agni-  
tio quædam alicuius rei in tragœdia, uel in comœ-  
dia, quam prius ignorabamus. Sed de his plura  
uide apud Arist. in lib. de poet. & in commenta-  
rijs,



rijs, quos in eum librum edidit Franciscus Robor-  
tellus. Hoc genus fabularū dramata ueteres appel-  
lare solent ἀπὸ τοῦ δράματος. Donatus quidem inter-  
pres Terentij de hoc fabularū genere sic ait; sicut  
apud græcos δράμα, sic apud latinos generaliter  
fabula dicitur, cuius species sunt tragœdia, comœ-  
dia, togata, tabernaria, prætextata, crepidata,  
attellana, μικτὸς, rhintonica. Hinc dare fabulas  
antiqui proferebant, & ut idem obseruat Dona-  
tus, facere fabulas. rectè profectò, nam poetæ  
ἀπὸ τοῦ ποιῆσαι, id est à faciendo dicti sunt. Hactenus  
unde fabula dicta sit, quot modis dicatur, et quot  
sint genera ipsius diximus. Nunc autem antequam  
cetera fabularū genera perquiramus, ac de singu-  
lis originem uniuscuiusq; inuestigantes pertrac-  
temus, uidendum est, quomodo non nulli fabulam  
definierint. Author ad Herennium lib. primo,  
& Cicero itidem lib. primo de inuentione sic eam  
definit. Fabula est, quæ neq; ueras, neq; uerisimi-  
les continet res. Aphthonius autem sub initio suo-  
rū περὶ ὑποκρίσεως sic; ἔστι δὲ μὴ βίη λόγος. Λυδὸς ἐκείνου  
ἀλάθειαν. Est autem fabula sermo falsus ueritatem  
effingens. à quo fortasse uidebitur alicui dissent-

re Cicconis definitio. ille enim fabulã esse inquit,  
 quæ neq; uera, neq; uerisimilia continet, hic autem  
 sermonem esse, falsum quidem, sed ueritatem tamen  
 effingentem. Nihil autem, si rectè consideremus,  
 differunt inter se allatæ à nobis definitiones. dum  
 enim ipsam tantum fabulam inspicimus, uerum est  
 illam neq; res ueras, neq; uerisimiles continere. iam  
 uerò dum allegoriam, idq; omne, quod sub ea uelu  
 ti quibusdam inuolueris tegitur, accurate perpen-  
 dimus, quãdam illa effingi, ac demonstrari ueritatẽ  
 facilè cernimus. Vnde Horatius quoq; uerisimilẽ  
 aliqua ex parte fabulam esse præcipit inquiring.  
 Ficta uoluptatis causa sint proxima ueris;

Nec quodcumq; uolet poscat sibi fabula credi.

- „ Et Arist. in poet. οὐδ' εἰ τὰ γινόμενα λέγειν τῶν ποιητῶν  
 „ ἔργοις ἐστίν, ἀλλὰ ὅσα καὶ γίνονται, καὶ τὰ δυνάτα ἡγεῖται εἶναι, ἢ εἰ  
 „ ἀνεγχείριον. quamuis hoc de quarto illo fabularum ge-  
 nere, quod integram actionem continet, intelligen-  
 dum sit. Macrobius autem sic inquit, In quibus-  
 „ dam enim & argumentum ex ficto locatur, & per  
 „ mendacia ipse relationis ordo contextatur; ut sunt  
 „ illæ Æsopiæ fabulæ elegantia fictionis illustres.  
 „ at in aliis argumentum quidem fundatur ueri solidi-  
 tate,

## DE FAB. DISPVT.

1<sup>a</sup> tate, sed hæc ipsa ueritas per quædam composita;  
 2<sup>a</sup> & ficta profertur, & hæc iam uocatur narratio  
 3<sup>a</sup> fabulosa, non fabula, ut cerimoniarum sacra He-  
 4<sup>a</sup> siodi, & Orphei, quæ de Deorum progenie, actu-  
 5<sup>a</sup> uic narrantur, ut mistica Pythagoreorum sensa re-  
 ferunt. Sed de his hæcenus. De fabularum ori-  
 gine uix certa ratio asserri potest, nam Aphto-  
 nius à poetis originem habuisse fabulam scribit sic  
 inquit, ὁ μὲν θεὸς ποιητὴς μὲν πρῶτον ἐστιν. Strabo autem  
 lib. primo non poetas modò, sed etiam legiulatores  
 in diuersis ciuitatibus lōgè prius fabulas effinxisse  
 testatur, necnon, quod etiam scribit Phitarchus  
 in libro de audienda poetica, ut hominum multitu-  
 dinem ad uirtutem fabulis allicerent, & ipsos insti-  
 tuerent. Quare quemadmodum illæ paulisper or-  
 ta sint, atq; à Philosophis ad poetas deuenierint,  
 opera pretium esse arbitror ut uideamus. Scien-  
 di cupiditatem omnibus hominibus insitam esse non  
 immeritò à maioribus traditum fuit, nemo est enim  
 qui cognitionis desiderio non ducatur, ac quodā-  
 modo uehemētius ad discendum semper aliquid im-  
 1<sup>a</sup> pellatur. Hinc Arist. in poet. αἴτιον δὲ καὶ τοῦτο,  
 2<sup>a</sup> inquit, ὅτι μανθάνειν οὐ μόνον τῆς ὑλοσώφους ἡδίστην, ἀλλὰ καὶ

τοῖς ἀλλοῖς ὁμοίως. Illi igitur, qui docere alios uole-  
 bant, scientes omnia, quæ ab hominibus cognosci,  
 ac percipi possunt, aut in contemplatione, aut in  
 actione consistere, quædam fabellarum excogita-  
 runt figmenta, quibus & ad agendum, & ad con-  
 templandum impelleremur. cum autem contempla-  
 tio circa diuina, & naturalia, actio circa mora-  
 lem, æconomicam, & politicam scientiam uersetur,  
 totidem et fabularum genera emanarunt, quot sunt  
 philosophiæ partes. Aliæ siquidem fabulæ ad di-  
 uina & naturalia cognoscenda nobis inseruiunt,  
 aliæ ad rectè agendum homines informant. Primi  
 illius generis exemplum esto illa Saturni, Cæli,  
 & Iunonis fabula, quam eleganter explicat Cice-  
 ro lib. ii. de nat. deorum; & aliæ quas apud Pla-  
 tonem legimus; omnes deniq; illæ, quas de Dijs  
 Stoici olim effinxere. quarum postea multi inter-  
 pretes fuerunt, & adhuc nostra ætate sunt non  
 nulli, qui si reconditam quandam fabellam theo-  
 logicè, physicèq; fuerint subtilius interpretati, se  
 magnos uiros esse arbitrantur. huiusmodi homi-  
 nes ridentur apud M. Tullium lib. ii. de nat. deo-  
 rum; ubi hæc ferme sunt uerba. Chrysippus, qui  
 Stoicorum

„ Stoicorū somniorū uaferrimus fuit interpers, ma  
 „ gnā turbā congregat ignotorum deorum, in secūdo  
 „ autem libro uult Orphei, Musæi, Hesiodi, Home  
 „ riq; testimonio fabulas accōmodare ad ea, quæ ipse  
 „ primo lib. de dijs immortalibus dixerit, ut etiā ue  
 „ terrimi poetæ, qui hæc ne suspicati quidē sunt, Stoi  
 „ ci fuisse uideantur. quem Diogenes babylonius con  
 „ secutus in eo lib. qui inscribitur de Minerva, par  
 „ tum Iouis, ortumq; uirginis ad philosophiam tradit  
 „ cens disiungit à fabula. Sed uix numerari possunt  
 „ ea, quæ de dijs à ueteribus efficta sunt, quorū alia  
 „ à Magis, alia ab ægyptijs, Africanis, atq; alijs  
 „ græcis inuenta fuisse testatur Phornutus in eo li  
 „ bello, quē de natura Deorū conscripsit. Plato, ut  
 „ dixi, multa de Dijs effinxit, unde Ammonius in  
 „ porphyriana introductione illū philosophorum ho  
 „ merum appellat: ita tamē effinxit, ut omnia diuina  
 „ quadā ratione constare uideantur. Homeri sequēs  
 „ uestigia, qui scitē admodum & eleganter multas  
 „ scripsit fabulas, ut illā de Ioue cathenis aureis Iu  
 „ nonē suspendente, nec non de Thetide, ac alijs hu  
 „ iuscemodi sexcētis. Verū apud Platonem Socra  
 „ tes lib. x. de legibus reprehendens poetæ turpia

*de Dijs fingentes, ne Homero quidem suo parcat.*  
*Qui autem de Deorum fabulis physicā rationem,*  
*reddiderint, & uocabulorum, cur quicq; ita ap-*  
*pellatum sit, causas explicarint, multos fuisse non*  
*ignoro, ut Zenonē, Cleanthen, Chrysippum, Pla-*  
*tonem, Ciceronem, Diodorum Siculum, & alios,*  
*inter quos Aratum in Phœnomenis, Macrobiū*  
*in Satur. et Palæphatum antiquum scriptorem in*  
*lib. de non credendis fabulosis narrationibus non*  
*nullis explicare certō scio. nec non Hyginum Au-*  
*gusti libertum in poeticōn astronomiōn libris, iti-*  
*dem Boccacium in lib. de Deorum genealogia.*  
*Sic igitur multa de dijs, de anima, de planetis fin-*  
*gentes illud fabularum genus inuenerunt, quæ ad*  
*res diuinas, & naturales occultandas plurimum*  
*ualent. quæ quidem arcana philosophandi ratio ab*  
*illis excogitata est, tūm ut eorum acies, qui ad con-*  
*templandum apti erant, fabulosis hisce narrationi-*  
*bus magis allicerentur, tūm ut eorum ingenia, quæ*  
*ad id minus erant idonea, huiusmodi scientiam ma-*  
*gna perterriti difficultate euitarent. Hunc ue-*  
*rō philosophandi modum Aristoteles postea ut-*  
*nimē probans, alium longē præstantiorem inue-*  
*nit,*



nit de quo multa profert Simplicius in præfatione  
 prædicamentorum, quæ ad id, de quo tractamus,  
 pertinere uidentur. illius uerba ita sese habent, quæ  
 „ latino sermone proferemus. is nusquam uoluit d  
 „ natura discedere, uerum quæcunq; naturam exce-  
 „ dunt, per habitum, & naturalem cognitionem cõ-  
 „ templatur, quemadmodum & alia ductus ratione  
 „ Plato more pythagoræo naturalia considerat qua-  
 „ tenus diuinis participant rebus, & his, quæ supra  
 „ naturam sunt. uerum neq; fabulis, neq; ænigma-  
 „ tibus, coniecturis, ac metaphoris implicitis, ut nõ  
 „ nulli ante ipsum, usus est; sed loco cuiusuis inuolu-  
 „ ti dicendi generis obscuritatem, seu breuitatem po-  
 „ tius maxime laudauit, & probauit. Hinc omnia  
 quæ protulit Aristoteles ita succincte & breui-  
 ter sunt conscripta, ut legentium, uel etiam doctio-  
 rum animi sapius defatigentur. tum sequitur Sim-  
 „ plicius. Nam antiquiores maioresq; natu, cum pi-  
 „ tarent non oportere corarijs, plebeisq; hominibus  
 „ suam proponere sapientiam, ne illam ob rerum fa-  
 „ cilitatem absq; ullo labore perciperet, alij fabulis,  
 „ alij coniecturis, non nulli metaphoris, quidam simi-  
 „ tudinibus abditam ueluti sacrarum rerum arcana

„ uelaminibus quibusdam inuoluere uoluerunt. *Ari*  
 „ *stoteles* autem obscuritatem magni semper fecit,  
 „ eaq; fortasse de causa fabulas, suspicionem, conie-  
 „ cturam comparationum, & similitudinem accusat,  
 „ quòd talia unusquisq; pro suo arbitratu diuerso mo-  
 „ do interpretari potest. Quare uidemus *Ari-*  
 „ *stotelem* in sua philosophia fabulas inserere non so-  
 „ litum esse, quòd si id fecit aliquando, summo cum in-  
 „ genio, & eleganter fecit; ut in libro de motu, ubi  
 „ *Atlantis* fabulam ad naturalem adaptat philoso-  
 „ phiam. et in *Meteor.* ubi de risu *Vestæ*. Pro-  
 „ prijs uerbis *Aristoteles*, non autem numeris, ut  
 „ *Pythagoras*, nec fabulis, ut *Plato*, philosophatus  
 „ est. ad poetas enim pertinere illas iudicauit,  
 „ qui ea, quæ à maioribus suis ficta fuerant, non mo-  
 „ dò in opinionem receperunt, sed multa etiam minus  
 „ credibilia fingere non dubitarunt. nam illi, ut  
 „ inquit *Cicero*, & ira inflammatos, & libidine fu-  
 „ rētes induxerunt *Deos*, feceruntq; ut eorum bella,  
 „ praelia, pugnas, uulnera uideremus, odia præterea,  
 „ dissidia, discordias, ortus, inieritus, querelas, lamē-  
 „ tationes, effusas in omni intemperantia libidines,  
 „ adulteria, utricula, cum humano genere concubi-  
 „ tus

tus, mortalesq; ex immortali procreatos, humana  
 scilicet omnia ad deos referentes ut idē Cicero ait  
 libro primo tusc. quæst. de inferis autem quot,  
 quātaq; Dij boni, ficta sunt apud quos tricipitem  
 illum cerberum, Stygias paludes, ultrices di-  
 tras, Charontem portitorem, Minoen, & Rhada-  
 manthum iudices, Pluronem regem, ceteraq; hu-  
 iusmodi finxerunt, quæ uel ipse poeta Horatius fa-  
 bulas appellat lib. primo od. llii.

Iam te premet nox, fabulæq; manes.

Quæ tamen omnia non sine certa, & quidem natu-  
 rali ratione inuenta fuisse credendum est. Iam ue-  
 rò hæcenus de fabulis, quæ ad eam philosophiæ  
 partem spectant, quæ in contemplatione cōsistit,  
 dictum est. si quis autem longius scire uoluerit, qui-  
 bus fabulis repugnet philosophia, & quibus ac-  
 quiescat, Macrobiū legat lib. primo de somnio  
 Scipionis sub initio, ubi hæc copiose tractantur.  
 nunc eas, quæ ad alteram philosophiæ partem at-  
 tinent, quæ posita est in actione, breuiter perpen-  
 damus. Has uel moraliter, uel politicè, uel æco-  
 nomice, totidem enim sunt eius philosophiæ partes,  
 cōsiderari posse diximus. cuius quidem generis sunt

illa potissimum, quæ *Aesopica* appellantur, elegantiæ fictionis (ut inquit Macrobius) illustres. de quibus afferam primum id, quod *Aphthonius* hoc pacto sub initio scriptum reliquit.

καλέται δὲ ὑπερσπικὴς, καὶ νίλις, καὶ κύπριος, πρὸς τοὺς ἐν ῥόν-  
 τας μιμνῆς πα' ὀνόμαϊα. νικᾷ δὲ μᾶλλον αἰσώπειος λεγόμενος,  
 τῷ τὸν αἰσώπην ἀριστα παντὶς συγγράμει τοῖς μὴ θύει. τῷ δὲ μῦθου  
 ἑμὲν ἐστὶ λυγρὸν, ἃ δὲ ἰδικόν, ἃ δὲ μικτόν, καὶ λυγρὸν μὲν, ἐν ᾧ π-  
 ποιῶν ἀνθρώπως πείσεται. ἰδικόν δὲ ἃ τῶν ἀλόγων ἢ θεῶν ἀπομυ-  
 μνήσκειν. μικτόν δὲ ἃ, ὅς ἀμφοτέρων ἀλόγων, καὶ λυγρὸν.

*Fabula*, inquit *Aphthonius*, *sybaritica*, *cilissa*, & *cypria* dicta est, mutatis pro inuentorum uarietate nominibus. obtinuit tamen, ut *aesopica* potius diceretur, cum *Aesopus* omnium optime fabulas conscripserit. Fabularum aliae sunt rationales, aliae mortales, aliae mixtae. Rationales sunt, quando fingimus hominem aliquid agentem, mortales, quæ irrationalium mores imitantur, mixtae ex utrisque rationalibus, & irrationalibus. quam nos diuisionem sequentes dicamus primum de moralibus, & mixtis fabulis; nam de rationalibus postea dicemus, cum illæ propius ad id, quod nobis propositum est, accedant. Moralem igitur fabulam intelligimus, quæ non tantum de ratione carentibus animalibus, sed etiam de plantis, de membris,

de

de corporibus deniq; omnibus scriptæ sunt. *Moralis est fabula quam ex Aesopo affert Aphtorius de formicis, & cicadis, quæ ad hominum mores aptè accommodatur. illa enim adolescentes ad labores perferendos incitantur: sic aliæ huiusmodi mulæ, e quibus aliquæ possunt accommodari non ad moralem tantum philosophiam, uerum etiam ad politicam, & ad æconomicam, & ad æconomicam & politicam simul. Fabula ranarum regem à Ioue petentium pertinet ad politicam, nam quemadmodum ranæ illæ trabe non contentæ alium postulabant regem, serpentemq; postremo nactæ sunt, qui omnes deuorauit; sic ciues illi, qui alicuius principis lenitate, benignitateq; abutuntur, in alicuius tandem deueniunt potestatem, qui meritas de illis pœnas sumat. Fabulæ uerò, quæ ad æconomicam pertinent sexcentæ sunt apud Aesopum, quas consulto prætermittimus, ne exemplorum multitudine lectores defatigentur, unum tantum proferam, quod ad moralem philosophiam politicam, & æconomicam simul potest adaptari. Nota est illa Agrippæ Menenij de membris humanis aduersus uentrem discordantibus fabula,*  
*qua*

qua plebem cum patribus in gratiam reduxit. nam  
 quemadmodum cetera membra sese habent ad uen-  
 trem, sic sensus ad rationem, subditi ad principem,  
 serui ad dominum se se habere dicuntur, patet igitur  
 quomodo fabularum hoc moralium genus ethi-  
 ce, politicè, & œconomice interpretari possimus.  
 eadem etiam ratione multæ sunt fabulæ, quæ & si  
 ex naturali philosophia depromptæ uidentur, pos-  
 sunt tamèn ad moralem etiam conuerti, ut illa apud  
 Platonem in *συμπόσιῳ* de amore, qui in Iouis hor-  
 to cœteris discumbentibus Dijs ex Penia, & Po-  
 ro affluentia deo natus fingitur. quod autem de  
 moralibus fabulis dictum est, idem etiam de mi-  
 xtis intelligi posse facile perspicimus. utq; ad  
 Aesopicas redeam fabulas, quas nostrorum qui-  
 dam non sanè recepto in usum nomine, ut inquit  
 Quintilianus, apologationes uocant, quia à græ-  
 cis, ut patet, ἀπολόγοι uocantur, sciendum est illas  
 diuidi posse in tres partes, in ipsam fabulam, id est  
 μὴ δεῖν, ἐπιμύδιον, & περμύδιον, fabula quæ, & qualis  
 sit, uidimus, περμύδιον autem appellatur, quotiescun-  
 que admonendi gratia ratio, qua fabula inuenta  
 est, præponitur, exemplum afferemus ex *Asphro*  
 nio,





Olim quod uulpes ægroto cauta leoni  
 Respondit, referam: quia me uestigia terrent  
 Omnia te aduersum spectantia, nulla retrorsum.  
 huiusmodi fabulæ ad suadendum, & hortandū plu-  
 rimum ualent, præsertim autem in populari sermo-  
 ne. sic enim Quintil. lib. v. cap. xi. Illæ quoq; fabu-  
 læ, quæ etiam si originem non ab Æsopo acce-  
 perunt (nam uidetur earum primus author Hesio-  
 dus) nomine tamen Æsopi maxime celebrantur.  
 ducere animos solent, præcipue rusticorum, &  
 imperitorum: qui & simplicius quæ ficta sunt, au-  
 diunt, & capti uoluptate facile ijs quibus delectan-  
 tur, consentiunt. sed ante Quintilianum etiam  
 Arist. lib. ii. Reb. Gellius autē lib. ii. cap. xxix.  
 de hoc fabulariū genere ita scriptū reliquit. Æsop-  
 pus ille ē Phrygia fabulator haud immerito sapiēs  
 existimatus est, cum quæ utilia monitu, suauisq; ex-  
 non seuerē, non imperiosē præcepit, & censuit, ut  
 philosophis mos est; sed festiuos, delectabilesq;  
 apologos commentus, res salubriter, ac prospicien-  
 ter animaduersas in mentes, animosq; hominum  
 cum audiendi quadam illecebra induit. Hacten-  
 us ex Aphthonij diuisione de moralibus, mixtisq;  
 fabulis

*fabulis satis diximus . nunc cætera de rationabili-*  
*bus , uti polliciti sumus , persequamur . Rationa-*  
*lem fabulam dictum est superius illam esse , qua ho-*  
*minem aliquid agentem fingimus . & quoniam ho-*  
*minum actiones aut priuatæ sunt , aut publicæ , sic*  
*fabule istæ aut polititæ , aut morales , aut æcono-*  
*micae , quia aliæ ad publicos , aliæ ad priuatos per-*  
*tinent , dici possunt . hominem autem agentem*  
*fingimus , ut Herculem descendentem ad inferos ,*  
*tot , tantaq; monstra superantem , Orpheum hyra ty-*  
*gres ac leones lenientem , Amphionem testudinis*  
*sono mouentem saxa , cæteraq; huiusmodi , quæ par-*  
*tim ex hominum opinione , partim ex historia mihi*  
*uidentur emanasse . Ex hominum opinione , quæ*  
*admodum de Hercule , quem tot facinora perfe-*  
*cisse credebant , atq; etiam in deorum numerum re-*  
*latum omnes iudicabant . Ex historia autem multa*  
*effluxerunt , quæ ita à poetis postea immutata*  
*sunt , ut licet è ueris incredibilia facta fuerint , pos-*  
*sint tamen ad ueritatem quam facillimè redigi .*  
*quis enim tam ineptus sit , qui non sentiat fieri nul-*  
*lo modo potuisse , ut Orphei hyræ concentu tygres ,*  
*leonesq; mites redditi fuerint , flumina constite-*  
d 2
rint,

rint, syluæ, altissimiq; mōtes illum sint insecuti. At  
 si quis diligenter consideret, quid aliud hanc fabu-  
 lam significare iudicabit, quam Orpheum summa  
 fuisse probitate, & eloquentia uirum, qua feros,  
 & immanes homines ad humanitatem allicere po-  
 tuit? id explicat etiā Horatius in poet. ubi inquit,  
 Syluestres homines sacer, interpretq; deorum  
 Cadibus, & uictu fædo deterruit Orpheus,  
 Dictus ob hoc lentire tigres, rapidosq; leones.  
 De centauris fabula ficta est, quod primi illi po-  
 puli equos domuerint. Nioben etiam in saxum com-  
 mutatam dicunt, quod lapideam intaginem filiorum  
 sepulchro imposuerit, quam Palæphatus lib. pri-  
 mo de fab. narrationibus se ipsum uidisse testatur.  
 apud quem quiuis legere poterit, quemadmodum hi-  
 storie multe in fabulis fuerint à poetis commuta-  
 tæ, nulla profectò de causa, nisi ut ijs homines ad  
 uirtutem uehementius impellerent, & à uitijs coer-  
 cerent. nam illos omnes, qui piè, prudenter, tempe-  
 ratè, ac fortiter uixerant, maxima consecutos præ-  
 mia finxerunt, qui autem crudeliter, temerè, im-  
 pudenter, & ociose uitam traduxerunt suam, cru-  
 delissimis illos supplicijs affectos esse tradiderunt.

Postremo

Postremò sicut quispiam, ut inquit Strabo lib.  
 primo, argenteo circumfundit aurum, sic & poeta  
 ueris contemplationibus fabulas apponit, quibus  
 eloquutionem dulcedine conciliat, & ornatu.  
 Hæc habui, quæ de omni fabularum genere Stri-  
 ctim dicerem, nunc quo in genere Ouidij fabulæ  
 constituentur, deinde qua nos adducti ratione illas  
 in quædam exemplorum capita collegerimus, bre-  
 uiter explicemus. Prius autem refellendi sunt il-  
 li, qui fabulas tanquam nullius momenti, & turpitu-  
 dinem quandam sæpius demonstrantes euitandas  
 putant. fateor enim præstantiorem illum esse phi-  
 losophandi modum, qui fuit ab Aristotele insti-  
 tutus; sed non propterea uetus fabularum Philoso-  
 phia contemnenda est. Nam (ut inquit Strabo)  
 foeminarum turba, popularibusq; hominibus phi-  
 losophicæ illæ rationes non ita facile induci in ani-  
 mum possunt, nec ad religionem, sanctitatem, fir-  
 demq; inuitari, sed numinum timore opus est, id  
 autem sine fabularum, ac miraculorum figmentis  
 esse non potest. quæ propterea ab antiquis re-  
 rum pub. institutoribus inuenta sunt, quod ijs ui-  
 debant ad civilem societatem, uitamq; humanam  
 d 3      laud

*haud multo labore posse homines incitari. quis  
 præterea non sentiat multos fabularum iucunditate  
 permoueri, cum poetas præclara uirorum fac-  
 torum fabulis inuoluta enarrantes audiunt? cum tri-  
 butos à Dijs immortalibus honores, cum picturas,  
 imagines, aut simulacra spectant, quæ fabulosam  
 quandam insignem exprimunt actionem? quis etiã  
 non à uitijs abhorreat, cum irrogata à Dijs sup-  
 plicia, minas, pauores, tormenta deniq; peruersis  
 hominibus audiat? At hæc omnia inquires, falsa  
 sunt. quid tum? considerare nos illa debemus, non  
 quòd uera sint, sed quòd tanta sit Deorum immor-  
 talium potestas, ut hæc, multoq; maiora possint ali-  
 quando accidere. quòd si nullum putas ex fabu-  
 lis emolumentum percipi posse, at ea saltem de cau-  
 sa minime spernendas arbitreris, quia nobis anti-  
 quorum opinionem et consuetudinem indicant, quæ  
 licet falsa sit, & nullo modo sequenda, dulcis ta-  
 men est, & iucunda cognitu. urgebis adhuc ue-  
 hementius inquires multa de Dijs finxisse poetas,  
 quæ nullo modo sint probanda, & non nullos ab-  
 surda scripsisse, quæ hominum mores corrumpere  
 potius, quàm sanare possint. scripsit Timonæ-  
 chus*



chus Medæ eadem, quæ peremit liberos, Theon  
 Orestis parricidium, Parrhasius simulatam Ulys-  
 sis insaniam, et Chærephanes, ut testatur Plutar-  
 in libro de audienda poetica, intemperantiam uer-  
 borum, qua mulierculæ adoriuntur maritos. Ad  
 hæc respondemus poetas aut morali, aut physica  
 ratione omnia finxisse; quæ ad Deos pertinent,  
 physice nimirum ficta sunt. cum enim de maximis  
 rebus, cuiusmodi sunt naturales & diuinæ, scriptu-  
 ri essent poetas, ne docendi & delectandi modum,  
 qui illorū est proprius, ommitterent, subterpicula  
 quædam fingendi licentiā sibi dari uoluerunt. sed  
 hæc de Dijs quæstio nihil ad nos quicquam perti-  
 net, ad ea siquidem tempora deuenimus, quibus ue-  
 ram Dei opt. max. religionem cognoscentes, non  
 modo quæ à poetis, uerum etiam quæ ab antiquo-  
 ribus philosophis theologicè dicta sunt, ridere, ac  
 spernere debemus. ita tamen ea sunt perquirenda,  
 ut antiquum poetarum scribendi modum optimè  
 calleamus, illoq; cum opus fuerit uti possimus. Tur-  
 pia uerò quæ moraliter a poetis ficta legimus, ut  
 de fœdo multorum Deorum amore, de furtis, de  
 cædibus, de rapinis, de adulterijs, ac de alijs sceler-  
 ribus

ribus morum integritati prodesse potius, quàm obesse mihi semper uisa sunt (quamuis etiam hæ fabulæ non ad moralem, sed ad physicam rationem referri potius debeant) multa siquidè à ueteribus tradita fuerunt, non ut illa sequamur, sed ut omni cura, ingenioq; euitemus. de sophisticis elenchis scripsit Arist. non mehercle ut illis uti debeamus, uerùm ut aduersus sophistas tueri nos, ac defendere possimus. Idem de uirtute tractaturus de uitio prius disserit, non alia profectò adductus ratione, quàm ut ex animis nostris maxime contraria propulsare cognoscamus. eodem modo de uenenis medicum multa tradiderunt. nã de remedijs uana esset scientia, nisi morbos ipsos cognitos prius & perspectos haberemus. sic etiam poætæ quàmplurima nobis exempla ante oculos proponunt, ut quid nobis euitandum sit perspiciamus. hinc rectè Strabo inquit lib. primo poætæ uirtutem hominis bonò cõtunctã esse, nec poetam bonum esse posse, nisi prius uir bonus existat. Valeant igitur seueri nimum isti homines, qui poetarum fabulas contemnentes quod omnibus maxime utile, ac necessariũ est tñm ad uitam rectè instituendam, tñm ad poesin conscribendam

bendam è medio tollere conantur. nonnullorũ. n. tan-  
 ta nostra ætate moralitas, et poetarum odium fuit,  
 ut optimum fabularum studiũ penitus negligi uidea-  
 tur, ac diuinũ hoc Quidij Metamorphoseon opus,  
 quod scripturis poesi in omnino necessarium est, inco-  
 gnitum, et contẽptum iaceat: cum tamẽ dicendi lepore,  
 miro poetæ artificio, iucundaq; rerum uarietate  
 ab omnibus sit uehemẽter expetẽdũ. Nihil est pro-  
 fectò à latinis dictum, quod non fuerit à græcis an-  
 tea copiosius, & grauius pertractatum. qui autẽ  
 fabulas diligenter collegerit, doctẽ, eleganter, ac  
 dispositẽ explicarit, nullus præter Ouidium fuit;  
 qui ex Orpheo, Hesiodo, Homero, cæterisq; uetu-  
 stissimis poetis tam præclarum, & admirandum  
 opus confecit, ut illo latinæ literæ nõ immeritò pos-  
 sint gloriari. Hinc illud, ne tanto bono careret  
 græcia, Maximus Planudes uir doctissimus, qui  
 Constantinopoli, antequam ciuitas illa in Turca-  
 rum deuenisset potestatem, græcas literas profi-  
 tebatur, ut suis prodesset, cum nihil tale apud ip-  
 sos extare uideret, ex latino in græcum sermonem  
 conuertit. Quod igitur exteri libenter excipiunt  
 & admirantur, id nos proprium, ac domi nostræ

natum spernemus? Cessent iam falsæ hominum  
 opiniones, tollantur errores grauißimi, in quibus  
 multi hæcenus uersati sunt, iamq; omnes  
 Ouidianas fabulas diligentius considerent, ex quibus  
 cum maximam uoluptatem, tum fructum incredibilem  
 sunt percepturi. Nam hoc Ouidij Metamorph.  
 opus illa etiam de causa maxime laudandum  
 est, quod eo modo conscriptum uidetur, quo poema il-  
 lud dictum κύκλος, à nostris circulus, confici à ueteri-  
 bus solebat. de quo mentionem facit Arist. li-  
 bro primo posteriorum ἀεὶ ἀληπτικῶν, et quale fuerit de-  
 clarat Proclus in libro περὶ χρονομαθίας. ueteres .n.  
 orsi ab antiqua illa rerum confusione gigantum, et  
 titanum originem, eorumq; bella descripserunt,  
 ac paulatim deducentes poema omnem Deorum so-  
 bolem, resq; illorum gestas usq; ad Vlyssis tempo-  
 ra persecuti sunt. huiusmodi serie uidetur imitatus  
 Ouidius in his Metamorph. libris, ut recte anno-  
 tauit Franciscus Robertellus ciuis meus in expli-  
 catione eorum, quæ ad elegiæ antiquitatem, et ar-  
 tificium spectant. Omnes autem fabulæ ab Ouidio  
 aut naturali, aut morali ratione sunt conscriptæ,  
 possuntq; uarijs modis ad scientiam, et ad recte  
 uiuendi

utiendi rationem adaptari. nos tamen id mini-  
 me perquirentes alia de causa nostra hac Mytho-  
 logia studiosis rem gratam facturos iudicauimus;  
 nam fabulosa quædam exempla ex ouidiana me-  
 tamorphosi colligentes, & in nonnulla capita redi-  
 gentes, non illis modo, qui poetica delectantur, sed  
 alijs etiam, qui grauioribus scientijs inuigilant, sum-  
 mum nos allatu-ros commodum sumus arbitrati.  
 Quis enim animalium, plantarum, rerumq; om-  
 nium naturam perquirens non maxima afficiatur  
 uoluptate, cum audiat quæ de leone, de ceruo, de  
 lupo, de bubone, de ciconia, de cygno, de mustella,  
 de accipitre, de cupressu, de lauro, deq; aliarum re-  
 rum natura fabulati sunt poetæ? quis libenter nõ  
 audiat supplicia, quæ de deorum contemptoribus,  
 perfidis, ingratis, furibus, adulteris, auariss, catè-  
 risq; peruersis hominibus fuerunt irrogata, maxi-  
 ma autem præmia, quibus religiosi, iusti, liberales,  
 magnanimi, fortes, temperati, ac liberales utri af-  
 fecti sunt? quantum autem philosophis prosint fa-  
 bulæ, nihil est, quod pluribus uerbis demonstre-  
 mus. satis enim ex ijs, quæ dicta sunt, constat fa-  
 bulam nihil aliud esse, quam ueterem quandam phi-  
 losophiam.

- Iosophiam. Sed nec illi etiam, qui eloquentiæ stu-  
 dio delectantur, debent fabulas contemnere, nam  
 ad probandum, ad suadendum, & ad auditorii ani-  
 mos demulcendos plurimum ualent, habentq; mirā  
 in se quandam uenustatem, ut illud apud M. Tul-  
 lium in or. pro Sextio, cuius supercilio Resp. tan-  
 quam Atlante cœlum niti uideretur. in qua etiā  
 oratione sub finem de Hercule fabulam attingit,  
 cuius corpore ambusto uitam eius & uirtutem im-  
 mortalitas exceperit dicitur. Itidem in or. pro Mi-  
 lone adaptat fabulam illius, qui cum patris ulciscen-  
 di causa matrem necauisset, uariatis hominum sen-  
 tentijs, non solum humana, sed etiam Deæ sapien-  
 tissimæ sententia liberatus est. cætera sunt huius-  
 modi quàm plurima, quæ apud optimos oratores  
 passim leguntur. Vnde antiqui Rhetores fabu-  
 las aliquando in oratione adhibendas statuerunt.  
 sic enim inter cæteros Hermiogenes inquit lib. ii.  
 ἡδὲ γοργόπης. ἡ ποιεῖ δὲ γλυκεραί τε καὶ ἰδενὴν ἔχουσα, μέγιστα  
 μὲν πᾶσι καὶ μνηστικαί. His autem omissis id impræ-  
 sentia affirmare ausim, neminem posse antiquorum  
 poetarum scripta intelligere, aut poetice quicquam  
 scribere, qui in fabularum cognitione non sit opti-  
 me



me uersatus. nam fabulosa oportet ut sint poemata, poetarumq; sermo uel in hoc potissimum ab oratorio differt, quod magna ex parte fabulari ratione constitutus est. Poetae siquidem pro igne Vulcanum, pro uino Bacchum, pro frugibus Cererem dicere consueuerunt, ut Horatius.

Vulcanus ardens urit officinas.

Et illud Terentij.

Sine Cerere, Et Baccho friget Venus.

nec non Vergilius, Bacchus amat colles.

sic alia fere omnia fabulose proferunt. exemplum aliud afferam ex Catullo, qui cum fratrem suum mortuum esse significare uellet, sic eleganter dixit.

Namq; mei nuper lethæo gurgite fratris

Pallidulum manans alluit unda pedem.

Quæ cum ita sint, ac tot, tantaq; commoda ex fabulis, de quibus longiori oratione disputauimus, oriantur, neminem esse arbitror, qui ad eas percipiendas alacrior, Et propensior non sit futurus, non strumq; hunc laborem, qualis qualis est, æqui boniq; consulturus. Præterea, quod maximū est, duo illa probationum genera exemplum, atq; enthymema, quæ oratorum sunt, de quibus agit Aristoteles

les libro.ii. *Rh.* ubi inquit, εἰσὶ δὲ αἱ κοινὰί πεισεῖς, δυνά τῳ γίνεσθαι, πᾶσι δειγµα, καὶ ἐνθύµηµα etiam poetæ inferuire. Exemplum autem quod analogiam cum inductione dialectica habere tradit *Arist.* duplex est, alterum quo res gestas commemoramus, utq; ille ait, εἰς λείπειν περάγµατα περὶ γεληµένων alterum uerò εἰς ἀντὶ ποιῆν. id est, quod nos fingimus, & est partim πᾶρολῆ, id est collatio; partim ἀπόλογος id est fabula. utrisq; exemplorū generibus ad probandum utitur orator, sed in primis eo, quod constat rebus gestis; poeta autem fabula tantum. Sed differt oratoria fabula à poetica, quòd illa ad *Aesopicarum* libycarumq; similitudinem (hæ enim propriè à ueteribus ἀπόλογοι uocantur) ab omnibus pro uniuscuiusq; ingenio fingi potest; hæc oportet, ut rationalis sit, utq; ab antiquioribus ficta est, sic à nobis accipienda. neque enim aut immutare ueteres fabulas, aut effingere ullam licet. Rem autem allatis exemplis ostendo. *Horatius* libro primo, od. ii. magnam esse hominum audaciam probaturus fabulosis utitur exemplis, hoc est ex fabula desumptis, non ex historia

*Audax Iapeti genus.*

*Ignem*

## DE FAB. DISPVT.

*Ignem fraude mala gentibus intulit. et*

*Expertus uacuum Dædalus æra*

*Pennis non homini datis.*

*Perrupit Acheronta Hercules labor.*

*Idem ebrietatis turpitudinem demonstrans inquit,*

*At ne quis modici transfiliat munera liberi,*

*Gentaurea monet cum lapithis rixa super mero*

*Debellata, monet sithonijs non leuis Euhys.*

*Et si uno tantum in loco animaduertimus Hora-*

*tium non fabuloso, sed historico usum exemplo. sic*

*enim ait libro. iti. ode. xxi.*

*Narratur & prisci Catonis*

*Sæpe mero caluisse uirtus.*

*Alibi autem semper utitur fabulis, quod etiam*

*apud alios poetas obserues, nam Tibullus libro*

*ii. El. iiii. omnes amori inseruire probans inquit.*

*Pauit et Admeti tauros formosus Apollo,*

*Nec cithara, in tonsæ profuerunt iæ comæ.*

*Vergilius in Buc. rusticam uitã laudans ita dixit*

*Quæ fugis ab demens? habitauit Dij quoq; syluas,*

*Dardaniusq; Paris. Pallas quas condidit arces*

*Ipsa colat. nobis placeant ante omnia syluæ.*

*Sic Ouidius in Elegia, qua Catulli mortem deflet*

*probans*

probans omnes ab importuna morte rapti, huiusmodi nititur exemplis inquit,

Quid pater Ismario, quid mater profuit Orpheo?

Carmine quid uictas obstupuisse feras? etc.

Eodem modo Propertius libro. ii. probans non esse aspernandam senectutem Tithoni, & Auroræ exemplum affert hoc pacto.

Si non Tithoni spernens Aurora cubile

Desertum coa passa iacere domo est.

Hæc qui ignorat nullo unquam modo poterit suavisimum poetarum leporè degustare. Atq; hæc, hæc, hæc, de fabulæ notatione, de singulis illius generibus, de definitione, de origine, de uniuscuiusq; fabularum generis diuisione, & usu, ac de fabuloso poetarum sermone dicta sint.

F I N I S.